



Jamoatchilik kengashi raisi:
Abdulla ORIPOV

Jamoatchilik kengashi:
Akramjon ADIZOV
Feruza MUHAMMADJONOVA
Abulqosim MAMARASULOV
Ahmad OTABOYEV
Minhojiddin MIRZO
Shuhrat SIROJIDDINOV
Ahmad USMONOV

Bosh muharrir:
Sobir O'NAR

Bosh muharrir o'rinnbosari:
Luqmon BO'RIXON

Mas'ul kotib:
Akbarali MAMASOLIYEV

Tahrir hay'ati:
Bobur ALIMOV
Iqbol MIRZO
Abduqayum YO'LDOSHEV
Abdusaid KO'CHIMOV
Sirojiddin SAYYID
Alisher NAZAR
O'rozboy ABDURAHMONOV

Sahifalovchi: Saodat RUSTAMOVA
Rassom: Dadaxon BAHODIROV

Ushbu son "Yoshlik" jurnali tahririyatining kompyuter markazida sahifalandi.

Manzilimiz:
Toshkent. sh.
O'zbekiston shohko'chasi, 16-«a» uy.
E-mail: yoshlik-xatlar@rambler.ru
Tel/faxc: (8371) 227-0-227,
245-5-793, 245-0-552

Bosishga 23. 08. 2011 yilda ruxsat berildi. Qog'oz formati 60x84 1/8. Nashriyot hisob tobog'i 8,7. Indeks 822. ISSN 0207-9137. Jurnal 2007 yil 4 mayda Matbuot va Axborot agentligi tomonidan № 0253 raqami bilan ro'yxitga olingan.

Jurnaldan ko'chirib bosilganda «Yoshlik»dan olindi» deb izohlanishi shart.
«O'qituvchi» NMU bosmaxonasida chop etildi. Buyurtma № 135/11. Adadi 3475 dona.
Toshkent shahri, Yunusobod tumani, «Yangishahar» ko'chasi, 1-uy.



© "Yoshlik" № 8 (249) 2011 y.

O'zbekiston Yozuvchilar uyushmasi,
«Kamolot» yoshlar ijtimoiy harakati muassisligidagi
yoshlarning adabiy-ijtimoiy jurnali
1982 yildan chiqa boshlagan.

MUNDARIJA

BUYUK VA MUQADDASSAN, MUSTAQIL VATAN!

Abduhamid MUXTOROV. Erkin vatanda yashamoq baxti. 2

MULOQOT

Kurshid DO'STMUHAMMAD. Ma'naviy tarsaki og'rig'i. 5

ADIB XONADONIDA

Husniddin SHARIPOV. Taqdir. 14

NAZM

G'ulom MIRZO. Shashqator nomalar. 11

O'roz HAYDAR. Yulduzlar sochilar misoli marjon. 32

NASR

Jamila ERGASHOVA. Zulfizar. Qissa. 20

BIRINCHI UCHRASHUV

Go'zal JUMANIYOZOVA. Senga yuragimda aytar so'zim bor. 49

Nargiza ABDULLAYEVA. Kichik hikoyalar. 59

Jamila BONU. Xayol daryosida suzaman sokin. 60

JAHON HIKOYACHILIGI

Robert SHEKLI. Shakl. Fantastik hikoya. 50

MUTOLAA

Bahrom RO'ZIMUHAMMAD. Kerakli bo'llish saodati. 56

TADQIQOT

Shoira DONIYOROVA. Yangi talqinlar. 61

YELPUG'UCH

Abdulla Ahmad. Ismini boshqa qo'ymoqchi. Hajviya. 63



Абдуҳамид МУХТОРОВ

ЭРКИН ВАТАНДА ЯШАМОҚ БАХТИ

...Фурсат дарёси шиддат билан оқиб ўтаялти. Уни на-да оний сонияга тўхтатмоқ, на-да суръатини сусайтиromoқ наинки бир инсон ёинки гурух, балки бутун бани башар иҳтиёрида эмас. Фурсат дарёси тиним билмай, абадул-абад оқаверади, оқаверади. Бизгача ҳам шундай бўлиб келган, биздан сўнг ҳам шундай бўлиб қолажак. Балки шу сабабдандир вақтни “Олий ҳакам” дейдилар.

Дарҳақиқат, шундай. Илло, фақат Вақтгина адодлат мезони сифатида олис-яқин кечмишга, кеча ва бугунги воқеа-ҳодисотларга ўзининг холис баҳосини беради.

Гўё ҳаммаси тушунарли, гўё ҳаммаси аён. Ҳаёт ўз темир қонуниятлари ила, тамаддун босқичларини бирма-бир ўтиб илгарилаб бораялти. Аммо айни дамда Тириклик аталмиш Мўъжизанинг воқеликда на-моён бўлишининг инсон ақлини шошириб қўядиган, юракларда ҳайрат ва ҳаяжон, эҳтиром пўртаналярини уйғотадиган яна бир ўзига хослиги бор. Бу вактнинг нисбийлигидир.

Кимё фанида оддий қонуният бор. Яъни шаклан бир хил бўлган углерод унсурларининг ўёки бу тартибда жойлашишига қараб тоҳфада оддий графит ёинки кўмир пайдо бўлади, гоҳида эса ярақлаган олмос.

Ҳамма гап – моҳиятда. Айнан шу сабабли ҳам инсон умри тақвим йиллари саноқлари билан эмас, мазмун-мағзи билан ўлчанади. Айнан шу сабабли ҳам мозий воқеликлари баҳоланганида асрлар сони миқдорини эмас, ўша воқеликларининг Инсониятга, музайян эл-юрт, миллатга нима бера олганлигини мезон сифатида оладилар.

Она Ватанимиз Ўзбекистон Истиқололга эришганига эндиғина йигирма йил бўлалайти. Оқсоқ тарих учун йигирма йил нима деган гап – киприк қоқунчалик фурсат, холос. Аммо бу йиллар ичида эришилган олам-

шумул ютуқларни, муваффақиятларни бир кўз олдингизга келтириб кўринг-а! Маънавиятимиздаги бемисл ижобий ўзгаришлар-чи!

Бармоқ букиб Мустақиллик даврида қўлга киритилган ютуқларнинг фақат айримларини санаб ўтишнинг ўзиёқ Ўзбекистон қисқа давр ичида юз, эҳтимолки юз эллик йиллик тараққиётга эришганидан шоҳидлик бериб турибди.

Мана шу эмасми Вактнинг нисбийлиги. Биз учун оддий кўринган фурсат моҳиятида қанчалар ижодкорлик, имконият ва том маънода мўъжизалар яшириниб ётганлигига Ватанимизнинг бор-йўғи йигирма йиллик Мустақиллиги даври хосилаларини кўриб-билиб туриб яна бир бор икрор бўламиз.

Албатта, эришилган улкан муваффақиятларнинг ҳаммаси кўқдан чалпақдек ёғилмади ёки уларни бирорвлар четдан келиб, бизга тайёр луқма шаклида ҳозирлаб беришмади. Асло! Бу ютуқларнинг ҳаммаси Юртбошимиз раҳнамолигига она ҳалқимиз томонидан, демак, сизу биз томондан, ҳалол меҳнат, изланувчанлик, пешона тери эвазига амалга оширилди. Биз мана шу улуғ яратувчанлик жараёнига гувоҳ бўлганимиздан, унда бевосита иштирок эттанимиздан ҳар қанча фахрлансак, ғурурлансак арзиди. Не тонгки, биз моҳиятан мағзи тўқ шиддаткор даврда яшамоқдамиз. Шунинг ўзи ҳам Инсонга ато этилган энг улуғ саодатлардан бири эканлигига шубҳамиз йўқ.

Ортиқча манманлиқдан Яратганинг ўзи асрасин, лекин ўзбек ҳалқидек меҳнаткаш, мўмин, закий, салоҳиятли ҳалқ бу дунёда бошқа топилмаса керак. Юртбошимиз ҳам бу ҳақда фахр билан шундай деган эди: “Агар мендан, дунёдаги энг содда, энг оқкўнгил миллат ким, деб сўраса, ўзбек миллати, ўзбек ҳалқи деб айтган бўлар эдим”.



Ўзбек халқи кейинги юз йилликлар мобайнида не-не кулфатларни бошидан ўтказмади, не-не истилоларга учрамади, не-не тазиқларга дучор бўлмади. Аммо бу халқ сира бошини эгмади, кишанларни парчалаб ташлади.

Инсоният тарихи урушлар тарихидир, дейишади. Бу гапда жон бор албатта. Аммо айни пайтда инсоният тарихи махфий урушларга тайёргарликлар, фитналар тарихи ҳамдир.

Маълумки, Мовароуннаҳр ўрта асрларда ички низолар, зиддиятлар гирдобида эди. Буюк соҳибқирон Амир Темур вафотидан кейин улкан салтанат парчаланиб кетди, майда ва тарқоқ давлатчалар пайдо бўлди. Натижада бир-бирига доимий адоватда бўлган Қўқон ва Хива хонлиги, Бухоро амирилги юзага келди. Бу давлатлар етакчилари халқни, унинг фаровонлигини ўйлашдан кўра, кўпроқ ўз худудларини кенгайтириш ҳақида бош қотира бошладилар. Миллий низо, уруғчилик, тала-тала авж олди. Бир миллат вакили ўзининг миллатдошига қарши болта ва ёй кўтариб борди. Натижада ҳар уччала давлат ҳам кучсизланди. Шундай бир шароитда подшоларнинг, амалдорларнинг айш-ишратга, бойлика мукласидан кетиши, йўқсилларнинг янада кафангандо бўлиши халқнинг сабр-косасини тўлдирди.

Россия империяси тўғридан-тўғри кучсизланган, тарқоқ Ўрта Осиё давлатларини босиб олиш ҳаракатига тушиб қолди. Бунинг учун эса уларни бир-бирларига қарши гиж-гижлашга, орага нифоқ уруғини сочиша тушди...

Мозайни нима учун эсга олмоқдами? Ўзбек халқи деярли бир ярим аср мобайнида мустамлакачилар зулми остида бўлди. Аввалига чоризм, кейин большевиклар.

1917 йилги Октябр тўнтаришидан кейин ҳокимият тепасига чиқсан большевиклар маккорлиқда чоризм пешволарини ҳам доғда қолдириб кетишли. Улар яхлит ва кучли салтанат бўлган Мовароуннаҳр худудида бир йўла бешта республика ташкил этдилар. “Бўлиб ташла ва ҳукмонлик қил!” сиёсати бу гал янада аниқроқ ва шафқатсизроқ тарзда намоён бўлди.

Бу ўринда собиқ Шўро давлати олиб борган қатағон сиёсати, бунинг натижасида миллатимиз фахри бўлган минг-минглаб, юз минглаб зиёлилар, адиллар, олимлар, дин пешволари жисмонан йўқ этилгани хусусида батафсил тўхталиб ўтиromoқчи эмасмиз. Аммо бу манфур сиёсатнинг бир жиҳатига алоҳида эътибор қаратиш лозим. Яъни шўролар халқнинг иродасини синдириш, руҳиятини ўлдириш учун унинг энг катта маънавий бойлиги бўлган – имон-эътиқодига, динига ҳужум қилдилар. Динсизлик мисли кўрилмаган даражада тарғиб қилинди. Диндорлар худди шу даражада таъқиб этилди. Инқилоб манфаатлари учун рус черковларининг тиллаларини кўпориб олишдан уялмаган Ленин худди шу манфаатлар йўлида иблис билан оғиз-бурун ўпишишга тайёр эканлигини билдириган. Натижада рус аэропланлари, бомбалари вайрон бўлишидан чўчиб таслим бўлган Бухоронинг вагонвагон оптинлари ҳам четга ташиб кетилган. Ислом динининг энг илғор марказларидан бирига айланган Мовароуннаҳрда масжидлар таланди, улар ташландик

ҳолга келтирилди. Масжидлардан омборлар сифатида фойдалана бошланди.

Ваҳоланки, эътиқод халқ руҳиятини, маънавиятини суюб тургувчи тиргакдир. Бундай тиргакдан жудо бўлган миллат таназзулга юз тутиши мумкин.

Юртбошимиз Ислом Каримов бу ҳақиқатни жуда теран англаган ҳолда, қўйидаги қимматли мулоҳазаларини билдириб ўтади: “Барчамизга яхши маълумки, дин азалдан инсон маънавиятининг таркибий қисми сифатида одамзотнинг юксак идеаллари, ҳақ ва ҳақиқат, инсоф ва адолат тўғрисидаги орзу-армонларини ўзида мужассам этган, уларни барқарор қоидалар шаклида мустаҳкамлаб келаётган гоя ва қарашларнинг яхлит бир тизимиdir.

Айниқса, кўп асрлар мобайнида халқимиз қалбидан чукур жой олиб, ҳаёт маъносини англаш, миллий маданиятимиз ва турмуш тарзимизни, қадриятларимиз, урф-одат ва анъаналаримизни безавол сақлашда муқаддас динимиз қудратли омил бўлиб келаётганини алоҳида таъқидлаш жоиз”.

Албатта, халқимиз сабр-тоқатли, аммо ҳар нарсанинг ҳам чегараси бор. Шўро даврида ҳам миллатни оммавий равишда манкуртлаштиришга олиб келишга уриниш ўзининг самарасини бермади. Айнан ўтган асрнинг саксонинчи йилларига келиб халқимиз онгшуурида, тафаккурида, руҳониятида улкан ижобий ўзгаришлар юз кўрсата бошлади. “Биз кимнинг авлодимиз? Ота-боболаримиз ким бўлишган? Биз аждодларга муносиб авлод бўла олдики?” сингари изтиробли саволлар нафақат зиёлиларни, балки деярли барча фуқароларнинг қалбини безовта қила бошлади.

Ахир биз кимнинг авлодимиз? Жаҳон фани, тиббиёти, санъати, ислом тараққиётига ўзларнинг мунносиб ҳиссаларини қўшган, Мухаммад Хоразмий, Аҳмад Фарғоний, Абу Наср Форобий, Абу Райхон Беруний, Абу Али ибн Сино, Закариё ар-Розий, Мирзо Улуғбек Муҳаммад Тарагай, Али Қушчи, Имом Исмоил ал-Бухорий, Термизий, Аҳмад Яссавий, Абдулхолик Фиждувоний, Баҳоуддин Нақшбанд, Аҳмад Юғнакий, Маҳмуд Кошғарий, Юсуф Хос Ҳожиб, Алишер Навоий, Заҳириддин Муҳаммад Бобур, Бобораҳим Машраб, Маҳмудхўжа Беҳбудий, Абдулла Қодирий, Абдулҳамид Чўлпон, Абдурауф Фитрат, Абдулла Авлоний каби юзлаб, минглаб даҳолар-ку бизнинг аждодлармиз.

Зеро, ўтмиши буюк халқнинг нафақат келажаги, балки бугуни ҳам буюк бўлиши керак эмасми? Мисол учун, ҳажга бориб келиш учун Москвадан руҳсат сўрасанг, руҳсат олиш ўзи машақатли иш бўлса; ён кўшнинг бўлган Арабистонга Москов орқали учсанг? Бу кичкина мисол, холос. Аммо томчидаги қўёш акс этганидай, мана шу мисолнинг ўзидаёт ўша йиллардаги туриш-турмушимиз, воқелигимиз, бир сўз билан айтганда борлиғимиз намоён бўлади.

Бунинг устига қулларча эзилиб меҳнат қилаётган, пахта яккаҳомлигидан жабр кўраётган, оғзи-бурни кимёвий дориларга тўлган халқни “Пахта иши”, “Ўзбеклар иши” деган баҳоналар билан оммавий равишда порахўрликда айблашса. Жаннатмонанд турпоқда яшаётган, ўзининг нефти, олтини, гази, турли қимматбаҳо қазилмаларига эга юрт халқини “Сен боқимандасан!” деб ҳақорат қилишса! Москвалик “десантчи терловчи”лар келиб каттадан кичик маҳаллий

раҳбарларни қамоққа тиқаверса! Маҳаллий раҳбар кадрлар ўрнини Москвадан келган на тилни, на урфодатларни биладиган мутахассислар эгалласа. Армиямиздан йигитларимиз жасади солинган тобутлар кетма-кет келаверса. Чорасизликда қолган аёллар исён рамзи ўлароқ ўзларига ўт қўйса... Табиатнинг энг улуғ неъмати бўлган она сутида оғу топилса... Ижтимоий адолатсизликлар, камбағаллик ортидан юзага келган низога энг юксак минбарлардан “бир коса кулупнай” сабабчи қилиб кўрсатилса. Икки қондош-жондош миллат орасига нифоқ солинса. Марказий матбуот ва телевидение халқнинг бошига тинмай мағзава ағдариб турса... Бу жараёнда, бу талотўпда Чингиз Айтматовдай улуғ адабнинг ўзбек халқини кўкларга кўтарган «Ўзбек халқининг тарихи жуда кўхна ва бой. Қадим ўзбек маданиятининг Марказий Осиёга кўрсатган таъсирини кўхна Византиянинг қадим Римга кўрсатган таъсири билан қиёслаш мумкин», деган ҳаққоний эътирофи эшитилмай қолса... Энг қадимий қадриятларимиздан бири бўлган Наврӯзни нишонлаш ман этилса...

Ҳа, сабр-тоқат косаси тўлган эди. Унга сўнгги томчи етишмай турган эди, холос.

Ниҳоят халқимиз асрлар мобайнида орзиқиб кутган улуғ кун етиб келди. 1991 йилнинг 31 августида муҳтарам Президентимиз Ислом Абдуғаниевич Каимов Ватанимиз мустақиллигини эълон қилди!

Кўпчиликнинг ёдида бордир, ўшанда ҳатто ноибларимиз ҳам бир лаҳза иккиланиб қолишганди. Аммо бу иккиланиш шу заҳоти йўқ бўлди ва нафақат зални, балки бутун Ўзбекистонни гулдурос қарсаклар тутиб кетди.

Ўзбекистон тарихида янги давр бошланди.

Таниқли адаблардан бирининг эл янги асрга оёғидаги лойи билан кириб келади, деган гапи бор. Биз мустақиллик даврига, мустақиллик ибтидосига ўтмишнинг оғир асоратлари билан кириб келдик. Улкан шўро салтанатида издан чиққан иқтисод, пул қадрсизланиши... Энг ёмони, одамларда нафақат эртаниги кунга, балки яшаб турган бугунги кунига ҳам ишонч йўқ эди. Ишонч йўқ жамиятда эса поракандалик юз беради.

Шўро матбуоти “Қайта қуриш сиёсати” баҳонасида одамларда яшаб турган заминига, ватанига нисбатан бефарқлик, лоқайдликни шакллантириб улгурган эди. Кўпчилик онгода “Фақат хориждагилар яхши яшаяпти, биз эса шунчаки кун кўряпмиз,” деган тушунча пайдо бўлганди.

Буларнинг барини ўзгартириш, жамиятимизга, ҳаётимизга янги ҳаво олиб кириш учун жуда катта

ислоҳотларни амалга ошириш, инсонлар тафаккурини ўзгартириш талаб қилинарди. Бу эса жуда қисқа муддатда амалга ошадиган иш эмасди. Аксинча, кунмакун, соатма-соат, дақиқама-дақиқа машаққатли изланиш олиб боришни, астойдил тер тўкиб ишлашни тақозо этарди.

Истиқтолга эришилган дастлабки кунлардан мамлакатимизда мана шундай эзгу саъй-ҳаракатлар бошланиб кетди. Қайта қуриш йилларида расм бўлган митингбозлик, популизм ўрнини ҳақиқий иш ва ижодкорлик эгаллай бошлади. Энг муҳими, ҳалқда ҳукумат олиб бораётган сиёсатга нисбатан ишонч уйғонди. Мана шунинг ўзи истиқтолнинг дастлабки йилларида эришилган энг катта ютуқлардан бири эди. Зоро, ўзаро ишонч бўлган жойдагина муваффақиятларга эришилади.

Ўзбекистон ўзига хос ва мос тараққиёт йўлини танлади. Бугунги кунга келиб ривожланишининг «ўзбек модели» бутун дунёда эътироф этилган воқеликдир.

Имоним комил, Истиқтолнинг дастлабки йилларида “Яқин фурсат ичидан Бирлашган Миллатлар Ташкилоти аъзосига айланган Ўзбекистонда автомобиллар ишлаб чиқарила бошланади”, дейилса, бу гапга ишонадиган одамлар камчиликни ташкил этарди. Бугун эса ўз кўзимиз билан кўриб турибмиз, бу борада эришилган муваффақиятлар ҳаттоки энг дадил башоратларга нисбатан ҳам улканроқ, маҳобатлироқ, кўламлироқ ва кўпроқ бўлмоқда. Асака ва Самарқандда ишлаб чиқарилган автомобиллар дунё бозорига чиққанига анча бўлди. Ёки бўлмаса, Мустақилликка эришган йилларимизда яна бирон башоратгўй киши баобру халқаро Ислом конференцияси ташкилотининг Тальлим, фан ва маданият масалалари бўйича тузилмаси – АЙСЕСКО томонидан Тошкент шаҳри 2007 йилда Ислом маданияти пойтахти деб эълон қилинади, деб қолса, биз бунга ҳам шубҳа билан қараган бўлардик. Ҳолбуки, биз ушбу шарафли воқеликнинг ҳам жонли гувоҳига, бевосита иштирокчисига айландик, бошимиз кўкка етгулик қадар фахрландик, гуурландик, шундай юртда яшаётганимиздан масрур бўлдик.

Шу юртнинг бугунига, келажагига ўзини ҳам имкон даражасида масъул санашга журъат этиб юрган фуқаро учун бундан ортиқ баҳт бўлиши мумкини, ахир.

Юртбошимиз сўзлари билан айтганда: “Шу азиз Ватан – барчамизники. Унинг баҳту саодати, ёруғ истиқболи, фаровон келажаги учун яшаш, курашиши, керак бўлса, жонини фидо қилиш шу муқаддас заминда яшаётган ҳар бир инсон учун баҳтдир”.

Ҳа, шак-шубҳасиз шундай.





МАЊНАВИЙ ТАРСАКИ ОФРИГИ



Ёзувчи Хуршид ДЎСТМУҲАММАД билан сұхбат

– Бош мұхарриримиз: “Хуршид ақа билан анъа-навий сұхбатларга ўшамайдиган, иложи бұлса баҳс уюштириб берсангиз”, деб қолди. Рози бўлдим. Шу сабабли, рухсатингиз билан гурунгни узундан-узоқ кириш сўзларисиз, ғарб журналистикасига хос бўлган “тўнтирилган пирамида” усулида, яъни асой мавзудан бошласак.

Хуршид ақа, Сиз асарларга баҳо берәётганингизда муаллифларни “ҳаваскорлар” ва “профессионаллар”га ажратасиз. Назаримда, бу ўзига хос “двойной стандарт”да адабиётнинг қанотини қайирадиган унсур бордек. Келинг, фикримни изоҳлашга уриниб кўрай.

Яхши биласиз, бундан деярли бир аср муқаддам, аниқроғи 1929 йили Абдулла Қаҳҳор бўш асарларни чоп этган бир таҳририят ижодкорларига қарат: “Инсоф қилинг, ахир “қишлоқ мұхбиримиздан келди” деб айнан босиб бўладими?” деб хитоб қилганди. Фикримча, бугунги кунга келиб мазкур жумла озгин на ислоҳ билан яна жаранглайти, яъни “қишлоқ мұхбiri” ўрнига “ҳаваскор ёзувчи”ни кўйисак кифоя. Зоро, бу талқин айрим ҳолларда қанақадир имтиёзлар берувчи индульгенция вазифасида ҳам кўпланилаётгандай (Бу ҳақда ҳали тўхталамиз).

Лев Толстой “Санъатнинг моҳияти тўғрисида” номли асарида ибратли бир ҳолатга алоҳида тўхталиб ўтади: “Бутун Европа алқаб келувчи Золя, Бурже, Гюисманс, Киплингларнинг машҳур роман ҳамда қиссаларини қунт ва ҳафсала билан ўқиб чиқдим. Айни вақтда, мутлақ нотаниш бир ёзувчининг болалар журналида босилган бир камбағал бева хонадонида пасхага тайёргарликнинг бориши тасвиранган ҳикояси ҳам кўлимга тушиб қолди. (Гап Ф. Ф. Тишенконинг “Ржаной хлебушко – калачу дедушка” ҳикояси хусусида кетмоқда. – А.Й.) Золя, Бурже, Гюисманс, Киплинг ва бошқаларнинг

роман ҳамда қиссаларини ўқиб, мен бирор сония таъсиrlанғаним йўқ... Номаълум муаллифнинг болалар ва жўжалар ҳақидаги ҳикоясини эса бошимни кўтармасдан ўқидим, чунки муаллифнинг тасвиrlанлари – эҳтимолки бошидан кечиргандари, ҳис этгандари менга дарҳол юқди-кўйди...”

Ҳар қалай, Толстой ўзини ларзага соглан асарга умумадабиёт талабларидан келиб чиқиб ёндошган, “сен ҳаваскорсан” деб муаллифнинг елкасига қоқиб қўймаган деб ўйлайман.

...Уч-тўрт йил бўлиб қолди, жizzахлик қаламкаш Сироқиддин Алиқуловнинг бир мунгли ҳикоясини ўқиб қолдим. Гарчанд бу “жонли лавҳадан рангиз кўчирма” (Пушкин) бўлса-да, сизга ҳикоя сюжетини айтиб беришга уриниб кўраман. Чекка қишлоқ. Отноаси ўлиб кетган, ичклиқбоз акаси ва бир бурда нонни бошига бир муштлаб берадиган золим янгаси уйида яшайдиган шўрлик чўпон қиз. (Достоевскийнинг Мариси эсингизга тушаяптими?) Шу бечорани ифлос бир ҳамқишлоқ йигит зўрлайди. Тез орада тўй бўлади. Тўй тугагач, ёмғир ва шамолли тунда келинчак чимилдиққа кирмайди, ўзини абгор аҳволга соглан йигитнинг олдига келади ва уни бир амаллаб ўша машъум воқеа содир бўлган жар ёнига олиб келади. Кейин йигитни маҳкам ушлаб олиб, ўзини жарга отади... Эртаси куни одамлар “Шўрлик келинчакни анави абллаҳ олиб қочиб кетибди, жардан олиб ўтаётган маҳал қулаб тушишибди”, деган хуносага келишиади. Бир эмас, икки жон ҳалок бўлди. Бу даҳшат. Аммо... аммо қиз ўзининг пок номини, шаънини сақлаб қолди-ку... Анча кунгача шу ҳикоя таъсиридан чиқолмай, ўзим умримда кўрмаган билмаган муаллиф билан ғойибона баҳсласиб юрдим. Бундай яхши маънода “даҳшатли” ҳикоя битиб қўйган қаламкашни “ҳаваскор”лар сафига кўшиб бўладими?

— Аввало, “Ёшлик” журналининг эътиборидан мамнунлигимни айтиб кўйяй. Озмунча қаламкашни тарбияламади, йўлга солмади журнал! Бу борада журнал шахсан ўзим учун ҳам ниҳоятда қадрли.

Баҳсга келсак. Одатда оддий сухбатдан кўра баҳсмунозара қизиқроқ ўқилади, чунки баҳсплашувчи томонлар ўз нұктаи назарларини ўртага ташлаш асносида ва табиий, баҳсда бўш келмаслик мақсадида, баъзан қизишиб, қарашларини кескинроқ тарзда баён этишга ҳаракат қилишади. Бироқ мен ҳеч ким билан баҳсплашиш ниятим йўқ. Хусусан, адабиёт, бадиий ижод, бадиий тафаккур мавзусидаги тортишувлар жараёнида бирор ҳақиқатта ойдинлик киритилладими-йўқми, бир нарса дейиш қийин, лекин худа-бехуда гап кўпайиши муқаррар (мисолни узоқдан изламайлик, Сиз мени баҳсга чорлаш ниятида берган мана шу саволингиздаги Абдулла Қахҳор, Лев Толстой ва Сирожиддин Алиқуловдан келтирган мисолларингиз менга унчалар ўринли тувломади, улар гапни кўпайтирмақда, холос). “Шу гапингизнинг ўзи баҳсли-ку”, дейишингиз мумкин. Шунинг учун ҳам мулоҳазамга изоҳ беришга тўғри келяпти.

Бадиий тафаккур, бадиий ижод ва умуман санъат асарига берилган ҳар қандай холис баҳо замонида ҳам субъективлик бўлмай иложи йўқ. Қизифи, бадиий ижод, биринчи навбатда бадиий дид, бадиий савия демақдир. Бунга қўшимча ўлароқ, ихтиёрийлик деган гапни ҳам унутмайлик. Тушунчасидан, дидидан қатъи назар ҳеч ким ижод қилиш ихтиёридан маҳрум этолмайди. Мен эса ҳатто баҳсли, баҳсга киришган ҳолатларда ҳам мен билан мулоқотдаги кишининг қарашларига зуғум ўтказиб қўймасликка ҳаракат қиламан. Мен мутлақ ҳақман, деган нұктаи назар адабиётда кетмайди. Бу шахсий фикрсизликка олиб келмаслиги керак албатта, шахсий қарашлар айтилмоғи керак, лекин гап мутлақлик ҳақида бормоқда. Айтмоқчиманки, ҳар кимнинг ўз ўлчови, мезонлари, тошу тарозуси бор. Мен ўз қарашларимни байроқ қилиб кўтаришдан кўра, бошқалардаги мавжуд фикр-мулоҳазаларни авайлаш муҳимроқ деб ўйлайман. Шу сабабдан менинг мулоҳазаларимни қабул қилиш-қилмасликаридан унчалик оғринмайман.

Асарларга баҳо бераётганда муаллифларни “ҳаваскорлар” ва “профессионаллар”га ажратишига келсак. Тўғри, у ёки бу чиқишиларимда мавзуга ушбу мезонлардан келиб чиқиб ёндашган бўлсан бордир. Лекин бунда адабиётнинг қанотини қайирадиган (?) “двойной стандарт” (?) топганингизни тушунмадим. Умуман, ҳар қандай соҳада, такрор бўлса, узр, айниқса бадиий ижодда профессионаллик ва ҳаваскорлик тушунчаси ниҳоятда муҳим, ғоятда нозик ва қатъий чегара-белгиларини аниқ-тиниқ белгилаш қийин бўлган масалалардан ҳисобланади. Бадиий асарнинг юқори профессионал даражада яратилганини кўрсатувчи муҳим кўрсатичлар бир талай: ғоя, мақсад, сюжет, тил, фабула, оҳанг, ҳажм, диалог, тасвир йўсуни, кульминация, яхлитлик, меъёр, мувозанат, муаллиф нұктаи назари ва иштироки, ниҳоя... Эҳтимол, бу ҳаммаси эмасdir, лекин уларнинг бари бир-бираидан аҳамиятли, бир-бираидан муҳим ва ҳатто шарт бўлган (!) талаблардир. Бадиий асарнинг бадиийлигидан, бадиий тафаккурнинг юксаклигидан, бадиий маҳоратнинг ўзига хослигидан далолат берувчи унсурлардир. Таъкидлаб кўйяй, бу сингари мезонларни кимдир ўйлаб топган ва жорий этган

эмас, балки Арасту ва Навоий замонларидан ҳозирга қадар бадиий-эстетик маҳорат мезонлари сифатида эътироф этилган – БАДИЙ ИЖОД ТАБИАТИДАН келиб чиқкан тушунчалар. Афсуски, гоҳида профессионаллар даврасида ҳам ҳаваскорлик даражасида фикрлашдан узоклаша олмасликни кўриб ранжийсан киши.

Лев Толстой қайсиидир номаълум муаллифнинг, Сиз С.Алиқуловнинг ўзингиз тасвирлаган ҳикоясидан таъсирланган бўлишингиз мумкин. Таъсирланиш мутлақо ихтиёрий ҳодиса, бинобарин, Толстой бобо ҳам, Сиз ҳам бу ўринда тўла ҳақлисизлар, лекин ҳар иккала мисолда келтирилган ҳикоя ҳам профессионал савияда яратилган эмас (ўзим ўқиб кўрмаган икки асар ҳақида бундай кескин хулоса чиқариш ноқулай, албатта.) Таъсирланиш бошқа, профессионаллик бошқа. Сезяпман, Сиз асар профессионал даражада ёзилган бўлса-ю, ўкувчига таъсири кўрсатмаса ундаи профессионалликнинг нима кераги бор дерсиз. Ундан кўра, келтирилган икки мисолдагида таъсирили асар ёзиш керак-да, деган ақидани тўғри деб ҳисобларсиз. Шу ақидангиздан келиб чиқиб С.Алиқуловнинг ҳикоясидаги келинчак образи (ҳай-ҳай, Достоевскийнинг Марисига яқин келтириш қийин-ов!) унтутилмас бадиий маҳорат тимсоли деб қарабарсиз. Бордию, шундай ўйласангиз, шундай ҳисобласангиз, янглишасиз.

Фикримга янада ойдинлик киритиш учун салгина четга чиқиб бўлса-да, шахматдан мисол келтирай. Бир партияда рақиблар ўртача ўттизтадан йўл юришди дейлик. Жаҳон миқёсидағи шахмат усталарининг деярли барча йўллари ўзларига хос мақомдаги профессионал даражадаги йўл сифатида баҳоланади, адоксиз муҳокамаларга мавзу беради. Битта-иккита учрайдиган фавқулодда хато йўллари эса ҳаваскорлик даражасидаги янглишмовчилик ҳисобланади. Ҳаваскор шахматчилар учрашивидаги ҳар икки рақибнинг ўттизтадан қилган юришларининг қарийб барчаси эса ўзларининг даражаларидан юқори кўтарилимайди. Фақат айrim ҳолатларда ғоятда ўхшатиб топилган юришгина профессионал даражадаги йўл сифатида олқишиларга сазовор бўлади, холос.

Бундан қандай хулоса чиқади: профессионал шахматчи хатосига қарамай профессионаллигича, ҳаваскор эса “даҳшатли” йўл топганига қарамай ҳаваскорлигича қолаверади. Ким қайси шахматчининг ўйинларидан завқшавқ олади, таъсирланади – буларнинг бари яна дид, яна савия, яна... алланималарга бориб тақалаверади...

– Ҳуршид ака, ўлашибимча, аввалига “Ўн саҳифасини кўрайлик-чи, ёқмаса, ўқимаймиз-қўямыз” деба “Бечора одамлар” романини кўлга олган, сўнг кўллёзмани тун бўйи зўр ҳаяжон билан ўқиб чиқкан, тонг саҳарда извошда бутун Петербургда изғиб, муаллифни қидирган муҳаррир Некрасов билан шоир Григорович баҳтли инсонлар. Чунки улар Белинскийдан “Янги Гогол туғилди!” деб суюнчи сўраб турғанлари ҳолда, аслида улуғ Достоевский даҳосини кашф этгандилар.

Шуқр, юртимизда истеъоддли ижодкорлар кўп. Аммо, шоир айтганидай, элга даҳолар керак.

Ёдингизда бордир, “Ҳуррият” газетасида сўров ўтказганингизда, XX аср ўзбек адабиётининг энг яхши асари сифатида “Ўткан кунлар” тилга олинганди. Бу нимадан далолат беради? Наҳотки кейинги етмиш ийл ичиди Абдулла Қодирий даҳосига тенг ижодкор

дунёга келмади? Ё ўзбек адабиёти “Ўткан кунлар” даражасидан юқорига кўтарила олмадими?

Кейинги йигирма йилнинг ўзида юздан ортиқ(!) роман ёзилибди. Аммо бу “ҳосил”нинг анчагина қисми адабий макулатура эканлиги Сизга яхши равшан бўлса керак.

Гап бу жанр ҳақида кетаркан, Эркин Аъзамнинг бир салмоқли фикрини эслаб ўтмоқчидим: “...роман деганларида янги бир воқелик, янги рух, мураккаб характерлар, уларнинг чигал тақдери, шулардан туғиладиган салмоқли бир фалсафа, фикрлар бўлмоғи лозим. Китобхонни у илгари нотаниш янги бир дунё, янги воқеликка бошлаб кирмоғи даркор”. Мана шу жиҳатдан қараганда, каминага ёзувчи Исажон Султоннинг “Боқий дарбадар”, Эркин Аъзамнинг “Шовқин” романлари адабиётимиздаги воқеа бўлиб кўринади. Бу асарлар жаҳон адабиётининг сара намуналари билан беллаша олади деб ўйлайман. Бундан уч-тўрт йил бурун яратилган “Жазирамадаги одамлар” (Луқмон Бўрихон) романи ҳам шундай эътирофга муносибдек.

Кичик жанрларга келсак, Назар Эшонқўлнинг “Қултой”, Улуғбек Ҳамдамнинг “Бир пиёла сув”, “Кўзини очиб юмган одам”, Исажон Султоннинг “Сувдаги коса”, Муяссар Тиловованинг “Олмазор”, Дилрабо Мингбоеванинг “Талант” ҳикоялари, менинг фикримча, биз шартли равишда “жаҳон адабиёти” деб атайдиган баланд “планка”дан бемалол ошиб ўта олади. Мен оддий ўқувчи сифатида шундай деб ўйлайман. Сиз ўзимизнинг ёзувчиларнинг бирон асарини ўқиётганингизда Некрасов билан Григорович аҳволига яқин аҳволга тушганимисиз?

– Абдуқаюм, дўстим. Мен матбуот сўзи маданияти, одоби муаммолари мавзусида озми-кўпми кузатишлар, тадқиқотлар олиб борганимдан хабардорсиз. Сиз билан кеча ё бугун танишганимиз йўқ, ҳар қалай, кўпгина қарашларимиз бир-бирига бегона ҳам эмас деб ўйлайман. Шулардан келиб чиқиб, саволингизнинг охирги қисми кўнгилга пича оғирроқ ботганини ҳам сездириб кўйай.

Адабий воқеа бўларли асар ўқиб Некрасов билан Григоровичнинг аҳволига тушиш... бундай ҳолатларда “аҳвол” сўзи кўлланилмайди, ёхуд шартли равишида қўлланилади, оғайни, чунки одам ёмон, оғир ёки аянчли аҳволга тушиши мумкин, Сиз айтган инсонлар қувончларини босолмаган, курсандчиликдан ўзларини кўярга жой тополмаган ҲОЛАТДА ёш Достоевскийнинг уйини излашга тушишган. Ўзини адабиётга, ижодга даҳлдор соғлом фикрли киши учун бунинг ҳеч бир ажабланарли ери йўқ (қолаверса, айни ўша даҳолар Достоевскийни кейинги асари учун матбуоту йигинларда “оббориб-опкелишгани”дан ҳам хабардорсиз). Бундай ҳайратланишу эътирофнинг бетакрор намунаси нуроний Лутфийнинг навқирон Навоийнинг машхур мисраси муносабати билан бўлиб ўтгани ҳам ёдингизда, албатта.

“Ўткан кунлар” ҳақиқатда улкан ва ноёб асар. Яна йигирма йилдан кейин сўровнома ташкил этилса ва бу роман яна замонавий ўзбек насрининг шоҳ намунаси сифатида тилга олинса ажабмас. Лекин бундай сўровномаларга бериладиган жавоблару эътирофларни ҳам тўғри тушунмоқ керак. Айрим ҳисобларга кўра, миллий адабиётимизда ҳозирга қадар 500 дан ортиқ роман эълон этилган бўлса, Сиз айтмоқчи, кей-

инги йигирма йил бадалида 100 та роман яратилган бўлса (бу жуда оз!), уларнинг бирортаси “Ўткан кунлар”га тенглашолмади ёки ундан заиф деган хулоса чиқармаслик керак. Умуман, масаланинг бу тарзда қўйилиши уччалик тўғри эмас. “Уруш ва тинчлик” яхши-ми ёки “Жиноят ва жазо”ми?.. “Жараён” маъқулми ёки “Бузрукнинг кузи”ми?.. “Ўткан кунлар”ми ёки “Улуғбек хазинаси”ми?.. Кулоққа ғалати эшитилмаяптими, бу тарздаги чоғиштиришлар?..

Масала бошқа томонда. Масала роман тафаккурининг ўзгарувчанлигига, бу ўзгариш тўхтовсиз давом этаётганида! “Роман” тушунчасининг идрок этиб бўлмас даражадаги сарҳад билмаслигига. Бирор-бир романни (жаҳон адабиёти дурдоналарини қўшиб айтганда) ҳар жиҳатдан бекаму кўст, яъни идеал асар дейиш жуда жуда қийинлигига! Роман шу қадар мураккаб ВОҚЕАки, тирик мавжудодки, ундан истаганча фазилат ҳам, истаганча қусур ҳам топиш мумкин. Барча унсурларига кўра мукаммал роман бўлмаса керак...

ИброҳимFaфуров, Шукур Холмирзаев, Эркин Аъзам, Мурод Муҳаммад Дўст, Хайридин Султон, Аҳмад Аъзам сингари адиларимизнинг сўзни ҳис этишдаги, ҳар қандай ҳолат тасвирини ифодалашдаги тиниқлик ва топқирик олдида ўзимни ҳамиша талабадек ҳис қиласман. Сиз номларини келтирган Назар Эшонқўл, Нуруллоҳ Муҳаммад Рауфхон, Исажон Султон, Улуғбек Ҳамдам, Саломат Вафо қаламига мансуб асарларда учрайдиган топилмаларга ҳавасим келади. Аниқ мисоллар сифатида бир қатор ҳикояларни санаб ўтишим мумкин, аммо-лекин “Этақдаги кулба” таъсирида Нуруллоҳ Муҳаммад Рауфхон, “Тун қаъридаги шуъла” таъсирида Луқмон Бўрихон, “Қисмат” таъсирида Исажон Султон, “Аёл” ва “Қўланка” ҳикоялари таъсирида Зулфия Қуролбой қизи, “Учинчи башорат” таъсирида Рисолат Ҳайдарова, “Қор элаган кун” таъсирида Ҳабибулло Ҳайдар, “Сиртлон” таъсирида Шомирза Турдимов, “Шикор” таъсирида Дурбек Кўлдошев сингари адаб ва адиларимиз тураржойларини кўлимда гулдасталар тутиб излаб боришга тайёр ҳолатга тушганимдан ва буғунги кун адабиётимизда мана шундай бадиий кашфиётлар юз берадиганидан самимий қувонганларимни ҳеч қаерда яширмайман.

– Хуршид ака, қайдадир ўқигандим, Жорж Сименон яратган 214 романида етти мингта сўз бирлигидан фойдаланган экан. Пушкинда бу миқдор йигирма мингга яқинни ташкил этган, Навоийда эса олтмиш мингдан ошган экан. Бироқ кейинги йилларда пайдар-пай яратилаётган кўплаб асарлар муаллифлари бу борада Сименонни ҳам ортда қолдириб кетишаётгандай. Ҳолбуки, адабиёт энг аввало сўз санъати.

Тасаввур қиласизми, кейинги пайтларда қўшни маҳалладан тушган келинни ҳам бемалол “келгинди” деб аташмоқда. Ваҳоланки, Абдулла Қаҳҳорнинг “Ўтмишдан эртаклар”ини ўқиган одам бу сўзнинг нақадар қаттиқ ҳақорат эканлигини жуда яхши билади. Шунга қарамай, энг оммавий санъат бўлган кинода “Келгинди куёв”, “Келгинди келин”, “Келгинди қайнона” деган фильмлар яратилди ва улар “ойнаи жаҳон”да тинмай айлантирилиб турилибди. Яқинда эса янги бир фильмнинг номи орқали баҳт ёки муҳаббат эмас, ҳаёт ҳам кечикиши мумкинлигига икror бўлдик.

Келинг, Сўзни ҳис қилиб, тежаб-тергаб, севиб-авайлаб ишлатиш борасида биттагина мисол келтириб ўтай: “Ҷо охирлаб бормоқда эди, теваракатроф сездирмасдан таназзул фаслига тайёргарлик кўрар, ялпизнинг сарғая бошлаган банди, сувнинг эндиликда тўқ зангор тусга кириши, жийда баргларининг бирма-бир тўклиши ва ниҳоят, ҳаддан ташқари тиниқ, зангори осмондан кузнинг сокин нафаси уфуриб турарди. Болакай бир зумга чумолидан нигоҳини узиб, ялпизнинг ҳам жуда қарилгини кўрди, шўрликнинг танаси йўғонлашиб-семириб, кўпдан-кўп бачки шоҳчалар чиқариб юборган ва иси ҳам аввали сингари нозик-нафис эмас, куюқ ҳамда ачқимтироқ эди. Ҳатто салом-алик ўтининг уруғи-да ўсимликнинг қариганини, шунинг учун ҳам уруғини ерга сочиб юборганини таъкидлаб турарди. Чумоли тинмай чиранаверди ва пировардида, туйқусдан сип-силлиқ орқаси ёрилди, ёриқларидан оқиш-сарғиши суюқлик отилиб чиқа бошлади, ҳавони чумоли заҳрининг ўтқир иси тутиб кетди. Шунда ҳам уруғни тортиб олмоққа тиришар эди...” Бу тиниқ тасвир табиат куйчилари бўлмиш К. Паустовский, В. Астафьев ёки ўзимизнинг Шукур акадан эмас, сұхбатимизда исми кўп тилга олинаётган И. Султоннинг бундан йигирма йил бурун чоп этилган “Муножот” қиссасидан. Бўладиган бола бошидан маълум деганлари шу бўлса керак-да.

Сизнинг ҳам олим, ҳам ёзувчи сифатида бугун яратилаётган асарлардаги тил масаласига муносабатнинг қандай эканлиги бизни қизиқтиради.

— “Келгинди” сўзини ўзингизга оғир олманг, жўра. “Ўтмишдан эртаклар”даги бу туйғу тасвири ҳам жуда майда (ўзи майда-ю, асорати оламни бузади бу касофатнинг!) тасавурлардан келиб чиқсан. Ахир тирик жон борки, ёруғ дунё учун ҳамма-ҳаммаси – келгинди-ку!.. Салгина йирикроқ бўлайлик.

Бадиий асарда тил маҳорати масаласи алоҳида муаммо. Тил маҳоратининг илдиз томирлари тафаккур тарзидан, дунёқараашдан, ижодкорлик концепциясидан бошланади. Ижодкорнинг ўйлагани нима, нияти нима, уларни қай йўсинда ифода этмоқчи, асар учун қай оҳанг ва меъёрни танламоқчи, жанр йўналишини қай тарзда белгиламоқда?.. Буларнинг барчаси пиравордида тилда ўз ифодасини топади, барчасининг “тақдири”ни тил ҳал қиласди. Бор қиласди ҳам, йўқ қиласди ҳам тил.

Сўзни хис қилишнинг ўзи улкан санъат, истеъодд, маҳорат. Бу борада ҳар ким тинимсиз ишлаши, изланиши, мактаб ўкувчиси мисол ўрганиши зарур. Афсуски, мен бу борада мураббийлик даъвоим йўқ. Бундан олдинги савол жавобида бир қатор адибларимизнинг номлари келтирилди. Тил сабогига қодир ижодкорларни адабиётимиз майдонига сафарбар этиш унутилиб қолаётгани яхши эмас.

— Абдулла Қахҳорнинг “Ёзувчи адабиётга икки хил киради: биринчи асари билан тутаб, биринчи асари билан яшнаб киради... Тутаб кирган ёзувчи узоқ тутайди, кўнглидан чиқариб эмас, қорнидан чиқариб асар ёзади...” деган ҳикматли гапини кўп эслайман.

Яқинда бир қаламкашнинг семизгина асарини каминага тақризга бериб қолишиди. “Қориндан чиқариб” ёзилган асар “танқиддан тубан” бўлиб кўринди кўзимга. Аммо мени бошқа нарса ўйлантириб қўйди.

Шу “асар”га муҳаррир машҳур фалончи ака, сўзбоши муаллифи янада машҳур пистончи ака... Мен уларга ачиндим: ахир осон бўлмагандир “қора”ни “оқ” деб ёзиш. Шу туйғу баробарида кўнгилда бир иштибоҳ, ҳам уйғондики, нима бало, бундай “ёзувчи”ларнинг истак-ҳоҳишлиарини адо этишга тайёр муҳаррирлар, тақризчилар, “оқ йўл” тиловчилар, ноширлар қатлами пайдо бўлдими ё бу воқеа аллақачон содир бўлиб улгурганими?..

Хуршид ака, Сиз кино соҳасини яхши тушунасиз. Биласизки, йилига ўн-ўн иккита фильм давлат бу-юртмасига кўра, давлат маблагига суратга олинади. Тахминан бундан тўрт баробар кўп картина эса хусусий студияларда. Рекламанинг зўри ўша картиналарда. Ваҳимали тарзда тарғиб-ташвиқ қилинган асар фильмларни бориб кўрсангиз, ҳафсалангиз пир бўлади, улар Тўйтепадан нарига ўтолмаслигининг сабаби ҳам шу бўлса керак.

Энди гурунгимиз аввалидаги мавзуга қайтсак. Кинодагига ўхшаш ҳолат адабиётда ҳам юз бермаятими? Яъни “ҳаваскор” мақомига муносиб кўрилгани боис талаб унчалик қаттиқ қўйилмаган айрим “ёзувчи” графоманлар чоп этаётган катта ададли жилд-жилд китоблар ўкувчи кўлига етиб бормоқда, кутубхоналарни эгалламоқда. Томошабин учун кинонинг қайси студия ишлаб чиқаргани аҳамиятга эга бўлмаганидай, ўкувчи учун ўқилган асар муҳим, муаллифнинг “ҳаваскор” ёки “профессиональ”лиги эмас. Энди бу “ёзувчи” китобларини қўлтиқлаб уюшмага келади, “мени аъзо қилиб олинглар, ахир шунча китобим чиқди-ку”, деб иддао қиласди.

Албатта, бошидан ўтган табиб. Шундай “классик ёзувчи”лардан бири сұхбатларидан бирида тўғридан-тўғри “Ўзбек детектив адабиётини мен билан Тоҳир Малик яратдик”, деб қолди. Яна бошқа биттаси “шедевр” асарини пул тўлаб рус тилига таржима қилдирган экан. “Шу ижодкорнинг сазаси ўлмасин”, деб уни интернет орқали Россиядаги нашриётлардан бирига юбордик. Афсуски, у ёқдан келган кескин салбий баҳо (“Разве это художественное произведение?”) боис анча пайтгача хижолат чекиб юришимга тўғри келди ва минбаъд бундай ишларга қўл урмасликка қарор қилдим: маънавий шапалоқнинг изи узоқроқ сақланиб тураркан. Мен ана шунда нима учун айрим ғарб давлатларида “бестселлер” яратувчи қаламкашлар ёзувчиларининг пен-клубларига аъзо қилинmasлигини англаб етгандай бўлдим...

Албатта, асарларнинг сарагини саракка, пучагини пучакка ажратишда танқидчиларга, таъбир жоиз бўлса синчиларга кўз тикамиз. Ахир, Умарали Норматов ёзганидек, “танқид сараламоқдир”. “Ёзувчи”лар асарларига холис муносабат Йўлдош Солижонов, Абдулла Улуғов ва Санжар Содикларнинг айрим чиқишиларида кўринаяпти.

Сўрамоқчи бўлганим, Хуршид ака, Сиз адабий бағрикенглик ва объективлик тушунчаларини ёнмаён қўя оласизми?

— “Маънавий шапалоқ” деган таърифингиз ёқди! Ёндафтаримга ёзиз ҳам қўйдим... “Маънавий тарсаки” деса ҳам бўллади... Бундай шапалоқ ва тарсакига лойик ижодкорлар бадиий ижоднинг қайси соҳасида

Йўқ дейсиз?! Биронтасини истисно қила оламизми? Йўқ. Демак, бу субъектив реаллик эмас, яъни кимнингдир хоҳиш-иродаси маҳсули эмас, балки объектив реаллик, яъни сизу бизнинг имконимиздан, истакларимиздан хорижда кечётган жараён. Фақат бизнинг воқелигимиз учун нисбатан янгилик бўлгани сабабли унга бўлган муносабатларни аниқлаштириб олишга пича қўйналаётгандекмиз.

Аслида-чи? Аслида ҳар қандай адабий жараён бамисоли тўлдириб таом пиширилаётган дошқозон. Фақат қозондан фарқли ўлароқ адабий жараённинг бағри ниҳоятда кенг, кенг дунёдан-да кенг! Унинг эгаси ҳам, посбони ҳам, тош-тарозиси ҳам битта – вакт! Ҳеч кимга қўлига таёқ қўтариб бирорни қувиб солиш ҳукуки берилмаган. Бадиий ҳақиқат эгаллаган мақомнинг манзили, “тураржой” шу қадар юксаклиқдаки, унинг учун ижодкорнинг истеъодлиси-ю истеъоддисизи бамисоли тароқнинг тишидек тенг. Бу мақом соҳиби, яъни бадиийлик илоҳаси кимнинг нималарга қодирлигини, ким нимада илғор-у, кимнинг заифликлари нимада – ҳаммасини кўриб-билиб туради. Фақат сукут сақлайди, сақлайсақлай ҳукм ҳукуқини вақт ихтиёрига беради.

Бу билан мен адабиёт майдонини қаровсиз ташлаб қўйиш керак деган фикрдан мутлақо йирокман. Биринчи навбатда, кенг омма ўртасида мутолаа маданиятини тарбиялаш ва шакллантириш зарур. Сиз айтиётган гравоман маҳсулотлар, фильмлар, қўшиқлар, мусиқалар бир кунлик лолақизғандоқдек урчиб кетаётганига ким бош сабабчи? Омма! Бизда оммага тил теккизмаслик одати шаклланган. Бу билан ўзимизнинг инсонпарварлигимизни кўз-кўз қилгандек бўламиз. Ваҳоланки, ҳақиқатда инсонпарварлик даъвоимиз чин бўлса, ўша омманинг тили, тил маданияти, саводи хусусида қайғурailик. Ўзини улуғлаган бўлиб, тилини оёқости қилиб қўймайлик. “Оммавий маданият” тушунчасига қарши курашни ҳам, “оломон маданияти” тушунчасига қарши курашни ҳам мана шу ҳақиқатни тан олган ҳолда бошламоқ керак. Бошқа иложи йўқ. Тасаввур қилинг, агар бу борада бир хисса олдинга ҳаракат бошланса, Сиз қайғуриб айтиётган “асар”ларнинг камайиши ўн ва юз ҳисса тезлашади. Кенг китобхонлар (санъатсеварлар) оммасининг қудратли кучи нималарга қодирлиги ана ўшанда кўринади: ижодкорнинг савияси (профессионаллиги!) қўтарилади, нафақат адабиётнинг, унга кўшилиб, умуммиллий бадиий дид шаклнади.

– Шубҳасиз, ижод жуда мураккаб жараён. Яна Абдулла Қаҳҳордан иқтибос оладиган бўлсак: “Адабиёт кўнгил иши, илҳом самараси. Туйғусиз, илҳомсиз ёзилган асар чангланмаган гулга ўхшайди – мева тугмайди. Кўнгил рози бўлган асарги на китобхоннинг кўнглига

йўл топади, китобхоннинг кўнглида мева тугади”. Инчунун, асарга муносабат билдириш ҳам маълум кўнишка, илм ва истеъоддод талаб қилиши муқаррар. Хуршид ака, бирон асарга аввалига ўзингизнинг баҳойингизни берганингиз ҳолда, кейин фикрингизни ўзгартирганимисиз?

– Бир сухбат асносида бир ижодкорга тўрт-беш марталаб мурожаат этиш (ҳатто Абдулла Қаҳҳор бўлса ҳам!) жудаям таҳсинга сазовор ҳисобланмайди. Начора, саволга тутувчи – Сиз, биз – жавоб берувчи, холос. Асарга муносабат – жиддий масала. Муаммо! Герменевтика дейилади фанда. Асарни талқин этиш илми. Шу мавзуда ўзбек мутахассислари ҳам бош қотиришмоқда. Домла Абдуғафур Расулов, тадқиқотчи олим Автондил Эркинов ва ҳоказо. Лекин ҳали бу борада қилинадиган ишлар ниҳоятда кўп, қалашиб ётибди. Жаҳон адабиётнинг бетакрор дурдоналарини дурустроқ ҳазм қилишга тишимиз ўтмайди-да (мабодо ўқишига тоқатимиз етса, албатта), “Пуф, сассик!” деб ўзимизнинг оёғимиз остида ўралашганимиз-ўралашган. Дарвоҷе, “Ёшлиқ” журнали мана шундай вазифаларни зиммасига олиши керак эмасми? Журналнинг ҳар сонида “Талқин”, “Асарни тушуниш илми” сингари рукнлар остида чиқишлиар уюштирилса, ёш китобхонларга ҳам, ёш ижодкорларга ҳам амалий, ҳам назарий таҳсил мактаби, тўгараги пайдо бўларди...

Бир воқеани мухтасаргина қилиб айтай. Кўп йиллар бўлди, қайсиdir вилоятдан поездда Тошкентта қайтиб келяпман. Ёз чилласи, жазира ма. Вагон тўла, жой йўқ. Амаллаб купенинг учинчи қаватига жойлашдим (аслида у ерга жомадонлар жойланади). Қарийб яланоч ҳолда лоҳас бўлгудай чалқанча ётибман. Шифтга урилиб қайтаётган нафасимнинг “тафти”га чидаб бўлмайди.



Бу етмагандай, вагон радиоси “хр-хр-р”лаб, вайсашдан тинмайди. Кўзим илинибди. Бир маҳал қулогимга куй-кўшиқ чалинди. Беихтиёр тинглай бошладим. Қулогимни янаям динг қилдим, дикқатимни жамладим. Қаердандир майнин ва саррин насим эсгандек, у менинг бетларимни авайлабгина сийпалаётгандай, эркалаётгандай, алла-лаётгандай... Ҳамон елиб бораётган вагон энди қўшиқ оҳангига маст бўлиб силкинаётгандек. Қани энди поезд юришдан тўхтамаса, шу маромда силкина-силкина кетаверса-кетаверса, қўшиқ ҳам узилмаса, майли, радио қитирлайверса ҳам розиман, қўшиқ тўхтамаса бас... Афсус, қўшиқ жуда тез тугади ва “Сиз фалончи шоирнинг шеърлари асосида яратилган қўшиклардан баҳраманд бўлдингиз” деган сўзлар билан дастур ниҳоясига етди. Бояги ҳолатда ётибману, аъзои баданимга муз юргурди ден! Худди фавкулодда оғир гуноҳ ишга қўл урдиму, бутун бир майдон тўла издиҳом олдида шарманда бўлаётгандек!.. Нега, дейми?.. Қўшиқ сўзларининг муаллифи ўзим мутлақо ўқимайдиган, кечирасизу, ёзганлари ўқишига арзимайди, деб ҳисоблайдиган шоир акалардан бириники экан! Тушуняпсизми, Абдуқаюм, ўша пайтгача ўша шоирга бўлган муносабатим – беписандлигим учун бировларнинг олдида эмас, ўзимнинг олдимда шарманда бўлдим. Маънавий тарсаки ёмон мулзам қилди ўшанда!..

Айтмоқчиманки, бадиий асар ҳолатга, кайфиятга қараб таъсир ўтказади. Бир ўқишида маъқул кўринган фазилати, эртасига бутқул зид таассурот уйғотади. Тўғри, ҳар қандай ҳолатда ҳам бирдек таъсир қиласидиган асарлар ҳам оз эмас.

Мен ҳар қандай одамни аввало қўлига қалам тутгани учун – умуман сеҳру жозибалар макони бўлмиш ижод дунёсига киришга ҳаракат қилгани учун хурмат қиласман. Ана шу интилиш-истакни олқишлишга асос бўларли фазилат излайман, насрой асаридан битта жумла ёки тасвир топсанм ҳам кўз-кўз қилиб мақтаман, ижодни давом эттириши учун рағбат бераман. Ва кейинги асарларини кузатаман: яхши томонга ўзгара бошлаганлигига, ижод машақатини зиммасига олган-олмаганлигига эътибор қаратаман, у ёғи... кўпкари олишувида ҳеч ким ҳеч кимнинг қўлидан етаклаб юрмайди, яъни у ёғига, валлохи олам, ижодкор вақт синовлари измига ўтади...

– Мен бир мухлис сифатида кўп йиллар мобайнида Сизнинг мақолаларингизни йигиб юраман. (Балки ёдингизда бордир, дастлабки танишувимиз ҳам сизнинг публицистик чиқишиларингизни мақтаб, “Нигоҳ” номли қиссангизни танқид қилиб йўллаган мактубимдан кейин кечганди). Мени анчадан бери бир савол ўйлантириб келади. 1987 йилнинг 11 июня ида “Ёш ленинчи” газетасида эълон қилинган мақолангизда шундай сатрлар бор: “...Сомерсет Моэмнинг машҳур қаҳрамони Стрикленд “Ишқ-муҳаббатга зор эмас-

ман. Ундан ишларга сарфлайдиган фурсатим йўқ”, деб бутун вужуди билан дунёни англашга шўнгиди. Назаримда, шунга яқин нуқтаи назар “Куза” қиссангиздан ҳам мўралаб тургандек. Биз Достоевскийга эргашиб “Дунёни гўзаллик қутқаради”, деб тақрорлаймиз. Гўзалликни эса муҳаббат яратади. Шундай экан, ишқ-муҳаббатсиз ҳам дунёни англа бўладими? Бу оламни, одамни адабиётсиз, санъатсиз ҳам англаб бўлади дегани эмасми?

– Чорак аср бўлди чоғи, “Ёшлик” журналида “Нигоҳ” номли қиссанг эълон қилинганида менга хат йўллаган эдингиз. Уни “Хира нигоҳ” деб номлагансиз. Жуда хурсанд бўлганман. Ҳафса ва эътибор билан, самимий куюнчаклик билан муносабатда бўлганингиздан бошим осмонга етган. Бу ҳақда Сизга кўп мартараб айтганиман, фақат қиссанинг туб моҳиятини тушунмаганингиз ҳақида индамагандим. Чунки, аввало у кезлар бирмунча ёш эдингиз, қолаверса, ўқиш-уқиш, бу юқорида айтганимиз – герменевтика. Бирорнинг бошига нуқиб асарни уқдириш қишин, қолаверса, ниятимни, ўзим кўзда тутган моҳиятни ўқувчи уқадиган қилиб ёзолмаган эканман, айб ўзимда. Афсус, феълим-табиатимга илғаш мушкулроқ йўсинда ёзиш йўсини раво кўрилган экан, биласиз, уни (услубни) ўзгартириш учун қайта туғилмоқдан ўзга чора йўқ...

Гўзалликнинг, ишқ-муҳаббатнинг сеҳрига ета олиш, уни тугал тасвирлай билиш бандасига ҳеч қаҷон насиб этмайди. Сомерсет Моэмнинг машҳур қаҳрамони қай муносабат билан ва қай ҳолатда у гапни айтгани ёдимда йўқ, лекин инсонни жамики мавжудотлардан ажратиб турувчи туйғу ҳам – муҳаббат. Ҳар бир кишининг инсонийлиги унинг бажараётган ишига муҳаббат билан ёндашувидан келиб чиқиб белгиланади. Дунёни англаш ҳам муҳаббатдан, ҳайратдан, ҳавасдан куч олади. Адабиёт ва санъатнинг илоҳий куч-кудрати ҳам шунда!

– “Ёшлик” журнали учун вақт ажратиб, самимий сұхбат курганингиз учун Сизга ташаккур. Мен Сизнинг фикрларингизни ҳурмат қиласман. Сиздай куйинчак ижодкорларнинг холис муносабати адабиётимизнинг ҳам бугуни, ҳам эртанги куни учун хизмат қиласиди деган умиддаман.

– Мен ҳам, Абдуқаюм, Сизнинг тиниб-тинчимай ижод қилишингизга, киришган ишингизни ниҳоясига етказмагунча ҳаловатни унутишингизга ва албатта бу уринишларингиз самарасиз кетмаслигига ҳавасим келади. Сұхбатимиз вақт синовларига дош бериб, адабиётимизнинг бугуни ва эртаси учун хизмат қилишига яраса, бунинг учун ҳам мана шундай тўкилиб мулоҳазалар билдириш имконини берган “Ёшлик” журнали таҳририятига ва Сизга ташаккур!

Абдуқаюм ЙЎЛДОШЕВ сұхбатлашди



Гулом МИРЗО

Шашқатпор номалар

Туркум



Дунёни рақамлар бошқармайди.

Гёте

*** ҳаловат**

*Ҳар тонг
ўн икки соатни
ўн икки сўм каби
ҳамёнимга солиб жўнайман
кечқурунга беш-олти соатлик
ҳаловатли уйқу олиб қайтгани.*

*** кексалик эшигидаги ёзув**

*Ёшликнинг
хатолари билан
кирмоқ эрур манъ.
Бунда ҳам
нуқсон кўп
сенга аталган...*

*

*Аслида
аслият ҳам – таржима.
Қалб,
Тафаккур,
Рұх
таржимаси.*

*

*Бир оёқли
симёғоч
уч оёқда туриб*

уни хўрлаётган

*дайди итга
боқди ачиниб...*

*** очун**

*Техника
одамнинг ўрнини
эгалламоқда
одамийлик ўрни эса
бўши қолмоқда
кўпинча...*

*** истиқбол**

*Биологик тарздан
электрон шаклга
ўтар бўлса башир ҳаёти –
шеър битарми, қизиқ,
электромагнит қалбли
бирон авлодим?..*

*

*Гугуртчўпдай
бошимда
балолар бўлдики жам,
жсаҳонимни ўт олгай
дунёга
тегиб кетсам.*

*** ҳикмат**

*Дунё дўқонидан
кераксиз молни
олавердим урҳо-ур.
Энди мағрут бисотимни ҳам
сотиб юбормоқча
мен мажбур...*

*** етакчилик юки**

*Турналар олисга учган чоз
юртлардан юртларга кўчган чоз
солишиади кўкда аргимчоқ –
куч-қувватин тежарлар шундоқ.
Аммо, энг кўп қанот қоқармиши
Парвоз пайти тўдабоши қуши.*

*

*Бугун
одам –
одам эмас,
одам – атом
(бўлинмас ва
бўлишимас ўзгаларга).*

*** тилак**

*сўзга чиққанингда – забон
овга чиққанингда – камон
йўлга чиққанингда – карвон
элга чиққанингда – имон*

панд бермасин
ҳеч қачон!

*

Ёр.

Ёт.

Ёв.

Биргина товуши билан
яқин ёки
йироқмиз дарров.

* тақдир

Бошида айланган
қанча-қанча
тегирмон тошлари
ун бўлиб кетганига
ҳали-ҳамон ҳайрон
шу увоқ бир дон.

* маникен

Муҳташам дўқондаги
зарҳал ойна ортидан
ӯшишайган бу тўримга
жон ҳам ато этилса –
“томошақовоқ” лигидан
бўларди-да хўб изза.

* арз

Вужуд билан олишидим қирқ
йил:
Ичса хароб қиласидиганни
ичирдим,
Еса азоб берадиганни едирдим.
Бу ёғига тан чиқди этчили:
Ичиши мумкин бўлмаганни
ичиргай,
Ейиши мумкин бўлмаганни
едиргай.

* туюқ

Кўнгилга
айрилиқ дозги
доз солар дозги ва дозги
қачон
висол аввали-ю
бу ҳажсринг адоги?

* баҳснинг давоми

Баҳсимииздан
тұғылған
ҳақиқатнинг
отаси
сенми
ё мен?..

*

Рафиқам
тахтайди сандиққа
устма-уст
ёзги кийимлару
иссиқ күнлар
ҳаловатини.

* Махмуд Кошғарий

Номусинг камзулуга
тил билан қадалған
туҳмат тұғмачасин
тишилаб
еочолмайсан,
узолмайсан ҳам...

* жаҳолат

“БИЗ – ТҮФРИМИЗ!”, деб
Том баравар шиор ёздилар
лекин
муаллифлардан бири
“Т” ҳарфини
ўмариб кетди секин.

* риёкорлик

Қайчи
огушини
қанча
кенг очар –
демак кесмоқлиги
шунча муқаррар.

* луқмай ҳалол

Йўлакдаги ҳакка
чўчимади-учмади,
аксинча, таънали тикилди
тикка.

Унинг чала чақилған
ёнгоқларин
шу йўлакдан олгандим териб
тигирма йилча бурун...

* шафоат

Бир куни саҳарда
соҳилга келиб
ҳасад, гина, аразларни
оқизиб юбордим
шафоат қайигига солиб
ва ортимга қайтдим баҳтиёр,
голиб.

* эшик қўнгироги

Бу чолгуда
ҳамма
фақат
битта куйни
чалгани –
чалган.

* нафосат

Гўё сув сатҳига
оёқ қўйғандек
бир оҳиста қадам босар ул.
Назаримда ҳозир, шу лаҳза –
туфлисин учидан
ҳалқа-ҳалқа ёйлади йўл.

*

Ёмғир тугар
Ёғду ҳам тарқ этар фалакни
табиат
рангларга бўлаклаб, тугар
ва асраб қўяр камалакни
кейинги галга.

* таъсир

Манзилингни сўрар эдим
илкимда қўлтелефон –
ўртамизга тушибди қулаб
манзилидан чалгиган
ари шўрлик
ногаҳон.



*

*Самодаги
Юлдузларнинг
олис ҳароратидан эмас,
сунъий йўлдошларнинг
яқин назоратидан
баъзан қисади нафас...*

*

*Рақамлар асрида
рақамли техника
сехридан сармаст
“рақам”лашавериб
сўзлашишини
унутмасак бас...*

* фарҳ

*Самарқанд. Юлдузли оқиом.
Самода янги (эски) ой.
Навоий, Улугбек ё Темур бобом
қачондир шу ойга боқсан
ҳойнаҳой
мен турган манзилдан
мендек маҳлиё.*

*

*Умр борҳо кам қолиптур.
Умр – чиндан ҳам қолиптур.
Ўзни сиддирмоқ-чун қолипга
Бошдан бошладик, охир –
Қолиптур оёқлар сизмай,
Бош ҳам қолиптур!..*

* соғинч

*Ҳали
қиши ҳам
бошланмай туриб
кўргим келди яна баҳорни
уч ойга патталар
олдим олдиндан.*

* имконсизлик

*Ҳар бир дақиқа –
оттмишта мих қоқилган
эшик.
Қайта очай десанг
қанча эшикларинг
яна берк...*

* таъриф

*Палакка очилган
сув билан
сероб
семизўтдек
орсиз, текинхўр
жаноб...*

*

*Куядори ҳиди...
гижимлик...
униқиши...
эски пальтомга ҳам
малол келди
қии.*

*

*Қанча давом этар
билим
севги деган
янги туши
рангли туши
оҳанги туши!..*

* шубҳа

*Хотира
наинки одамда,
компьютерда ҳам бор.
Лекин қалбни
микроочига кўчириши –
эҳ-ҳеј, душвор иши...*

*

*Истайман
истакларимни.
Лек
истаклар
истаса –
нетай...*

* тарбия

*Бандадан
нажот кутар
дилбанди.
Афсуски
банда – банд
банда – банди.*

* газетада хато кетган рақамлар

*Сиз – ошкора пинҳоним
ва қийналган виждоним
очиқ қолган товоним
гумониму пушмоним
ёмонлардан ёмоним
душманим...*

*

*Хотира диктофони –
энг даҳшатли қурол.
неча кунки
хато кетган сўзларимни
такрорлаб
пушаймондан ўлдирди мени.*

*

*Паришон
қуши мисол
ҳар нафасимни
қалбни
совутмоққа
сарфлайман (увол)...*





Хусниддин ШАРИПОВ

Очиғи, севимли журналиминг ташрифи мени бироз шошилтириб қўйди. Ўзим ҳақда гапиришга анча қийналдим. Лекин кўнглимда ўқувчиларга айтар гапим кўп. Фурсатдан фойдаланиб ҳаётимда, ижодимда катта аҳамият касб этган баъзи бир ибратли воқеаларни эслаб ўтишини истадим.

Муаллиф

ТАҚДИР

Доно инсоннинг бир оғиз сўзи ўша сўзга муҳтоҷ бўлиб турган, лекин бундан ўзи ҳам бехабар бошқа бир кишининг тақдирини янги бир кенглик сари буриб юбориши мумкин экан. Буни кўриш менга ҳам насиб қилган.

1960 йилнинг январида «Ўзбекистон маданияти» газетасига адабий котиб сифатида ишга жойлашганимдан кейин ортирган дўстим, адабиёт бўлим мининг мудири, кейинчалик фарзандларимга ҳам университетда устозлик қилган қадрдоним, яхши олим ва журналист Шариф Юсупов сўнгги пайтларда бешён кишилик давра ичига кириб қолсак, давримизнинг улкан ёзувчиси Абдулла Қаҳҳор 1952 йил декабрида мени мақтаб, бир оғиз сўзи билан адабиётда қаддимни тиклаб қўйганини бир-икки марта шавқланиб эсга олди. Бу ҳақда ўзимнинг муносабатим қандайлигини ҳам сўради. Муносабатим аъло даражада-ку, аммо бу ҳақда эл аро гап очсан, ўзимни ўзим мақтагандай бўлиб қолишдан чўчиб, индаёлмай юравердим. Чунки ўтган асрнинг эллигинчи йилларида – факат ёшлар эмас, китоб чиқарган, ҳатто ёши бир жойга бориб қолган қаламкашлар ҳам, камтарлик деворини бузуб, ўзларини шоир деб айюҳаннос солишдан ийманар эдилар.

Шариф ака менинг қитигимни уйғотиш қийин эканига ақли етдими, «Адиднинг жасоратли бир сўзи» мақоласи («Ўзбекистон адабиёти ва санъати», 2007 йил, 16 март)да бу вазифани ўзи адо этишга киришибди. Мана у мақоладан бир лавҳа. «Ўшанда Абдулла ака ўз нутқини ҳозирги ёшларга ҳавасим келади, улар бизнинг авлод ёшлиқ чоғида қилолмаган катта ишларни қилмоқдалар, деб бошлаган ва ўша кунлари шеърият майдонига эндиғина кириб келаётган Хусниддин Шариповнинг «Саҳрого ҳужум» (аслида

«Ирода») шеърини ибрат намунаси сифатида келтириб, атрофлича таҳлил этгандан сўнг, ҳозирда Хусниддиндан кўра беш-ўнта қўйлакни кўпроқ йиртган қаламкашлар ундан дарс олишларини истардим, деганди».

Шундан сўнг, Шариф Юсупов ёзганидек, Абдулла Қаҳҳор ўзбек насли ва шеъриятидаги умумий аҳволга тўхтаб, баъзи адиб ва шоирларнинг ижод соҳасидаги, шахсий ҳаётидаги нуқсонларни ўйиб-ўйиб оладиган сўзлар билан бутун зал тасаввурнида яқол гавдалантириб берганди.

Ана шундай сўзлардан кейин ҳам мен оғзимга талқон солиб ўлтираверишим, бошқалар тугул, ўзимга ҳам ғалати туюлаётгандай бўла бошлади. Фақат бир андиша бор: ҳозирги эсловчилар кўпинча эсланувчиларнинг номларини яшириб, «бир ёзувчи», «танникли шоир» сингари иборалар билан атаб ўтадилар. Менимча, шеърда ҳам, хотираномада ҳам қаҳрамонни таниб бўладиган портретини чизишининг зарари ёки оғринтирадиган жойи йўқ. Ахир бу кимнингдир орқасидан тош отиш учун эмас, балки ўша давр об-ҳавосини, лексикасини, ифода имкониятларини кўрсатиб бериш учун хизмат қилиши мумкин.

Ҳозир ҳам қўлимда Ўзбекистон ёш ёзувчилари IV Республика кенгаш-конференциясининг 1952 йил 24-26 декабрь кунларида мажлисларининг стенографик ёзуви бор. Мен ўтганларнинг руҳидан кечирим сўраб, энди стенограмманинг у ер-бу еридан қисқа-қисқа лавҳалар келтираман, умидим борки, бу Абдулла Қаҳҳорнинг ўз портретига ўзи кўшган бўёқ бўлиб қолади.

Аввало Мирмуҳсиннинг «Абдулла Набиев» достони ҳақида. Қаҳҳор домла шундай дейди: «Бу маҳсулотнинг учта яхши бўлмаган томони бор. Биринчидан, Абдулла Набиев ўртоқлари, таниш-билишлари қаторида маълум

бир образ эди. Мен уни кўрганман, эшитганман – унинг алоқаси бўлган кишилардан эшитганман. Поэмада шу ёрқин образ латта қўғирчоққа айланган. Иккинчидан, поэма душман тўғрисида ўқувчида нотўри тасаввур туғдиради. У бундай эмас, душман бундай бўлмайди. Душманинг чет эл билан бўлган алоқаси бундай эмас эди. Учинчидан, ҳақиқатан бой, бадиий пухта ишланган мисраларни эътиборга олмасак, поэма ўқувчини шоирдан (эҳтимол шеърдан) маълум даражада бездиради»

Конференцияни ўз маъруzasи билан бошлаб берган 31 ёшли Мирмуҳсин ака 45 ёшли устознинг бу танбехи устида ўйлаб, орадан бир кун ўтгач, ўзининг якунловчи маъруzasida Абдулла Қаххор достонни дикқат билан ўқигани учун миннатдор эканини билдириди, асар устида ишни давом эттираётганини ва бу жараёнда Қаххор фикрларини ҳам ҳисобга олажагини айтди. Мен бу ўйлашнинг натижасини билмоқ учун Мирмуҳсин аканинг кейинги китоблари ва таржими ҳолларини варактаб кўрдим, лекин ўша достоннинг на ўзини, на номини топдим. Мехнати увол бўлишини муаллифнинг ўзи ҳам сизган бўлса керак-да.

Бадиий асарлар хом туғилаётганини, Абдулла Қаххор нутқини давом эттириб, ижодий кенгашлар фаолиятининг паст савиасига боғлади. Шеърият кенгаши (у пайтлар поэзия секцияси деб аталарди) раисини тилга олиб, «Мамарасул Бобоев, маълум бўлишича, сен менга тегма, мен сенга тегмайман, иккаламиз ҳам олам кенг, яшайверайлик, деб иш тутаркан. Бунақа камтарплик кимга керак?» дейди устоз ва сўзини давом эттириб, Асқад Мухторнинг бирор асарга баҳо беришда унинг сифатидан кўра, муаллиф мавқеига кўпроқ эътибор қилаётганини эслаб ўтади.

Бундай ҳолат наср кенгаши (яъни проза секцияси) да ҳам ҳукм сураётгани ҳақида сўзлаб, Абдулла Қаххор бирин-кетин Сами Абдуқаҳхор, Иброҳим Раҳим, Аббос Муҳиддин, Саид Назарнинг қисса, ҳикоя ва романларини таҳлил қиласи, улардаги мантиқизлиқ, ҳаётдан йироқлик, тил ғариблигини чертиб-чертуб, зални кулдира-кулдира, намойиш этади. Буни Ёзувчилар уюшмаси раҳбарларидан бирининг адабий ҳаёт бўйича навбатдаги наштарли нутқи дейишдан кўра, умри ижод билан ўтган улкан тажрибали ёзувчининг республикамиз ёш қаламкашлари учун ўтказган маҳорат дарси, унтилмас сабоги деб аташ тўғрироқ бўлади, менимча.

Устознинг маъруzasи ниҳоясига етиб қолди шекилли, оҳиста умумлашмалар туғила бошлади. «Ижод-



8-сон. 2011 (249)

корларнинг кўпчилиги адабиётга қалам билан кираётиди, ёшлар адабиётга зўр мақсад билан келаётиди, – дейди Абдулла Қаххор ва давом этади. – Биз учун ёзувчиларнинг оз ёки кўплиги эмас, балки буюк мақсад йўлидаги бир ривожланиш воситаси бўлиши қизиқарли. Кимдир ўз олдига қандайдир ёзғувчи бўлишни мўлжал қилиб қўйган бўлса, на чора, ундан ҳар қачон ҳам ёзувчи чиқавермайди. Ёзувчини буюк мақсад туғдиради. Ҳатто бугунча тажрибаси етарли бўлмаган ёш қаламлар остидан чиқсан асарларда ҳам ўша руҳ барқ уриб турса, мана шу руҳдан туғилган илҳом баракали бўлади».

Мажлис қатнашчилари бу дадил ва теран нутқ учун миннатдорчилик билан қарсак бошлаганларида устоз минбарни тарқ эта қолмадилар, балки юқорида айтган фикрларини яна бир бора тасдиқ этиш учун бўлса керак, шундай давом этдилар: «Қайси куни «Қизил Ўзбекистон» газетасида адабий саҳифа чиқди. Унда ёш шоирлардан Ҳусниддин Шариповнинг «Ирод»а деган шеъри босилиб чиқди. (Шу он менинг юрагим «шув» этиб кетди. Лекин, ҳайрият, устоз боягидай қаттиқўллик билан эмас, ўзгача бир оҳангда давом этдилар). Афсуски, шеър ўқиши билмайман, билсам ўқиб берардим. Майли, ўзингиз ўқиб оларсиз. Шеърда кум бўрони тасвир этилади. Кимдир бунақа ҳодисани ҳалокат деб ҳисоблар. Аммо шоирнинг ўзиdek ёш бир геолог ўзи бу ерларга бугун-эрта бошлаб келадиган ҳаётни ўйлаб, ҳалокатли бўрон остида жилмаяди. Чунки орқасида бутун мамлакат борлигини, ҳалқ борлигини билади. Шунинг учун ғалаба қилишига амин.

Мен гапимни нима билан бошлаган бўлсам, ўша билан тамомлайман: биз адабиётга йўл ахтарганда, бундай шеър ёза олмас эдик, бундай ёзишни тасаввур қилиш ҳам қийин эди. (Узоқ ва давомли қарсаклар)».

Шундан сўнг танаффус эълон қилинди. Танин ва нотанишлар, ҳали зал эшигидан чиқмай турибок, мени табрик эта бошлашди. Газета ва журналларнинг ходимлари босилмаган шеърларимни сўраб олишга киришдилар. «Шеърларим тугади» десам, қай бир мавзуни айтиб, буюртма берганлар ҳам бўлди. Расмий мажлислар орасида бўлиб ўтган ижодий муҳокамаларда шеърият кенгаши раиси Мамарасул Бобоев менга ҳам тез-тез сўз бериб турди. Ана шу жараёнда ақлим сал ёришиб, Абдулла Қаххор деб аталган улуғ инсоннинг сўзи нақадар курратга эга эканини тушуна бордим. Устоз мени анча-мунча юқорига кафтларида кўтариб кўйган эканлар, эндиғи вазифа – ўша ердан «гурс этиб» қуламаслик, домламиз сўзини бекадр қилмаслик, ўша йўл, ўша трамплиндан янада олға интилиш эди.

«Ирод» тўрт йилдан сўнг «Ниҳол» деб аталган биринчи китобимда асли ўзим қўйган ном билан босилди. У китобни топиш ҳозирги кунларда амри маҳол бўлгани сабабли, ёш шеърхонлар ва бошқа қиёқанларга кўчирма ҳавола этмоқчиман:

САҲРОДА

*Бирдан қумтепалар, чўчиған тойдай,
Сесканиб қўзғолди, бўрон бошланди.
Нурдан ҳозиргина кўз толган жойда
Қоронғулик чўкиб, сурон бошланди.*

*Куёш чанг қоплаган баркаш сингари
Тўзон орасидан кўринар хира.*

*Машина юролмас энди илгари,
Йўлни кўрмоқ учун илож ўйқ сира.*

*Кўзойнакдан ўтиб кўзга кирап қум,
Тишнинг орасида қум ғижирлайди.
Бўронга боқаркан, геолог Турсун
Кўмни туфлаб ташлаб, бирдан жилмайди:*

*Майли увллаб ол, сахро, сўнгги бор,
Тезда ювош бўлиб қоласан қўйдек.
Бу ерлар бўлади кўм-кўк пахтазор,
Чунки кенг кўксингга биз қадам қўйдик.*

*Шамол ҳуштак чалар, тинчимас бир дам,
Дарғазаб, ёқага солади чангал.
Турсун палаткада, қўлида карта,
Жилмаяр «Боғ бўлар манов ерларда,
Бу ердан ўтади ҳаётбахш канал».*

Хозирги куннинг баъзи бир жимжимахўр шеърхони юқоридаги сатрлар билан танишгач, ҳайрон бўлиши мумкин: Нега бу қадар олқиш, қани юракни ғижимлаб ташловчи оҳанглар, қайда қолди самовий теранлик ва ярқ этиб кўзни тиндирувчи зулматлар, деб. Жавоб сифатида айтишим мумкинки, ўша давр адабий об-ҳавосидан нафас олган Наим Каримов, Уммат Тўйчи сингари ёш шоир дўстларим (ҳа, жуда оз қоляпмиз) ҳануз эсласалар керак. Уруш йиллари жангчиларни олға чорлаган, мамлакат ичкарисида меҳнат қилаётган фидойиларни эса белларидағи тасмани янада қаттироқ тортишга ундан сатрлар садоси эллигинчи йилларнинг бошларида ҳам янграб турарди шеъриятда. Дабдаба ва мадҳиябозлик одатий нарса эди. Константин Симонов ва Микола Бажаннинг чет элдаги дўстларимиз ва душманларимиз ҳақидаги тиғдор шеърий китобларига эргашиб, газеталарда ўқиган мақолаларимиз таъсирида ўзимиз ҳам «Ана – улар» сингари туркумлар ёзиб, «Ёшлик дафтари»да чиқариб юбораверардик. Адабиёт тарозусининг яна бир палласини эса мумтоз шеъриятга тақлидан яратилган насиҳаттўйлик ёки ишқий сўла-кайномалар эгаллаганди. Адабиётнинг эртасини ўйлаган, шира босмаган, аммо ширадор шеърларни соғинган ижодкорлар юқорида айтилган каби ғарифликларни даволаш йўленини ҳаётнинг ўзидан, ўша куннинг қаҳрамонларидан, илҳомга омухта воқеабанд шеъриятдан қидиришарди. Бу – биринчи масала.

Иккинчидан, ўтган аср қирқинчи йилларнинг охир, эллигинчи йилларнинг бошида адабиётга уруш кўрган бир гурӯҳ ёш каламкашлар дадил кириб келди. Улар ижоди сабабли адабиётда «фронт ҳақиқати» деган ибора ҳам пайдо бўлди ҳатто. Шимолий шаҳарларда Коган, Кульчицкий, Корнилов, Казин, Суворов ва уларнинг кечагина солдат жомаларини ечган тенгдошларининг сатрларида умр қадри, ватанга фидойилик, уруш заҳматлари ўз табиий бўёғида, хеч қандай бежамасиз ифодасини топар эди. Лекин ҳаётнинг бўёқлари ҳам рангго-ранг.

Марказий газета-журналларнинг баъзилари ижод оламининг янги авлодини мамнуният билан кутлаб қарши оларди. Бундай овозлар кўтарилиб бораётган бир паллада бошқа бир обрўли марказий газета, ўн-үн беш кун ўтказиб, «адабиёт – умумхалқ иши, жуда масъулияти, мураккаб нарса, унинг тақдирини эндинигина қалам тутишни ўрганаётган, гражданлик руҳияти паришон

ўспиринларнинг қўлига топшириб қўйиш ақлдан бўлмас» деб чиқарди. Агар нашириётлар аввалроқ ёшларнинг асарларини сўраб олаётган бўлса, энди эҳтиёткор муҳаррирлар уларни дарҳол ўз йиллик режаларидан чиқариб ташлашга киришардилар. Тез-тез тақрорланиб турадиган бундай «иккиланиш тўлқинлари» ўша газета-журналлар билан бирга биз тарафларга ҳам мунтазам етиб келар, натижада «ижодимиз қайиғи» чайқалгани-чайқалган эди.

Адабиётнинг келажаги учун ўз масъулиятини яқол ҳис этиб яшаган устоз Абдулла Қаҳҳор, назаримда, ўша кунги нутқи билан, аввало, шеъриятимизнинг ҳалқ турмушидан туғилган йўналишини қўллаб-куватлашига ўзи ишора қилган, қолаверса, ижодкор киши сермаҳсул ва мўтадил ҳаёт кечириши учун ҳар қанақа бегона шамолларнинг тебратаверишидан ҳимоя қилинмоғи зарур эканини таъкидлаган, деб ўйлайман. Бу факат ўша кунги кайфият эмасди. Устоз, менимча, ўзи кўтарилиган уғқа янги, ҳалол шогирдлар ҳам тирмасиб, у олаётган завқа шерик бўлишларини ўйлаган, лекин бу унинг учун бир-икки мавсумли иш бўлмагани сабабли, узлуксиз ўйлаган. Сўзимнинг исботи сифатида қуириқда яна устознинг ўз сўзларини келтираман.

Мана, орадан ўн-ўн беш йил ўтиб, адабиётга ёш ижодкорларнинг яна бир янги авлоди кириб келди. Андрей Вознесенский, Евгений Евтушенко, Роберт Рождественский ва ҳамқурларининг овози жаҳон бўйлаб тарала бошлади. Бизнинг адабиёт ҳам янги, янгроқ, ёрқин рух қасб этдики, буни Қаҳҳорнинг 1965 йил 7 августдаги «Литературная газета»да босилиб, «Ўзбекистон маданияти» ҳам чоп этган «Талант – ҳалқ мулки» сарлавҳали мақоласида айниқса яқол кўриш мумкин.

«Эркин Воҳидовнинг «Нидо» поэмасини олайлик, – дейди устоз қувонч билан. – Поэманинг лирик қаҳрамони – уруш жафосини тортган, фашизмга қарши буюк жангла ҳалок бўлган одам. Унинг қалб садоси миллион-миллион қишиларнинг нидоси урушга нафрати, урушда ҳалок бўлганларнинг ҳақоний хотирасидир.

Абдулла Орипов «Темир одам» деган шеърида мураккаб техника сиридан воқиф бўлган, лекин инсоннинг қувончи, ғам-ғуссасига келганда қулоги кар, тили лоп бўлган, йиглаган гўдакнинг бошини силолмайдиган, онага таскин-тасалли беролмайдиган одамларга таъна тошини отади.

Ҳусниддин Шарипов шеърларида инсонни, унинг ақлини, меҳнатини, эзгулик ва адолатни куйлайди, улуғлайди.

Ўлмас Умарбеков «Севгим, севгилим» повестида одам боласига ишонч, одамлар қалбининг соғлиги тўғрисида завқ-шавқ билан ҳикоя қилади».

Бу эътирофлар албатта фақат ёшлар эмас, ҳатто тажрибали қаламкашга ҳам қанот баҳш этмоғи мумкин. Лекин гап фақат қанотнинг ўзидағина эмас, балки ундан катта мақсадлар учун фойдаланишда, парвозни юқсанкларда мустақил давом эттира билишда. Ана шунинг учун бўлса керак, Абдулла оралини шогирдларни сергаклантириб, йигирма сатрлардан кейин фикрни бундек давом эттирадилар:

«Ҳозир, омади гапни айтганда, Эркин Воҳидов билан Ҳусниддин Шарипов ўзларидаги бор куч-куватни тўла ишга солишаётгани ўйқ. Юқорида шеъри мақтов билан тилга олинган Абдулла Ориповда ўз талантига масъулиятызиз қараш ҳоллари сезилаётиди. Ўлмас

Умарбековнинг биринчи йирик асари қўшиқдай қал-
бидан отилиб чиққан эди, ўзи яхши билмаган геологлар
ҳаётидан олиб ёзган асари эса зўрма-зўраки, тасодифий
чиқиб қолди. Шукур Холмирзаев биринчи асарида ҳаёт-
нинг бир парчасини ғоят чиройли бир табассум билан
чизиб берган эди, кейинги бир асарида воқеа қидириб
қолгани сезилиб турибди. Учкун Назаров кейинги хи-
кояларида биринчи ҳикояси даражасига яқин ҳам бо-
ролмәтибди».

Абдулла Қаҳхор бундан илгарироқ ўзининг «Махалла» деган ҳикоясига эпиграф қилмоқ учун ва, эҳтимолки, ёш ижодкорга қора қаламини қайраб боқаётган танқидчиларнинг нафси ва нафасини қайтариб қўймоқ учун Эркин Воҳидовга бир тўртлик буюриб ёздирганини ҳозирги китобхонлар билишавермаса керак. Мана ўша тўрт сатр:

*Инсон билан тирикдир инсон,
Мұхаббатдан ҳаётнинг боши.
Одамзодға баҳш этади жон
Одамларнинг меҳр қуёши.*

Кейинроқ худди шундай таклиф билан устоз ўз шогирди бўлиб қолган Абдулла Ориповга ҳам мурожаат этиб, бу тўртлик билан «Нурли чўққилар» ҳикоясини безади. Мана ўша узукнинг кўзи:

Гоҳо ер мөхрини ўларкан,
Эсга тушар дорнинг сиёғи;
Ажаб ҳикмат: одам ўларкан
Узилганда ердан оёғи.

Абдулла аканинг соясига интилишимиз ёшлик билан ўтиб кетадиган хислатлардан бири эмас экан. Орадан анчагина вақт ўтиб, ҳассос ва файласуф шоир Аскад Мухтор раҳбарлигидаги «Шарқ юлдузи» журналининг шеърият бўлнимини бошқараётган, журнал атрофига анчагина ёш ва, муҳими, истеъододли шоирларни жалб этиб, Абдулла Қаҳхордан олган ижодий қарзларимни ушаларга қайтариб бераётган паллам эди. «Шарқ юлдузи»нинг тоғдай обрўсига суюниб, ҳали ўзини ҳимоя қилишга ожиз ёшларга ёки қалами бўшроқ акаларга катта-катта талаблар кўйиш қийин эмасди. Лекин менинг ўзимга ким талаб кўяди? Ҳа, мен ҳам «билган киши»нинг сўзига зор эдим.

1965 йил. Ёшлар йиғиладиган одатий вақт ва күн. Ѓузувчилар уюшмаси раиси кабинетининг ортидағи ши-
намгина хонага таклиф этилди. Абдулла Қаҳжорни
шу ерда кутиб олдик. Катта-кичик йигирматача экан-
миз, устоз бир-бир қараб, ўзлари сўз айтишдан илгари
бизни тингламоқчи эканларини билдирилдилар. Дарров
шеърхонлик бошланди. Шеър ёзмайдиганлар, одат-
дагидек, уларни танқид қилиб чиқа бошлашди. Мен
кейинги пайтларда негадир оқ шеър машқ қилаётган
эдим. Билардимки, урушдан илгари адабиётимизда
анча-мунча сарбаст-сочма шеърлар яратилган, аммо
бу усул негадир ҳаётга сингиб кетмаганди. Шунинг учун
мен ўзимнинг «қоғия-либос»сиз ёзғанларимдан бир оз
хавотирда эдим. Навбат етганда, туриб, «Денгиз сокин
эди» деган янги шеъримни ўқиб бердим. Абдулла aka
енгил бош силкиб «маъқул» дедилар-у, кейинги нотиқдан
сўз кутаётган эдилар, мен улоқни бергим келмади

— Домла, ўқиганым одатий шеър эмас, қофиясиз, оқ шеър, фикрингизни билмоқчи эдим.

– Шунақами, мен қофияси бор-йүқлигини мутлақо пайқамабман, дуруст, – деб күнглимни тинчтидилар. Бу сүз бирор янги йўл излаганимда ҳали ҳам менга тутқа бўлиб келади.

Ёшларни ўз химоясига, ўз қаноти остига олишдан устознинг мақсади – ўша давр адабиётини тушуниш савиясини кўтариброқ, бадииятнинг моҳиятини ёрқинлаштирибороқ беришга кучи етадиган янги оқимга йўл очиш бўлса керак, менимча. Негаки, юқорида эслаб ўтилган «Талант – халқ мулки» мақоласида таъкидланганидек, «илгарилари ёшлиқда ёшлигига, қариганида қарид қолганига риоя талаб қилиб ўтган кишилар оз эмас эди». Бу масала ижодий турмушимизнинг энг оғриқли бўғимларидан бири бўлиб, ҳали хозиргача ушбу соҳада «коммавий тушунчамиз»нинг зеҳни на етарли даражада ўткирлашди, на кўзи дурустроқ равшанлашди. Таҳлилчиларнинг бадиий тимсолни фаҳмлай олиш савияси пастлигидан энг кўп жабр кўрганларнинг бири Абдулла Қахҳор бўлса керак.

Тақдир деймиз. Ёзувчининг тақдирини ижодий меҳнат ва унинг қалами учидан туғилган жонли инсонлар яратади. Мен Абдулла Қаҳхор ҳақида ўйлаганимда кўз олдимдан негадир Михаил Шолохов ва унинг қаҳрамонлари ўтаверади. Тасаввур қилинг, икки оқим бирини шартли равишда «оқ кучлар» десак, иккincinnисини «қизиллар» деб аташимиз мумкин. Ҳар иккала куч ҳам замон ва маконни бошқарув мурватини ўз қўлида сақлаб қолиш учун беаёв курашга киришган. Гоҳ ўнг тўлқин босиб кетади бу ҳарбда, гоҳ сўл тўлқин. Буни муҳит дейдилар. Дунёга умид билан келиб, баҳтини меҳнатдан, ўз қора тупроғидан излаганлар-чи? Уларнинг кўксидаги муҳаббат деб аталган илоҳий неъмат-чи? Аниқроқ қилиб айтсақ, Григорий ва Аксинялар-чи? Бу беражм, инсоннинг зорини эшитиш қобилиятидан, севиш-севилиш завқини англаш баҳтидан маҳрум муҳитда икки севишган қалб, қайси тўлқиннинг кифтида қалқиб-энтикиб борса-да, фақат оёқ ости бўлади.

Хатто бу аянчли тақдир бозоридан бош олиб кетаётганларида ҳам орзулари хазонга айланади.

Күпгина эсдаликларда, «Сароб» романы узоқ ваңт дүпспосланиб, орадан ўн саккиз-йигирма йил үтгач, ўз ижебий баҳосини олган, дейилади. Лекин ёзувчининг орзуси факат ижебий баҳомиди? Қани, романни бир вараклаб кўрайлилек-чи.

Унинг асосий қаҳрамонлари – Мунисхон ва Саидийни тақдир бир эшикнинг икки бетида учраштиради. Бу асно аста-секин ҳаётни остин-устун қилиб юбораётган тарихий воқеалар гирдобига бориб тулашади. Гирдоб аёв нима эканини билмайдиган нарса. Уни айлантираётган кучларнинг бири мақсад йўлида қурбон бўлишдан ҳам қочмайдиган курс жон эгаларидан ташкил топган бўлса, иккинчиси – ўз жонини асрраб қолиш учун хатто ёлғиз опа ё синглисини қурбон қилишдан тоймайдиганлар. Уларнинг ўртасидаги «ур-теп»лардан дами чиқаётган коптокка ўхшаб синиккан Саидий «замона бўрони бутун мамлакатни тараққатлаётитпи-ку. Кўй, мен оламга том тузатгани келганим йўқ» деб, китобхон билан хайрлашади. Мунисхон эса турмушнинг сасиб ётган разолат ботқоғидан оёғини тортиб ололмагач, «Олам тўла баҳт, фақат мен баҳтсиз эдим» деб, авваламбор ўз чаккасини ўққа нишон қилган эди, тўппонча эса акасиники.

Тақдирдошликни күринг, «Тинч Дон» ва «Сароб»ни ҳар иккала ёзувчи ҳам айни йигирма уч ёшида ёзишга киришган эди. Улар мавзуну ёритиш ёки қаҳрамонлар

қиёфасини яратишда бир-бирларидан «гула кўтаришган» деб айтиш мумкин эмас. Чунки Шолоховнинг асари 1928 йили ёзила бошлаб, қирқинчи йилда ниҳоясига етган бўлса, Абдулла Қахҳор ўз романини 1930-1934 йиллар орасида яратган. Шундай экан, айтишимиз мумкини, Шолохов ҳам, Қахҳор ҳам бир-бирларидан анчагина олисда, ўз тупрокларида ҳалол яшай туриб, давр оқимини, замон об-ҳавосини, ўша шароитда нафас олаётган беғубор кишиларнинг, ўзлари билган кишиларнинг сезги, севгивадарларидаги ҳамоҳангликни, баъзиларга ўхшаб қулоқ ё бурунлари билан эмас, балки сезгир юраклари билан ҳис эта олганлар ва, энг муҳими, мустақил ифода этишга муваффақ бўлганлар.

Мен олимлик даъво қилмоқчи эмасман. Фақат, юқоридаги кузатувлардан келиб чиқиб, кўнглимда туғилиб қолган бир фикрни ўртоқлашиш ниятида айтаманки, ижодкор қандай усул ё услубда, қачон ва қаерда қалам тебратмасин, бундай меҳнат кишиларини бирлаштириб турдиган нарса – истеъдод, ИСТЕЪДОД ўзи эса жуда қисқа қилиб айтганда ТАСАВВУР ВА УНИ ИФОДАЛАШ ҚОБИЛИЯТИДИР.

Ана шу улкан қобилият маҳсули бўлмиш ҳар икки асарнинг кўз очиб кўрганлари ашаддий танқид бўлди. Шолохов мунаққидлар томонидан янги даврни тезгина ҳазм қилиб кета олмаган бебошвоқ «казак» (Абдулла Қахҳор таъбири билан айтганда «ўрис қозоқ»)



ларнинг куйчиси» деб «ўқقا тутилса», Қахҳорнинг бошидан миллатчилик масаласини баҳона қилиб совук сув кўйилди. Қирқинчи йилларнинг охирида ҳаддан ортиқ саваланиб, кейинчалик «Қўшчинор чироқлари» сифатида янгидан яратилган «Қўшчинор» романи ҳақида ҳозир гапириб ўтирмайман – аввал солишириб ўқиш керак, чамамда. Чунки мен «Қўшчинор»ни ва унинг тўғрисидаги танқидларни фўр ўспиринлик чоғимда ўқигандим ва, оғзимни очганимча, унисига ҳам, бунисига ҳамаланг-жаланглаб қолавергандим. Лекин хотирамнинг бир четида ҳануз бир чўғ милт-милт этиб туради майли, мавзу масаласини ҳозирча оғизга олгани эринсак, хўп, бу икки «Қўшчинор»нинг бадиияти, айнича, тил бойлиги устида ишлайдиган бирор мард адабиётшунос топилса, бугун ҳам бемалол фан докторлигига арзийдиган гўзал илмий асар туғилиши мумкин.

Истеъдод қисматини фақат ўзи ҳал қилиш максадида ҳар қандай муаммони, ҳатто юксак бадиият масалаларини сиёsat эгови билан текислашга уринувчи ҳакам ва ҳунармандлар илгари ҳам бўлган, бундан кейин ҳам бўлаверади. Лекин адабиётда юз берган ва бераётган ҳамма ташвишли ҳоллар учун айбни уларга ағдараверишдан фойда унча кўп бўлмаса керак. Чунки асарни истеъдод, истеъдод эгаси шоир, ёзувчи, драматург яратади.

Мана, йигирманчи аср янги асримиз билан туашган паллаларда, яъни қайта қуришнинг олатасир кунларида, кейинроқ – жамият турмуши ўзгаришга юз тутиб, ҳалқ турмушини бошқарувчи янги кучлар қарор топган даврда ҳамма ижодкорларимизнинг кўзи очиқ, ақли жойида, қалами кўлида эди. Аммо уларнинг орасидан бирор йигирма уч ёшли янги Абдулла Қахҳор чиқиб, ўзининг «Сароб» даражасидаги фикрга толдирувчи янги китобини элга тақдим этолдими? Бундай асар яратса олмаган бўлса, сабаби нима? Истеъдод етишмадими? Ҳаётни тушунишга тишлари ўтмадими ёки адабиётнинг янги тарозибонларидан чўчишдими, жон ширинмиди?

Ана шуларни ўлаганда, Абдулла Қахҳор нақадар жони қаттиқ, чидамли, файлласуф инсон экани кўз ўнгимизда гавдаланади. Унинг «Шоҳи сўзана» («Янгиер») пьесаси Москва театрида саҳна юзини кўрганидан кейин ижодкорига Давлат мукофоти берилди. «Синчапак» қиссаси Константин Симонов томонидан таржима қилиниб, Москва журналида босилиб чиққанидан кейин ўзимиздагиларнинг унга муносабати равшанлашди. Фақат улкан инсон эмас, ҳатто оддий киши ҳам ана шундай асноларда кимлар билан яшаётганини ўйлаб, ичи зил кетиши мумкин. Ахир ёзувчи ёки шоир ҳам одам, у факат дилидагини эмас, тилидагини ҳам ўз замондошлари тушуниб олишларини истайди, ҳа, меҳнатининг натижасини ўз кўзи билан кўргиси келади. Фақат келажак умиди билан яшаш оғир, ахир.

Эҳтимол кимdir устозни тили аччиқлиқда айблар, юзингда кўзинг борми деб ўлтирмай, ўз ҳақиқатини дастурхон қилаверишини кимdir ёқтирмас, шунинг учун ҳар бир қаҳҳорона «тарс»га «қарс» этиб бошмабош жавоб берувчиларнинг уруғи кўп эди, дер кимdir. Менимча, гап бунда эмас. Яна ўша муҳитга назар ташлаб кўрайлил. Йигирманчи асрнинг биринчи чораги ўтиб, янги жамият қарор топибдики, давлат бошқарувига оддий одамлар кўплаб жалб этилгани сабабли, унинг асосий шиорларидан бири «танқид ва ўз-ўзини танқид» бўлди. Раҳбарми, содда ваъзхонми, минбарга чиққанидан



кейин матързасининг бешдан тўрт қисмини турмушда, ишлаб чиқаришда, оилада ва ўз фаолиятида рўй берәётган камчиликларга бағишилар, шундан сўнггина қандайдир мўлжалларини, бу мўлжаллар беражак ижобий натижаларни, ўша натижалар кўлга киритилиши учун нималар қилиш кераклигини тилга оларди. Бунга ҳамма кўнишиб қолган эди ҳам.

Ҳаёт саҳнасидаги ушбу ҳолат 1966 йилга келиб, давлат раҳбариятида янги арбоблар пайдо бўлганидан кейин кескин ўзгарди. Энди қўлига микрофон тушиб қолган нотик ўз нутқининг бешдан тўрт қисмини кўлга киритилган муваффақиятларга, қолган қисминигина ишдаги ва турмушдаги етишмовчиликларга ҳамда яхши ниятларга бағишилашга ўрганди. Кадрларнинг ишонч қозониши, юқори лавозимларга кўтарилиши ҳам улар ана шу санъатни нақадар пухта ўзлаштиришлари билан

боғлиқ бўлиб қолди. Сабаби тирикчилик деганларидек, уларнинг орасида фақат мансабпастларгина бўлиб қолмай, Абдулла Қаҳҳорнинг шогирдиман деб юрган олим ёки қаламкашлар ҳам учраб турарди. Карвон бехатар бўлмайди-да!

Абдулла ака декорация ўзгарса ҳам пинагини бузмай, ҳатто жонининг оғриғини бошининг оғриғига айлантироқчи бўлганлар тобора кўпайса-да, қаҳҳорона яшашни давом эттириди. У ўзи ишонган, ҳалол, истеъододли ҳаммаслакларига суюниб дардини енгарди. Бутун умиди эса ёшлар қўли ва истеъоди билан яратилгувчи келажакка боғлиқ эди. Агар бир мўъжиза рўй берса-ю, мен бехосдан рассомга айланиб қолсам, аввало устознинг кўзидағи ана шу яширин умидни тасвирга туширган бўлардим ва расмнинг номини «Тақдир» деб кўйган бўлардим.

АДИБ ҲАҚИДА МАЪЛУМОТ

Ҳусниддин Шарипов 1933 йилда Наманган туманида туғилган.

2000 йилда “Мөҳнат” шуҳрати ордени билан тақдирланган. Умумий мөҳнат стажи 54 йил. 1993 йилдан буён нафақада, ижодий иш билан машгул.

Ҳусниддин Шарипов таникли ўзбек шоири, драматурги ва таржимонидир. Унинг “Навоий” деб номланган дастлабки шеъри 1948 йилда Наманган вилоят газетасида эълон қилинган эди. Шундан сўнг ўтган ярим асрдан кўпроқ вақт мобайнида шоирнинг “Кўнгил буюргани”, “Қуёшга ошиқман”, “Тупроққа қасида”, “Ернинг қалби”, “Мен сизга айтсан”, “Лирика”, “Ҳаяжонли дақиқалар”, “Оҳ, гўзал”, “Хирмон”, “Яна висол” каби жами ўттизга яқин шеърий тўпламлари дунё юзини кўрди.

Ҳусниддин Шарипов жами йигирмага яқин достонлар муаллифи. Улар орасида, айниқса, “Сотиболидан салом”, “Қуёшга ошиқман”, “Инсоф диёри”, “Тановар” достонлари ўзининг ўйноқилиги, халқоналиги, ширадор тили ва бошқа фазилатлари билан ўзбек достончилиги тарихида алоҳида ўрин тутади. Шоирнинг “Бир савол” шеърий романи ўзбек адабиётида шеърий романнинг энг сара намуналаридан биридир.

Ҳусниддин Шарипов моҳир драматург ҳамдир. Унинг “Сени севаман”, “Ота ўғил”, “Афсона”, “Чоллар ва кампирлар” драмалари мамлакатимиз театрларида муваффақият билан саҳналаштирилган. У моҳир таржимон сифатида И. Тургенев, У. Уитмен, Р. Рождественский каби ёзувчиларнинг шеърлари ва драмаларини ўзбек тилига ўгирган. Айни чоғда Ҳусниддин Шарипов асарлари рус, урду, тоҷик, турк ва бошқа жаҳон тилларига таржима қилинган.

Ҳусниддин Шарипов айниқса Ўзбекистон давлат мустақиллиги йилларида фаол ижод қилмоқда. Бу йилларда шоирнинг “Ёр истаб” (1992 й.), “Минг иккинчи кечা” (1992 й.), “Қалтис юриш” (1999 й.), “Қайнарбулоқ” (2002 й.), “Асирингман” (2003 й.) каби жами йигирмадан кўпроқ шеърий китоблари, достонлари, драматик асарлари ва Ежи Юрандотнинг “Тўққизинчи покиза” (1999 й.), Пабло Неруданинг шеърлари (2000 й.), Жан Лафонтеннинг шеърлари (2001 й.), Бертольд Бреҳтнинг шеърлари (2002 й.), В. Маяковскийнинг шеърлари (2003 й.) таржималари ўзбек тилида дунё юзини кўрди. Улар адабий жамоатчилик томонидан юқори баҳоланди.

Икки ўғил, икки қизнинг отаси, кўплаб невара ва чевараларнинг бобосидир.






Жамила ЭРГАШЕВА

ЗУЛФИЗАР

Қисса



Акбарали Мамасолиев чизган расм.



Ҳаво ниҳоятда дим эди. Осмон юзига кир чойшаб ёпилгандек оқ булат қоплаган, күёш хира фонус каби зўрга кўзга ташланади. Куз. Сўнги япроқларини тўкаётган дараҳт шохлари совқотган каби алланечук дийдираб туради.

Зулфизарнинг юраги сиқилиб кетди. Машинадан тушгач, чуқур-чуқур нафас олди, аммо юрагини сиқаётган беҳаловатлиқдан халос бўла олмади, ўпкасининг қайсиdir бурчакларига тоза ҳаво етиб бормаётгандек эди. У тезроқ уйга етиб боришни истади. Келаётганини қизига айтмай яхши қилган экан. Ҳозир уйга кирадию, ётади. Чарчоғи ёзилгач, овқат қилади, Феруз мактабдан қайтгач, Фарангизни боғчадан олиб келади. Қизига кечга яқин қўнғироқ қилади: “Мен келдим, неваралярим билан ўтирибмиз”.

Калит одатдагидан қийинроқ буралди. Темир эшик “ширқ” этиб очилди.

“Ие, булар уйдами, дейман?” ҳайрон бўлиб ўйлади у, бўсағадаги бесаришта пойабзалларга кўз ташларкан. Қизи ҳам, куёви ҳам бу пайтда ишда бўлишлари керак эди. “Тинчликмикин?!“

Қизи касал бўлиб қолганда ҳам бир кун ишдан қолмас эди, фақат болаларининг тоби қочгандагина ноилож қоларди.

Ётоқхонадан ғудурлаган овоз эшитилди. У шошиб эшикни очди:

– Сора!

Ағдар-тўнтар бўлиб ётган тўшакда кўзлари олакула бўлганча шошиб-суриниб қийинишга ҳаракат қилаётган ярим яланғоч куёви билан Соранинг энг яқин дугонасини соchlари тўзиб ётган ҳолда кўрди-ю, турган жойида тошдек қотиб қолди. Етмиш икки томирини кўйдирган аланга келиб томогига тикилгандай бўлди, оғзи қуриб, тили танглайига ёпишиб қолди. Секингина ортига бурилиб, бемадор қўллари билан деворга суяна-суяна, ошхонага йўл олди: Сув! Бир қултумгина сув...

Челак турадиган курси ёнига зўрға етиб борди. Столдан пиёлани олиб, сувга энгашган маҳал ўнг елкасида симиллаган оғриқ турди. Оғриқ лаҳза сайин зўрайиб бораради. У амаллаб бир ҳўплам сув ичди-да, секин ортида турган ўриндиқа ўтириди. Оғриқ ёйилиб, кўкрак томонга ўтди ва юракнинг қайсиdir бурчагига жойлашиб олди. Кўп ўтмай юрақда даҳшатли оғриқ бошланди. Бу шундай кучли оғриқ эдик, нафас ҳам ололмай қолди ва гурсиллаб полга йиқилди...

Нашатир спирти ва камфора ҳиди анқиб ётган хонада ўзига келди. Тошдек оғир қовоқларини зўрға кўтариб, боши устида унга қараб, алланималар ҳақида баҳслашаётган оқ ҳалатли одамларни кўрди. Кўксидаги оғриқ нафас олишига ҳам йўл бермас эди.

– Ўҳ, ўлиб қоламан ҳозир!..

– Оғрияптими? Тезроқ оғриқни қолдириш керак, морфий!

Оғриқ аста-секин тарқай бошлади. Пешонасини муздек тер қоплади. Хоргин вужудини уйку элитди. Атрофида ғимир-ғимир қилиб юрганларнинг овозлари олислардан келаётгандек, элас-элас эшитила бошлади. Сўнг кимдир келиб, уни ташқарига олиб чиқди. У турган жой ям-яшил адирлик экан. Адир тепасида оппоқ либосдаги бир кампир гоҳ қўлларини кўкка чўзиб, гоҳ пешонасини ерга уриб, Оллоҳга илтижо қилиб ётган эмиш. Зулфизар бир амаллаб ўша тепаликка чиқиб борди. Ёвшанларнинг шитирлашиданми, хаёли бўлингган кампир бурилиб, унга қаради. Унинг ёшланиб

турган кўзлари меҳрга тўла эди. Кампир унинг ёнига келиб, аста юзларини силади:

– Ай, болам-а! Овора бўлган болам-а!

Бу унинг момоси – Улкан кампир эди. Унинг қўллари худди тириклиқ пайтларидағидек лой ва тупроқдан тарс-тарс ёрилиб кетган, дағал, аммо иссиққина эди.

Улкан кампир узоқ вақт чўнтакларини титкилади, сўнг узр сўрагандай, унга юзланди:

– Сенга берай десам, ҳеч нарсам йўқ экан, болам. Йўқчилик курсин... Абдурасулим жонталаш бўлиб ётганда эшон “Жонга жон, садака радди бало. Бир жонлик айтинг”, деди. Айтадиган ҳеч вақоимиз йўқ эди. Илоқсиз турган пайтимда кўзимга сен кўриниб кетдинг. Ўшанда қўлбошдайгина чақалоқ эдинг. Бир сенга, бир ярадор шердай инграб ётган аканга қарадим. Невараларимнинг тўнгичи, уни отангдан ҳам кўпроқ яхши кўрардим. Ётиб қолган кунидан буён “Шугинанинг дардини менга бер” деб, Оллоҳдан сўраб ўтиргандим. Оллоҳ мен шўрни олмади, пешонангдаги ёзуғларни охиригача кўр, дедими... Эшоннинг гапидан кейин тишимни тишимга қўйиб, ўрнимдан турдим-у, йўргак пўргагинг билан даст кўтариб, акангнинг устидан айлантиридим:

– Ё, меҳрибон Оллоҳим, шу қизнинг жони акасига садақа бўлсин. Садақамизни қабул қилгин, – дедим.

Улкан кампир чуқур “уф” тортди. Қалбидаги андуҳдан юзлари қоп-кора бўлиб кетди.

– Аммо Оллоҳ садақамни рад қилди. Ўшанда сени олиб кетганда шунчалар овора бўлмасдинг...

Унинг томоқлари қақраб кетди.

Улкан кампир бўйнига кумуш қўнғироқчалар осилган чиройли кўзачада сув узатди:

– Ол, ич, болам!..

Сув муздек эди, у ютоқиб ичди, аммо ҳеч чанқоғи босилмади. Кампир эса индамай нари кетди.

– Сен энди дам ол, – деди кетаётib.

У ростдан ҳам жуда чарчаган эди, оёқларини олдинга узатиб юборди, зилдек бошини юмшоқ майсалар устига қўйди. Димогига ўт-ўланларнинг ажабтовур ёқимли ҳиди урилди. Булуллар ортидаги баҳор қуёши оҳистагина қиздираётган юзларини майнин шабада си-лаб ўтди. У шу алпозда узоқ ётди, юз йилми, минг йилми...

* * *

Бундан кўп йиллар аввал қишлоққа муаллим бўлиб қайтган қизидан ғурурланган Ойсултон Улкан кампирга таъна қилган эди:

– Мана, моможониси, сиз бир замонлар садақа қилган қизингиз бинойидек муаллим бўлиб келиби.

Улкан кампир маҳзунгина жилмайди:

– Ҳа-а, йўқчилик-да, болам. Кўз опдимда жондан азиз неварам шамдек сўниб бораради. Эшон бобо жонига жон беринг, деганларидан сўнг ўзимни йўқотиб қўйдим. Ҳаёлимда жонлик сўраб, минг эшикка кириб чиқдим. Уйда ўзимизнинг дардисар жонимиздан бўлак ҳеч нарсамиз йўқ эди. Эшон бўлса “ўзингизга азиз бирон нарсани айтинг”, деб турибди. Бир пайт кўзим шу гўдакка тушди: уч ўғилдан кейин тилаб олган қизимиз... Шартта ўрнимдан турдим-у...

Ойсултон ҳам ўтган кунлар ёдига тушиб, бир сўлиш олди:

– Йўғ-е, хола, сиздан сира хафа бўлганим йўқ. Шунда топқирлигингизга қойил қолганман. Кейин...

Шу чақалоқ Абдурасулимнинг ўрнига қолгандай қанча пайт эмизгим келмай юрди. Ҳа-а, нима дейсиз, ҳар ким ўз кунига гаров экан-да...

Бу сұхбат Зулфизарни ҳам ранжитмади:

– Жуда чиройлимиди Абдурасул акам?

– Ҳа, ҳар елкасига бир ўтов тиккүдек жуда абжир чобоғон эди. Қишлоқнинг бор қизи унга ошиқ эди. Қоши-қўзлари сеникидек ловуллаб турарди.

– Лекин сендан минг марта если эди, – Улкан кампир бу маҳзун сұхбатнинг осойишта маромини бузди.

– Мен нима қилдим? – норози оҳангда тўрсайиб олди Зулфизар.

– Ўқиб, муаллим бўпсан, хўп қибсан. Аммо эркакка ўхшаб хўб соchlарингни кесиб ташлаганинг нимаси? Қишлоққа яланг оёқларингни ширдайтиб, тўрт қарич кўйлак билан қандай кириб келганингни ҳеч ақлимига сифдира олмаяпман, эртага мактабга ҳам шу уст-бошда бормоқчиридан ҳали?

– Нима бўпти, момо, ахир мен муаллимаман!

– Муаллим элдан чиқиб кетиши керакми, – баттар қаҳрланди момо. – Ўқимишли одам сувдан ба-ланда, ажриқдан паст, ҳокисор, нима бўлса, кўп билан, эл билан бўлиши керак. Буёғи уруш, қорахат олмаган уй қолмади. Илгари бир уйдан ўлик чиқса, ўн уй “Уруғим, томирим” деб кўк кияр эди. Ҳозир бутун қишлоқ азадор, азадор қишлоқни оралаб шу кийимда юришингга сира рози эмасман.

Ёлғизинга ўғли билан девдай-девдай икки неврасини урушга жўнатиб, на яхши, на ёмон хабар олоп-май ўтирган кампирга эътиroz билдиримоққа ҳеч ким журъат қила олмади. Хонага ноxуш жимлик чўқди. Бир пас ўтиб, Зулфизар ҳовлига чиқди. Томида ўт-ўланлар қовжираб ётган уйлари ниҳоятда ғарифона, мискин эди, момоси билан онасига ўхшаб... Агар отаси билан акалари уйда бўлганда... Тезроқ тугай қолсайди шу лаънати уруш!

Зулфизар момосидан қанча норози бўлса ҳам, эртаси куни мактабга ўзбекча кўйлак-лозиму рўмолида кетди.

Мактаб колхоз идораси ёнида жойлашган тўрт хонадан иборат кўримсизгина бино бўлиб, унинг муаллими ҳам, раҳбари ҳам ўтган йили урушдан оқсоқ бўлиб қайтган Жўра деган йигит эди. Зулфизарни кўриб суюниб кетди:

– Яхши бўпти. Анчадан буён бир муаллим юборинглар, деб юрган эдим. Қимирлаган жон борки, дала-да. Аммо ҳалқнинг боласига ҳеч бўлмаса бошланғич таълимни беришимиз керак-ку. Бугунги вазият, уруш вақтинчалик, эртага тугайди. Урушда йўқотган йигитларимиз ўрнига қолган болаларни саводсиз қилиб улғайтиришга сира ҳаққимиз йўқ.

– Рост.

– Муаллимнинг кўлларини мушт қилиб куюнчаклик билан гапириши унга ёқди. Унинг ранглари униқиб кетган кителидан ғалати ҳид келиб турарди, қон ва тер ҳидига ўхшаш ачимсик бир ҳид.

– Ҳамма ёшдаги болаларни бир синфга йигиб, ўқитиб ётган эдим. Энди уларни бўлиб ўқитамиз.

– Хўп.

Унга энг кичик ёшдаги болаларни берди. Анчадан бери оҳакланмаган синфхона зах ва қоронғу, тинимсиз дарс қолдирадиган болаларнинг кўпчилиги касалманд, нимжон, синфда дарс бўйи йўтал овози тинмас эди. Бутун синф биттагина китобдан фойдаланаар, кўпчилик болаларда дафтар-қалам ҳам йўқ эди.

Момосига ҳасрат қилган эди:

– Кўктош-да унинг давоси. Тўртта кўктош топиб, яхшилаб куйдирсанглар, қанча оҳак бўлади, – деди Улкан кампир.

Болалар бир дунё кўктош йигиб келишди. Ўтин то-пиб, тош куйдирган ҳам ўзлари бўлишди. Биргалашиб, бутун мактабнинг ичи-сиртини оҳаклаб ташлашди.

Жўра муаллим уни мақтаб қўйди:

– Сен қизда ажойиб ташкилотчилик қобилияти бор экан-ку.

Кўп ўтмай уни колхоз идорасига чақиришди:

– Сизни партияга қабул қилмоқчимиз. Маҳаллий хотин-қизлар орасида ҳам партияга садоқатли кадрларни кўпайтиришимиз керак.

Отасидан қорахат келганига бир ой ҳам бўлгани йўқ эди, мактабга колхоз партия ташкилоти котиби бориб, эртага райкомга боришини айтди.

– Сағал ўзингга қараб чиқ. Райкомдагилар, бизга кимни тавсия қиласайпсизлар, дейишмасин яна, – кета туриб кўшимча қилди котиб.

Эртаси куни Зулфизар уйдан одмигина кийиниб чиқкан бўлса-да, мактабга келиб, қайта кийиниб олди. Уст-бошини алмаштираётib, хаёлан момосининг олдида ўзини оқлаган бўлди: “Иш, иш-да, момо. Талаб қилишгандан кейин илож йўқ. Зиёли одам ўзининг ташки қиёфасини кўркам, замонавий тутиб юриши зарурат. Ҳа-а, сиз буни қаердан ҳам тушунардингиз...”

Аммо райкомдагилар уни шундай хайриҳоҳлик билан кутиб олишдик, қайтишаёттанды қорахат келгандан буён тишиларини тиззасидан олмай, жим ўтирадиган бўлиб қолган момоси ёдидан ҳам чиқиб кетди. Эрталаб уйдан кийиб чиқкан кийимлари мактабда қолган эди, мактабга бурилиб ўтирамди. Бу пайтда у ерда ҳеч ким бўлмаслиги аниқ эди.

Эшикни очган заҳоти қандай хатога йўл қўйганини тушунди. Улкан кампир унга бир қаради-ю, юзини четта бурди. Унинг бир лаҳзалик нигоҳида қаҳрдан ҳам кўра жирканиш аломатлари босимроқ эди.

Зулфизар уст-бошини алмаштириб, Улкан кампирнинг ёнига чўқди. Қоқ суяқ елкаларидан қучиб, сўлғин терилари осилиб ётган юзларидан ўпди:

– Момо, мени кечиринг. Мен бугун райкомга бордим. Мени партияга қабул қилишди. У ерга лозим, рўмолларда бориб бўлмайди. Идорадан янгича кийиниб чиқинг, дейишди. Шунинг учун, мажбурият туфайли...

Момо индамади.

Зулфизар ҳазил билан момосининг аразини ёзмоқчи бўлди:

– Абдурасулнинг ўрнига сен ўлиб кетсанг, яхши бўларди, денг.

Момо яна индамади. Унинг фақат юраги эмас, суяклари ҳам ўт бўлиб ёнарди. Абдурасул жон талашиб ётганда бадавлат бўлган экан, ёнида нордай ўғли, бирин-кетин бўй етиб келаётган неча невараси бор эди. Мана, ўғидан қорахат келди. Мамарасул билан Мамараимдан на хат бор, на хабар. Ҳувуллаган уйда уч муштипар қолди. Ўшанда юраги бутун экан, шартта ўрнидан туриб, йўргакдаги гўдакни бемор боласининг бошидан айлантира олди. Энди-чи? Энди осмон олис, ўғли ва неваралари жон олиб, жон бераётган жойлар ундан-да олис.

Камига манави қиз ҳам думи юлинган товуққа ўхшаб...

– Момо... – Зулфизар ялинчоқ оҳангда эмраниб, момосини қаттиқроқ қучди.



Улкан кампир бир силтаниб уни ўзидан итариб ташлади:

– Нарироқ тур, дардим сен эмас!

Онаси пастки лабини тишлаб, бош чайқади: “Қўй, керак эмас”.

Кечки қуёшнинг майин нурлари хонани зўр-базур ёритиб турарди. Зулфизар Улкан кампирнинг оёқларини қучоқлаганча ғужанак бўлиб пойига ётиб олди:

– Момо, уч ой аввал Манзуранинг отасидан ҳам қора хат келган эди. Энди билишса, мина портлаган жойда қолиб кетган экан. Командирлари уни ўлдига чиқариб, уйларига қора хат жўнатишган. У эмаклаб-эмаклаб, ўз қисмига ётиб олибди. Ҳозир госпиталда экан, хат ёзибди, яқинда уйга қайтаман, дебди. Момо, бу уруш, урушда ҳар нарса бўлиши мумкин. Мен отамнинг ўлганига сирайм ишонмаяпман, кўнглим айтиб турибди, эрта-индин ўзи кириб кепади.

Улкан кампир унинг сочларини, юзини силади.

Зулфизар бурилиб, момонинг кўзларига қаради. Кампирнинг хавотир тўла кўзларида умид учқунлари пайдо бўлганди.

– Бугун районда айтишди, лаънати Гитлернинг армияси орқасига қарамай қочаётган эмиш, тез орада уруш ҳам тугар экан. Фалаба билан қайтган ватандoshларимизни ёргу юз билан кутиб олишимиз керак, энди шунинг тайёргарлигини кўришимиз лозим, дейиши. Ҳали замон отам билан акаларим кириб келишади. Ана ўшанда бизни қийнаб, шундай ўтирганларингиз учун афсус қиласиз. Кейин акаларим бу уйни бузуб ташлаб, катта уй қуришади. Албатта, икковимизга алоҳида хона бўлади, мен дарсимни қиламан, сиз менга қараб ўтирасиз. Сигир оламиз, уни ўзим соғиб, сизга сут пишириб бераман, қатиқ увитаман, эрталаблари қаймоқ еймиз. Акаларим токларимизни кўтаради, ёз бўйи дастурхонимизда узум бўлади. Мен майиз қилиш ўйларини ўргандим, қиш учун майиз қиласиз.

Унинг юзларини силаётган муздек кафтларга астасекин ҳарорат иниб борарди.

* * *

Палатани аллақандай дорилар ва хлорнинг ўткири ҳиди тутиб кетган эди. Зулфизарнинг нафаси қайтди, бу ҳолат унга ҳали тирик эканлигини англатар эди. У кўрпа остидан секин қўлларини чиқариб, бармоқларини бўйин томирига қўйди, юраги ҳеч нарса бўлмагандай бир текис уриб турарди. Оёқларини қимирлатиб кўрди, аммо танасининг оғирлигини умуман сезмади. У дорилар таъсиридан вазнсизлик ҳолатига тушиб қолган қиз югуриб бошига келди:

– Она, онажон!..

– Деразани оч... – бурнини жийириб ўтинди у.

Қизи шошиб деразани очди.

Деразадан ёпирилиб кирган мусаффо ҳаво хонадаги ёқимсиз ҳидларни сикиб чиқарди. Палатанинг доғ-дуғ бўлиб кетган деворлари, сим каровотлар, илвираб кетган юраклар бир зум ёддан чиқди. Она ва қиз тоза ҳаводан тўйиб симириди.

– Онажон, тузукмисиз? Ҳамманинг юрагини ёрдингиз-ку, – у юмшоққина кафтларини онасининг пешонасига кўйди.

– Менга нима бўлди?

– Буни сиз биласиз-да, Офтобойим... – ўпкаланди Сора. – Шунчалик ҳам бўладими, одам? Бораяпман деб, бир оғиз қўнғироқ қилиб қўйсангиз бўлмасми? Кўчада шундай бўлиб қолганингизда нима бўларди?

– Шундай бўлишни билибманми? – Гуноҳкорона ўтинди.

– Ҳеч ҳолингизга боқмадингиз-да, она. Икки марта инфаркт ўтказган одам бўлсангиз... Сиз йўлда эмас, уйда ўтирганингизда ҳам ҳамиша эҳтиёт бўлишингиз лозим. Сиз бўлса... куёвингиз телефон қилса, юрагим ёрилиб кетишига бир баҳя қолди. Уям шошиб қолганидан “Тез ёрдам” қаерга олиб борса, шу ёққа эргашиб кетавериби. Ўзимизнинг докторимиз бор, шунга олиб боринглар, дейишни ҳам эпламаган. Энди қўзгатмай турайлик, деяпмиз. Сал ўзингизга келсангиз, кейин ўзимизнинг клиникага олиб ўтамиш.

Палатага пешонасидаги соchlари буткул тўкилиб кетган ўрта ёшлардаги доктор билан ҳамшира кирди.

– Сора Анатольевна, беморни чарчатаюпсиз! – Кулимсираб танбеҳ берди доктор. – Ўзи зўрга жаҳаннамнинг остонасидан қайтариб келдик. Аммо бамайлихотир бўлишга ҳали эрта.

Сора индамади.

Доктор Зулфизарнинг ёнига келиб, қўлларидан тутди:

– Хўш, опажон, аҳволларингиз яхшими?

– Шукур...

– Юрагингиз ўзини эслатиб яна эркалик қилмаяптими?

– Сагал... Аммо кечагидай эмас.

– Яхши. Ҳозир яна укол қилиб қўйишади, бу укол ухлатади. Ухлаб, дам олинг. Айни пайтда сизга ҳеч кимнинг ҳамдардлиги, ачиниши ёрдам бермайди. Кўзларингизни юміб, қимирламасдан ётинг, фақат яхши нарсаларни ўйланг, ҳеч ким билан гаплашманг.

У Зулфизарнинг қўлларини оҳистагина тўшак устига кўйиб, Сорага юзланди:

– Сора Анатольевна, илтимос, бу киши онангиз эканликларини бир муддат ёддан чиқаринг. Бу киши бемор, сиз шифокор, муносабатлар ҳам шу тушунча доирасида бўлиши керак. Ташқарида ўн-ўн беш одам туриби, бири қўйиб, бири ичкарига киришни сўрайди. Илтимос, шуларга жавоб бериб юборинг. Сиз билан бизга халақит беришмасин.

– Хўп, доктор!

Зулфизар гуручи сув қўтмармайдиган қизининг ўзи тенги бир шифокор, эҳтимол илмий даражаси ундан ҳам пастроқdir, бераётган танбеҳ ва кўрсатмаларни индамайгина қабул қилишидан билди-ки, аҳволи жуда жиддий.

* * *

Шу кун тонгни Зулфизар уйғотди. Кеч ётган бўлишига қарамай, жуда эрта уйғонди. Тўشاқдан аста сирғалиб туриб, ҳовлига чиқди. Боботоғ ортидан сеқин тонг ёришиб келарди. Янги тонг қўнғир туман орасида аста тарқалиб бораарди. Осмон этагида ёлғиз милтиллаб турган юлдузга қараб, отаси ва акаларини ўйлади. Уни ҳам шу юлдуз каби ёлғиз ташлаб кетишиди... Қулогига қаердандир йўқлов эшитилди. Йўқловгага диккат билан қулоқ солиб, бу овоз юрагидан чиқаётганини англади. Даҳшатга тушди.

Ажаб бу йўқлов унинг қалбida ҳозир увиллай бошладимикин ёки азалдан бормиди? Қачон, қачон унинг

қалби ўзига аза оча бошладиейкин, қачон? Ё балки энг бошиданоқ, ҳув ўша дамларданоқ бу юраги унга нималардир деб тавалло этгандир? Ахир доим ақлига қулоқ тутиб иш қилди, бошқалардан бир калла бўлса ҳам баланд, бир қадам бўлсада илгари юрди. Ўша пайтлар унинг мана ҳозир ич-ичидан элас-элас сас каби йўқлаётган, уними ё ўзиними кўмайётган қалбига қулоқ солгудай эдими? Энди нега бунча бўзлади бу юрак? Оғриқдан... бари оғриқдан бўлиши керак... Лекин барибир нега келиб-келиб шу бугунга келиб-бирина бирин, худдикни уни маҳв этмоққа қасд этган лак-лак бешафқат қўшин каби умрининг ҳар бир лаҳзаси, ҳар они дабдурустдан, шовуллаб, шувиллаб кўз ўнгидан ўта бошлади? Тушига кирган момоси-чи? Гўдак эмаску, она қолиб, ота қолиб моможонга талпингудек... ўзи момо бўлса, неваралари, қизи, ўғли... Уффф... бу яна ким бўлди? Ие, котибми?

Ҳа, ўша кун... Ўша куни ҳам котиб келиб, эртага райкомга боришларини айтib кетди:

– Номзодликдан ҳақиқий аъзоликка ўтасан. Идорада бўламан, эртароқ кел. Соат тўққизда бюро, пиёдага анча йўл, – кетаётib олдингидек қўшимча қилди:
– Уст-бошингга ҳам қара.

Бу гапдан директорнинг ғаши келди:

– Одамнинг баҳосини кийим-бошига қараб бермайдилар-ку.

– Тўғри, Жўра муаллим, сиз кўп нарсани билан сиз. Аммо, яна бир нарсани билиб қўйсангиз, зиён қилмайди. Яъни зиёли коммунист ташқи қиёфаси билан ҳам оддий чўпондан фарқ қилиб туриши керак.

Директор котибнинг гапларини охиригача эшишиб ҳам ўтирамди. Қўл силтаб хонадан чиқиб кетди. Унга Зулфизарни партияга ўтказаяпмиз, деб, ийғилишмайғилиш судрайверишилари сира ёқмасди. Буни у яшириб ҳам ўтирамди.

Ҳатто Зулфизарнинг ўзига ҳам айтган:

– Сен жуда яхши муаллимасан. Бирорнинг боласини шунча яхши кўриб, қалбининг кўрини бериб, сабоқ ўтиш ҳамманинг ҳам қўлидан келавермайди. Яхши муаллим бўлиш учун эса коммунист бўлиш умуман шарт эмас.

Янги ўқув йилидан учинчи муаллим бўлиб, уларга қўшилган Хадича ҳам Жўра муаллимнинг фикрини маъқуллади:

– Ростдан ҳам яхши муаллим бўлиш учун партияга кириш шарт эмас. Менимча, кўпроқ мансабга интилган одамлар партияга ўтишади.

Ўзига ҳамфир топилгани ҳам директорни тинчитмади:

– Ўқувчиларни яхши бир муаллимдан айришаётгандиларига кўзим етиб туриби.

Бу гаплар Зулфизарнинг ҳам кайфиятини бузди.

Партия аъзоси бўлиш ҳар қанча олиймақом бўлмасин, ёnidagi ҳамкаслари шундай деб тургач, одамга хурсандчилик татирмиди?

Зулфизар бу гапни котибга айтган эди, у жигибийрон бўлиб кетди:

– Бўлмаса, партияга кимни ўтказиш керак? Партия сафлари сендеқ жонкуяр, ўз ишининг устаси, фидойи кадрлар билан мустаҳкамланмаса, у қандай қилиб курдатли бўлади? Қандай қилиб ғояларимизни оддий инсонлар қалбига, онгига сингдирамиз. Бу ғояларни бир рус аёли келиб, бизнинг қишлоқ хотин-қизларига тушунтирса, у ҳар қанча билимдан бўлмасин, қабул

қилдириш жуда қийин кечади. Аммо ўша гапларни ўз ҳамқишлоғи айтса, осонгина қабул қиласди. Шу оддийгина ҳақиқатни тушуниш шунчалар қийинми? Фронтдан қон кечиб қайтган дейман, бўлмаса, ўзим билардим уни нима қилишни!

...Тонг ёришгач, Зулфизар даҳлизда ўтириб, котиб берган китобларни бир-бир вараклади. Кийинди, ўқишдан қайтгандан буён анча ўсиб қолган соchlарини силлиқина қилиб тараб, орқасига бир ўрим қилиб ўриб кўйди, билакдек зулф нозик белида қулф урди.

Худога шукрки, унга осон-осон саволлар беришди. У гапираётгандан бюро аъзоларининг унга ҳавас ва меҳр билан қараб туришлари уни янада байрон қилиб юборди. Айниқса рус тилини ўрганиб, болаларга рус тилидан ҳам дарс бераётганини улар жуда маъқуллашди.

– Сиз энди қиз бола эканлигинизни унунинг. Сиз энди партиянинг аскарисиз. Партия лозим кўрган жабҳада ишлашга доимо тайёр бўлинг, – деди бюордан сўнг сухбатга чақирган бир киши. – Баъзан ишингиздан ташқари топшириклар берилса, вижданан баъжаринг. Бу сизнинг коммунистик бурчингиз.

– У жуда катта одам, – деб тушунтириди котиб ташқарига чиқишигач, – Кадрлар бўйича ҳамма масалаларни шу одам ҳал қиласди. Ана, сен ҳам назарга тушдинг.

Тонг саҳардан туриб, қишлоқдан туман марказигача, у ёқдан қишлоққача пойи-пиёда келиб, кун бўйи оёқда тик турган бўлса ҳам учиб келаётган Зулфизар қишлоққа киргач, ғалати бўлиб кетди. Аввал олдиридан почтачи Салим чўлоқ чиқди. Худди кўрмагандай саломига ҳам алик олмасдан юзини тескари буриб ўтди. Сўнг... Қаердандир увиллаган йўқлов овози эшистилди. Кунига неча уй азахонага айланиб, қишлоқнинг ҳар бурчида йўқлов айтилиб ётган бўлса-да, негадир унинг юраги “шув” этиб кетди. Шошиб уйлари томон югурди.

– Вой, болам, кўзимнинг нури, болам,
Белимнинг қуввати, қалбимнинг қўри, болам.

Энди нима қиламан...

Бошимни қай тошларга урайин,
Мозорингни қаерлардан излайнин,
Оting ўчсин, уруш, отгинанг ўчсин!..

Муштдеккина бошини қаттиқ ерга уриб фарёд чекаётган баҳтсиз аёл унинг онаси эди. Ранглари мурданикӣдай оқариб кетган момоси ҳамон қоқсуяк оёқларини маҳкам қучоқлаганча тиззасини тишлаб ўтиради. Унинг нурсиз қўзларидан ёшлар шашқатор бўлиб қуйилар, аммо у шу қадар бемажол ёки беэътибор эдими, бу ёшларни артиб ҳам кўймасди.

Ўқдек учиб кирган Зулфизар титраб-қақшаб онасини қучоқлаб олди:

– Энажон, ким? Нима?! Нега бундай ўтирибсизлар?

– Ўзи ҳам уларга қўшилиб, йиғлай бошлади.

– Аканг, қизим, акажонинг! Мамарасулдан ажраби қолдик. Энди нима қиламиз, болам!

Орадан ҳафта ўтиб, Үлкан кампир ҳам омонатини топшириди. Ювиб, кафанлагани кирганлар момога кўп ачинишди:

– Икки тиззаси ҳам момоталоқ бўлиб кетган экан, ювиб бўлганимиздан кейин ҳам қўзларидан оққан ёшни кўрдик. Шўрлик, чин дунёга йиғлаб кетди.

Уйнинг ним қоронғу бурчагида бир оғиз ҳам гапирмасдан ўтирса ҳам шу мусибатли кунларда Үлкан кам-



пир оила учун улкан қоя бўлгани ўтирган ўрни бўшаб қолгандан кейин билинди.

Момоси бор эди, умрларида кўрмаган аллақайси юртларда юрган бўлсалар ҳам, отаси, акалари бор эди. Бирин-кетин келган уч жудолик юракларига беадоғ оғриқ ва қўрқув солди. Ҳовлида бир хазон шитирласа ҳам Зулфизарнинг юраги қинидан чиқиб кетгудай бўларди.

Шу оғир кунларда Хадича унинг ёнидан кетмади. Тушгача мактабга бориб келар, сўнг намозшом тушгунча уларнида ўтиради.

Бир куни ёринчоқда маккажӯхори майдалатиб қайтаётгандан Жўра муаллимдан гап очди:

– Жўра ака жуда яхши одам, ҳар куни сени сўрайди. Эркак-да, ёнингга келолмаса... Лекин ўзини қўярга жой топа олмай юриби.

Зулфизар индамади.

– У сени яхши кўради, – бир пасдан кейин қўшимча қилди Хадича.

Буни Зулфизар яхши биларди, аммо минг яхши одам бўлса ҳам йил ўн икки ой ранги ўчиб кетган ҳарбий кийимда бир оёгини судраб юрадиган Жўра муаллимни ҳеч қачон ўзига муносиб кўрмасди. Эрта-индин уруш тугайди. Отаси, акалари қайтиб келади. Тўкин-сочин, яхши кунлар бошланади. Улар шаҳарга кўчиб кетишида. Зулфизар баҳтини ўша ёқлардан топади.

– Ҳой, эшитяпсанми? – Хадича уни уйғотмоқчи бўлгандай туртди.

– Ҳа.

– У сени яхши кўради, – такрорлади Хадича.

– Нима бўпти?

– Унга турмушга чиқишингни истаяпти. Агар рози бўлса, совчи қўяман, деди. Мана шу оғир кунларда отанг ва акаларинг келгунча бошларингда бир эркак киши бўлгани яхши-да. А, нима дейсан?

– Қўйсанг-чи!

– Ундей дема, Зулфизар! – ялинишга тушди Хадича. – Унга жудаям раҳмим келади. Соғлифи йўқ, онаси ҳам ўтиб кетди, бир уйда бир ўзи яшайди.

– Раҳминг келаётган бўлса, ўзинг тег! У менинг тенгим эмас, – ижирғанди Зулфизар.

– Жон деб тегар эдим, у бебаҳо инсон, лекин у мени эмас, сени сўрайяпти.

– Қўй шуну!..

Жўра муаллим барibir одам қўйди. Совчилари қуруқ қайтгач, ўзи қўнгил ёрди:

– Урушдан қуруқ суратим қайтган эди. Ҳали ҳаётида бирон қизнинг қўлини ҳам ушлаб кўрмаган, қалби орзуларга тўла не бир йигитларнинг парча-парча бўлиб, юзлаб бўлакларга бўлинниб кетганини кўрдим. Бу бўлакларни йигиб, дафн қилишнинг ҳам иложи йўқ эди. Бунга ҳеч кимнинг вақти ҳам йўқ эди. Мени ортга қайтаришди, аммо мен ўша қирғинбаротлар ҳамон давом этаётганини яхши биламан. Ўқларнинг визиллаб учган овозлари, бомба портлашлари, аскар йигитларнинг инграшлари қупоқларимнинг остидан сира кетмайди. Шу ҳолда одамзод нимагадир қизиқиши мумкини? Йўқ, албатта. Аммо, ишонсанг, сен мени ўша тубсиз чоҳдан юқорига олиб чиқдинг, мени ҳаётга қайтардинг. Сени яхши кўриб қолдим. Агар йўқ десанг... Йўқ, мен буни кўтара олмайман. Хўп, дегин. Ишон, бир умр бошимда кўтариб юраман.

Қаршисида яланғоч новдадек қалтираб турган йигитга нисбатан қўнглида заррача рағбат туймади. Унинг дийдаси қаттиқ эди.

– Мени кечиринг, Жўра ака. Мен ҳали ўқимоқчиман.

– Бирга ўқиймиз.

– Йўқ, бунинг иложи йўқ, – у шартта ўрнидан туриб, хонадан чиқиб кетди. Аччиғи келди. “Ҳар ким ўз тенгини билса экан! Энди Зулфизар келиб-келиб, шу чўлоқча... Ё, тавба-еий!”

Шундан кейин ҳам Хадича кўп қистади:

– Бунча тошбағир бўлмасанг? Юришини қара, адойи тамом бўлди, шўрлик.

Аммо ўзи Зулфизарни бошқа безовта қилмади.

Уруш тугаб, мактабга янги муаллимлар келгач, у туман марказидаги мактабларнинг бирига оддий ўқитувчи бўлиб ўтиб кетди.

Зулфизар елкасидан юк тушгандай енгил нафас олди.

Хадича хафа бўлди:

– Мен уни яхши кўрардим, – деди бир куни кутилмаганда.

Зулфизар ҳайрон бўлди:

– Мени унга кўндиromoқчи бўлиб, шунча асабимни бузганларинг тил учиди экан-да...

– Мен уни ҳамиша яхши кўрганман. Унга тег, унга раҳм қил, деб сенга ялиниб юрган пайтларимда ҳам яхши кўрганман. Ўша тер ва қон ҳиди сингиб кетган кителини жойнамоз қилиша тайёрман ҳамиша. Уни яхши кўрганимдан, унга раҳмим келганидан, унинг баҳтили бўлишини жуда-жуда истаганимдан ялингман сенга. Ким билан бўлса ҳам майли, баҳтили бўлсин шу йигит, дедим.

– Энди-чи?

– Энди... Билмадим, бу ёғи нима бўлади? Юрагидаги яралар битгач, учрашиб қолсак, агар унгача бирор-ярим чаққонойлар илиб кетмаса, ҳаммасини ўзим айтаман.

– Оббо сен-еий! Кўнглинг кетган ошни мақтаб бирорларга тавсия қилиб юришингнинг маъниси нима? Худди ўзинг энди ўн етти ёшга кирган пари-пайкарсан. Ҳали сенинг қўлингни сўраб, Бойчибор минган неча Алпомишлар келади. Лекин сен пайсалга солиб, кечиқиб қолма, ўзингни ҳам ўйла.

* * *

Зулфизар ярим тунда ўйғониб кетди. Вақтни билиш учун аввал атрофга, сўнг ойнинг заифгина нурлари сизиб кираётган деразага қаради. Қаршидаги каравотда қизи ухларди. У бир муддат қизига тикилиб қолди. Бегона тўшак нокулайлигиданми, у бир пасда бир неча бор ағдарилиб олди. Зулфизар уни ростдан ҳам жуда эрка ўстирган, ҳаётида бирон нокулайлик бўлмаслигига ҳаракат қилган. Энди!.. Э-э, худо, авлоддан авлоддага бойлик мерос бўлиб ўтишини, хасталик ўтишини биларди, аммо баҳтсиз қисмат ҳам мерос бўлишини билмаган экан. Агар шундай бўлмаганда Зулфизарнинг тақдири қизида тақрорланиши шартмиди? Бир замонлар ўзи тақдирнинг талхўр насибасини татиб кўрганда бунчалар эзилмаган эди, аммо қизининг ағдар-тўнтар бўлиб ётган тўшаги унинг ҳаётини издан чиқариб юборди, худди поезд рельсдан чиқиб кетгандай... Эрини ярим тунда ўйнашига қўшиб ҳайдаганда ўзига ўзи тасалли берга олган эди: “Бир кам дунё, деганлари рост. Менинг камим шу эр бўла қолсин, энг муҳими, жоним соғ, болаларим бағримда. Тирик ва саломат бўлсанг, баҳт, омад, бойлик ўзи сени излаб топаверади”.

Гарчи кейинчалик ҳаёти бекаму-құст бахтга тұлиб үтмаган бўлсада, эрсиз қолганига сира афсусланмади.

Эрталаб Сора уни уйғоқ ҳолда кўриб, суюниб кетди. Нам сочиқ билан юз-қўлларини артиб, овқатлантиргач, хонага бир қизни бошлаб келди:

– Онажон, бу қиз менинг шогирдим, илмий иш қиляпти. Жуда билимли, зийрак қиз. Мени бир зарур масала бўйича клиникага чақиришяпти. Шундай бораман-у, қайтаман. Бу қиз мен келгунча сизга қараб туради, – сўнг қизга тайинлади. – Доктор билан ҳамширалардан ташқари ҳеч ким кирмасин.

– Бу қизни ташвишга қўймагин, болам. Ахволим яхши, ўзим ётавераман, – хижолат бўлди Зулфизар. – Келгунингча шу ернинг докторлари қараб туришар...

– Йўқ, она, сизни шундай ташлаб, хотиржам кета олмайман. Ёнингизда ўзим бўлмасам ҳам, ўзимнинг ишонган одамим туриши керак.

Ҳамшира укол қилиб кетгач, энди кўзи илинаётган эди, эшик “ғийқ” этиб очилгани эшитилди. Зулфизар негадир хавотирланиб эшикка қаради. Остонада узоқ ҳасталиқдан турган бемордек ранглари сўлгин, қарашлари ҳадик-хавотирга тўла Фанишер турарди.

– Ассалому алайкум.

Шогирд қиз ўрнидан туриб, бир Фанишерга, бир беморга қараб қолди. Фанишер унинг нигоҳларидаги иккиланишини сезиб, изоҳ берди:

– Сиз бир айланиб келинг, бу кишига ўзим қараб тураман.

Қиз бир дақиқа ҳаяллаб турди-да, сўнг индамай чиқиб кетди. Нима ҳам десин, күёв бўлса.

Фанишер унинг қаршисидаги курсига ўтириди:

– Мени кечиринг.

Бошқа пайт бўлганда юзига бир шапалоқ тушишарди. Ҳозир бунинг иложи йўқ. У индамай юзини де-вор томонга ўгириб опди.

– Тўғри, ичингизда қарғаётгандирсиз, турқинг кўрсин сен итнинг, деётгандирсиз? Лекин бу сиз ўйлаганчалик итлик эмас. Билсангиз, ахволингизни кўриб, ўзимнинг ҳам бўларим бўлди. Сизга бир гап бўлганда, ўзимни кечиролмасдим...

– Уша “бир гап” бўла қомапти-да, – шартта унинг гапини кесди Зулфизар, аммо ўз овозининг ҳасталиги-га қарамай бундай кескир чиққанидан ўзи ҳам ҳайрон қолди.

Күёвига нафрати шунчалик кучайган эканки, бор алами куч бўлиб бўғзидан отилди гўё.

– Аслида бу шунчаки тасодиф эмас. Мен дуч келган хотинга ёпишиб юрадиганларданам, уйимга, тўшагимга ҳар кимни судраб келадиганлардан ҳам эмасман. Лекин барибир бир нарсани тан олишим ке-рак. Анчадан буён кетмоқчи бўлиб юрган эдим. Ҳеч жазм қила олмаётгандим. Охири кетсам, аввалроқ ке-тишим керак экан, сизни инфаркт олдирмай...

– ...

– Нега кетмоқчи эдинг, демайсизми?

Унинг миқётмаганидан нимагадир баттар қизиши индамас күёви, сўнг қирқ қайта қайтариб, ёд олгандек деди:

– Қизингиз мени ҳеч қафон яхши кўрмаган!

Зулфизар икки чаккасидаги томирлари гул-гул лўқиллай бошлаганини сезди: гапини қаранг бунинг? Шу ёшида “севди-севмади” эсига тушибди-да, ора-да икки бола туғилиб, бўйи бўйинг билан тенг бўлиб қолганда-я?

Жирканиб, юзини терс ўгирди. Аммо ичидан ни-

мадир барибир күёвига нисбатан бу қадар бешафқат бўлмасликка ундан турарди. Ҳар не бўлганда ҳам ўғлидан-да меҳрибони шу эди, боласининг ортидан боласидек... Унинг ичидан кечётган хавфли ҳаёлларни сезгандек Фанишер ҳам дадиллик билан гапида давом этди:

– Менимча, у пул, мол-дунё, шон-шуҳратдан бошқа ҳеч нарсани яхши кўра олмаса керак. Уйланган кунимдан буён кўпроқ пул топай, тезроқ илмий ишимни ёқлай, номзод бўлай, доктор бўлай, деган ташвишлар билан яшаб келаяти. Болаларнинг олдида ҳам ўрним йўқ. Қўшниникига чиқиш учун ҳам онасидан рухсат сўрайди. Шу пайт ёнгинасида ўтирган ота эса улар учун бир жонли ҳайкалдан бошқа нарса эмас. Албатта-да, уй онанини, машинани она олган, она ҳайдайди, она оғзиларидан чиқкан ҳар бир истакни муҳайё қиласи. Бу ёқдан сиз, у ёқдан боболари тўлиботишиб келади. Менинг ота-онамда дуо билан меҳрдан бўлак ҳеч нарса йўқ. Ўзим шунча йилдан бери илмий ишимни ёқлай олмай сарсонман. Маошим тушлигим билан йўл кирамни зўрга қоплайди. Бу уйда доимо кераксиз буюмдек ҳис қиласман ўзимни.

У анча пайт жим қолди. Бу орада Зулфизар ўйларди: индамайгина шунча гапни ичига ютиб юрган экан-да, ғалча. У бир умр шу ғалча эркакларни ёмон кўрди. Илк бор турмушга чиққанида шу сабоқ бўлмаганимиди? Айнан мана шундай мулойим супурги эрлар бир кун келиб албатта тузлиғингга тупурмай қўймайдилар. Яна кетар чоғи ҳамма айбни ўзингга юклаб, қорага чаплаб ташлайди. Ўзлари эса пахтадек оқ. Ахир қилгани ҳам, энг яхши кўргани ҳам шу қизи бўлди. Чунки қизнинг ўзи шунга арзиди. Унга ўхшаб адашмади, ўзи севди, ўзи тегди ва... энди факат ўзи куйиши керакми? У она бўлиб индамай бир четда қараб тураверсинми? Қизини сўрагувчилар кўп бўлди. Ўзи бир қиз, ҳусни ўн қиз эди-да Соранинг. Ҳозир ҳам кўрган кўзни куйдиргудек. Аммо негадир бироз эркак-часигами-еъ фикрлайди. Эри-хотин ажралиб кетишса ҳам, Сора бир зум ота эътиборидан четда қолмади, эрка, дангалрок бўлиб ўси. Шу лапашанг эрига ҳам оёқ тираб туриб олгани учун ҳам узатишганди. Бунинг нимасини севиб қолган экан: шу ақли, шу ҳусни билан?! Бу шўртумшуғам шўр-шўрлаб туриб олди-да. Ўшанда ота-онасининг камбағаллигини ўйлаганимиди? Шу қиз менга лойиқми ўзи деганимиди? Ораларидаги фаркни, тафовутни энди билибдиларда? Олтин балиқчаси жонига тегибида? Зулфизар ўзини бу ўйлардан ҳар қанча тийишга ҳаракат қилмасин, яраланган она шер каби фарзандининг куйига ана шундай аламли ўйлар фарёди бўлиб бўғзини кўрғаб, саннаб ташлашдан тийиб турарди. Умуман, нимаям деб қарғасин? Ўта маданияти бўлишнинг шуниси ёмон-да, ғазабинг бостириб келганда ҳам тилинги тишлаб тураверасан, анча пайт жим бўлиб қолган күёв яна хижолатли томоқ қирди. Энг муҳим гапни айтиш учун тараффудланаётган эди чамаси. Ниҳоят ёрилди:

– Мени кечиринг, назаримда мен ўз муҳаббатимини топгандайман. У ҳаётини менсиз тасаввур қила олмайди. У худди онамга ўхшайди, мени тушунади, мени аяди. Мен унга ўйланишга қарор қиласи. Сиздан ягона илтимосим, Сорага ҳеч нарса деманг. Даволаниб чиққанингиздан сўнг ўзим айтаман.

Ҳар нима бўлганда ҳам Зулфизар хиёнаткор күёвдан бундай айлов ва кескин қарорни кутмаган эди. Агар Фанишер у ўйлагандай каловланиб ўзини оқлаганда эҳтимол ҳали бери жаҳлидан тушмаган

бўларди. Ўзича бу оғриқли тишни қизининг ҳаётидан қандай қилиб оғриқсиз ҳолда олиб ташлаш режасини топа олмай ётганди. Аммо күёвнинг кутилмаган қарори уни шошириб қўйди. Назаридаги қизи, неварарапи катта шаҳарда ёлғиз, бекаров қолгандаи кўрқиб кетди. У қошларини чимириб, ижирғангандай киноя билан Ганишерга қаради:

– Ўзингизнинг нафсингиз, ҳою ҳавасларингиз учун болаларингизнинг кўнглини яримта қилиб кетмоқ чимисиз?

– Болаларнинг кўнглида мендек отага умуман эҳтиёж йўқ.

– Сиз шундай деб ўйлайсиз, яъни сиз қандай ўйласангиз, шундай кўрасиз. Эҳтимол ҳозир уларнинг сиз билан умуман ишлари бўлмаётгандир. Улар ҳали бола-ку. Улар учун ўз ташвишлари, ўз дунёларидан бўлак ҳеч нарсанинг қизиги йўқ. Аммо ташлаб кетсангиз, аниқ, бўшаб қолган ўрнингизга қараб “дод” деб юборишади. Ана шунда, уларга жуда кераклигинизни билган дақиқаларда орtingизга қайта оласизми? Балки унгача бу оилада ҳам “ота” деб этагингизга ёпишувчи бегуноҳ фарзандлар дунёга келар. Ана шунда нима қиласиз?

Зулфизар табиатан жуда яхши нотик эди. Истаса, гўдақдек бегуноҳ одамни ҳам, шайтонга дарс бергувчи товламачини ҳам ўз йўриғига сола олар, шу истеъододи билан ишлаб юрган пайтлари неча юзлаб рўзгорларни сақлаб қолган эди. Осмондан келаётган куёв унинг гапларидан кейин жим бўлиб қолди.

Эшиқдан кириб келган доктор ўртадаги ёқимсиз сухбатга нуқта қўйди:

– Ие, Сора Анатольевна қаерда? Сиз кимсиз, сизни палатага ким киргизди? – чинакамига уришиб кетди у.

– Мен куёвлариман. Қараб тургандим...

– Сора Анатольевна шифокор бўлгани учун беморнинг ёнида бўлишига руҳсат берганимиз, бўлмаса, ўзимизда ҳам қаровчилар етарли. Боя ҳамшира укол қилган эди, сиз туфайли бемор ухлаёлмай карахт бўлиб ётиби. Қани, тез чиқинг палатадан.

Ганишер палатага қандай мардоновар кириб келган, шундай учиб чиқиб кетди. Ўзини беобру қилиб ҳайдаб чиқарган доктордан миннатдор бўлди. Агар шу доктор кириб келмаганида, ким билади, бу қайноаси...

* * *

Нихоят йиғлаб-юпаниб ғалаба кунларига ҳам етиб келишиди. Ҳамманинг тинка-мадорини қуритган уруш тугади. Ҳаётларида бирон ўзгариш юз бермаган бўлсада, ҳамманинг кайфи чоғ, худди шахсан ўзи Рейхстагга ғалаба байроини қадаб қайтгандек мамнун эди.

Бундан беш йил аввал машиналарни тўлдириб-тўлдириб, урушга кетган йигитлар энди бирин-сирин, бугун бирор, эрта яна кимдир, индин ҳеч ким, кутаётган одамлар зик бўла бошлаганда елкасига юқ халта осиб олган, ҳорғин кўзлари соғинчга тўла яна кимдир қишлоққа кириб келарди.

Қишлоқ четидан ўтган кичкинагина ариқ кўп-ригидан туман марказига элтувчи узун яйдоқ йўл томон кескин бурилиш бўлиб, шу туфайли кўприкдан ўтиб қаралмаса, бу узун йўлдан қишлоққа келаётган одамни кўриб бўлмасди. Қишлоқ қариялари кўприк ортидаги толлар соясидан ўзларига жой қилиб олишди. Ким бир парча шолча, ким жанда кўрпача, ким эски бир жабдуқ олиб чиқиб, эрта тоңгдан қора кечгача шу ерда ўтиришни одат қилди. Қишлоққа қайтган

аскарларнинг биринчи сухбати ана шу қарияларга насиб қилар, бирор-ярим келиб қолса, уларнинг атрофига тупроқ ҷангитиб юрган болакайлар дарҳол чўп отларини миниб, аскарнинг уйидан суюнчи олгани чопишар эди. Соғинчга айланган умидвор қишлоқ қиийқириб келаётган болаларни кўрганда қувончдан бир қалқиб кетгандай бўларди. Ҳамма кутарди. Урушнинг биринчи кунлариданоқ қора хат олиб, беш йилдан бери азалик кийимини ечмаганлар ҳам, неча вақтлардан буён на яхши, на ёмон хабар олмаганлар ҳам, урушга бергудек ҳеч кими бўлмай, урушга ҳеч кимини бермаганлар ҳам-ҳамма бутун вужуди билан йўлга қаради.

Мамараим ғалабадан роса бир йил ўтгач, уйга қайтди. У қайтгунча Зулфизар қишлоқнинг катта одамига айланган, уни мактаб директори қилиб тайинлашган эди. Ойсултон хола ўғлини бағрига босиб туриб, ҳушини йўқотди. Йўқотишлар, йўқчиликлар, зориқиб йўл қарашлар уни бутунлай ҳолдан тойдирган эди. Ҳалиям кўнглидаги “милт” этган умид унга матонат бағишлаб, ўғлига рўбарў келгунча оёғида тура олишига сабаб бўлди.

Уй бир пасда қўни-қўшни, қариндош-урӯғ билан тўлиб кетди. Хотин-халаж қий-чув қилиб, Ойсултон холанинг юзига сув сепа-сепа ўзига келтириб олишиди.

Оқшом чўкиб, келди-кетди узилгач, уйда она болалар ёлғиз қолишиди. Зулфизар елиб-югуриб ҳамма жойни тартибга келтириди. Ҳовлига шолча тўшаб, шолчанинг гирдини айлантириб кўрпачалар солди. Қишлоқ оқшоми жуда гўзал эди. Айниқса, азиз одамларинг ёнингда бўлса, бу гўзаллик янада тўлақонли ва завқли бўлади.

Зулфизар қанча ўқтам қиз бўлса ҳам акасидан тортиниб турар, кўнглининг қайсиdir бурчида “ростдан ҳам шу одам менинг акаммикин?” деган хавотир сира кетмасди. Сабаби, акаси урушга кетаётгандан жуда ёш, устки лабларини эндиғина майин тук қоплаган ўспирин эди. Бугун кўрпачага оёқларини узатганча, ёнбошлаб олган кишининг овозлари ҳам, қарашлари ҳам улар кузатган ўша ўспиринга заррача ўхшамас эди. Факат у ёдга солаётган хотиралар, соғинч ва меҳр тўла нигоҳлар “Мен сенинг акангман” деб турарди. Унинг олдида Зулфизар яна ўзини ёш қизалоқдек ҳис қиларди:

– Агар кўчада қаршимдан чиқиб қолсангиз, мен сизни умуман танимас эдим, – нихоят кўнглидагини айтиб қўя қолди у.

– Сен ҳам анча улғайибсан. Бекор юрмай, ўқиб олибсан, баракалла, – сўнг кулиб қўшимча қилди: – Директор бўлибсан.

– Номига директорман-да. Ўзи тўрт киши ишлаймиз. Мен ҳам ҳамма қатори дарс бераман, фақат жа-вобгарлиги зиёда.

– Шуям катта гап-да.

– Мени вилоятдан ўқишига юборишмоқчи эди, онам ёлғиз деб, кета олмадим. Мана, энди сиз борсиз, ўқишига бораверсан ҳам бўлаверади.

– Бўлади, синглим, – мамнун бош ирғади ака. – Шунча пайт онамга қараб, рўзгорни эплаб ўтирдинг, раҳмат сенга, буёғига ўзимга ташла ҳаммасини.

Болаларига термилиб, жимгина ётган Ойсултон хола ака-сингилнинг меҳрибонлигидан, ўғлининг жўмардлигидан хурсанд кулимсиради:

– Сен буни кўп талтайтирма. Тоғанглар “акаси келсин” деб юришганди. Энди қирқ минг қалин, қирқ кўй оламиз-да, узатиб юборамиз.

— Бекоргинани айтибсиз, мен сизга молмидимки, сотсангиз.

— Удум-да, мени ҳам сотишган, энди сени сотамиз, аканга ҳам бирони сотиб олиб берамиз, — баттар жигига тегарди онаси.

— Она, бундай хунук гапни ҳазил қилиб ҳам айтманг, илтимос. Одамни сотишмайди-ку ахир, ҳеч қачон сотишмаган ҳам. Беш-түрт сүм қалин пули беришса, шуниям қизининг рўзгорига нимадир қилиб жўнатган. Сотади, дейилса, одам ғалати бўлиб кетади.

Она кулди:

— Сени сотмаймиз, кимни севсанг, шуни сотиб олиб берамиз.

— Қўйинглар. Менга бунча ёпишдиларинг!..

— Бўпти, бўпти. Бу масалани ёпамиз... — Гапни бошқа ёққа бурди Мамараим.

Улар ярим тунгача шу зайл гаплашиб ўтиришди. Онаси билан акаси ётган жойларида ухлаб қолишгач, Зулфизар кўрпа олиб чиқиб, уларнинг устига ташлаб кўйди. Ўзи ичкарига кириб ётди.

Бу оила уруш тугаганини, ҳали унинг яралари битмаган бўлса-да, шу осуда тунда илк бор ҳис этишди. Болалиқдан сахармардонда туришга одатланган Зулфизар ташқарига чиққандаги гимнастёркасини елкасига ташлаб олган Мамараим бир томони нураб кетган эски тандирнинг бошида турарди. Гарчи саратон чилласи бўлсада, тонг салқингина эди. Зулфизар шошиб юзкўлини ювди-да, акасининг ёнига бориб, салом берди. Назарида кечадан бери шунчалик кўп вақт ўтган эдик, юраги соғинчдан ёрилай деб турарди.. Қиз бола бўлмаганда акасини кучоклаб олишга тайёр эди.

— Яхши дам олдингизми, акажон?

— Ҳа, раҳмат. Хўроз қичқириғидан уйғониб кетдим. Ҳали тўлик уйғонмаган эдим, бир пайт от кишини эшитдим. Тушиммикин, хушиммикин деб, ёнбошимга қарасам, муштдайгина бўлиб онам ётиби. Урушда баъзан қишлоқларга яқин бориб қолсақ, кўйкўзиларнинг маъраши, хўрозларнинг қичқиришларини эшитсам, юрагим кенгайиб кетгандай бўлар эди. Кўз олдимга кўй-кўзилар ўтлаб юрган ям-яшил адиirlаримиз келарди. Одамзод қизиқ бўлар экан, ажал нақд, оёқларимиз ости тўла мина, қулоқларимиз остида ўқлар визиллаб учиб ётиби, аммо бирон кун, бирон дақиқа уйга қайтиш, тинч, осуда ҳовлингда чалқанча ётиб, юлдузларга термилиш, адиirlарда яланг оёқ юргуриш орзуси кўнгилдан кетганий йўқ. Командирларимиз “Она Ватан учун олға!” деб жангга солишганда ҳамиша кўз олдимда мана шу қадрдан қишлоқ, ерга қапишиб мунғайибгина турган мана шу уйимиз пайдо бўлар эди, — Мамарайим тандирга қаради. — Бу ўша биз қўйиб кетган тандирми? Қара-я, ҳеч нарса қилмапти.

— Ҳа, энди... Уйда тандир-тандир нон ейдиган одам бўлмаса... онам иккаламиз ўчоққа бир нон пишириб олсақ, тўрт кун еймиз. Шу тандирни олиб ташлай деб қанча уриндим, онам қўймади, — Зулфизар ерга қаради.

— Нега олиб ташламоқчи эдинг?

— Энам, қачон қарасам, тандирни қучоқлаб йиғлайди. Сенинг ҳам ичинг куйик, менинг ҳам ичим куйик, Тандир она Худодан болаларимни сўраб бер, деб, йиғлайверарди. Охири бир кун кетмонни олиб, тандирнинг бошига келдим, яна бир марта шу ерга келиб йиғласангиз, шу тандирни чопиб ташлайман, дедим.

— Бечора энагинам!... — чуқур хўрсинди Мамараим.
— Биз иккаламиз отамнинг, акаларимнинг ўрнини бил-

дирмай, онамни авайлаб, юрагидаги яраларга малҳам бўлишимиз керак.

— Ҳа-а...

Райкомдагиларга Зулфизарнинг ўқиш ҳақидаги режаси маъкул тушди:

— Фақат Тошкентга эмас, вилоят партия қўмитаси Москвадаги олий партия мактабига маҳаллий хотин-қизилардан бирон номзод суришираётган эди. Борасиз, ўқийсиз, турар жой билан таъминлашади. Маoshingiz берилади. Хуллас, бу жуда катта имконият!

Зулфизар райкомдан чиққандаги айни туш маҳали эди. Терак учига қадалиб қолган саратон күёши еру осмонни аёвсиз қиздирав, дов-дараҳатлар, йўллар, одамлар ҳансираф нафас олар, ана шу оташгоҳ ичра Зулфизардан баҳтли одам гўё дунёда йўқ эди. Бир томони бепоён адиirlар билан туташ яйдоқ йўлда кетиб борар экан, дамба-дам рақсга тушаётгандек айланар, назарида у эмас, унинг атрофида, унга ҳавас қилиб дунё айланётгандек эди.

Мамарайим ҳовлининг бир четида сувоқ учун лой тайёрлаётган экан, ҳамон ўғлиниң дийдорига тўймаган Ойсултон хола ҳам унинг ёнида гап бериб ўтиради. Зулфизар уларни кўриб, дарров суюнчилади

— Эна, ака! Мени Москвага, олий партия мактабига жўнатишяпти.

Ойсултон ҳоланинг қовоғи солинди:

— Ўқиб, яна ким бўлмоқчисан? Шаҳар олиб бerasanmi? Бир дипломинг бор, ишлайпсан, яна нима керак сенга? Бировингни Худодан сўрай-сўрай, шу томонлардан зўрға олиб келдим. Энди сенинг дардингда куйишим қолганми? Ҳеч қаерга бормайсан.

Акаси эса хурсанд бўлди:

— Ундей деманг, эна. Қизингиз урушга кетаётганий йўқ-ку, ўқишга кетаяпти. Москвада ўқиб келса, камида бир туманни сўрайдиган арбоб бўлади. Нодирабегимлар ҳам сизнинг қизингиздай бировнинг эрка қизи бўлган. Қаранг, ҳам арбоб, ҳам шоира бўлиб, тарихда номи қолди.

Ойсултон хола қатъий бош чайқади:

— Қўй, болам. Менга шунинг арбоблиги умуман керак эмас. Жойи чиқса, узатсам, тиниб-тиниб, ўзи билан ўзи бўлиб кетганини кўрсам бўлди. Ўзи икковигиналаринг бўлсанглар, биринг Ироқда, биринг йироқда... Йўқ, мен бунга чидай олмайман.

— Узатишга улгурасиз, эна. Ҳали ёш, индаманг, ўқиб келсин. Тўй қилишга шошаётган бўлсангиз, мана, мен уйланаман, — у кулиб Зулфизарга кўз қисиб кўйди.

— Кейин, келин-неваралар уйингизни тўлдириб юборади. Хўп денг, энажон, ўқиб келсин шу қизингиз!

Зулфизар ўқишга кетгунча акаси уйнинг у ёқ бу ёғини шуваб, қўшни тоғанинг қизини қозон-товоғига эга қилди.

...Ву шу тариқа Москва таҳсили ҳам бошланиб кетди. Биринчи дарсда урушва унинг қаҳрамонлари, ғалабава уни таъминлаган буюк куч ҳақда ёқимсиз мунозара бўлди. Муаллим — сийрак соchlари сап-сариқ, уккини-кидек кўзларида қандайдир ёвуз туйғу кўриниб турган ранги совуқ киши “Урушда қатнашган ҳар бир аскар шак-шубҳасиз қаҳрамон, лекин буюк ғалабани буюк рус ҳалқи таъминлади”, деб айтди. Зулфизар рус тилини яхши тушунса-да, ҳали эркин мунозара қила олмас эди. “Нега? Менинг отам билан акам ким учун, нима учун жон берди?” деган саволи бўғзида қолиб кетди. Лекин биринчи қаторда ўтирган узун бўйли туркман йигит ўрнидан туриб кетаверди: “Бу гапингиз Урта Осиёдан келиб, қон дарё бўлиб оқкан жанггоҳларда жон



олиб, жон берган йигитларга нисбатан беҳурматлик эмасми?" деди.

– Мени кечиринг, муҳтарам зот, – муаллим мазах қилгандай қўлларини кўксига кўйиб, бошини эгди. – Исли шарифингиз?

– Оғамурод Сапарович!

– Ҳа, Оғамурод Сапарович! Мен жуда афсусдаман, аммо бу айни ҳақиқатнинг ўзи. Масалан, бир умр пахта даласидан чиқмаган, кетмондан бошқа қуролни ушлаб кўрмаган ёки бир умр молнинг изидан юрган чўпонда ҳарбий стратегия, тактика, манёвр каби малакаларни шакллантириш учун қанча вақт керак, биласизми? Бир аср! Остонада турган душман сизни бир аср кутиб турармиди? Асло! Тўғри, сизнинг қондошларингиз ҳам бу урушга ташланди, аммо улар Улуғ Ватан ҳимояси учун қаердадир жонли девор, қаердадир душманнинг кўзига катта армия бўлиб кўриниш вазифасини баъжарди, холос. Шубҳасиз, уруш қурбонсиз бўлмайди, қурбонлар кўп бўлди. Сизлардан ҳам, бизлардан ҳам, душман томондан ҳам кўп қурбонликлар берилди. Мен юқорида таъкидлаган фикримни яна бир карра таъкидлашни истайман, яъни ғалабани буюк рус халқи берган қурбонлар таъминлади.

Шу билан мунозара мавзуси тўғридан тўғри Ўрта Осиёга кўчиб кетди. Муаллим 30-йилларда Ўзбекистонга келган экан...

– Далада ишлайдиган аёлларнинг бошида 30-40 сантиметрлик цилиндрга ўхшаш бош кийими. Бу цилиндрни неча хил рангли рўмолни ўраб-ўраб ясашар экан. Қанча вақт далама-дала юриб, бу бош кийими ишлаганда халақит беришини уларга тушунтира олмадик. Шуни кийиб ишлаганларга иш ҳақи бериilmайди, дедик охири. Энди бизнинг қорамиз кўринса, ҳалиги цилиндрларни бошларидан ечиб, шох-шаббаларнинг тагига яшириб қўйишарди. Кетишимиз билан яна ўша лайлак уяларини бошларига кўндириб олишарди. “Вой, жонининг фойдасини билмаган халқ-ей!” деб роса жиги-бийроним чиқарди. Гап йўқ, ажойиб халқ экан бу ўзбек деганлари, – у кўзларини артиб-артиб роса мириқиб кулди, унга қўшилиб, бутун аудитория кулди. Аудитория тинчигач, у кўзларини ишқалаб-ишқалаб, узр сўради: – Орангизда, шубҳасиз, ўзбек ўртоқларимиз ҳам бор, узр. Аммо шу нарсани айтиш им керакки, меҳнатларимиз зое кетмади, ҳозир уйда ўтирган кампирлардан бўлак ҳеч ким цилиндр киймайди. Ўзбек қизлари Москвада таълим олмоқда. Мана, сизга жонли мисол, – у ҳамманинг диққатини Зулфизарга қаратди. – Ислмингиз нима?

– Зулфизар...

– Зулписар? Ўзингиз жуда гўзал қиз экансиз. Аммо тўғрисини айтганда, бу исм сизга унчалик ярашмаялти. Келинг, сизга янги чиройли исм қўймиз. Масалан, Зинаида! Зина! Зиночка! Айтиш ҳам осон. Отангизнинг исмлари?

– Абдиқодир...

– Зинаида Абдуқодировна! Йўқ, бунчалик мураккаблаштириш-нинг нима кераги бор? Абдиевна бўла-қолсин, Зинаида Абдиевна! Қаранг, қандай жарангдор ва улуғвор! Ўтиргинг, Зиночка! – Муаллимнинг совук юзига мамнуният ифодаси қалқди.

Танаффусга чиқишгач, Зулфизарнинг атрофини талабалар куршаб олди:

– Зина, Зиночка! Сизларда ростдан ҳам цилиндр кийиб юришадими?

– Унинг усти ростдан ҳам лайлак уяга ўхшаш очиқ бўладими? Нега?

Бу қизиқувчанлик бир томондан унинг нафсониятини оғритса, иккинчи томондан изза қиларди. Аслида аёлларнинг салла ўраб юришларини унинг ўзи ҳам жуда ёмон кўрарди, лекин шу саллани деб бу тахлит изза бўлиш!.. Унинг ўқтамлiği тутиб кетди. Ҳаммани гап билан қайириб-қайириб ташлади:

– Керак бўлса, гўзал Афродита билан Клеопатранинг бошида ҳам цилиндрга ўхшаш қалпоқ кўрганман. Бу шаклдаги кийим аёл кишининг юзини чўзинчоқ қилиб кўрсатади. Бунинг устига бошингизда узунчоқ юқ турса, унинг тушиб кетмаслиги учун ҳамиша гавдангизни тик тутиб юришингиз керак. Шунинг учун бизнинг аёлларимизнинг қоматлари гўзал, юришлари чиройли бўлади. Қолаверса, Ўзбекистон жуда иссиқ юрт. Бошни иссиқдан сақлаш учун ҳам шундай бош кийим кийилган.

Унинг гапларини кимдир жўяли топди, кимдир масхара қилди. Хуллас, Зулфизар момоларининг “лайлак ўяси” учун бир марта яхшигина қизарди. Шу-шу ўзи ҳам кийим-бошига янаем кўпроқ эътибор берадиган бўлди. Белларида қулф уриб турган соchlарини тубидан қирқиб ташлади. Бироз қорамагизлигини ҳисобга олмаса, у талабалар ичидаги энг гўзал қиз эди. “Зулписар” бўлиш ҳам жонига тегди. Паспорт бериладиган маҳкамага бориб, исми-шарифини ҳам “Зинаида Абдиевна” деб ўзгартириб келди.

Уни уч-тўрт “осиёлик” дўстларидан ташқари ҳамма яхши кўрарди. “Зина, Зиночка” деб ҳамма атрофида парвона бўлса ҳам ўзининг “осиёлик”лари бир четда тўрсайиб туришар, зарур бўлиб қолганда ҳам янги исми билан атамасди.

– Шуларга яхши кўриниш учун ота-онангиз кўйган исмдан воз кечдингизми? Бу хиёнат, гўзалим! – деди Оғамурод очиқдан-очиқ. – Тўғри, бизда ҳозирча Россияядаги саноат тараққиёти йўқдир, аммо урфодатларимиз, кийинишимизнинг бу тараққиётга қандай алоқаси бор? Бизга саноатни олиб киришса, устимиздан кулмасдан, саноатга қўшиб бизга бегона бўлган урфодатларини ҳам тиқиширмасдан олиб киришсан.

Зулфизар ҳам гапини бериб қўйишни истамасди:

– Биринчидан, мен ҳеч кимга хиёнат қилганим йўқ. Балоғат ёшига етган ҳар қандай фуқаро ўзига исм танлаш ҳукуқига эга. Иккинчидан, рус халқи улуғ халқ. Бу халқдан фақат саноат тараққиётини эмас, қандай яшашни ҳам ўргансак, зиён қилмайди...

Бундай тортишувлар баъзан ярим тунгача давом этар, Оғамурод қизишгандан қизишар, тортишашётган рақиби қиз бола эканлигини ҳам инобатга олмас, бир сафар ҳатто “Хай, исми-шарифингизни шуларга мослаштириб олдингиз, энди миллатингизни ҳам ўзгартиринг”, деди.

Зулфизар ҳам гапдан қолмади:

– Америка фуқароларининг паспортида “миллати” деган жойга “Америка фуқароси” деб ёзилар экан. Ажаб эмаски, яқин вақтлар ичидаги бизларнинг паспортилизмада ҳам “Совет Иттифоқи фуқароси” деган ёзув пайдо бўлса! Ана ўшанда бу ўзбек, бу туркман, бу рус деган улуғлашлар ҳам, камситишлар ҳам бўлмас эди.

– Мен бундай сиёсатга бутунлай қаршиман. Бу сизга ўхшаган лаганбардорлар ўйлаб топган посангидан бошқа нарса эмас – у кўл силтаб даврадан чиқиб кетди.

Улар тортишганда сира бир-бирини аяб ўтиришмасди, аммо барибир бир жойнинг одамлари эмасми, шунча қарама-қарши фикрлашига қарамай Зулфизарнинг қалби шу йигитни кўрганда беихтиёр унга

қараб талпинишини ҳис этарди. Түғри, йигитнинг қарашлари, ҳаддан зиёд түпори ва чўрткесарлиги унга ёқмас, жинними бу, олий партия мактабининг ўқувчиси эмиш, деб қош чимирса-да, ич-ичидан аслида унинг ҳеч ким ва ҳеч нарсадан тап тортмай ўз фикрини айтишининг ўзиданоқ жаҳлдан ҳам кўра ҳаяжондан қизариб, бўзариблар кетарди. Аммо кўзлари ва қарашлари кишининг жонини шартта суғуриб олгудек ёвқур қарашли Оғамурод кесатиқ билан уни гўзалим деса-да, барибири унинг хаёли Зулфизардан-да ба-ланд, осмонда эди. Фақат ҳар икковининг ҳам шу битта осмонга борар йўллари негадир айро, шундай кафтдаги чизиклардек, битта кафтда, аммо барибири айро эди. Зулфизар, барибири қиз бола экан-да, юраги ториқканда, уйини, онаси, момосини соғинганда не-гадир ўкраб-ўкраб йиғлагиси келар ва ҳар йиғлагиси келганда негадир айнан Оғамуроднинг елкасига ўзини ташлаб, отасига хархаша қилган қизалоқдек ичидаги-ларни айтиб-айтиб, хўнг-хўнг қилишга тийиқсиз майл ҳис этар, ҳатто бир гал йигитнинг хонасига кўзлари йигидан қизариб борганди ҳам. Аммо... бу ташрифидан биринчи галда ўзи ниҳоятда хижолат бўлиб кетди. Оғамурод шўрлик-ку, тилига ўткир бўлгани билан қиз болага қандай муомала қилишни билмайди, чоги, батамом лом-мим деёлмай қолди. Ахийри иккаласи ҳам вазиятдан чиқиш йўлини топишиди. Зулфизар дудукланиб, кеча унинг семинарда айтган фикрига қарши эканлигини билдириди. Оғамурод ҳам “Тупурдим ўша семинарга” демади, жон жаҳди билан фикрини ҳимоя эта бошлади. Ахийри улар Маркснинг “Капитал” асари ҳақида баҳсласиашдан нарига ўтмай, ажрашишиди. Бўлди, қарор қилди Зулфизар, энди бундай аҳмоқона хаёлларга бормайман. Уят бу, уят! Яхшиям Оғамурод ичимдаги гапни пайқамади, яхшиям... Аммо кейин ўша, бир боргина берилган имкониятда у йигитга салгина ишора билан бўлса ҳам унинг ўзига ёқишини бу мусоғир юртларда унга фақат Оға мадад бўлиб юрганини айтмаганига, айттолмаганига кўп пушаймон бўлди, кўп...

Бир куни аудиторияда ўқитувчи билан қаттиқ тортишиб қолди. Ўша ранги мурданикдек совуқ ўқитувчи эди. У Совет Иттифоқи ва ундаги суверен давлатлар, уларнинг ҳақ-хуқуқлари ҳақида гапираётган эди.

Бирдан Оғамурод кўл қўтариб ўрнидан турди. Зулфизарнинг юраги “шув” этиб кетди: “Хозир бу яна бир нарсани бошлайди”.

– Кечирасиз, қандай суверенлик ва иттифоқ ҳақида гапиряпсиз? Мен, масалан ўзимни суверен давлатнинг эмас, бир мустамлака давлатнинг фарзанди деб ҳисоблайман. Бизни олдин чор Россияси босиб олган эди, Россияда социалистик революция ғалаба қозонгач, биз социалистик Россиянинг мустамлакасига айландик. На байроғи, на туғроси, на Давлат мақомига эга бўлган она тили бўлмаган, ота-бобоси ўқиган алифбосидан ҳам воз кечишга мажбур бўлган мамлакатни озод мамлакат дейиш мумкинми?

Ўқитувчи бошчилигида бутун аудитория унга қарши турди.

– Чиқ дарсимдан! – Охирида ўшқириб юборди ўқитувчи. – Нонкўр! Бундан кейин қорангни ҳам кўрмайин.

Бутун аудитория сув куйгандай жимиб қолди:

Яхшими-ёмонми, йил бошидан бери ёнларида юрган бир тенгдошларининг тақдири ҳал бўлаётган эди. Аммо Оғамуроднинг ён бериши нияти йўқ эди. Китоб-дафтарларини жилдига солиб, эшикка йўналди.

Остонага етгач, ортига бурилиб, ўзи ҳайдалган аудиторияга, сўнг ўқитувчига қаради:

– Кечирасиз, мана кўраяпсизми, миллатингиз шаънига айтилган бир оғиз гап сизга қанчалар оғир ботди. Шуни унутмангки, ҳар бир миллатнинг ўз ғурури, иззатнафси бор.

Уни бошқа ҳеч ким кўрмади. Хонадаги шахсий буюмлари шундайлигича турганлигига қараганда, у уйига кетмаган эди.

– Уни қамаб юборишган, – шивирлабгина бир-бирларига ўз гумонларини айтишар эди курсдошлар.

– Ажаб бўпти! Тилини тийиб юрмагандан кейин шундай бўлади.

Орадан олти ойлар ўтгач, онаси билан акаси келиб, раҳбариятга учрашиши, бирон бир маълумот олишолмагач, дод-фарёд билан ўғилларининг нарсларини йигиб, жўнаб кетишиди. Оғамурод ҳаммадан кўп Зулфизар билан тортишар эди. Ҳаттоқи бир гал:

– Мен сизни ёмон қўраман, – деган эди юзига қараб очиқдан очиқ, – сизга раҳмим келади.

Оғамуроднинг бу гаплари қанчалик дилига ботмасин, ўзининг унга нисбатан туйғулари туфайли қанчалик ич-ичидан номус этмасин, аммо барибири шу йигит йўқолиб қолгандан сўнг, Зулфизар анча вақтгача гарангисиб юрди. Аста-секин ўзига кела бошлагач эса кўнглида атрофидагиларга, муаллимларига нисбатан бир ҳадик пайдо бўлди. Аммо бу ўткинчи туйғу эди. Кўп ўтмай у яна гуруҳнинг энг пешқадам, энг севимли аъзосига айланди. Болалигидан шундай, қаерда, қандай шароитда бўлмасин, у биринчи бўлишга интилар, бунга эришмагунча тиниб-тинчимас эди. Биринчи бўлиш унга жуда ёқар эди.

Диплом ҳимоясидан олдин, уни деканатга чақиришиди:

Деканнинг ёнида гуруҳ раҳбари ҳам ўтиради.

– Зинаида Абдиевна! – деди бир қўлини фронтда қолдириб келган декан. – Таҳсил давомида сиз тиришқоқлигингиз, одобингиз, ташкилотчилигингиз билан ҳаммамизнинг меҳримизни қозондингиз. Сизни узок бир вилоятга юборишга кўзимиз қиймайди. Кураторингиз ҳам шу ерда ишда қолишингизнинг тарафдори.

Зулфизар юраги гуپирлаб уриб кетди: “Наҳотки? Иттифоқнинг юраги – Москвада яшаб, ишлаш!”

– ...аммо, – гапида давом этди декан – биз Иттифоқнинг ҳар бир бурчида ўз одамимиз, кўз-кулогимиз бўлишини истаймиз. Сизни вилоят партия кўмитасига юборамиз. Буни сиз “ўқиб, уйимга қайтдим” деб эмас, “мени вилоятда ишларни яхшилаш учун юборишиди” деб тушунингизни истаймиз.

Бу ҳам унга билдирилган катта баҳо, ишонч эди.

Юраги бўғзига тиқилиб қолгандай, нафас олиши қийинлашди. Қалби ғурур ва қувонч ҳиссига тўлиб кетди. Бу туйғу вилоят партия кўмитасига борганда ўз-ўзидан мамнуният ҳиссига айланди.

Ёз. Нам ҳаво иссик ва дим эди. У нарсаларини йиғишириб, йўлга отлангунча толиқиб бўлган эди. Аммо самолётдан тушгач, уйга эмас, тўғри вилоят партия кўмитасига борди. Биринчи котиб йўқ экан. Ташкилий кадрлар бўлими бошлиғи Николай Владимирович уни “Иккинчи”нинг ҳузурига олиб кирди. “Иккинчи” – қалин қошлари қовоқлари устига осилиб тушган ўрта ёшлардаги рангпар киши ўзини Александр Иванович деб таништириди.

– Ажойиб ўхшашлик, – деди у Зулфизарнинг кўлларини сиқиб кўришар экан. – Мени қўрганлар доим

нега исми-шарифингиз русча, ўзингиз осиёликларга ўхшайсиз, дейишади. Сиз эса Осиё гўзали, аммо исмингиз Зинаида! Жуда яхши, Зиночка, энди сизга берадиганларимиз билан танишитирай: лавозим, уй, хизмат машинаси, ҳайдовчи, яхши маош. Сиздан сўрайдиганимиз – садоқат ва иш. Бўладими?

Зулфизар хушиуд жилмайди.

– Албатта, Александр Иванович!

“Иккинчи” унга бироз синовчан тикилиб турди-да, бироз истиҳола билан қўшимча қилди:

– Яна бир гап. Албатта, бу ўта шахсий масала, аммо сиз билан биз коммунистик партияниң аскарларимиз, бизнинг ўзимиз ҳам, шахсий туйғуларимиз ҳам партияники. Коммунистик этика деган гап бор. Унга асосан раҳбарлик лавозимида ишлайдиганларнинг анкетаси тоза ва ибратли бўлмоғи лозим, яъни судланмаган, оилали!.. Шу боисдан зудлик билан турмушга чиқишингиз керак. Агар кўнглингизда бирон одам бўлса, уни айтинг. Аммо сизга уйланадиган одам сизнинг иш вақтингиз чегараланмаганлигини, сиз замонавий раҳбар эканлигингизни, рашик қилиб ишингизга халал бермаслигини...

Николай Владимирович қўшимча қилди:

– Сиз фақат анкета бўйича уни, аслида жисмингиз ҳам, қалбингиз ҳам партияники эканлигини яхши билиши лозим. Шундай номзодингиз бўлса, айтинг.

Бояги такаллуфлар туфайли Зулфизарнинг юзларига ёйилган табассум жойида қотиб қолган, бирдан кайфияти тушиб кетган эди: “Бундай эрни қаердан топади?”

– Аммо, сиз хавотирланманг. Агар бирон аниқ режангиз бўлмаса, бизга қўйиб беринг.

...Уни ўша куни кечки пайт қишлоққа ярқираган оппоқ “Волга” олиб келиб қўйди. Бу унинг хизмат машинаси эди.

Улар топган номзод – ёши ўттизларга етган, пешонасидан соchlари сийраклашиб чўзинчоқ юзларига улуғлик бағишилаб турган бир камсуумгина йигит эди. Тўй-тантана ҳам қилиб ўтиришмади. Расмий идорада никоҳларини қайд қилдиришгач, шаҳардаги янги уйларида уч-тўрт киши бўлиб ўтиришди. “Биринчи”, “Иккинчи”, “Кадр”, вилоятдаги қандайдир ташкилотда раҳбар бўлиб ишлайдиган қайнотаси, куёв ва ўзи, онаси билан қайнотаси бўлак хонада ўтиришди. Кампирларнинг қистови билан меҳмонлар кетгач, мулла чақириб, шаръий никоҳ ўқитилди. Никоҳдан кейин қайнота Зулфизарни бағрига босиб, бироз кўз ёш қилди:

– Айланиб кетай сиздан, болам сизга омонат. Ўзи яхши йигит, илмга жуда берилганиданми, ҳеч бирорга юқуми йўқ, пича бўшроқ. Бир кун ёнида ўтирангиз ҳам ундан бир оғиз гап ололмаслигингиз мумкин. Лекин кўнгли тоза, ғубори йўқ.

Зулфизар купди:

– Холажон, менга айнан шундай одам керак-да ўзи. Ишимиз оғир, баъзан кечроқ қайтишим бор, баъзан айтмасдан узоқ қишлоқларга кетиб қолишим бор. Шундай пайтда ҳориб-толиб келган ҳолимга бу кишиям жаҳл қилиб, тергаб бошласа, кейин менга жуда қийин бўлади.

Ойсултон хола қизининг бу қадар эркинлигидан янги қуда олдида хижолат тортиди:

– Нима, тергамайди деб ўйлаляпсанми? Албатта тергайди, эрман-ҳар нарса дерман, дейишган.

– Йўқ, йўқ, менинг боламнинг кўлидан бирорни тергаш келмайди. Ўзига тўғри бўлса, бўлди-да. Аёл зоти энг аввал ўзи учун шаънини асрайди.

Зулфизар иложсиз ҳолда раҳбарларининг топширигини бажараётган бўлса-да, шу тахлит, томдан тараша тушгандек бирорвнинг хасмига айланадиганидан кўнгли жуда хижил эди. На бир изҳори дил, на бир мардана шарт айтмай, индамай уйига, ҳаётига кириб келган одам унга ҳеч ёқмади. Аммо, чидаш керак. Кўнглига яқин бирон инсон бўлмагач, ким билан яшашининг нима аҳамияти бор? Қайнонасинынг гапларини эшитиб, бироз кўнгли ёриши: меҳрибон, ақлли аёл экан. Кетишга чоғланаётган қайнонаси билан қайнотасини ётиб қолишига унади:

– Кеч бўлиб қолди, ётиб қолинглар, хона кўп, холам онам билан гурунглашиб ётадилар.

Нодир ҳам ёмон йигит эмас эди, ичмайди, чекмайди, ёмон гапи йўқ. Ярим тунгача ёзув-чизуви билан банд. Қорни очса, индамай ўзи чой қўйиб ичаверади. Баривор бу ҳолат Зулфизарнинг кўнглини илита олмасди: “Эркакка ўхшамайди, латта!” Аммо эрига нима ҳам дейди: “Билганини қилсан!”

Ўғли туғилгач, эри бирдан ўзгарди. Хотинининг эмизкли болани онасига ташлаб, ўзи ярим тунгача ишда юришларига ҳеч кўника олмай қолди. Ўша куни олис тоғли қишлоқларга боришганди. Ярим тунда қайтди. Ҳайдовчи у томонга ўтиб, эшигини очаётган эди, дарвоза олдида эри кўринди. Зулфизар зим-зиё тунда ҳам эрининг юзи қаҳрли эканини билди. Ҳайдовчининг олдида вазиятни юмшатиш учун эрига ўзича такаллуф қилган бўлди:

– Ҳа, дадаси, хавотирларнингизми?

Эри эса... юзига тарсаки тортиб юборди.

– Нега, нима учун?! – Зулфизар жойида қотиб қолди.

– Мен... остоноада ҳам бегона эркакка билагини ушлатадиган аёл билан ортиқ яшай олмайман.

– Қандай бегона эркак?! У ҳайдовчим-ку! – чинкирди Зулфизар.

– Ҳайдовчинг эркак эмасми?

– Майли, эркак ҳам дейлик, аммо қандай савиаси паст одамсиз? Наҳотки мен ўзимни шу ўқимаган ҳайдовчига тенг кўрсам? Жуда чарчаган эдим, машина баланд бўлгани учун “ушлашиб юборинг” дедим.

– У эса ҳузур қилиб билакларнингиздан ушлади!..

– Сиз сиёсий кўр феодалсиз!

Ўша тун тўшаклар бўлинди.

Эрталаб Нодир узр сўради.

– Зулфизар, мени кечиринг. Мен сизни ростакамига яхши кўриб қолганга ўхшайман. Энди кетмасам бўлмайди. Хавотирланманг, никоҳимиз тураверади. Анкеталарга ҳам бемалол “Оилалиман” деб ёзверасиз. Сўраганларга “Эримни Тошкентта ишга чақиришди, илмий иш қиляпти”, дейсиз. Мен Тошкента га кетаман. Факат илтимос, Ботиржонни эҳтиёт қилинг, унга сизнинг меҳрингиз, эътиборингиз керак.

“Кетманг!..” дейишга турур йўл бермади. Аммо юрагидан нимадир узилиб кетгандай бўлди. Индамади, ҳатто кузатгани ҳам чиқмади. Неча кун юрар йўлидан адашган девонадай ҳаловатини йўқотди. Ўзига келган кун англадики, ўша “Феодал” йигит ҳаётининг бир бўллагига айланиб бўлган, унга ўрганиб қолган эди. Ҳамиша атрофингда ўралашиб юрадиган жонзотга ўрганиб қолгандай...

Муҳаббатсиз бошланган турмуш муҳаббатга ўхшаш илиққина муносабатлар пайдо бўлгач, шу тариқа бузилиб кетди.

Даёвоми 34 бетда



Ўроz ҲАЙДАР

Юлдузлар сочилар мисоли маржон

* * *

Ҳаёт, ниқтамагин чўбин отингни,
Унда қанот йўқдир, учгувчи, бироқ,
Қора кунларингга ёқмайди чироқ,
Сўраб ҳам ўтирмас наасаб-зотингни.

Бесабр қалб билан талпиндим ҳар чоқ,
Даъваткор исёндан ўқиб тин, мунгни.
Бунда шон қулларин уйқуси уйгоқ,
Умидсиз шовқинда билмас сўл-ўнгни.

Нафосатнинг олис оташ жаранги,
Ишқ сувида поклар гамгин оҳангни.
Мунис чехраларда ёниқ ҳаловат

Ва қайнок орзулар қанотланур бот.
Маҳрум эт севгидан, асрара шафқат,
Мен сени севаман, барибир, Ҳаёт!

* * *

Бахром Рўзимуҳаммадга

Жўнунда таъма йўқ, маъшуқда ибо,
Мулкига ўт қўйинг, қарагай кулиб.
Гўё ўзга молин томоша қилиб,
Завқдан туйилгандай ютинар ҳаво.

Ҳавони узумдай узиб ер, аммо
Минг бора тирилиб, минг бора ўлиб.



Қайнок сувдан куйган гул каби сўлиб,
Унга тупроқ болиши, ҳасратдир маъво.

Ботаётган офтобдек йўл қарайди у,
Юлдузлар бошида сайрайди, ёҳу.
Эзилган чечакдай сингранар беун,

Қуриган сой каби қақшайди гоҳо.
Унинг юрагига ботирадар муҳрин
Тошлиарнинг тилидан тўкилган наво.

* * *

Исмингни айтмакни этишиди таъкиқ,
Сени севмогим-чун лозиммии фармон.
Шивирлай дейману, тополмам дармон,
Йиглайман-у, аммо кўзимда ёши йўқ.

Ҳавони чайнайман – гижирлайди Кўк,
Юлдузлар сочилар мисоли маржон.
Оғзим қон, кўксим қон, сирқирайди жон,
Ичимни куйдирадар унсиз ўкирик.



Исмингни айтгил деб ёлворар кўзим.
Қон ютган зулукдай қон қусар Сўзим.
О, севмакдан маҳрум этилган ҳар не,

Илдизсиз дарахтдай қақшайди беҳад.
Кимники, нафратдан очилса кўзи,
Муҳаббатдан кўзи юмилар, албат.



* * *

Қазо ҳукми, уни қуйди тупроққа...
Олисда бир аёл йиғлар, күзда ёш.
На унга қариндош, на унга сирдош,
Ҳаққи йўқ, кўк кийиб аза тутмоққа.

Ҳар лаҳза жовдираబ қарар ҳар ёкка,
Кўкнинг шарпасидан юраги оташ.
Кўрқувидан умид сўнади ёввоши,
Борлиги қоядай нурайди чоҳга.

Оёги остида ер ҳам йўқолур,
Эртага қабрига на гул қўёлур.
ЛАънатлар ёзиғин, тул муҳаббатин,

Дунё сарватидан ўгиреб юзин.
Ҳақорат санайди қуёши шафқатин,
Мозорин гулиман деб атар ўзин.

* * *

Эй, кўхна Коинот – гумбази даҳр,
Кўксинг тўла тош-ку, сендан не нажом.
Токай Ишқни овлар кўринмас сайёд –
Дилнинг ноласидан туғилган қаҳр.

Қаҳр эмган қўшиқ беканот қушидир,
Парвози туши унинг, нағмаси – иснод.
Долгалар фалаждир, тўлқинлар ношод,
Фалак шовқинидан олам беҳуидир,

Қайгу оҳангани харж этгай Ҳумо,
Ишқча зорлар ҳар дам қолур бенаво.
О, буюк Коинот, кўксинг тўла тоши,

Тангрига хусумат – бу тийнат недан?
Зулм санги Эрк уйин ноҳақ этса лош,
Осмон қулаб тушигай Ер кулгусидан.

* * *

Қўй, йиғлама, гулим, сен учун энди
Майли, тўйиб-тўйиб йиғласин Осмон.
Ишқсизларга мудом яшамак осон,
Айтгил, муҳаббатсиз ўтган кун кунми?

Йўл бошида турган йўловчи мисли
Йўл кутасан беун йўл қараб ҳар он.
Кўкда ой шуъласин сочур паришин,
Бошинг узра сокин, ёритиб тунни.



Қўй йиғлама, гулим, дарёдай тўлиб,
Фақат тингла мени қуёшдай кулиб.
Улуғ қалб Каъбаси – азал бодаси

Ҳатто сиўратингга бахши этсин ҳусн.
Шунда куйдиргайдир ҳуснинг сояси
Соҳир Ишқ узугин ўтли жодусин.

* * *

Айтинг, у гўзал ким? Кутмакда кимни
Олис саркаш денгиз соҳилида жим.
Кўлларида нечун рўмоли гижим,
Эшиштмайди асло менинг оҳимни.

Ҳинд малаги, фаранг паривашиими,
Ё армани – ўйнар зулфида нужум.
Икки кўзи мордай қиласадир ҳужум,
Ишқ бобида ойни қилур ўсал у.

Ким экан у? Кезар соҳилда танҳо,
Оппоқ тўлқинлардан тинглайди наво.
Хурми, сув париси эканмикин ё,

Нечун ўз ёрини денгиздан излар.
Айрилиқда ёниб ҳар соҳилда, о,
Пайдо бўлар... яна... чорлар ва бўзлар.

ҚЎШИҚ

Юлдузлар чақчаяр сўқир кўз каби,
Мотамсаро Ойнинг соchlари сўзон.
Нақадар ёлгизман, тун ҳам ичган онт,
Тўрт тараф жарлиқдир, халос эт, Раббим!

Кел дедим, келмади Сукут малаги,
Сас сузди ҳавода: – Бўлма топагон.
Ўзинг чопагонсан, отинг чопагон,
Сенсиз айланмагай кўк чархпалаги.



Ай, менинг кўзимни чўқиган қузгун,
Осмоним қонталош, ерим-чи, бузгун,
Корнинг овозидан титрайди ҳаво,

Ёлғон латифалар тўқир бунда Ишқ.
Ҳар кимдан тиланиб жон сўрар наво,
Оёқлар остида қолганда қўшиқ.

Ботиб бораётган күёшнинг бир чети кўриниб турарди. Касалхона ҳовлиси айланишга чиқан беморлару, йўқловчилар билан гавжум. Укол таъсиридан зўрға кўзини очган Зулфизар ёнида жовдирағ ўтирган қизини кўриб, эзилди. Бемадор қўлларини узатиб, аста қўлидан тутди:

- Сора, сен баҳтли бўлишинг керак.
- Онахон, у нима деганингиз?
- Мен учун ҳам, аканг учун ҳам!..

– Кўйинг, ўша бангини гапирманг. Ҳамма нарсани сотиб, сизни кафандаго қилган шу. Энди ҳовлини сотасиз-да, кўшним уйини сотаяпти, шу ерга кўчиб келасиз. Билганини қилсин. Ўзингизга дори олмай, пенсиянгизни ҳам шу аҳмоқнинг наркотигига бериб юрганингизни биламан, она! Ўшани деб шу кўйига тушдингиз. Энди бўлди, ҳаммасига нұқта қўяман.

– Сен болам, ўзингни, ўзингнинг баҳтингни ўйла. Акангнинг тақдирни учун мен жавобгарман. Кечакундуз иш деб чопиб юрмасдан шу болага озгина эътибор, вақт ажратганимда шу кўргуликлар бўлмасди. Бизнинг давримиизда ота-онанинг бир кучи болаларининг устини бутлаб, қорнини тўйғазишга кетар эди. Шундайм ҳафтада бир марта ёвғон ича олмасдик. Устимиздаги кийим ювилса, куригунча кўрпага кириб турадик. Мен боламга энг сара кийимларни кийдирдим, танлабтанлаб едиридим. Пул шундайгина токчада туради, ҳисобини сўрамас эдим. Сўраш, тергаш керак экан, уни ёмон болалар йўлдан урди. Момонгни ҳам, мени ҳам доғда қолдириди.

– Йўқ, она, ўша шароит менда ҳам бор эди. Нега мен гиёҳванд бўлмадим. Нега?! Билсангиз, ҳамма нарса одамнинг ўзига боғлиқ.

– Сен ахир қиз боласан. Наҳотки, қиз бола бўп туриб...

– Она, менинг рус мактабда ўқиганимни унунтманг. Бизнинг қизларимиз ўзбек мактабларидағи ўғил болалардан баттар эди. Чекиш, ичиш, йигитлар билан юриш улар учун одатдаги эрмак эди. Мактабнинг орқасидаги овлоқ ҳовлиларнинг ҳожатхонасига бориб, нечтаси кайф билан ухлаб қоларди. “Акам учун куйиб юргани етади, хавотирланмасин” деб мен буларни сира сизга айтмас эдим.

Зулфизар унинг бармоқларини қисиб қўйди: “Рахмат”. Анча жим ётиб, яна ўзини айблади:

– Отасининг олдида ҳам юзим шувут бўлди. Кейинроқ бўлса ҳам отасига хабар қилганимда келиб, олиб кетарди. Даволатиб, тўғри йўлга солиб юборамиди? – Ҳаёлига келган фикрдан кўзлари “ярқ” этиб очилди. – Ҳалиям айтсаммикин? Мен унинг иш жойини биламан. Бориб, ёнимга айтиб кел, болам. Ўлиб-нетиб кетсам, аканг шўрлик... Хотини ҳам ҳайдаб юборган, кўчада итдай ўлиб кетмасин.

Сора индамади. У акасини жуда ёмон кўрарди. Шу ака учун қайси бир жойга бориб, кимларнидир айтиб келгандан кўра... Аммо онаси айтганини қилмай қўймайди.

- Майлимни, қизим? – эмранди она.
- Хўп, – у тўрсайиб олди.

Зулфизар ҳорғин қовоқларини юмди. Ҳозир бошида ўша, бир тарсаки уриб, муҳаббат изҳор қилган, аммо муҳаббатини ҳимоя қилишдан қўрқиб қочиб кетган лапашанг Нодир пайдо бўлганда ҳам унинг кўзларига қарамаслик учун шундай кўзларини юмб опар эди.

Аммо кўзларини юмб бўлса-да, ҳозир ўша одам билан гаплашиши шарт. Ўшанда, у кетиб қолган дамлар бироз бўшашиб сиқилганини айтмаса, тез кунда ишга шўнғиб, уни қўнглидан бутунлай чиқариб юборган эди. Ҳатто боғча опалар “Ўғлингизнинг дадаси келиб, кўриб кетди”, деганда ҳам қалби бир энтиқмади. Шу одамга балки биз керақдирмиз-а, деб ўйламади. Унинг қаердан келиб, қаерга кетгани, нималар билан шуғуланаётгани билан умуман қизиқмади. Баъзан кимдир хушомад қилибми, “Эрингиз Тошкентдаги фалон илмий текшириш институтида ишлаётган эмиш”, “Ҳалиям уйланмаган эмиш”, “Нихоят уйланнибди бечора” каби маълумотларни етказишганда ҳам узоқ бир қариндошлар ҳақидаги гапдек “ҳа”, дея қўл силтаб қўя қоларди. Ҳақиқатан ҳам ўша пайтлар унинг иши жуда кўп эди. У ер-бу ерда ўз жонига қасд қилган ҳар бир факт учун Марказком олдида тик туриб жавоб беришарди. Айни пайтда барча туман ва қишлоқларда шундай ҳолатларнинг олдини олиш масаласида тинмай йигилишлар ўтказар эди. Унинг йигилишларидағи сўровларда эркак раҳбарлар ҳам дағ-дағ титраб туришар эди. Ҳурмат-иззат, такаллуф ва тавозелар ҳам шунга яраша эди. Шундай бир пайтда бир замонлар юзига тортиб юборган тарсакидан хижолат бўлиб, “мен сизни яхши кўриб қолибман, шекилли”, дея кетиб қолган эркак учун гусса чекиб юаримида?

Энди эса... Ҳаммаси ортда қолди. У минбарни муштлаган дам юзлаб эркак йигилган мажлис илкис қалқиб кетган даврлар, бир оғиз такаллуфини мукофот деб билган одамлар-бир эртак энди. Энди, гиёҳванд ўғил, беҳол, бемадор вужуд ва бор шарбати сиқиб олинган анордек пўкиллаб қолган юракдан бошқа ҳеч нарсаси йўқ. Энди ўша, бир замонлар “Ўғлимизни эҳтиёт қилинг”, дея ўтиниб кетган бўшант одамнинг ёрдамига муҳтож бўлиб ётиби. “Топширсам эди”, муаммоларнинг ечимини шу ниятда кўрди. Лекин у жуда мулойим, меҳрибон одам, ўғлини яхши гап билан йўлга солади. Ботир ҳам гиёҳвандликдан буткул чарчади. “Бошқа чекмайман” деб юз марта қасам ичади, аммо кайф хуруж қилган дам ўзини идора қила олмай қолади. Унга ҳозир қатъиятли, меҳрибон бир суюнчиқ керак. Ана шунда шунча йилдан бери азоб берган оғатдан балки бутунлай кутилиб кетади.

Зулфизар энди тушликка чиқай деб турганда, ички телефон жиринглаб қолди. Уйга кетаётган пайт яна бирон муаммо чиқибдими, деган хавотирда гўшакни кўтарган эди, “Кадр”нинг овози эшитилди:

– Зинаида Абдиевна! Тушликка чиқаяпсизми? Бизнинг хонага бир кириб ўтсангиз, дегандим.

Ҳар қандай вазиятда ҳам бу одамга йўқ, дейишнинг иложи йўқ. Вилоятда унинг мавқеи шу даражада баланд эдик, ҳатто “Биринчи” ҳам бирон муҳимроқ қарор қабул қилишдан олдин, албатта унинг фикрини сўради. Зулфизарга бирон марта ҳам терс гапирмаган бўлса-да, бу одам Зулфизарнинг кўзига жуда хавфли бўлиб кўринар эди.

Хонада “Кадр”дан ташқари оқ-сариқдан келган узун бўйли, тепакал бир киши ўтиради. Зулфизар уни бир қарашдаёқ уни танидию, бирдан дув қизариб кетди, Аммо тезда ўзини кўлга олиб, юзига жиддий, хукмронона, шу билан бирга илтифотли тус берди. Ичада эса бир нарса тиқиллай бошлади. Бу одам? У

бу ерда нима қилиб ўтирибди? Тоғ тоғ билан учрашмайди, дегани шу экан-да?

“Кадр” ўрнидан туриб, мулозимат кўрсатди.

– О! Идеология маликаси, хуш кўрдик. Ўзим чақирмасам, кирай ҳам демайсиз? Сизнинг атиларингизни бир ҳидлаш учун йўлакларда тентираб юришга мажбур бўляпмиз. Бу нима деган гап ахир?

– Кўйсангиз-чи, Николай Владимирович, – хижолат бўлди Зулфизар, – очилмаган духиларим бор. Истасангиз, биттасини совға қиласман.

– Йўқ, азизам, менга сизнинг табиий ифорингиз билан омухта бўлган духи керак. Борди-ю, духи билан сизни хонамга кўчириб келсанам, вилоятда идеология ишларини барбод қилган бўламан. Бу эса асло мумкин эмас. – У ним табассум билан уларнинг суҳбатини тинглаб ўтирган меҳмонига юзланди. – Сенга айтган Осиё гўзали шу киши, аммо кўриб турганингдек, айтганимдан ҳам гўзал, окила ва талабчан, – сўнг Зулфизарга ўгирилди. – Танишинг, менинг энг яқин дўстим Анатолий Абрамович! Фазилатлари жуда кўп: меҳрибон дўст, кўли гул хирург, энг муҳими доно тадбиркор, уни бир чўпнинг устига хўрзқандай қилиб ўтиргизиб кўйсангиз ҳам, тадбир ишлатиб, сиз билан мендан кўпроқ пул топади. Нуқсонлари ҳам бор, қизларни, айниқса маҳаллий қизларни жуда яхши кўради.

Ажаб, меҳмон ҳам худди Зулфизар каби аёлни биринчи кўриб тургандек тутди ўзини. Лом-мим дейишга ожиз одамдек хижолатомиз кўлларини ёзди:

– Шарқ қизлари гўзал бўлишса, бунда менинг айбим нима? Ахир гўзалликнинг қошида худолар ҳам тиз чўкишган.

Зулфизар ялт этиб Анатолийга қарадио, дарров кўзини яшириди. Ажаб! Уни бунчалик ажир, сўзга уста деб ўйламаган экан. Индамагандан кўрк, деб шуни айтишса керак-да? Ваҳоланки бундан бир йил бурун Зулфизар тўсатдан кўричак бўлиб қолган, табиийки уни вилоятдаги энг нуфузли шифохонага зудлиқда етказишиган ва шахсан Анатолий Абрамовичнинг ўзи уни операция қилган эди. Гарчи шифохонада уч кунгина ётган бўлса-да, у ҳар қандай бемор каби табибига боғланиб қолишига ултурган, индамас, лекин кўзлари кулиб турувчи, ақллилиги қарашларидан аён, озода, бақувват кўлларини гоҳ унинг пешонасига қўйиб кўриб, гоҳ беморининг томирини ушлаб, унинг неча йиллардан бўён эркак кўли тегмаган вужудини бироз сескантирган, бироз титратган, энг қизиги, Зулфизар, кап-кatta раҳбар, шу биргина шифокорнинг қаршисида ожиз, беҳимоя қушчадек жавдираб, ундан кўз узолмай қолган, шифокор атрофида гиргиттон бўлиб турган ҳамшираю навбатчи дўхтирларга кўрсатма бераётган чоғдагина унинг бироз бўғиқ ва босиқ гапиришини билиб олган, бу овоз унинг кулоқларига ҳам хуш ёққан эди. Аммо оёққа туриши билан шифохонадан ёв кувандек, ҳатто халоскори билан хайрлашмай чиқиб кетганди. Иш! Иш кутиб турмайди! Мавсум! Режа пасайиб кетибди, э Худо, унинг ялпайиб ётиши-чи? Топган вақтини-чи бу кўричакнинг? Шу тариқа Зулфизар бу сирли шифокорни кейин бир ё икки бор ғалат энтикиши билан эслади. Эсладио, дарҳол унинг суратини хотиридан ўчириди. Бемаънилик! Касаллик, арзимаган дард бўлса ҳам, барибири одамни ожиз қилиб қўяркан, деди. Ишга шўнғиди ва уни буткул ёдидан чиқарди-кўйди, тамом.

– Илтимос, Толик, ўз айбингни оқлаш учун худоларни гуноҳкор қиласман, – ҳамон вайсарди “Кадр”, – ун-

дан кўра бўйдоқман, уйлантириб қўй, кейин ҳеч кимга қарамайман, де. Биз айбингни ўчирайлик, – у кула-кула Зулфизарга юзланди. – Маълумот учун яна бир нарса: у бўйдоқ. Лекин буни нуқсонлари рўйхатига ҳам, фазилатлар рўйхатига ҳам киргиза олмаяпман. Сиз нима дейисиз?

Икки эркакнинг бу тарздаги тагдор гаплари Зулфизарнинг нафсониятига тега бошлади. Аммо ўзини қўлга олиб, ним табассум билан жимгина тураверди: бошқа нима ҳам қила олар эди?

– Дарвоқе, бизнинг маликамизнинг ҳам бошлари очиқ. Агар фаришталар омин, деб, сизлар турмуш курсаларингиз, социалистик жамиятда ажойиб ибрат намунаси бўларди.

“Буниси энди ошиб кетди! Ишда камчилликка йўл кўйган бўлса, уришсин, сўксин, аммо шахсий ҳаётига бу хилда араплашув!..”

– Кечирасиз, Николай Владимирович, онамнинг тоблари йўқ эди. Дори олиб бормоқчи эдим, – у қовоғини ўюб олди.

Гапи бўлингани “Кадр”га ёқмади:

– Шундайми? Биз сиз билан тушлик қилмоқчи эдик-ку. Ҳа, майли, боринг. Аммо бир шарт билан, эртага ўзингиз бизни тушликка олиб борасиз.

Зулфизар индамади.

Эшик олдига етгач, секингина бош эгиб “Яхши қолинглар” деди-ю, хонадан чиқиб кетди.

Москвадан қайтгандан бўён бирон гапи икки бўлмаган, қаерга борса, ҳадик ва ҳурмат билан кутиб олинган Зулфизар “Кадр”нинг бугунги муомаласидан ўзини йўқотиб қўйди. Бир нарса дейин деса, бутун обкам, жумладан Зулфизарнинг тақдири ҳам унинг кўлида. Демаса, очиқдан очиқ, бу хил “ҳукмронлик”! Аммо бундан ҳам баттари анов ярамас дўхтирнинг индамай, уни “Кадр”нинг илмоқли гапларига ўлжа қилиб ташлаб қўйиши бўлди. Ўзини ким деб ўйлашти у? Хўп майли, гап нишаби бу тариқа кечмаганда, Зулфизар ўлибдими, фурсатдан фойдаланиб, унга миннатдорчилигини билдирарди. Агар ёдидан чиқкан бўлса, улар таниш эканлигини “Кадр”нинг олдида айтарди. Аммо эркак бўлиб Зулфизарни танишини яширибдими, демак, шундай бўлиши керак экан-да. “Кадр”нинг олдида шахсий муносабатларни билдириш хавфли, ҳа, жуда хавфли, буни Зулфизар яхши билади. Шунинг учун ҳам дўхтирнинг ўзини бу тарзда тутгани ҳам... уни... Зулфизарни ўйлаб қилган ҳаракатидир?

Шунга қарамай, барибири тушлиқдан кейин ҳам юрагининг сиқилиши тарқамади. Кечга яқин Ҳадича келди. Қизлигидан бир тутам чучомадеккина бўлиб юрадиган Ҳадича турмушга чиққач, тўлишиб, очилиб кетган эди. Унинг чақнаб турган кўзларига қараб, Зулфизарнинг бироз кайфияти кўтарилди:

– Жўра акам сени нима билан боқаяпти, кундан кунга семириб борајпсан? – ҳазил қилди у дугонасини бағрига босаркан.

– Шу аканг ўзини боқасям... топгани мактабидан бери келмайди. Ҳали у ерини ямайди, ҳали бу ерини. Эскини ямайман деб, эрим бечоранинг эси кетди.

– Ниманинг ҳисобига бунча семирајпсан, бўлмаса?

– Ўзим-чи? Икки ставка дарсим бор. Керак бўлса, ойлигим директорнидан икки баравар кўп.

– Унда яхши, хурсандман. Кеч бўлганда ойлигим кўп деб, мени ресторонга таклиф қилиб келмагандирсан, ҳойнаҳой?

— Э-э, қўйсанг-чи, сенинг кўнглингни топишга йўл бўлсин. Аканнинг дарди билан юрибман. Ёнимизда янги мактаб қурилаяпти, шу ёққа директор қилиб ўтказиб бер. Бўлмаса, бечора эрим шу эски мактабни сонга соламан деб ажалидан беш кун бурун ўлиб кетади. Ўзи мазаси йўқ. Урушнинг асоратлари аста-секин юзага чиқаяпти.

— Яхшилаб қара, даволансин.

— Ўн беш кун бир жойга бориб дам олиб келсанг, руҳингда қандай ўзгаришлар бўлади. Бу киши тўрт йил қон кечиб, жон олиб, жон бериб юрган. Ҳалиям қулоқларим остида снарядларнинг портлашлари, жон бераётган аскарларнинг инграшлари эшитилиб туради, дейди. Минг эҳтиётлаб қараганим билан...

— Ҳа-а... — Зулфизарнинг гапларидан оғир бир сўлиш олди.

Уларнинг сухбатини телефон кўнгироғи бузди.

— Эшитаман, — Зулфизарнинг хаёли ўзида эмас эди, “Кадр”нинг овозини эшитиб, бирдан хушёр торди. — Лаббай, Николай Владимирович!

— Зинаида Абдиевна, ишлаётганмидингиз?

— Ҳа, Николай Владимирович!

— Бугунги таклифим ҳақда ўйлаб кўрдингизми?

Зулфизарнинг юраги “шув” этиб кетди:

— Қайси таклифингиз? — билиб турган бўлса-да, билмаганга олди.

— Анатолий Абрамович ҳақида айтаяпман. Аммо лекин сиз Толикка жуда ёқиб қолибсиз. Тушлиқдан бери ўн марта телефон қилди, қачон учрашамиз, деб.

— Кўйсангиз-чи, биз бошқа-бошқа дунё одамларимиз. Бундай гап бўлиши мумкин эмас.

— Ие, бу гапни сиз айтаяпсизми? Айтаётганларнинг ўзингиз тарғиб қилаётган “миллати, ирқи, мансуб бўлган динидан қатъий назар...” деган идеологиянгизга қарши эмасми?

— Николай Владимирович, илтимос қиласман, мени қийнаманг. Мен у кишининг миллати, ирқи ҳақида бир нарса деяётганим йўқ. Агар кўнгил кўйсам, хабашга ҳам тегишим мумкин. Аммо тушгача танишган одамга кечкурун турмушга чиқа олмайман-ку.

— Зинаида Абдиевна, сал ошириб юбормаяпсизми?

— Ҳа, балки ошириб юбораётгандирман, мени кечириң, аммо...

— Бу сиёsat учун керак, муҳтарама Зинаида Абдиевна. Сиз билан биз партиянинг аскарларимиз, ҳар дақиқада ўзимизни унга қурбон қилишга тайёр туришимиз шарт. Менимча, шу билан бу масала ҳал. Бундан Марказкомнинг ҳам хабари бор. Улар сиз билан бизни олқишишламоқда.

Зулфизарнинг устидан бир чеълак қайноқ сув қуилиб кетгандай бўлди. Унинг ранги кўмдай оқариб кетган эди. Нима бўлганда ҳам!.. У қўғирчоқмидики, истаган одамларига совға қилиб юборишаверса? Унга қараб, Хадича ҳам кўрқиб кетди.

— Ким, Зулфизар? Сени кимга беришмоқчи?

— Анатолий Абрамович деган жарроҳга! — ўзига ўзи гапираётгандай кўзларини номаълум нуқтага тикиб жавоб қилди у.

— Анатолий Абрамович? Вилоят шифохонасидаги жарроҳлик бўлими бошлиғими? — Хадичанинг кўзлари катта-катта бўлиб кетди. — Ахир У жуҳуд-ку. Жуҳудга теккан одамнинг етти пушти куйиб кетади. Сен шунга рози бўласанми?

— Бошқа иложим йўқ.

— Нега, нега?! Бу сенинг ҳаётинг, ахир. Унга хўжаинлик қилишга ҳеч кимнинг ҳаққи йўқ.

Зулфизар дугонасининг ғазабга тўлиб кетган кўзларига маюсланиб қаради:

— Акс ҳолда ишдан кетишим керак.

— Кет, кетавер. Нимага керак шу иш сенга? Оддий муаллим бўлсанг ҳам, онанг билан бир ўглингни боқа оласан.

— Одамлар-чи? Ишини эплай олмагани учун ҳайдашди, деб кулишмайдими?

— Жуҳудга тегсанг-чи, бундан баттар кулмайдиларми?

Зулфизар индамади.

— Тўғри, юзингга қараб кула олмасликлари мумкин, аммо ортингдан “қаҳ-қаҳ” отиб кулишади, нафрлатлинишади. Мусулмонлик номига дот туширди, дейишади.

— Ноиложман, Хадича! Қолаверса, ўзга миллат билан тақдирини боғлаган бир менми? Хонлар етти иқлимдан гўзал қизларни олиб келиб, уйланишган. Мен унинг миллати бошқа эканлигини айтмаяпман. Уни умуман билмайман, ҳатто дурустроқ гаплашиб ҳам кўрмаганман.

— Билсанг... унга тегишинг ҳам мумкинми?

— Нима бўлти? Дугонажон, мен даҳрийман, аммо сен сифинадиган Худонинг олдида ҳам ҳамма бир хил мақомга эга банда. Мусо яҳудийларнинг пайғамбари, Исо христианларники, агар Оллоҳ бу миллатларнинг бандаларини ёмон кўрганда, уларга пайғамбарлик мақомини бермаган бўларди. Тўғри, мен бу масалаларни унчалик чуқур билмайман, аммо Худо одамларни ўзбек, ўрис, яҳудий деб ажратмайди, уларнинг мўмин ва мунофиқлигига қараб ажратар экан, шуни биламан.

— Онанг билан аканга нима дейсан?

— Уларга тушунтиришни сенга юклайман.

— Йўқ.

— Бу ҳамма замонларда бўлган, азизам. Партия мендан мана шу арзимас қурбонликни сўраётган экан, мен бунга тайёрман. Ўша эркакни севиб, ардоқлаб, одамларга ажойиб оила намунасини намойиш қиласман.

Аслида Зулфизар бу гапларни Хадичага эмас, ўзига айтаётган, бўғзига тиқилиб, исён кўтараётган ўзлигини ишонтироқчи бўлаётган эди. Аммо ҳар қанча ўқтамлик қилиб, дадил-дадил гапирмасин, ичичидан нимадир узилиб, силласи қуриб бораётганини хис этиб турарди. Гарчи бир томондан қаршисида очилишга шай турган баҳт ва ишқ эшиги қаршисида юраги гупирлаб уриб ётган бўлса-да, аммо ич-ичида нимадир бешафқат тарзда бу ёқимли титроқларни “бу мумкин эмас, аспо!” деб шарт-шурт сидириб ташлаётгандек бўлар, шу билан бирга у ўзини ўзи “мен нима ҳам қила олардим, талаб шундай” деб ҷалғитишга уринар, бироқ у кўзлар, у нигоҳлар, у мулојим, ҳа, кучли, бақувват, аммо ипакдек майнин, вужудингга тегса жон ато этгандек бир ёқимли туйғу уйғотувчи у кўллар измига ўзини бутунлай, бир умр ташлаш истаги хиёнаткор иблисдек, уни мазахлаган каби туйғуларини номаълум, кишининг эсида қолмайдиган, аммо нима бўлса ҳам эшитгинг келаверадиган кўйни чалган каби туйғуларининг торини “тинг-тинг”, “жинг-жинг” чалиб кўяр ва Зулфизар шу торлар титроғининг ўзиданоқ барчасини қандай бўлса шундайлигича, шароит оқимиға



ташлаб қўйишни истар, аммо негадир дугонасига ичини ёролмас, куёвликка номзод бу жухуд дўхтирга ўзи ҳам беэътибор эмаслигини тан олиш гўёки ўзини ўзи сазойи этишдек туюлиб, баттар айбдорлик ҳиссини турди.

Икки дугона ўртасидаги узоқ давом этган нохуш жимликни Зулфизарнинг ўйчан овози бузди:

– Қишлоқни соғинибман. Сизларнинг супаларингда ётиб, юлдузларни томоша қилишларни... Бор бойлигимиз эгнимиздаги биттагина чит кўйлак бўлса ҳам биздан бахтли одам йўқ эди ўша кунларда. Мактаб-чи? Кўктош куйдириб оқлатганларимдан кейин қандай чиройли бўлиб кетган эди. Қанийди, бир умр ўша мактабда қолиб кетганимизда...

– Ҳа...

– Энди эса, ўша соchlари қирқ ўрим Зулфизар йўқ. Мен Зинаида Абдиевнаман! Сен эҳтимол, билмассан, мансаб, шон-шуҳрат жуда ёмон нарса. Пастлиқдан туриб, чўққига қарасанг, чўққи жуда чиройли кўринади, кўнглингда ҳавас пайдо бўлади. Аммо чўққида туриб, пастга қарасанг, юрагингни ваҳима босади, тушиб кетишидан кўрқасан. Менда ҳам ҳозир шундай ҳолат. Пастга тушишдан, одамларга масхара бўлишдан кўрқаман. Бунинг устига, русларнинг бизнинг қизларимизга паст назар билан қарашларига чидай олмайман. Бу ерда ўзбек қизларининг нималарга қодир эканлигини кўрсатиб қўйиш учун ҳам ўтиришим керак.

– Яхудийга тегибми?

– Кўйсанг-чи бу гапни. Уям Худонинг бандаси, сен билан мен каби тенг ҳуқуқли фуқаро. Кел, яхшиси бирон кун қишлоққа борайлик, сизларнигига, бизнигига, мактабга... Ҳеч кимга айтмай, секингнига... Қайтадан бола бўлиб... Агар ўша супаларинг турган бўлса, бир кеча ётиб ҳам қоламиз.

Хадича унга ғамгин тикилди:

– Супанинг этаси ўтиб кетди-ку, супа қолармиди? Онам шўрлик ҳар йили сомоншувоқ қилиб, ялтиллатиб кўярди. Акаларим бузиб, жойига ёғочдан кароват қилишиди.

– Майли, ўша кароватда ётамиз. Осмон, юлдузлар турибдими, ахир?

– Майли. Сен вақт топсанг агар...

– Менга қара, Хадича, энамга сен айт, тушунтир. Ўқувчиларингга тушунтиргандай, ҳижжалаб, ишонарли қилиб!..

– Иложим йўқ, – кўзларини юмганча бош чайқади Хадича, – буни мендан сўрама.

У бу гапни шундайин қатъият билан айтди, Зулфизар бошқа ҳар қандай ўтинч ножоиз эканлигини тушуниб етди. Қаҳри келди. “Тумшуғидан нарини кўрмайди. Бутун дунё бир-бiri билан куда-андада бўлиб ётиби. Бу эса бир эрдан чиқкан дугонаси учун фожиа ясади. Шу курсида ўтириб турсам, энг аввало шуларнинг обрўйи эмасми?”

– Хўп, айтмасанг, ўзинг биласан. Фақат жухуд эканлигини ҳам айтма. Рус деб ўйлай қолишсин.

– Бир кун кимдир ҳақиқатни айтади-ку, барибир.

– Айтишганда куёвларига кўнишиб бўлган бўлади.

...Эртаси куни Анатолий Абрамовичнинг ўзи кўнғироқ қилди:

– Алло!..

– Эшитаман... – Зулфизарнинг овози титраб кетди. Гарчи улар деярли гаплашишмаган бўлса-да, бу одамнинг овозини бир оғиз сўзидан таниган эди.

– Ассалому алайкум, Зинаида Абдиевна! Соғсаломатмисиз? Мен Анатолий Абрамовичман.

– Танидим.

– Биз бир учрашишимиз керак, Зинаида Абдиевна!

– Нега?

– Сизга айтадиган муҳим гапларим бор.

– Ҳамма гапни сиз учун айтib бўлишган, – гарчи сұхбатдошининг таклифи унга жуда ёқаётган бўлсада, Николай Владимировичнинг такаббурлиги жуда нағсониятига текканидан мавриди келганда чақиб-чақиб олгиси келаётганди.

– Кўйинг, бу гапларни. Менинг айтмоқчи бўлаётгандарим бутунлай бошқа нарса. Илтимос, йўқ деманг.

– ...

Кечки пайт шаҳар четидаги кичкинагина ҳовлига боришиди. Уларни ёши ўтиңқираган бир киши кутиб олди. Ҳовли шинам ва ораста эди. Ҳовли ўртасига қўйилган айлана столга оппоқ дастурхон ёзилиб, унга гул, хўл мевалар ва иккита шам қўйилган эди. Улар ичкарига киришгач, кутиб олган киши узр сўраб, “зарур ишларим бор эди” деб, ҳовлидан чиқиб кетди. Анатолий Абрамович чақонлик билан илтифот кўрсатиб, уни столга ўтиргизди, ўзи ҳам ҳам костюмини ечиб, ўриндиқнинг елкасига кийгизиб қўйди-да, ошхонадан таом сузиб келди.

– Зираворлар солиб димланган балиқ!..

– Балиқ?! Бу таомни яхши кўришимни қаердан билдингиз? – ҳайрон бўлган Зулфизар хурсандчилигини яшира олмади. Йўқ, севимли таоми дастурхонга тортилганиданмас, кимдир унинг кўнглини топиш учун шунчалик ўлиб-тирилаётгани учун хурсанд эди. – Ҳарқалай, дўстингиз бу таомни яхши кўришимни билмас эди.

– Ҳа, у билмас экан. Аммо шуни унумтандиги, разведкачилик қобилияти бўлмаган одам жарроҳ бўла олмайди. Сиз жуда катта одамсиз, сиз билан ресторанларга бориб бўлмаса... Шундай бўлгач, шу уйга олиб келишга тўғри келди, бу тоғамнинг уйи, у ёлғиз яшайди, озгина бўлса ҳам кайфиятингизни кўтарар деб, суруштирув ишларини ҳам олиб бордим... – У бироз энгашиб, кўлуни Зулфизарнинг қўллари устига қўйди. – Мени кечиринг, Зинаида Абдиевна... – Зулфизар шошиб қўлларини тортиб олди. – Мен сизга бу тарзда эришишни сира ҳам истамаган эди. Менга мажбурият билан эмас, севиб-севилиб турмушга чиқишингизни истайман. Сабаби... Мен сизни яхши кўраман.

Зулфизарнинг потирлаб кетаётган юраклари кўксига сиғмай, буғзига тиқилди. Қаршида титраб-қақшаб ўтирган одам гарчанд ўзга миллат одами, ўзга бир тилда изҳори дил айтадиган бўлса-да, бутун вужудини ёқимли титроқ эгаллаб олган, назарида у бу дақиқаларни, бу одамни бир умр кутган-у, эндиғина етишгандек эди. У индамай ерга қаради, нима десин, нима ҳам дея олар эди?

– Агар юрагингизда менга нисбатан ҳеч қандай рағбат бўлмаса, Коляга ўзим айтаман, сизга ортиқча тихирлик қилмайди. Аммо мен жудаям истайманки, менга бир имконият берсангиз, сизни баҳтиёр қилиш имкониятини... Ахир сиз жуда гўзалсиз, сиз умрингизни, ўзингизни бу хилда ишга фидо қилишингиз асло мумкин эмас, сиз севишингиз, севилишингиз керак. Одам ахир робот эмас, жонли мавжудот...

Улар узоқ гаплашиб ўтиришди. Тўғрироғи, Анатолий Абрамович гапирди, у тинглади.

Ойсултон хола янги куёвни кўрганда Зулфизар илк бор қишлоққа ялангоч оёқларини ширдайтириб, тиззасидан баланд қўйлак кийиб борганида Улкан кампир тушган ҳолатга тушди.

– Бу яна нимаси, қизим? – дея олди зўрға.

– Мен уни яхши кўриб қолдим, эна.

– Энди ўрисга тегасанми, болам, элга кулгу бўлиб?..

– Эна, Оллоҳнинг олдида ўрис-ўзбек деган гап йўқ, ҳаммамиз Худонинг олдида бирдек бандамиз.

Ойсултон хола индамади. Нима ҳам десин? Ёш бола бўлса экан, кўлидаги ўйинчогини олиб қўйса ёки ичкари хонага қамаб қўйса?

Шу билан неча кун гапирмади, бир кўнгли қишлоққа кетиб қолтай, деди, шу қизнинг ҳам, тепакал куёв бўлмишнинг ҳам юзини кўрмайин, деб. Аммо неварасини кўзи қиймади. Зулфизар саҳардан ярим тунгача исҳда, бола овора бўлади.

Орадан бир ҳафта ўтиб, эшиги оҳиста тақиллаб, куёв бўлмиш кириб келди:

– Онажон, ассалому алайкум, – деди у ўзбек тилида дудуқлана-дудуқлана.

Ойсултон кампир жуда қайсар аёл эди. Юзини тескари бурди.

Куёв бўлмиш момонинг ўзига ўхшаш соддагина исёнидан кулди:

– Мен сизни чойга таклиф қилгани келдим, – яна бўғинлаб-бўғинлаб ўзбекча гапирди.

Унинг изидан кирган Зулфизар ҳам кулди:

– Энажон, куёвингизнинг қўлида ўттизта ўзбек ишлайди. Ўзбекистонга кўчиб келганига ўн саккиз йил бўлган. Бу одам шу пайтгача бир оғиз ҳам ўзбекча гапирмаган. Мана, сиз учун қийналиб бўлса ҳам ўзбекча гапиряпти. Юринг энди, бирга чой ичайлик.

– Ичаверинглар!

– Турмасангиз, иккаламиз икки қўлтиғингиздан даст қўтарамиз-да, дастурхоннинг бошига олиб бора-миз. Кейин...

Ростдан ҳам устига бостириб келаётган қизи билан куёв бўлмишни кўриб, момо сапчиб ўрнидан турди. “Энди шунга қўлини ушлатиб!..”

У яна ён босди. Нима қилсин, боласи-да.

Ярим тун. Палатанинг қия очиқ деразасидан кираётган муздек шабада дарпардаларни оҳистагина ҳилпиратиб ўйнайди. Қизи тўшкада ғужанак бўлиб ухлаб ётарди. Кўнгли нотинч, асаблари таранг кишилар ғужанак бўлиб ётади, деб эшитган эди. Бунинг кўнгли нимадан нотинч?

Унинг ётиб қолганиданми? Ахир бу биринчи марта ётиб қолиши эмас-ку? Ёки эрининг хиёнатларини се-заб юрганмикан?

Зулфизар қизини ҳеч қачон ожиз, иложсиз, нотавон ҳис қилмаган. Сора онасига ўхшаш ўқтам, ғайратли қиз бўлиб ўсади. Отасидан тадбиркорликни олган. Ёш бўлса ҳам “Йўқ, ҳеч вақом қолмади” деган жойда бир йил ўйнаб-кулиб яшашга етгулик жамғармаси бўлади ҳамиша унинг. Эри бўлса аксинча, жуда кўнгилчан, бўшанг. Топган беш-тўрт сўм маошини икки кунда сарфлаб қўйиб, кейин бўм-бўш чўнтак билан бўшашиб юраверади. Шундай вазиятда болалар ундан пул сўраса,

бу пул ундан эмас, хотинидан чиқса ёки кейинги сафар болалар ундан эмас, оналаридан пул сўраганда, ўзича эзилади, асаби бузилади. Айни ӯзининг бўшанглигидан эмас, хотинидан ахтаради. Бордир албатта, Сорадан ҳам айб ўтгандир. Ҳамиша пулсиз шумшайиб ўтирадиган эр билан ҳисоблашмаган жойлари кўп бўлгандир. Аммо у эри айтганидек ҳамма нарсадан пулни устун қўювчи молпараст, такаббур, бемехр аёл эмас. Агар эрининг шундай, унинг тўшагида, якин дугонасини ундан афзал билиб, унга хиёнат қилганини билса!..

“Йўқ, у буни кўтара олмайди” ўйлади бир олам андух билан Зулфизар.

Азим шаҳарда, тўрт хонали уйда икки боласи билан ёлғиз, сўппайиб қолиши тасаввур қилиб, кўнгли ғамга тўлиб кетди. Шундайгина бориб, қизининг соchlарини силагиси келди, аммо қанийди ўрнидан туролса, бемажол қўллари унинг бошига етса экан.

– Ўв-в, – ичиди бир бўри “ўв” тортди. Оғзидан бир аланга чиқиб кетгандай бўлди. – Ўв-в!

Унинг омон-омон давронларига йўқлов айтаётган бўри ҳам ўзи каби кекса ва нотавон эди.

Ўзининг оёқлари ҳамиша узангида бўлди, ҳамиша қўлида жарақ-жарақ пул эди, ҳеч қачон бекор, ёлғиз қолгани йўқ. Ярим тунда ишдан келиб, ҳали вужудида симиллаб турган чарчоқлар тарқамасдан ишга югуради. Аммо оёқлари узангида, ўзи шунчалар банд бўлса ҳам юрагидаги ҳувуллаган бўшлиқ ҳамиша ўзини билдириб турарди. Айниқса Ботир гиёхванд бўлиб қолгач, бу бўшлиқ ҳамиша ютиб юборай-ютиб юборай, дерди. Ёлғизлик ёлғиз худойимга ярашган деб, бежиз айтишмаган экан.

Шу боланинг дарди-азоби унинг жони-жаҳонини минг бўлакка бўлиб ташлади. Столни бир муштлаган дам минглаб эркак йигилган мажлис сапчиб турадиган амалдор хоним ўғлининг исмими эшитганда, минг томонда сочилиб ётган жонини бир жойга жам қилиб, зўрға ўрнидан турадиган бўлди. Шундай чиройли уй, машина, мансаб, тавозе-такаллуфларсиз оддийгина пахсадевор уйда, оддийгина қишлоқ муаллимаси бўлиб яшаса, ёнида ўғли соғ-омон бўлса! Атрофида келини, неваралари... Оталари ишдан қайтганда чопқиллаб олдига чиқишишса...

Уйда Зулфизарнинг беш-олтида портретидан бошқа ҳеч нарса қолмади. Қўлга илинадиган нарса борки, ўғли ўғирлаб чиқиб, сотди. Хумори тутиб, қалтираб қолган дам Зулфизарнинг ўзи, деворда осиғлик гила-мими, қулоғидаги сирғасими, боласига ичи ачиганидан ўзи берган кунлари ҳам бўлди.

Шунинг учун ҳам кўёвининг қилмишига “э-э!..” дея олмади. Қўз ўнгига қизи, неваралари келди. Елкаларида ўзларида навқирон ғусса билан... Унинг ўзи юраги тамом бўлган саргардан аёл эди. Энди Соранинг гамини кўтара оларниди.

Кечки пайт “Биринчи” чақиритирди. Хонада “Иккинчи”, “Кадр” ўтирган эди. Зулфизарга негадир “Биринчи”нинг кайфияти йўққа ўхшаб кўринди. Ҳамма иғифилгач, бармоқлари билан силлиқ соchlарини орқага тараб-тараб, ўрнидан турди:

– Ўртоқлар, юқоридан телефонограмма олдик. Хўш, унда бизнинг эътиборимиздан четда қолиб, социалистик турмуш тарзимизни бузиб келаётган баъзи



диний расм-русумлар, одат ва анъаналарни барҳам топтириш вақти келганилиги айтилган. Ҳақиқатан йўлда кетаверсангиз, йўлнинг икки томони ялов илинган ходага тўлиб кетган. “Ҳа?” десангиз, “Шаҳид!” дейишиди. Йўлдами, чўлдами бирон ҳалокат туфайли бирор ўлса, ерга томган қонини қириб олиб, йўлнинг четига шу қириндиди кўмиб, атрофини ўраб, ялов қўтариб қўйишади. Одам ўлмаган, одамзоднинг қони тўкилмаган ер борми? Ҳар бир шаҳид ўтган одам учун тўрт-беш квадрат жойни ўраб, ялов кўтараверсак, ер юзида яашаш, дехқончилик қилиш учун эмас, оёқ қўйишга ҳам жой то-пилмай қолар эди. Зиёратгоҳлар бор: “Сулаймон ота”, “Кокилдор ота”, “Тўқсон ота” ва ҳоказо. Бу “ота”лар ким бўлган? Улар нима каромат кўрсатган, ҳалқ учун нима хизмат қилган? Буни ҳеч ким билмайди, қизиқмайди ҳам. Ҳар чоршанба куни ким товуқ қўлтиқлаб, ким қўй етаклаб, давлатнинг ишини ташлаб, шу зиёратгоҳлар атрофида ин курган текинхўрларни боқиши учун югуради. Ҳай, биродарлар, масалан, Сулаймон ота қаерда яшаган-у, бу ерда унинг қабри нима қилиди, дейидиган бирон ақлли одам йўқ.

Мана шундай тушунмовчиликларга барҳам берадиган вақт келди. Бир томчи қон учун кўтарилиган яловлар олиниб, ўрни ижтимоий фойдали ерларга кўшилсин. Кимлиги номаълум “ота”ларнинг зиёратгоҳлари жойлари текислаб ташлансин.

Ҳайит кунлари қабристонларимиз йифи-сиги қилган хотин-халажга тўлиб кетади. Бу кунлари қабристонга чиқиш ман қилинсин. Ундан кўра йилда бир кун хотира куни деб эълон қилиниб, юртимизда яшайдиган ҳамма миллат вакиллари қабристонларга бориб, ўтганларни хотирласин, қабр атрофларида ободонлаштириш ишларини олиб борсин.

Диндорлар ин қуриб олган мачитлар ёпилсин.

Зинаида Абдиевна! Бу кеча мана шу фикрлар сингдирган ажойиб бир маъруза тайёрлайсиз. Эртага вилоят бўйича барча ташкилот раҳбарларини, фаолларни йиғамиз. Бир ярим минг кишилик йифилиш бўлади. Эрталаб соат еттида маъруза билан танишиб чиқишим керак.

Яна бир гап. Вафот этган биродарларини сўнгги йўлга кузатиш, кўмиш маросимлари ҳақида ҳам ўйлаб кўрадиган вақт етди. Бирор ўлса, жағ-бошини бойлаб, ялангоч ҳолда ётқизиб қўямиз. То узоқ-яқин қариндошлар йифилиб, қабр тайёр бўлгунча ўлик шу ҳолда ётаверади. Бирор ярим яқини сўнгги бор кўриб қолай деб, юзини очса, кўрқанидан юраги ёрилади. Биз ҳам чиройли кийимлар кийгизиб, муносиб тарзда сўнгги йўлга кузатсак бўлмайдими? Йигирма метр оқ сурғга ўраб, қабрга ташлаймиз-у, қайтамиз. Уч-тўрт йил ўтмай қор-ёмғир остида нам тортган лаҳад ўйилиб, ичига одам тушиб кетади доим. Нима кўп, ёғоч кўп. Тўртта ёғочдан ажойиб тобут ясаш мумкин. Наҳот, бир умр меҳнат қилган инсондан тўртта ёғоч азиз бўлса?! Жаноза нимага керак, ҳеч ким тушунмайдиган аллакандай арабча сўзларни ўқиб ўтирасдан, чиройли бир митинг ўтказайлик, мархумнинг фазилатларини эслайлик. Тўғри, бу таклифларни эртанги йифилишда айтиш шарт эмас, аммо ўз бирларимиз ичиди намуна сифатида қўллаб, ҳалқни шунга тайёрлаш, ўргатиш керак.

“Биринчи” гапларини тугатгач, маррага етгунча нафаси бўзига тикилиб колган спортчидек чуқур нафас олди, сўнг “бўладими?” дегандай, “Иккинчи”га қаради. “Иккинчи” “ихтиёрингиз” дегандай елка қисиб қўйди.

– Тушунарлими? – “Биринчи” нимагадир шошарди.

– Ҳеч кимда бошқа таклиф бўлмаса, йиғилиш тамом.

– Шошманг, – мулойимгина оҳангда уни тўхтатди “Қадр”: – Балки эътирозлар бордир?

Ҳеч ким эътиroz ҳам билдирамди.

Эртаси куни йиғилиш жуда жанговар руҳда ўтди. Ҳар бир фаолга қатъий топшириқлар берилди. Ўзаро пичир-пичирларни айтмаганда ҳеч ким эътиroz билдирамди. Аммо ижро қишин бўлди. Ҳар бир яловнинг ортидан ўнлаб одам бош кўтарди. Зиёратгоҳларни бузиш ундан ҳам қишин бўлди. Биронта ўзбек бульдозерчи бу ишни ўз зиммасига олмади. Одамлар орасида “Фалон зиёратгоҳнинг устига бир ўрис бульдезорини соглан экан, қаердандир икки илон чиқиб, бўйнига чирмасибди. Бу ишнинг бошида турган парткомнинг бадани ола-чалпоқ пес бўлиб қолиби” каби ваҳимали гаплар тарқалди.

Ҳайитдан бир кун аввал ҳамма қабристонлар фаолларга бўлиб берилди: “Ҳайит куни қабристонга ҳеч ким чиқмасин. Ўтганлар фақат Хотира куни зиёрат қилинади”.

Зулфизарга ўзларига яқинроқ қабристонни беришди. Фаоллар яхши ишлашибди, катта қабристон ваҳимали тарзда ҳувуллаб ётар эди.Faқат қабристоннинг бир бурчагида беш-олти қорайган кўринди. Зулфизар анча берида турган бўлса ҳам уларни дарров таниди. Ҳа, улар қўшни кўчада яшашарди. Онаси ҳамшира эди, ўтган йили “Ўғлим институтни фақат “5” баҳоларга битириб келди, бир дурустроқ иш топиб беришинг, ёлғизгина болам, бори-йўғим, бор давлатим шу”, деб Зулфизарнинг олдига келган эди. Зулфизар ҳам ҳафсалла қилмади. Аёл бир сафар ўғлини ҳам етаклаб келди. Яқинда автоҳалокатга учраб!..

Онаизор қабрни қуҷоқлаб, дод-фарёд солар, атрофидагилар уни қабрдан бир амаллаб кўтариб олар, у яна юлқиниб ўзини қабр устига отар эди.

Зулфизар чуқур хўрсинди. Кўнглида зиммасига юкланган топшириққа нисбатан эътиroz пайдо бўлди: “Бу шўридага ўғлингни бугун эмас, хотира куни ёдла”, деб қандай айтиш мумкин! “Дўппайган тупроқ уюмлари оралаб, бир-бир босиб изига қайтиб бораркан, ҳудди ортидан бирор қувлаётгандай кўнглига ваҳима тушди, қадамлари тобора тезлашиб, охир оқибат қабристондан деярли чопиб чиқди: “Кимни қачон зиёрат қилиш ҳар кимнинг ўз хоҳиши эмасми? Наҳотки шу масалада ҳам партиядан изн сўраш керак бўлса?”

Энг ёмона ўша кунлар онаси омонатини топшириб қўйди. Гарчи онаси билан лоақал ҳафтада бир марта ўтириб, дурустроқ гаплашишга вақт топа олмаган бўлса ҳам онаси ҳаётидаги энг катта суюнчик эканлигини кўзлари бутунлай юмилган кун билди. Шошиб қолди. Аввал акасига, сўнг ишхонага кўнғироқ қилди: “Онамдан ажралиб қолдим”.

Акаси, янгаси, жиянлари билан олдинма кейин уйига бир қишлоқ одам кириб келди. Кекса холаси изиллаб йиглаб, “Вой, эгачим-эй, ҳалиям шундай ётибди-ми? Чиқиб туринглар, ечинтириб, маҳрам сувга олиш керак”, деб ҳаммани чиқариб юборди.

Бир пайт уни ҳовлидан сўрашаётганини айтишди. Нимагадир бир нохуш хабарни сезгандай юраги “шув” этиб кетди. Остонада кимдир уни супанинг бир четида ўтирган “Биринчи”нинг ёнига олиб борди. Кун исисик бўлишига қарамай қоп-кора костюм-шим кийиб олган “Биринчи” уни ҳовли четига бошлади:

– Зулфизар, – у ҳамиша “Зинаида Абдиевна” деб мурожаат қиласади, – синглим, бандачилик... Она дунёдаги энг улуғ давлат, энг азиз неъмат, уни бериш осон эмас. Энди бардам бўлинг, Худо сабр берсин.

– Раҳмат.

– Хў-ўш, мени кечиринг, топшириқ десамми, омонат десамми, бир гап бор. Шу... момони янгичасига дафн этсак. Кафан ўрнига чиройли уст-бош, тобут... Жаноза ўрнига митинг... Нима дейсиз?

Зулфизарнинг оёқлари остидаги ер силжиб кетгандай, боши айланаб кетди. У бор кучини йигиб, мувозанатини ушлаб қолди. Онасиning юраклари уришдан тўхтаган дам энг катта давлатидан ажраб қолганидан қанча эзилса, муқаррар айтиладиган мана бу топшириқни ўйлаб, ундан кўпроқ эзилган эди. Онаси азиз меҳмон, у қачон бўлмасин, кузатишни билар эди. Аммо бу хилда кузатишни истамас эди. У ёшга тўлган кўзларини илтико билан “Биринчи”га тикиди:

– Мен шу лавозимни деб энамни жуда кўп хафа қилдим. Жуҳудга тегдим, вақт-бевақт ёнларида бўла олмадим, ҳамдардлик қила олмадим. Энди сўнгги йўлга ҳам уларнинг иродасига қарши ҳолда, элга ҳангома қилиб кузатайми?

– Синглим, бу раҳбарларнинг топшириғи... Мен бир ижроҷиман, холос.

– Ака, – деди эмраниб. Расмий қилиб “Сайдмурод Камолович” деб ўтиришга ҳоли йўқ эди. Юраклари иложисизликдан ўртаниб кетди, – ахир бу вилоятда сиздан катта ким бор? Ўзингиз мусулмон бўла туриб, нега менинг энамнинг мусулмончилигига қарши борасиз?

– Мени кечиринг, аммо сиз бунга мажбурсиз.

– Менга қаранг, мен ўлсам, иш либосида, ёғоч то-бутга истасангиз, темир тобутга солиб, жаноза ўқитмай, митинг ўтказиб, кўминг. Лекин илтимос, энамга тегманг. Энамнинг партияга ҳеч қандай алоқаси йўқ.

– У сизнинг, партия етакчисининг онаси... Агар топшириқ бажарилмаса, сизни ҳам, мени ҳам қўйишмайди.

– Ижозат беринг, жон ака, энамнинг ҳурматини ўрнига қўяйин.

“Биринчи” бош чайқади:

– Иложи йўқ. Айтинг, момонинг энг чиройли либосларини кийдиришсан. Тобутга буюртма берилган. Энди бораверинг, – котиб “гап тамом” дегандай изига бурилиб, нари кетди.

Зулфизар худди ёш болага ўхшаб турган жойида ўтириб олиб, ер тепиб, бақириб-бақириб йиғлагиси келди. Бу қандайин хўрлик ахир, на онасини муносиб тарзда кузата олади, на йиғлаб аламидан чиқа олади? Шуми унга партия берган имтиёзлар! Она бўлиб, тўрт оғиз гурунгига мусассар бўлиши қийин бўлса-да, қизининг юриш-туришидан, мартабасидан суюниб юргани учун унга аталган мукофот шуми? Ўшанда биринчи бор ўнг елкасида пичноқ санчилгандай оғриқ тўйди, оғриқча чидай олмай инграб юборди. Оғриқнинг зўриданми, бўғзига тиқилган аламданми, кўзларидан дувиллаб ёш тўкилди. Турган жойида унсиз йиғлаб-йиғлаб, сўнг бирдан ўкириб юборди:

– Эна-ам, вой энам, энам-ам! Эна-ажоним!

Юрагининг туб-тубидан яна бир ўкирик чиқди:

– Вой, шўр бошим... Нотовон жоним...

Энди у ўзига йўқлов айтиётган эди.

Кимдир келиб, кўлтиғидан кирди. Суяб, онасиning бошига олиб келишибди. У хонага кириши билан хонанинг шиплари йиғидан кўтарилиб кетгандай бўлди.

– Вой, энам-ей...

– Вой, холажоним!

У хона ўртасида бир муддат серрайиб турди-да, сўнг онасиning кийимлари турадиган шкафга юзланди. Шкафни очиб, бир текис илиниб турган кийимлар орасидан онаси яхши кўрадиган чинор баргли помбарҳит кўйлакни, фақат тўйларда ёпиладиган оплок рўмолини олди. Кейин марҳумани ўраб ўтирган хотин-халажга қараб: “Энди, ғачилар, ярим соатга чиқиб турсангизлар, онамни сўнгги йўлга тайёрлайлик”, деди мардана.

– Уйи тайёр бўптими? – холаси “ялт” этиб унга қаради.

– Ҳа, – гапни қисқа қилди у.

Хонада ўн чоғли аёл қолди. Хола улардан учовини танлаб олди:

– Энди, хафа бўлманглар, сингилларим, эти, сугаги деган гап шу ерда керак. Майитни ўзининг сугаги ювиши керак.

– Мен бегонаманми? Менинг аммам бўладилар, – изиллади чиқариб юборилаётган янгаси. Ўнинг отаси марҳумага амаки эди.

– Ҳа, сен ҳам сингил эдинг, – деди хола унинг гапини бўлиб. – Лекин ҳозир сен келинсан. Сендан тортинади. Чик. Ювмасанг ҳам, шунча йил бирга яшадинг, хизматини қилдинг. Нима олган бўлсанг, шу хизматлардан олгансан. Энди, ташқарига чик.

Кийинтираш палла яна хола жанжал қилди:

– Иби, бу нима кўргилик? У дунёда бунга помбарҳит кўйлак нимага керак?

– Шундай қилиш керак, – деди Зулфизар имкон даражасида хотиржам, бўйруқ оҳангиди. – Бутун вилоят бўйича раҳбарлар ўтирибди. Тошкентдан ҳам одамлар келишади.

– Келишса келишаверсан, опамнинг нима кийиши билан уларнинг қандай ишлари бор?

– Четга ўтинг, хола! – қўлига ёпишаётган холасини бир силтаб нари суриб қўйди-да, онасини кийинтираш бошлиди. – У менинг энам, увол-савоб ҳам менини.

Онаси жуда сўлим аёл эди, кийинтиришгач, юзларига қизил юргургандай янада сулув аёлга айланди. Қип-қизил духоба кўрпа устига ётқизилгач, эндигина уйкуга кетган маликага ўхшаб қолди.

Зулфизар унинг устидаги ёпинчики кўксига тортиб, юзларини очиб қўйган эди, бир четда тўрсайиб турган хола “дод” деб юборди.

– Ювилгандан кейин юзини номаҳрамлар кўриши мумкин эмас, ҳай кофир!

– Хола, илтимос, мениям, ўзингизниям чарчатманг. Мен бир нарса деяпманми, демак, шуни билиб айтиётган бўламан ва айтганимни қиламан.

– Билганингни қил. Лекин одам эмас экансан. Тупурдим сенинг мансабингга, – хола йиғлаб ташқарига чиқиб кетди.

Бирпастдан кейин унинг ташқаригача қиришириди. Остонада қоп-қора тўн кийиб, белини боғлаб олган акаси кутиб турарди. Кўзлари қизариб кетган ака қовоқларини ўюб, ичи бураб оғриётган одамдай энгашибигина турарди:

– Энамни Сулаймон отага қўямиз. Ҳамма сугагиз ўша ерда. Бу энамнинг сўнгги васияти.

– Шу ердан қабр тайёрлашаётган эканлар-ку.

– Йўқ. Энамнинг сўнгги тилагини бажармасликка ҳеч кимнинг ҳақи یўқ. Мен энамни қишлоққа олиб ке-

таман. Эна меники, обкоминг менинг ишимга аралашмасин.

Бошқа гапнинг ҳожати йўқ эди.

– Ўзингиз биласиз, ака. Каттага бир оғиз айтиб қўйинг.

– Ҳе-е, сенинг каттангни ҳам, каттачилигинги ҳам!.. Кун қизимасдан йўлга тушиш керак. Умидворлар хўшлашиб олсин.

...Кип-қизил духоба ёпилган ёғоч тобут машинага ортилганда Зулфизар ўзида йўқ эди. Жанозасиз йўлга чиқкан марҳумани кузатгани келгандар ёқа ушлаб, эшикка беҳол суюниб қолган Зулфизарга нима деб тасалли беришни билмасди.

Чиройли машиналарда қабристон томон йўл олган катталар юқ машинасининг оёғига қараб ўтиришини лозим топмасдан олдинга ўтиб кетишиди.

Қабристонда анча кутиб қолиша тўғри келди. Ҳаво жуда иссиқ, қабрлар устида қовжираб турган ўт-ўланлар азалий дунёнинг маҳзун кўшигини айтиб ётарди. Тириклик ҷоғларида уй-жой, бола-чақа, от-увол, мол-ҳоли билан дунё-дунё майдонларга сифмай, ўрни келгандан бир парча ер учун талашиб-тортишиб, ёқа йиртишиб яшаган одамларнинг ҳар бири бу ерда нари борса, икки қулочгина ерга қаноат қилиб, жимгина сукут сақлаб, ёнма-ён ётишар эди.

Митингга йигилганлар бетоқат бўла бошлади. Қўшнининг қўшнига сояси тушмайдиган бу даргоҳда шоҳу гадо баробар, минг лавозимдор киши келса ҳам ҳеч ким ўрнидан туриб кутиб олмайди, бу салтанатда ёлғон хушомад, тавозелар йўқ. Тунд сукунат, дим ҳаво йигилганларнинг юрагини сиқиб юборди. Нихоят кўча муюлишида юқ машинаси қўринди. Машинанинг изидан бир тўп қишлоқдошлар етиб келишиди. Қабристон дарвозаси олдида машинадан ҳашаматли ёғоч тобут ўрнига устига духоба ёпилган ихчамгина тол тобут туширилди. Қора костюм-шимларда терлаб кетган “катталар” нима гаплигини англаб етгунча, тобут одамлар елкасида нам тупрок ўюлиб турган қабр бошига етди. Мамараим маййитнинг устига ёпилган духобани кўтарди, тол тобутнинг устида ғожари гиламга ўралган марҳума бир тутам қизғалдокдек бўлиб ётарди.

Ҳаммаси тушунарли, ўғил онасини ўз уйига олиб кириб, қадимий урф-одатлар бўйича ювиб-тараб, кағанлаб, жаноза ўқитиб чиқкан.

– Марҳуманинг тоғаси борми? – сўради қишлоқнинг оқсоқоли.

– Мен тоғасининг ўғлимани, – полвон келбат бир йигит тобутнинг ёнига келди.

– Менинг отам ҳам тоға эди у кишига, – яна бир йигит унинг ёнидан турди.

– Маййитни уйига кўйиш сизларнинг хасмингиз, – оқсоқол уларга изн берди.

Ғожари гилам ичидан оппоқ ғумбак чиқди. Тоғаларнинг бири қабр ичига кирди, иккинчиси ичкарига узатди. Шу топда оломон гўё иккига бўлингандек эди. Бири айтгани бўлмаганидан қаҳрланган, иккинчиси қавмини муносиб тарзда кузата олганидан мамнун. Аммо бу ерда яна бир учинчи тоифа ҳам бор эдик, улар бир томондан бир бегуноҳ муштипарнинг бекафан, бежаноза кетмаганинидан енгил тортса, иккичи томондан эртага бўладиган муқарар гап-сўзларни ўйлаб, саросимага тушиб туришар эди. Булар бир четда гоҳ қизариб, гоҳ бўзариб турган “Биринчи” ва унинг ёнидаги маҳаллий раҳбарлар эди.

“Иккинчи” захрини ютиб тура олмади:

– Бу сизнинг “фоянгизми? Бу ўлкага маданият олиб кириш ниҳоятда қийин эканлиги яна бир бор исботланди.

– Менинг ҳеч нарсадан хабарим йўқ, – шоша-пиша ўзини оқлади “Биринчи”.

Митинг ҳам совуққина ўтди. Ҳамқишлоқлар митинг ёпиқ деб эълон қилингандан кейин қабр бошида қолишиди. Қишлоқ оқсоқоли биринчи фотиҳани ўқигандан кейингина одамлар тарқалди. Қабр бошидан кетишар экан:

– Одамлар, марҳума қандай инсон эди? – деб сўралди.

– Солиҳа аёл эди.

– Яхши инсон эди, – ҳар жойдан шундай жавоблар эшитилди.

– Одамлар, Ойсултон хола қандай инсон эди? – яна сўралди.

– Мўмин аёл эди.

– Мехрибон аёл эди...

Бу савол-жавоб Ойсултон хола қолаётган янги дунё учун айтилаётгандай кайфият уйғотарди кишида.

– Мўмин аёл эди, меҳрибон аёл эди.

Бу сўзларнинг акс-садоси бошлари оппоқ Кўхитанг тоғлари тўшига урилиб, Мамараимнинг қулоқлари остида жарангларди.

“Ҳа, энагинам мўмин, меҳрибон аёл эди”.

Улар Зулфизарнинг уйига қайтиб бормади.

Ақа-сингил бир онага икки уйда маърака ўтказди.

Маъракалар ўтиб бўлгач, Зулфизар онаси билан бирга энг яқин қариндошларидан ҳам ажralиб қолганини тушунди. Уликнинг дастурхони узун деганлари рост экан, унинг уйига кимлар келиб, кимлар кетмади. Аммо энг яқин қариндошлари бир келиб, далда бўлишмади.

Акасининг қилганларини эшитиб, қанча гапга қолган бўлса-да, сира хафа бўлгани йўқ. Хаёлига келмаган чорани топгани учун акасидан хурсанд бўлди, акс ҳолда, бир умр виждан азобида яшашга тўғри келарди.

Қариндошлар эса “Зулфизар мусулмончиликдан батамом чиқибди. Олдин биноидайдай эрини кўйиб, ўрисга теккан эди, энди онасини бежаноза, бекафан, ёғоч қутига солиб кўммоқчи бўлди”, деб ундан бутқул юз ўгиришиди.

Ўзи ҳам кўп вақтлар қишлоққа бора олмай юрди, журъят топмади.

* * *

Ухлатувчи дорилар толиқтирганиданми, унинг ҳеч кўз очгиси келмасди. Ўзи ўйғоқ бўлса ҳам, кўзларини юмиб ётарди. Сора секин бошига келиб, елкасига оҳистагина туртди:

– Онажон!

– Ҳа, – у зилдек қовоқларини базур кўтарди.

Сора нимадандир тараддуланаётганини сезди. У бир зум онасига қараб турди-да, сўнг узр сўрагандай гапини айтди:

– Сиз сўраган одам келиби.

– Ким?

– Акамнинг отаси...

– Ҳа-а, кирсин бўлмаса. Йўқ, аввал бир сидра юз-қўлларимни артиб ол. Кейин...

Сора оппоқ докани намлаб, онасининг юз-қўлларини артди. Оғзини чайдирди, соchlарини тўғрилаб қўйди.

У ташқарига чиқиб кетгач, Зулфизар ёстигининг тагидан кичкинагина ойнасини чиқариб, яна ўзига бир назар солди: яқиндагина бўялган соchlар, пайваста қошлар, бодомқовоқ кўзлар атрофида саф тортган қуюқ киприклар ҳам вужудини ларзага соглан оғриқнинг заъфарон изларини беркита олмасди. Бирдан йиғлагиси келди. Касаллик кўнглини юмшатиб ташладими, кейинги пайтларда сал нарсага хўлкаси тўлиб, кўзлари ёшланаверарди. Аммо ҳозир йиғлаши мумкин эмас! У бир амаллаб кўз ёшларини ичига ютди.

Эшиқдан кирган одамни зўрга таниди. Унинг нигоҳлари шу қадар сокин ва бегона эдик, беихтиёр Зулфизар ўзининг афтода аҳволидан хижолат тортди.

– Тузукмисиз? Сизга нима бўлди?

– Юрагим сағал...

– Худо шифо берсин.

Унинг на овозида, на нигоҳларида заррача ҳамдарлик сезилмаганидан Зулфизар яна хижолат бўлди: “Ўғлини ҳам аллақачон унутиб юборгандир. Балки мен ҳам бу ҳақда умуман сўз очмаганим маъқулдир”.

– Ботир яхшими? – анча пайтдан кейин сўради у.

– Ҳа.

– Мен яна уч ўғил кўрдим. Улар Ботирга жуда ўхшашади. Кўп марта уни олиб кетиб, таништироқчи ҳам бўлдим, лекин сиз рухсат бермайсиз, деб индамадим.

– Ботирнинг мазаси йўқ...

– Нега? Нима бўлди унга?

Унинг овозидаги хавотир Зулфизарнинг кўнглини бироз ёриштириди:

– ... гиёҳванд бўлиб қолди.

Нодир ўрнидан туриб кетди. Дераза ёнига бориб, унга елка ўгириб ташқарига қараганча анча туриб қолди. Гарчи улар айни дамда юзма-юзма туришмаган бўлса-да, Зулфизар унинг кўзларидаги ғазаб ёлқинини аниқ-тиниқ кўргандай бўлди.

– Ҳа, мен айборман. Иш деб, болани кекса онамга ташлаб, бутунлай назоратсиз қолдирдим. Онам шўрлик ниманиям тушунарди. Ҳар хил баҳоналар билан уйдан чиқиб кетаверган. Онам унга ишониб ўтираверган. Гиёҳванд болалар онасининг пули кўп деб буни йўлдан уришган. Хабар топганимда ўрганиб қолган экан. Даволатдим, ялиниб-ёлвордим! Аммо ҳеч тўғри йўлга сола олмадим. Мен најжот истаб, шифохонага юборсам, у ерда бирори даволаса, иккинчиси яширинча наркотик сотар экан.

У ортига бурилиб, Зулфизарга ғазаб билан тикилди:

– Керак бўлса, ўша шифохонада бола билан бирга ётиш керак эди. Нега шундай қилмадингиз? Ахир у касал эди-ку. Мана, сиз касалсиз, ёнингизда қизингиз ётиби-ку, нега уни...

– Ҳа, ётмадим. Ётиш хаёлимга ҳам келмабди. Фақат ўзини уришдим, ялиндим. Мен айборман. Ҳамма айб менда. Қилган хатоларимни энг азиз нарсаларим билан-болам билан, унинг тортган азоблари билан, сувга оққан умрим билан тўладим. Энди кўлимдан ҳеч нарса келмайди. Тўловга арзийдиган ҳеч вақом ҳам қолмади.

– Э-э...

– Бу учинчи инфаркт эди. Мени уришманг, бунинг фойдаси йўқ. Умримнинг саноқли кунлари қол-

ганини билиб турибман, агар иложини топсангиз, биламан, буни сиздан сўрашга сира ҳаққим йўқ, аммо уни сиздан бошқа кимга ҳам топширас эдим? Уни олиб келиб, ўзингиз қаратсангиз.

– Ҳа, ҳа! Албатта шундай бўлади, сиз буткул хотиржам бўлинг. Уни даволатиб, укаларига бош қиламан.

– Раҳмат сизга. Кейин илтимос, уни ҳеч қачон у ёқларга қайтарманг. У тузалиб кетса ҳам ўша чекишни ўргатган болалар яна йўлдан ураверади.

– Ҳўп, майли сиз айтганча бўла қолсин.

Нодир кетгач, яна юраги санчди. Яна укол қилишибди. Уйқу аралаш вужудида симиллаб турган оғриқни ҳис этиб турса ҳам кўнгли хотиржам эди: “Худога шукур”.

* * *

Онасининг маъракалари ўтгач, эри уйга ёшгина бир қизни етаклаб келди:

– Менда ишлайди, ҳамшира. Қандайдир тоғ қишлоғидан келган. Кўнгил қўйган одами ташлаб кетибди. Ҳомиладор экан, ижарадан ҳам ҳайдишибди. Бош ҳамширанинг олдида “Энди қаёққа бораман?” деб йиғлаб ўтирган экан, олиб келавердим. Уйнинг ишларига қарашибди. Ўзинг айтасан-ку, одамнинг чиқити йўқ, деб. Бир хатога йўл қўйган одамни чиқарип юбораверсак, у яна ҳам каттароқ хатоларга йўл қўяди.

Зулфизар кенг кўйлак остидан ҳам билиниб турган ҳомиласидан тортиниб, буқчайибгина турган қизга қаради. Ҳуркак тоғ кийикларига ўхшаш бу қиз жуда гўзал ва болалардек маъсум эди.

– Үқишини битиргач, қишлоғингга кетсанг бўлар эди-ку. Шаҳардан кўра қишлоққа ҳамшира кўпроқ керак. Олий маълумотти врачлардек эъзозда бўлар эдинг. – Бир ғижиниб, рус тилида эрига мурожаат қилди. – Ёшларига ҳайронман, ҳаммаси шаҳарга чопади. Шаҳарга келгандан кейин бу аҳвол!

Қизнинг ўрнига Анатолий Абрамович жавоб берди:

– Амалиётни бизда ўтаган эди. Қўл-оёғи чақонгина экан. Қоламан десанг, қолавер, дегандим. Қўй, уни кўп қийнама.

Қиз жуда чақон ва зийраккина эди. Ҳомиласи бўғзига тиқилаётгандай пишиллаб юрса ҳам, ҳамма ишга улгуарар, ҳовли-жойни ёғ тушса ялагудек қилиб қўяр, тинмай турли хил пишириқлар, бир-биридан тансиқ овқатлар тайёрлар эди. Туқандан кейин ҳам 10-15 кунда ҳеч нарса кўрмагандай рўзгор ишларига шўнгигб кетди. Онаси бечора ҳам қўлидан келганича ғимир-ғимир қилиб бўлса-да, рўзгорига файз киритиб юради. Бу қиз онаси каби бедор ўтириб, ярим тунгача уни кутмаса-да, ҳамма жой озода, рўзгори бадастир эди. Зулфизар ўзининг болаларига нарса олганда, албатта, Насиба ва унинг болачасига ҳам нимадир олар, унга ўз синглисиде мөхр кўя бошлаган эди. Лекин неғадир ўғли билан қизи уларни ёқтиримай қолди. Айниқса Ботир “Шу жодугарни йўқ қилинг” деб қисталанг қилаверарди доим. Бешинчи синфда ўқийдиган Сора ҳам Насибани кўрса, тўрсайиб олар, болачаси ёпишаверса, индамай туриб кетар эди. Зулфизар буни димоғдорликка йўйиб, баъзан Насибадан узр сўрар, болачани бағрига босиб, ўзи эркалаб қўярди:

– Ота-онанинг пули ва мансабига шунча такаббурлими? Э-э, Худойим-еї, бу болалар эрта бир кун бир мартабага эришиб, ўзлари беш-олти сўм пул топса, умуман ҳеч ким билан гаплашмаса керак.

Насиба эса одатдагидек ҳеч нарса демас эди.



Бир кун “сингил”нинг яна қорни дўппайиб турганини сезиб қолди.

– Бу нимаси? Буни қаердан орттиридинг?

Қиз индамади.

Унинг шу индамай туриши ҳам Зулфизарнинг асанни бузди. Иркит нарсага кўзи тушгандай жирканди:

– Бир оғиз тили-забон йўқ, аммо бу ишни қандай уddyалаб келаяпсан? Наҳотки ҳеч кимга гапирмайдиган, қарамайдиган қизни ҳам кўчада тутиб олиб, шу ахволга солиб кетаверишса? Ким у? Кимлигини айтасан менга?! Келиб, болаларига эгалик қилсан! Бўлмаса, лаш-лушкингни йигиштир-да, уйимдан йўқол!

Кечки пайт эрига заҳрини сочди:

– Анавингиз яна бола орттириб олиди.

– Йўғ-е, – кўзлари ола-кула бўлиб кетди эрининг.

– Ҳа! Илтимос, шуни уйдан йўқотинг.

– Шўрлик жуда бўш-да. Қизлар “Йигити келиб юрибди” дейишаётган эди. Яна “чув” тушибди-да. Шошмай тур, шу йигитни топтириб, ўзим бир гаплашай. Жой-пой қилиб, олиб чиқиб кетар, бўлмаса, хизматингни қилиб юрибди-да...

– Эсингиз жойидами? Мен ҳаром-ҳарис аралашган ишни ёмон кўраман, – эрининг гапини бўлди Зулфизар.

– Қанақа ҳаром, нима ҳаром?!

– Анатолий Абрамович, рус тилида тоза ва нотоза деган сўз бор. Бу сўзлар тоза ва нотоза деган тушунчадан келиб чиқкан. Бизда эса тоза ва нотоза деган тушунчалардан ташқари ҳалол ва ҳаром деган тушунчалар ҳам бор. Бу сўзларнинг сизларнинг тилингизда таржимаси йўқ. Маълумот учун, кўчадан орттирилган беникоҳ бола ҳам ҳароми ҳисобланади. Бундай ишлар қилиб юрган аёллардан жирканаман!

Эри Зулфизар билан ошиқча тортишувнинг фойдаси йўқлигини билибми, индамай кўя қолди.

Орадан бир ҳафталар ўтгач, янги гап топлиб келди:

– Беш болали одам экан. Қаматиб юборишимиз мумкин, аммо у Насибани ололмайди. Насиба дугоналарига “Ўзимни ўлдирмоқчиман, боламни кимга қолдирсам экан?” деб юрган эмиш. Энди нима қиласиз?

– Ўзини ўлдирса, ўлдираверсин. Садқаисар! Мендан нари!

– Ҳар бир сүнқасд учун Москвага жавоб берасан. Ўйингда яшаган аёл жонига сүнқасд қилса, гап-сўз кўпайиб кетмайдими? Қўй шуни, Зиночка. Юраверсин. Ўйингга, болаларингга қараб ўтириби. Агар истасанг, ишдан бўшатиб юбораман. Уйдан чиқмай ўтиради. Ортиқча гап-сўзнинг нима кераги бор? – эри жонини жабборга бериб, уни муросага чакиради.

“Рост. Бир бола қўлида, бир бола қорнида, уйжойсиз, кўчада қолса, бу ифлос, албатта, жонига қасд қилади. Уйида яшаган аёлнинг исёни унинг бошига қандай бало бўлиб ёғилишини тасаввур қилиш ҳеч қийин эмас”.

– Ҳаммасига сиз айбдорсиз. Қайси гўрдан шу ҳаромини етаклаб келдингиз? Нима иш қилсангиз, изида бир ишкали бўлади доим.

Бу унинг ён бериши эди.

Анатолий Абрамович уни эркалаган киши бўлиб, оҳистагина елкаларидан кучди:

– Қаердан ҳам билибман! Мен бир содда одам бўлсан, сенга яхши бўлсин, дегандим-да. Сорамиз ҳали кичкина, уй ишларига қарайдиган бир одам керак-

ку, барибир. Бу қиз ҳам ҳали ёш, ғўр. Нима хато қилса, шу ғўргили туфайли қилган. Бутун вилоят аёллари тақдири сенинг кўлингда. Шу бечорадан ҳам мурувватингни аямай, яхши қилдинг.

– Майли, – у бир силтаниб, эрининг қўлини елкасидан тушириб ташлади, – фақат мен уйда бўлганда, кўзимга кўринмасин. Қорнини ҳам, ўзини ҳам кўрмайин.

– Ҳафа бўлмасанг, бир гап айтаман, Зиночка. Кўп руслар ҳам ўз она тилларида сен каби тоза гапира олмайди. Москвада таълим олиб келгансан. Бир қараашда жуда замонавий аёлсан, кийинишинг, ўзингни тутишинг... Аммо қараашларинг ҳамон эскича экан. Ривожланган мамлакатларда никоҳ, фарзанд кўриш ҳар кимнинг ўз эрки. Кимдан хоҳласа, шундан фарзанд кўраверади. Сиз ўзбеклар эса “никоҳли, никоҳсиз” деб фожия ясайсизлар. Бошқа мамлакатларда эркин никоҳ деган тушунчалар бор.

– Э-э, кўп бошимни оғритманг.

...Эртаси куни қайтиши керак эди. Ҳамма иши битгач, тургиси келмай қолди. Кетаётганда қизи йўталиб турган эди, хавотирланди. Кечки 9 да учадиган самолётда ортига қайтди. Қўлида бир дунё қоғоз, топшириқлар бор эди. Бирров ишхонасига кириб, кейин уйга қайтмоқчи бўлди, аммо у ердан чиқа олмай қолди.

Уйга қайтганда, вақт ярим тундан ошган эди. Болаларини безовта қилмаслик учун эшикларни оҳистагина очиб, уйга кирди. Одатдагидек болаларига бир-бир назар ташлаб, сўнг ётоқхонасига ўтди. У ерда ҳеч ким йўқ эди: “Менинг уйда йўқлигимни била туриб, бу пайтгача қаерда юрган экан”, дея хаёлидан ўтказди.

Кийимларини алмаштириб, бир ювиниб олди. Ҳовли адогида Насиба яшайдиган уйчаларга йўл олди: “Қаердалигини балки у билар?”, унинг эшигини қоқиб ўтирмай, дeraзадан борди: “ухлаб ётган бўлса, индамайман”.

Сутдек ойдин кеча, канизлари билан сайрга чиқкан тўлин ой Зулфизар билан бирга дeraзадан ичкарига боқди. Ва!.. Кўзлари тушган манзарадан ой хижолат бўлиб булатлар ортига кириб кетди. Зулфизарнинг ойга ҳаваси келди, қани унинг ҳам кўзларини шу булатлар тўсса-ю, хиёнаткор эрини кўрмаса! Ағесу! Сўнг ўша осмон бор ялтири-юлтири тошлари билан унинг бошига тўклиди.

Ойнинг оппоқ нурларига чўмилиб ётган осуда ҳовлини бир зумда қиёмат кўпди.

...– Ҳозироқ уйимдан йўқол!

Аввалига ранги кумдек оқариб, довдираб қолган аёл устига маломат тошлари отилавергач, кутилмаганда қўлларини белига кўйиб, хужумга ўтди:

– Ҳеч қаерга бормайман! У менинг ҳам эрим, болаларимнинг отаси. Демак, бу уйда менинг ҳам ҳаққим бор!

Бу гапни йиллар давомида бирон марта ердан бошини кўтариб, кўзига тик қарамаган тилсиз-забонсиз “қизалоқ” айтиётган эди.

Бу гап Зулфизар учун кўриб турганларидан ҳам оғирроқ зарба бўлди.

– Шу сенинг эрингми, – лаблари пирпираб кетди Зулфизарнинг. – Бўлмаса, эрингни ҳам ол-да, йўқол. Бу уй менинг уйим.

– Бу уй давлатники! – Насиба ялпайиб диванга ўтириб олди.

— Йўқол, ҳозир иккалангни ҳам ўлдираман, – Зулфизар шкафни очиб, кўлига илинган нарсани уларга қаратиб, улоқтира бошлади.

Очиқ қолган эшиқдан кўркиб кетган ўғли билан қизи кириб келмаганда Зулфизар ҳали-бери бақиришдан тўхтамасди. Унинг ёнида “хай-хай”лаб турган эри болаларга кўзи тушгач, хотинларнинг можаросига кўл силтаб, кўркувдан кўзлари катта-катта бўлиб кетган Сорани даст кўтариб, олиб, бағрига босди. У Сорани алоҳида меҳр билан яхши кўрар, туғилганда ўнг қошининг устидаги холни кўриб, “Онамнинг ҳам шу ерида холи бор эди”, деб унга онасининг исмими кўйган эди. Қизалок улғайган сари отага яхудий момосини тобора кўпроқ эслатадиган бўлиб борарди. Беш-олти ёшларга киргач, ўзи танимайдиган момосининг кичкина нусхасига айланиб қолди. Отаси ишдан қайтгач, уни тиззасидан туширмас, уни исми билан эмас, ўз тилида “мам” (она) деб эркалар эди. У Сора учун ҳамиша ҳамма нарсадан воз кечишга тайёр эди:

— Бўлди, Насиба, йигиштиришларингни!

Насиба гап қайтармоқчи бўлиб хезланган эди.

— Бўл, деялман сенга, – деди.

У бу гапни шунчалар қаҳрли оҳангда айтдики, шангиллаб ётган Насиба индамай юкларини йигиштиришга тушди.

Сўнг Анатолий Абрамович Зулфизарнинг ёнига ўтди:

— Ҳозир олиб бориб ташлайман. Кейин бафуржга гаплашиб оламиз, ўзим сенга ҳаммасини тушунтираман. Ўзингни кўлга ол, болаларни қўрқитаяпсан, – деди ялинчоқ оҳангда.

Дир-дир қалтираб турган Зулфизар кўлидаги буюмни ерга улоқтириб, Сорани эрининг қучоғидан юлқилаб тортиб олди:

— Ўзингиз ҳам бирга йўқолинг, сиз билан гаплашдиган гапимиз қолмади.

Сўнг оstonонда турган ўғлини етаклаб уйига кириб кетди. Улар жуда узоқ йиғиширинди, уларнинг шу ҳовлида ғимир-ғимир қилиб юришлари Зулфизарнинг сабр косасини тўлдириб, тобора ҳолдан тойдириб, силласини қуритиб бораётган эди. Ниҳоят дарваза очилиб, машина ҳовлидан чиқиб кетди. Зулфизар ташқарига чиқиб, дарвозани ичкаридан маҳкамлаб қайтди.

Орадан бир соатлар ўтгач, дарвоза ортига машина келиб тўхтади. Бу вақтда аллақачон тонг ёришиб қолган эди. Келувчи дарвоза олдида анча ғимирлаб, эшикни очолмагач, улар ётган хонанинг деразасини чертди:

— Зина, дарвозани оч!

— Дадам! – ухлаёлмай ётган Сора жойидан сапчиб турди.

— Жойингга ёт, қизим. Энди у сенинг даданг эмас.

— Нега?

— Зина!.. – дераза бетоқатлик билан тақиллади. – Зина, ҳеч бўлмаса, дераза ёнига кел.

Зулфизар ўрнидан турмади.

— Мам! Дарвозангни оч.

Сора деразанинг ёнига борди:

— Дада, онам йиғляяпти, дарвозани очмайсан, деяпти.

Қўшни келинлар чиқиб, кўчага сув сепа бошлашгач, машина изига қайтиб кетди. Олам бир пас сукунат қўйнига чўмди, аммо кўп ўтмай дераза ортидан ўтган-

қайтган одамларнинг овозлари эшитила бошлади. Янги кун бошланган эди. Ҳа, шунчалик шармандачиликларга гувоҳ бўлган тун ўтди, лекин ҳайратланарлisis, ҳаёт тўхтаб қолмади, яна тонг отди, янги кун бошланди, ҳаёт давом этаверди.

Зулфизар минг йиллик хасталиқдан эзилган бемордек зўр-базўр ўрнидан туриб, нонушта ҳозирлади. Болаларни турғизиб, овқатлантириди. Ўзи ҳам наридан бери овқатланган бўлиб, ишга отланди.

Шу уйга кўчиб келишганидан бўён биринчи марта дарвозалари қулфлоғлик қолди. Авваллари онаси уйда қоларди, сўнг қанча пайт Насиба бўлди, хуллас, ҳовлини қулфлаб кетишга ҳеч зарурат бўлмади. Энди эса...

Зулфизар калитларнинг бирини ўғлига, бирини қизига берди. Мактабдан қайтгач, уйдан чиқмай ўтиришни қайта-қайта тайинлади, лекин ишга кўзи орқасида кетди...

Ихтиёри ўзида бўлса, бугун умуман жойидан тургудек ҳоли ҳам, ҳоҳиши ҳам ўйқ эди. Аммо бугун бюро бор. Кеча “Кадр” кимнидир партиядан ўчириш ҳақидаги масала тайёрланаётганини айтган эди. Бормаса, бўлмайди.

Бюро ниҳоятда кескин руҳда ўтди. Ҳамиша ҳамма жойда ибрат қилиб келинган юлдузли ҳўжалик раҳбарини партиядан ўчириб, ишдан олиш ва қамаш масаласи қўрилди. Бу инсон ҳосилдорликни ошириш ҳисобига ҳўжалик аъзоларига ўй-жой, ҳаммом, маданият саройи, спорт комплекси, ҳатто Баҳт уйи ҳам курган. Обрўйи райком котибиникидан кам эмас эди.

Бюорода уни пораҳўрлиқда, мавжуд гектарларни яширганликда айблашди.

– 200 гектар ерни 100 гектар деб ёзиб, ҳосилдорликни 70 центнерга етказдим деб, олтин юлдуз тақсан қаҳрамонни кўринг! Биз бу ёқда бошқа ҳўжаликларни нега ҳосилдорликни 35 центнердан ошира олмайсизлар, деб қийин-қистовга соламиз, урушамиз, дўппослаймиз. Тажриба ўрганинг деб бу кишининг ҳўжалигида семинарлар ўтказамиш. Боргандар ҳайрон, ўзлариникидай дала, ўзлариникидай ғўза. Ҳисобот эса икки баравар кўп. Бу ёқда ҳаммом, спорт комплекси, Баҳт уйи, Маданият саройи. Халқ учун шунча нарса курди, деб юрганимиз. Ҳа, майли, Марказдагилар олдида ҳурмат қозониб, ҳўжаликка шунча маблағ киритиб, фалон-фалон ишларни уddyалади, деб юрсак, ҳурматли Аҳмад Парпиев бу ҳаракатларнинг ҳаммасини ўз манфаати учун, яъни ҳўжалиқдаги қариндошларини ишли, мансабли қилиш учун амалга оширган. Бир оғиз сўзи, ҳар имзоси учун катта-катта поралар олган. Одамлар бу кишининг исми-шарифини унтиб, “ота” дейдиган бўлиб қолган. Буларнинг ҳаммаси меҳнаткаш халқ наزارида социалистик тузумнинг, коммунистик партиянинг обрўсини туширган. Парпиевнинг бу хил ҳатти-ҳаракати партияга, халққа хиёнатдан бошқа нарса эмас. Уни партия сафларидан ўчириб, ишини қонун ҳимоячиларига топшириш керак. Токи халқ хиёнаткорлар жазосиз қолмаслигини кўрсинг.

Хона анча салқин бўлишига қарамай нотик терга тушиб кетган эди. Гапини тутатар экан, гўштдор бармоқлари билан пешонасидаги терни сидириб, биринчи котибга қаради.

“Биринчи” унга “ўтиринг” дегандай ишора қилдида, бюро аъзоларига юзланди:

– Қани, ўртоқлар, яна кимда қандай фикр бор?



– Мол-дунёга ўчлик Парпиевнинг қонида бор. Унинг отаси ўз вақтида бу ерларга қулоқ қилиб юборилган. Партия бағрикенглик қилиб, қулоқнинг боласини кечирди, ўз сафларига олди, мансаб-лавозим берди, халқнинг тақдирини, давлат мулкини ишониб топшириди. У эса бу улуғ ишончни систеъмол қилди. Бундай муттаҳамларга орамизда ўрин йўқ, – бу одам Парпиевни энг кўп “излайдиган” обком ходими эди.

– Халқнинг хизматини қилсин деб, қизимни хуқуқшуносликка ўқитган эдим. Янги Бахт уйи қурилгач, менинг қизимга ўхшаган мутахассислар учун қурилди, деб суюндим. Бу киши эса туман Бахт уйида ишлаб юрган қизини олиб келиб, мудира қилди.

...Бюрга тўплланган эллик-олтмиш одамнинг ҳар бири кўйнидаги тошни отиб қолишга ҳаракат қиласди.

“Нега? Нима учун? Кечагина шуларнинг ҳаммаси Парпиев билан бир бор саломлашишини мукофот деб билишар эди-ку. Шунча нарса қурган бўлса, соchlари оқариб кетган бу чол ўша иморатларни гўрига орқалаб кетмайди-ку!”, Зулфизар бўғзига тиқилган саволларни зўрга ичига ютиб, гоҳ сўзга чиққанларга, гоҳ узун столнинг энг охиридаги ўринидек ерга қараб ўтирган Парпиевга жавдираб қаради. Ёшига хос бўлмаган чаққонлик билан ҳамиша шошиб юрадиган раиснинг юзида илгариги ўқтамлиқдан асар ҳам қолмаган эди.

Бюро тугагач, Парпиев негадир Зулфизарнинг олдига кирди. Зулфизар боя тақдири ҳал қилинаётган дам кўрқоқлик қилиб, бир оғиз ҳам ҳимоя қила олмаганидан хижолат бўлиб, ўзини йўқотиб кўйди.

Парпиев ҳам негадир хижолат эди.

– Мени кечиринг, Зинаида Абдиевна!

– Нега?

– Ўзимни ҳимоя қила олмай, юзларингизни ерга қаратдим. Лекин, – у кафтларини ёзиб, Зулфизарга кўрсатди. – Лекин қаранг, қўлларим топ-тоза, виждомим ҳам тоза.

– Биламан, – баттар хижолат бўлди Зулфизар.

– Раҳмат сизга!

Оқсоқол бошқа бир сўз демай хонадан чиқиб кетди.

Кечки пайт “Кадр” қўнғироқ қилди:

– Зинаида Абдиевна, Парпиевга адвокат бўлиб ёлланибсиз, деб эшитдим.

– Бу гап қаердан чиқди? Хайрлашиш учун кирган экан, холос, – шошиб ўзини оқлади Зулфизар.

– Ҳайронман, нега тақдири ҳал этиладиган бўлимларга эмас, сизнинг олдингизга киради?

– Билмадим, Николай Владимирович, аммо рости гап, унга жуда раҳмим келди, ахир ҳалқ учун қанча хизмат қилган одам...

– Нималар деяпсиз, Зинаида Абдиевна? Ҳали сиз буоронинг қарорига қарши чиқаяпсизми? Бутун бюро аҳмоқ, фақат сиз ақлнимисиз?

– Йўқ, мен ундей демоқчи эмасман...

– Сиз айнан шундай дедингиз ва бу нуқтаи назарингиз учун жавоб берасиз. Ўрни келганда яна бир нарсани айтай, кейинги пайтларда хулқ-атворингиз бизга ёқмаяпти. Ўйингизда сақлаган хизматкорингиз сирка ичib қўйганини эшитдингизми? Инсон бир буюм эмаски, истаган пайти жавонга қўйиб, керак бўлмай қолганда ахлатга улоқтириб юборилса!

Зулфизарнинг юраги қинидан чиқиб кетай деди:

– Унга нима бўпти? Наҳотки?.. – “ўлибдими?” деб сўрашга журъати етмади.

– Уни сақлаб қолишган, аммо “ички ишлар” жонига қасд қилган аёл сифатида рўйхатга олган. Ярим тунда аёл кишини икки бола билан кўчага ҳайдашга қандай журъат этдингиз? Яна вилоятдаги барча хотин-қизлар тақдирига масъул одам бўлсангиз?

– Николай Владимирович! Уни нега ва ким билан ҳайдаганимни биласизми?

– Билмайман, билишни ҳам истамайман.

– Эрчасининг тўрт хонали уйи бор, у ҳеч қаҷон кўчада қолмайди. Яна... унинг ўз жонига қасд қилганига сира ишонгим келмайди. Ахир у мени алдаб, эримни уйимдан олиб чиқиб кетди. Бошида пулдор эри, уйи, машинаси бўлса, жонига қасд қилишга қандай асос бор?

– Сизни ҳам ярим тунда яшаб турган уйингиздан ҳайдаб юборишса, ўша аёлнинг аҳволини ҳис этган бўлардингиз.

– Николай Владимирович, менга нисбатан ноҳақлик қилаяпсиз, – гўшакнинг нариги томонидан алоқа узилганлигини англатувчи “бип-бип” деган овоз эшитилди.

Зулфизар кейинги кунга ўзи туғилиб ўсган хўжаликда ўтказиладиган партия ташкилоти ҳисобот сайлов йиғилишига вакил қилиб белгиланган эди. Бундай топшириқлар умумий тартибда анча олдиндан белгилаб қўйилса-да, одат бўйига кетишдан аввал бирор “Кадр”нинг олдидан ўтилиб, қўшимча топшириқлар бор-йўқлиги сўралар эди. Зулфизар эрта билан туриб индамай қишлоққа жўнаб юборди. “Нима десин? Ўша жуҳудни кўярда кўймай унинг ҳаётига тиқиширган эди. Энди аламидан ҳар хил баҳона топиб, эзишга ҳаракат қиляпти. Виждонсиз. Олса, ишини олспин!”

Хўжалик раҳбари-қирқ йиллардан бери хўжаликни бошқарив келаётган Омонқул раис Зулфизарни ўзгача бир меҳр билан яхши кўрар, у билан фаҳрланар, буни сира яширмас эди.

– Сизнинг ташрифингиз биз учун байрам, хуш келибсиз, – уни кўриб, хурсанд бўлиб кетди Омонқул раис. – Йиғилиш соат 2 га белгиланган. Унгача мактабга ўтиб келмаймизми? Баҳорга бағишлиланган бир тадбирлари бор экан. Кеча директор таклиф қилиб келган экан. Эртага Ола ҳам келадилар, агар хўп десалар, у кишини ҳам олиб ўтаман, деб ваъда қилгандим. Бугун Наврўз – Йилбоши. Шундай кунда эски қадрдонларни излаб, уларнинг кўнглини олиш савоб.

Зулфизар сиқилиб турган эди. Рози бўлди. Қадрдон мактабни кўриб, балки бироз кўнгли ёзилар...

Мактаб тадбирга жуда яхши тайёргарлик кўрган эди. Наврўзой тимсолида чиқкан қизни ўзига ўхшатди: келишган, ўқтам...

Болаларнинг Наврўз тарихидан шунча маълумотни қандай тўплаганига қойил қолди. “Ҳақиқатан ҳам жуда гўзал байрам экан бу. Нега бу кунни ҳеч байрам қилмаймиз?” хаёлидан ўтказди у.

Эртаси куни уни иккинчи котиб чакирди.

– Сиз нима қилиб юрибсиз? Сизни партия ташкилотининг ҳисобот сайлов йиғилишини ўтказишга юборсак, сиз диний байрамлар ўтказишга бош-кош бўлиб юрибсизми?

– Қандай диний байрам? У баҳорнинг келишига бағишлиланган қадимий байрам эди, холос.

– Баҳор биринчи мартаңдан бошланади. Сиз бутун иттифоқ учун белгиланган тақвимни билмайсизми? Кеча 21 марта эди, қандай қилиб 21 марта куни баҳор,

Янги йил бошланади. Янги йил 1 январда нишонлади. Баҳор 1 март куни бошланади. Сиз ўзингизга билдирилган ишончни сунистеъмол қилдингиз. Мав-қеингиздан фойдаланиб, совет турмуш тарзига қаланғи-қасанғи одатларни тиқиширмоқчи бўляпсиз. Бунга йўл қўйиб бўлмайди. Бунинг устига қўл остингиздаги раҳбар ходимлардан тилла тақинчоқлар талаб қилишингиз ҳақида маълумотлар бор. Одамлар орасида Парпиевга нисбатан адолатсизлик қилинди, деб гап тарқатиб юрган эмишсиз. Парпиев қамоқда ўтириби. Айби бўлмаса, қамоққа олишармиди? Қадамингизни билиб босинг, яна Парпиевнинг ёнига бориб қолманг! Шошилинч бюро чақирираман. Бюрога қилмишларингиз ҳақида ўзим ахборот бераман.

Ҳаммаси кутилмаганда, жуда тез содир бўлди. Бир соатнинг ичидаги Зулфизар бутун фаолиятига ҳам, номига ҳам қора чизик тортилди. Ишдан бўшатилди, партиядан учирилди.

– Сиёсий жиноятчи ва порахўр сифатида уни қамоққа олишимиз шарт ва зарур эди, аммо балоғатга етмаган икки нафар фарзанди борлигини инобатга олиб...

У бирданига ҳеч ким ва ҳеч нарсасиз қолган эди. Унинг ёмон одати бор эди. Эрта бир кун керак бўлиб қолар деб, сандиққа 4-5 сўм олиб қўйишни билмас эди. Бюрова айтилганидек порахўр бўлганида...

Эссиз...

– Ҳар йили туғилган кунида тилла тақинчоқ олиб бермасам, кун йўқ эди. Ҳар хил баҳоналар топиб, сикувга оларди.

– Нечада марта шундай қимматбаҳо совға беришга мажбур бўлгансиз?

– Беш марта...

Бу айбловни маданият бошқармаси бошлиғи айтиди. Зулфизар унинг кўзларига, ҳеч бўлмаса, бир мартағина қарамоқчи бўлди, аммо у сира ҳам Зулфизар томонига қарамади. Худди Зулфизар эмас, ўзи пора олгандай бошини ердан кўтармасди.

“Бечора. Мажбур қилишган”. Шу топда негадир ўзига эмас, унга раҳми келди.

Аслида Зулфизарнинг қўли пул кўриб, тўртовора давраларга кирганидан бўён олган жами тилло тақинчоқлари бештагина эди: иккита зирак, учта узук. Шундан бир зирак билан узукни Анатолий Абрамович никоҳ куни совға қилган...

Бюродан кейин уч кун ўтгач, Ҳадича кириб келди. Дугонасининг ранги-рўйини кўриб, роса хижолат бўлди:

– Мени кечир, ҳамиша ўз ташвишларим билан ўгуриб кириб, ҳамма гапни энг охири бўлиб эшитаман. Бугун ишхонамиздан бир муаллима айтди...

– Ҳеч қиси йўқ, ҳаммаси жойида, – маъюсгина кулди Зулфизар.

– Ифлослар, сенинг умрингни, истеъододингни куидиришди. Шуларнинг йўриғига юрмай, илмий иш қилганингда, энг зўр олима бўлар эдинг. Ҳа, уларга ҳам сенинг ақллилигинг ёқмаган аслида.

Зулфизар қўл силтади:

– Қўй, бу гапларни!..

Токчадан тилла тақинчоқларини олиб, Ҳадича нинг олдига қўйди:

– Манавиларни сотиб бер. Ишга жойлашиб, маош олгунча рўзғор қилиб тuriш керак.

Ҳадича ҳайрон бўлиб, бир тақинчоқларга, бир Зулфизарга қаради. Сўнг тақинчоқларни эгаси томонга сурриб қўйди:

– Буларни олиб қўй, – сумкасини ковлаб, бор пулени Зулфизарнинг олдига қўйди. – Маош олгунингча ўзим қарашиб турман. Бизнинг мактабга юр. Олдингидай бирга ишлаймиз.

Зулфизар пастки лабларини тишлаб бош иргади: “Хўп”.

Учундан бери уйи ичидаги шарпадексудралибюриб, кўзларидан бир томчи ёш чиқмаган эди. Кўзларини юмди, аммо қовоқлари дувуллаб тўкилаётган шўртаъм ёшларни тўхтатиб қола олмади. Ҳадича унинг бошини кучогига олди:

– Зулфизар, ҳали ҳаммаси олдинда.

– Йўқ, ҳаммаси тугади!

* * *

Сора бу сафар отаси келганини айтиб ўйғотди:

– Онажон, дадам кирмоқчи. У ҳар кун келади, ахволингиз яхши бўлмагани учун киргизмаётган эдим. Хўп денг, бир мартағина кирсинг, жуда ўтиниб илтимос қилаяпти.

Зулфизар бош чайқади: “Керак эмас”.

– Онажон, ҳеч бўлмаса, мен учун рози бўлинг. У менинг отам, фақат шу одамнинг ёрдами билан бу азим шаҳарда қироличалардай яшаб юрибман. У ҳамиша сизнинг олдингизда ўзини айбдор, деб билади. Қилган ишларидан минг пушаймон. Ўша ёввойи ҳамшира сиз бўла олармиди?

Зулфизар яна бош чайқади: “Барибир, керак эмас”. Сўнг юзини девор томонга ўғириб олди.

Сора унинг бошида туриб-туриб, палатадан чиқиб кетди. Зулфизарнинг юраги сиқилди. Қайсар қизининг айтганларини қилмай, отасини бошлаб келишидан хавотирланди. Юрак ютиб, ота ва қизнинг олдинма кейин кириб келишини кутди. Астойдил Худога илтижо қилди: “Ё, муруватли Оллоҳ, шу нобакорнинг юзи юзимга тушишидан ўзинг асрар!” Илтижо қила туриб ўша “нобакор”ни жуда ҳам кўргиси келаётганини, бошини кўксига қўйиб ўқириб-ўқириб йиғлагиси келаётганини хис этди. Лекин... йўқ, керак эмас!

Анчадан сўнг палатанинг эшиги очилиб, Соранинг ўзи кирди. У айтганини қилдира олмаганидан, отасининг кўнглини топа олмаганидан хафа эди. Индамай каравоти томон ўтиб, жойига чўзилиб олди: “Бунчалар эркатой бу қиз! Нега? Гўдак ҳолида отанинг хиёнатини, аканинг саргардонликларини, онанинг таназзулини кўрди, шу кўргуликлар ичидаги яшади. Аммо қаердан шунчалар ўзбилиармон, эрка бўлиб ўсди? Билимим зўр-да, шу ёшида ким фан доктори бўла олади? Ўзи гўзал. Бўёғи отаси унга мъебудага сифингандай сифинади. Шундан ҳамма айтганим бўлиши керак, деган кайфиятда юришга ўрганиб қолган”.

Хаёлан ўрнидан туриб, қизи тумтайганча чўзилиб ётган каравот ёнига борди, охистагина соchlарини силади: “Мени қўй, жоним. Ўзингни, ўзингнинг турмушинги ўйла”.

Зулфизар неча кундан бери шу гапларни айтишга оғиз жуфтлар эди-ю, аммо ҳеч журъат топа олмасди. Лекин, билади, айтиши керак, токи эрта бир кун қизи ҳам ўзи каби умр поёнида ёлғизлик азобида қийналмасин. Неваралари ҳам отали-онали тўкис бўлиб улғайсинлар.



– Сора!
– Ҳа, она? – қизи сапчиб ўрнидан турди.
– Бу ёққа кел, анави курсини ёнимга қўйиб ўтиргин.

Сора ҳайрон бўлиб, онасининг ёнига ўтириди. Зулфизар унинг қўлларидан тутди:

– Қизгинам, сен жуда ақлли қизсан. Сен фақат ўзинг йўл қўйган хатолардан эмас, ўзгаларнинг, масалан, менинг хатоларимдан ҳам хуласа чиқара олишинг керак. Кечаги одамни кўрдинг, қандай камтар, ақлли инсон. Лекин жудаям бўшант одам эди. Бировларнинг сўзи билан қўйдай бўлиб уйимга кириб келди, қўйдай бўлиб яшади. Унинг шу мўминлиги ғашимни кептирад эди. Шу қўй бир кун келиб менга қўл кўтарди. Бунга ҳам чидай олмадим. Атрофимдагиларнинг тавозелари кўзимни кўр қилиб қўйган эди. “Э, бор-е” дедим. Мен уни мансабга алмаштирудим. Такаббурлигим оқибатида ўғлимни етим қилдим. Мансабимдан ажралмай деб, кечаларимни ҳам, кундузларимни ҳам ишга бердим, ёлғиз ўғлимнинг гиёхванд бўлишига сабабчи бўлдим. Агар отасидан ажралмаганимда, ахир оналаримиз эрлари “қўй” бўлса ҳам, “зўр” бўлса ҳам индамай яшайверишган-ку, мансабга шу қадар ёпишмаганимда, болам шунчалар овора бўлмас эди. Қандайдир сохта ғоялар қурбони бўлдим. Иккинчи марта эрим ташлаб кетганда ҳам партиядан ўчириб, ишдан ҳайдашганларидагидек эзилмаган эдим. Ҳолбуки, ўша аҳмоқ отангни жуда яхши кўрганман, ҳозир ҳам яхши кўраман.

– Онажон, бу гапларнинг нима кераги бор? Ўтган нарсалар учун ўзингизни қийнаманг. Ўзи зўрга қайтариб олди.

– Мен яхшиман, сен хавотирланма. Менга қара, қизим, мен бир нарсани кўриб турибман, сен эрингни умуман назар-писанд қилмай қўйгансан. У эркак, унга эътибор-мехр керак.

– Онажон, бу нима деганингиз? – Қошлари чимирилиб кетди Соранинг. – Мен аёлман, менга ҳам эътибор, меҳр керак. Рўзгорнинг ҳамма харажатлари менинг бўйнимда. Яна димоқ-фироқларини кўтаришим керак. Ўз-ўзидан ҳафталаб гаплашмай юрадими-еј, телевизор кўрган жойида ётиб қоладими-еј. Қиликлари кўнглимни айнитади. Баъзан “кўзимдан йўқол” деб кўчага ҳайдаб солгим келади. Яна неча йиллаб дадамни соғиниб яшаганларимни эслаб, ўзимни босаман. Эртага ўғил уйлантиришим керак, қизимга совчи келади, шунда бошимда эркак бўлсин, дейман. Аммо унга нисбатан кўнглимда заррача илиқлик қолгани йўқ.

Зулфизар қўрқиб кетди. Икки қўллаб қизининг қўлларидан ушлаб олди:

– Йўқ, қизим, истасанг бу гапларимни васият ўрнида қабул эт, аммо эрингга бўлган муносабатингни ўзgartир. “Гуноҳи кабира” деган бир китобдан ўқигандим, оқшом пайти эркак кишининг айби билан эру хотин ҳафалашиб қолса-ю, эркак тоңг отгунча тескари қараб ётса, аёл унинг кўнглини олиб, ўзи томонга қаратмаса, аёл гуноҳкор ҳисобланар экан. Ҳа, айборд эркак киши бўлса ҳам! Шундай, қизим, бизнинг давримизда Исломни бидъят, аёлларнинг ҳукукини камситган, деб таълим беришган. Аслида эса Исломда оилани асраб қолища масъулият аёлнинг зиммасига юклangan, шу масъулиятни кўтаргани учун ҳам унинг оёқлари остидаги ерни жаннат деб атаган. Бир олим пастга туш, оиланг, болаларинг ўзинг учун

унинг ҳурматини ўрнига қўй, Эр-ярим пир, дейишган. Сен ҳам шундай деб ҳисобла. Агар шу эркадан ажрашсанг, билиб қўй, гўримда тик турман. Сенга ҳеч нарса қолдира олмайман, аммо истайманки, бебаҳт тақдирим ҳам мерос бўлмасин.

Сора ҳайрон бўлди:

– Бу нима деганингиз, онажон? Хўп, сизга ким ажрашаман, деяпти. Нега бундай гапларни айтаяпсиз?

– Муносабатингни ўзгартир. У, борди-ю, ажрашаман, деса ҳам, ажрашмайман, дейсан.

– Хўп. Вой-еј, қандайлар куёвингиз бор эди?

– Ана шу гапнинг кераги йўқ. Энди эрингга кўнғироқ қил, мен уни кўришим керак.

– Нега?

– Гапим бор.

– Эртага чақиравман. Бугун чарчадингиз, кеч бўлиб қолди.

– Йўқ, уни бугун кўришим керак.

Орадан кўп ўтмай куёв келди. У бировларнинг гуноҳини ҳам ўз бўйнига олиб, шу мардлиги учун катта жазога маҳкум бўлган одамдай анча тушкун кайфиятда эди. Зулфизар Сорани палатадан чиқариб юборди.

– Фанишер, ўғлим! Менинг вақти-соатим етиб боряпти. Сиздан биттагина илтимосим бор, мендан кейин қизимни, неварапаримни ёлғиз қолдирманг.

Куёв бўлмишнинг кўзлари катта-катта бўлиб очи-либ кетди. У қайнонасидан бундай гапни сира кутмаган эди. Унинг ҳисоб-китоби бўйига бу амалдор кампир эрта-индин оёққа турса, уйда эмас, масъулиятсиз ота, хиёнаткор эр сифатида ишхонасида ҳам мухокама бўлиши аниқ эди. Қачонки, қизининг тўшагида дуч келган манзара туфайли ҳаёт билан видолашмоқда.

– Нималар деяпсиз?

– Биламан, қизим бироз эркароқ. Балки у узоқни кўра олмаётгандир, балки бироз эътиборсизлик қилаётгандир. Лекин сиз эркаксиз, мард бўлинг. Аёллингизни, болаларингизни ташлаб кетманг.

– ...

– Менга ваъда беринг.

Фанишер анча вақт жим қолди. Сўнг чуқур “уф” тортиди.

– Мен Сорани яхши кўраман. Болаларимни ҳам. Уларни ҳеч қачон хор-зор қилиб қўймайман.

– Демак, кетмайсиз.

– Ҳа...

– Яна бир илтимос, рўзгорингизга бошқа ҳаром-ҳариш нарсаларни аралаштирманг. Исмимни русчага ўгирдим. Икки эр қилдим. Лекин ҳеч қачон ҳаром ишга кўл урмадим.

– Биламан.

– Мендан рози бўлинг, ўғлим. Сора сизга омонат. Сизга бироз ташвиш бўладиган бўлдим. Мени онамнинг ёнига қўйишларингни хоҳлайман. У жойлар баҳорда жуда гўзал бўлиб кетади. Бепоён адирликка жойлашган қабристон ям-яшил ўт-ўланлар, қизғалдокларга кўмилиб кетади. Адирнинг устида ётсангиз, бутун қишлоқ кафтдек кўриниб туради. Ўша қабристоннинг этагидан ўтган анҳорда чўмилиб катта бўлганимиз.

– Сиз хавотирланманг, -унинг овози титраб кетди. – Ҳаммаси айтганингиздай бўлади. Фақат илтимос, мени кечиринг. Мен туфайли...

– Unday demang. Bu taқdiri aзал.

Унинг ҳамма маъракалари қишлоқда ўтди. Жанозада одам кўп бўлди. Мамараимнинг ёру дўстлари, ҳамқишлоқлар, Соранинг, куёвнинг таниш-билишлари, қариндош-уруғлар... Зулфизар билан бирга ишлаган деярли ҳеч ким йўқ эди.

Еттидан кейин Сора ёлғиз ўзи қабристонга бориб, онаси билан хўшлишиб қайтмоқчи бўлди. Унга Хадича ҳамроҳ бўлди: "Сени ёлғиз юбормайман".

Саратон кўксини кўйдирган бепоён адирлик ҳувиллаб ётарди. Сора Хадичанинг елкасига бошини кўйиб, узоқ йиғлади. Хадича юрагини бўшатиб олсин деб, атай уни юпатмади. Йиғлаб-йиғлаб, сўнг гурунгга берилди.

Хола, онам сизни жуда яхши кўрарди. Эрим онанг қишлоққа олиб боришимиzn тайинлади, деганда, хафа бўлгандим. Бир марта олиб келиш ташвиши ҳеч нарса эмас, аммо ёнимизда бўлса, соғинган пайтларим шундайгина уйимдан чиқиб зиёрат қилиб қайтаверардим, дегандим. Энди қараб турсам, мени қишлоқ билан, қариндошлар билан боғлашни истаган экан. Зиёрат баҳона уларни ҳам излайди, деган. Яна... Сиқилган пайтлари ҳадеб бошимга келиб, йиғлайвермасин, ўзини кўлга олсин, қаттиқроқ бўлсин, деган. Бу жойларга илгари ҳам кўп келганман. Баҳор пайтлари жуда гўзал бўлиб кетади.

Ха, онанг жуда ақлли аёл эди, – унинг соchlарини силади Хадича. – У ўз даврининг курбони бўлди. Юрт мустақилликка эришган бугунги кунларнинг одами

бўлганида, бу саргардон кўчалардан умуман ўтмаган бўларди.

– Холажон, нега бизда майитлар бошқа халқларникдай, чиройли кийинтириб, мустаҳкам тобутларга солиб кўмилмайди? Оддийгина қилиб, кафанлаб кўмишади?

– Билмадим, болам. Одамзод асли тупроқдан бино бўлган ва яна тупроққа айланади, дейишади. Бу жараён ёғоч тобутта ниобатан, кафандада тезроқ, осонроқ кечади. Ернинг остини ёғоч қутига тўлдиришнинг нима кераги бор? Ер муқаддас, у бизни елкасида опичлаб, кафтида ризқ тутиб катта қилади, фоний дунёдан ўтганимиздан кейин ҳам ўз бағрига олади. Ҳеч ким-на она, на фарзанд мурдани уйида уч кундан ортиқ сақлай олмайди. Ер эса индамай, беминнат, бетаъма, ҳеч қандай эътиrozларсиз яхшига ҳам, ёмонга ҳам кўксидан жой бераверади. Шунинг учун ҳам одамзод ерни яхши кўради, онасига талпингандай унга талпинади, уни Она ер дейди, Она дейди.

Сора атрофга қаради. Аллақачон куйиб, қовжираб қолган бўлса ҳам ажабтовур дала гулларининг ҳидлари уфуриб турган бепоён олам кўнглига таскин берди. Улар ўтирган жойдан онаси туғилиб ўсган уй ҳовлиси кафтдек кўриниб турарди. Ана, тоғаси кекса гужум тагидаги супада қишлоқдошлар билан ўтириби, дарвозадан яна беш-олти аёл келди, уларни жиянлари ичкарига бошлади...

Ҳатто қулоғига Қуръон тиловати ҳам эшитилгандай бўлди. Кўнгли янада хотиржам тортди.



**Гўзал ЖУМАНИЁЗОВА**

Сенга юрагимда айтар бўзим бор

СЕНИНГМАН, ВАТАН

Дилдаги минг орзу-ниятим бўлдинг,
Ўзинг она юртим – осмоним Ватан.
Сенсан саждагоҳим, меҳрим поёндоз,
Жоним аро топган жаҳоним Ватан.

Юрак уриб турад, токи тирикман,
Сенинг меҳринг билан ёниб яшайман.
Дилимни тўлдирдинг шаън-ифтихорга,
Сенинг хизматингга ҳамиша шайман.

Не-не улуг зотлар – юлдузларинг бор,
Мен ҳам осмонингдан жой олсам дейман.
Сенга юрагимда айтар сўзим бор:
Тоабад бағрингда мен қолсам дейман!

ЮРТНИНГ БОЛАСИ

Кўнглида барқ уриб умид гунчаси,
Сафарга отландик зўр сарбон билан.
Очилар манзилнинг буюк дарчаси
Халқим улуглаган ҳур карвон билан.

Бугун бу авлоднинг юрак зарбида,
Биз учун ифтихор, буюк сиймо бор.
Истиқбол қуёши порлар самода,
Бунда ҳар кимсага толе эрур ёр.

Бағрингда баркамол ўсар авлодлар,
Бу юртнинг хазонсиз гулу-лоласи.



*Бу ажисб диёрда, ажисб маконда,
Келажаги буюк юртнинг боласи.*

* * *

*Ҳар япроқ – таниши чеҳрадек,
Менга сокин ҳаёт багишлар.
Ёмғир саси эски хотира,
Яна ўша дамни олқишилар.*

*Кўнглимдаги хазонрезги куз –
Изтироблар чўккан кўзимсан.
Сен мендан ҳеч ўғирмагил юз,
Ҳали айтилмаган менинг сўзимсан.*

*Нафасимни сезасан дилдан,
Кўнглимдаги айтар изҳорим.
Шивирлама ишқининг сиридан,
Қайтиб келмас кўклам, баҳорим.*

Ҳар япроқ – таниши чеҳрадек...

СЕВГИ

*Мунгли хотирларга кўмилиб яна,
Сенинг ишқинг билан яшайман ёлгиз.
Мендан ёргу кунлар бўлишар пана,
Бардошим қолмади, юрак ҳам ожиз.*



*Мұхаббат қалбимда тирикдир ҳамон,
Унинг дарди билан шириндир ҳаёт.
Мен ҳамон сенга баҳт сўрайман ишион,
Гарчи баҳтсиздирман ҳажсирингда, ҳайҳот.*



Роберт ШЕКЛИ

ШАКЛ



Фантастик ҳикоя

Учувчи Пид тезликни қарийб нолга туширди. У ҳаяжон ила мовий сайёрага тикиларди. Ускуналар кўрсаткичларисиз ҳам бунга шубҳа қолмаганди. Қуёш тизимида учинчиси ҳисобланган бу сайёра яаш учун ягона яроқлиси эди. Сайёрани тинчгина сузаётган булутлар ўраб олган.

Сайёра жуда беозордек туюларди. Аммо унда Глом сайёрасидан юборилган барча экспедиция аъзолари умрига зомин бўлган нимадир бордек эди гўё. Пид узил-кесил пастга шўнгишдан олдин қандайдир лаҳзаларга тараддуланиб қолди. Ўзи ва яна икки шериги ҳар қачонгидан ҳам кўпроқ бу ишга тайёр эди. Ҳар бирининг танасидаги чўнтакда ҳозирча ҳаракатсиз, аммо ишлатишга шай, ихчамгина Кўчиригич солинган.

Пид экипажга нимадир демоқчи бўларди-ю, бироқ гапни нимадан бошлашни билмай турарди. Экипаж кутмоқда. Алоқачи Ильг Глом сайёрасига сўнгни хабарни жўнатиб бўлган. Индикатор Жер эса бир йўла ўн олти ускунанинг кўрсаткичларидан кўз узмай турибди. «Душманлик руҳи аломатлари мавжуд эмас», дей маълумот берди у бепарво тарзда.

Пид ушбу хотиржамликни ичидагайд қилиб қўйди. Энди нима ҳақида гапиришни билади. Экспедиция Глом сайёрасини тарк этгандан бўён Шакл Интизомига риоя қилиш салбий томонга ўзгарган. Ҳужум Кўммондони уни огохлантирганди-я. Лекин нимадир қилиш ҳам керак. Бу Учувчининг бурчи, негаки, Алоқачи ва Индикаторлар чиққан қуви табақалар Шаклсизликка интилувчилар сифатида ёмонотлиқча чиқиб бўлишган.

– Экспедициямизга жуда катта умид боғланган, – секин гап бошлади Пид. – Биз энди ватандан йирокдамиз.

Индикатор Жер бош иргади. Алоқачи Ильг эса унга буюрилган Шаклдан оқиб чиқиб, қулай тарзда ялпайиб олди.

– Бироқ, – деди қаттиқўллик билан Пид, – масофа беахлоқ Шаклсизликни оқлаш учун хизмат қилмайди.

Ильг дарров Алоқачига мос бўлган Шаклга айланди.

– Бизга, сўзсиз, Экзотик Шаклларга мурожаат қилишга тўғри келади, – давом этди Пид. – Бундай ҳолатлар учун алоҳида руҳсатнома бор. Аммо унумтманг: хизмат заруратисиз қабул қилинган ҳар қандай шакл айнан Шаклсизликнинг найрангидир.



Жер дархол танаси юзасидаги оқма ўйинларини түтхатди.

— Гапим тамом, — дея хотима ясади Пид ва яна диқкатини бошқарув пультига қаратди.

Кема жуда оҳисталик билан паствлаб борар, экипаж эса шунчалик бир-бирига ўйғун ҳаракат қиларди, бундан Пид бейхиtiёр түрурланиш ҳиссиси түйді.

«Яхши ишчилар, — ўйлади у. — Охир-оқибат улардаги Шаклнинг ўз ўрнини билиш ҳисси олий табақадан бўлган Учувчиники каби ривожланишига ишонса бўлади». Ҳужум Қўмондони ҳам худди шу сўзларни айтганди.

— Пид, — деганди Ҳужум Қўмондони сўнгги сухбат чоғи, — бу сайёра бизга жудаям керак.

— Ҳа, жаноб, — дея жавоб берганди Пид қаддини ғоз тутганча, арзимас ҳаракат билан ҳам ўзидағи Учувчининг Байрамона Шаклини бузмасликка интилиб.

— Орангиздан биттангиз у ерга кириб, атом қуввати манбаи яқинига Кўчиргични ўрнатиши керак. Биз томонда эса қўшин сакрашга шай туради.

— Буни уddyалаймиз, жаноб.

— Экспедиция мақсадга эришиши лозим, — деди Қўмондон. Кучли чарчоқ сабаблими унинг чехраси бир зумгагина қийшайиб кетди. — Гап фақат иккимизнинг ўртамиизда қолсин: Глом ҳозир жуда нотинч. Кончилар иш ташлаган. Улар ер ишлари учун янги шаклларни талаб қилишмоқда. Айтишларича, эскиси ноқулай эмиш!

Пид керакли бўлган қаҳр-ғазабни ифода қилди. Кончилар шакли, худди бошқа асосий шакллар каби жуда қадимда ўрнатилган. Энди эса бу каллаварамлар уни ўзгартишмоқчими?!

— Бу ҳали ҳаммаси эмас, — давом этди Қўмондон. — Биз Шаклсизликнинг яна бир кўринишига тўқнаш келдик. Унинг таъсирига тушиб қолған гломлардан саккиз мингтасини кўлга олдик ҳам, аммо ҳали яна қанчаси озодлиқда юргани номаълум.

Пид гап Глом аҳолиси тасаввурига ҳам сиғдира олмайдиган жуда хавфли иблис, Буюк Шаклсизлик васвасаси ҳақида кетаётганини англади. Аммо гломларнинг қандай қилиб бу васваса кутқусига тушиб қолаётганига ўзиям ҳайрон эди.

Қўмондон Пиднинг кўнглига қандай гап келганини ва уни тилига чиқара олмай турганини дарров тушунди.

— Пид, — деди у, — сен, афтидан, тушунмаётган бўлсанг керак. Айт-чи, сенга Учувчи бўлиш ёқадими?

— Ҳа, жаноб, — оддийгина жавоб берди Пид. — Парвоз қилиш ёқадими, дейсиз. Ахир бу ҳаётим мазмунуку?! Мен кемасиз — ҳеч кимман.

— Аммо ҳамма гломлар ҳам шундай, деб айта олмайди. Менинг ўзимгаям бу тушунарсиз. Вақтнинг бошланишидан бери барча аждодларим Ҳужумлар Қўмондонлари бўлишган. Шу боис ўз-ўзидан тушунарлики, мен ҳам Ҳужумлар Қўмондони бўлишни истайман. Бу нафақат табиий, балки қонуний ҳам. Бироқ қуий табақалар бутунлай бошқа ҳиссиётларни тудилар, — Қўмондон ғамнок алпозда танасини қимирлатиб қўйди. — Сенга бу ҳақда бекорга галирганим йўқ. Биз гломларга катта маконлар керак. Сайёрадаги низолар, тартибсизликлар аҳолининг кўпайиб кетгани билан изоҳланади. Психологлар шундай дейишмоқда. Агар бошқа сайёрада ривожланиши имкониятини кўлга киритсак — барча яралар тузалиб кетган бўларди. Шу боис сенга умид боғлалямиз.

— Ҳа, жаноб, — фахрлангандай жавоб берди Пид.

Сухбат тугаганига ишора қилгандек, Қўмондон жойидан турмоқчи бўлди-ю, кутилмаганда яна қайтиб ўтириди.

— Экипажга кўз-кулоқ бўлиб туриш керак. Содик йигитлар, бунга гап бўлиши мумкин эмас. Аммо улар барниб қуий табақадан. Қуий табақанинг қанақалигини эса ўзинг яхши биласан.

Ҳа, Пид буни биларди.

— Экипаждаги Индикатор Жернинг Испоҳотчиликка яширинча мойиллиги бор, дейишади. Бир сафар уни ноқонуний тарзда Овчи шаклига киргани учун жаримага ҳам тортишган. Ильга қарши бирор аниқ айлов йўқ. Бироқ менга маълумот беришларича, у шубҳали тарзда узоқ вақт ҳаракатсиз ҳолатда қолар экан. Ўзини Мутафакир деб ўйлаётган бўлиши эҳтимоли ҳам йўқ эмас.

— Бироқ, жаноб, — журъат этиб Қўмондоннинг гапини бўлди Пид, — агар уларнинг номига Испоҳотчилик ёки Шаклсизлик борасида озигина доғ тушган бўлса ҳам бундай экспедицияга жўнатиш тўғри бўлармикан?

Бироз тараффудлангандан сўнг Қўмондон ҳўрсиниб кўйди:

— Мен ишонсанам бўладиган гломлар бирталай. Бироқ бу икковида тасаввур ва топагонлик кучлироқ, яъни улар мазкур экспедиция чоғи асқотадиган алоҳида сифатларга эга. Уларга кўз-кулоқ бўлиб туриш керак.

— Ҳа, жаноб, — деди Пид ва сухбат тугаганини англаб, салют берди.

Пид танасининг ички чўнтағида айни дамда муррок ҳолдаги, лекин зарур пайтда душманинг атом энергиясини Гломнинг енгилмас қўшинини олиб ўтадиган самовий кўприкка айлантириб бера оладиган Кўчиргичнинг оғирлигини ҳис қилди.

— Омадингизни берсин, — деди Қўмондон. — Унинг сизга керак бўлишига ишончим комил.

Кема бирор товуш чиқармай, душман сайёраси томон паствлаб бормоқда. Индикатор Жер паствда сузуб юрган булутларни тадқиқ этди ва олинган маълумотларни Ниқобловчи блокка киритди. У эса дархол ишга киришди ва тез орада кема патсимон булат шаклини олди.

Пид кеманинг сирли сайёра узра оҳиста парвоз қилишига қўйиб берди. Энди у Учувчининг Байрам Шаклида, яъни Учувчилар табақаси учун мўлжалланган тўрт шаклнинг энг самарали ва энг кулайида эди. Ҳозир у гунг, кўр ва соқовга, янаем тўғрироғи, бошқарув пультининг ажралмас қисмига айланган. Бутун диққат-эътибори қат-қат булутлардан ўзиди кетмасликка ва улар билан ўйғунашиб кетишга қаратилган эди.

Жер эса Индикаторлар учун руҳсат этилган шакллардан бирига кириб олган ва зўр бериб уни сақлаб қолишга интиларди. У маълумотларни Ниқобловчи блокка киритгач, паствлаётган кема тўп-тўп булутлардан бирига ўхшаб қолди. Душман сайёрасида эса ҳеч қандай ҳаёт аломатлари зоҳир бўлмасди.

Ильгат атом қуввати манбаи жойини аниқлади ва бу ҳақда Пидга хабар берди. Учувчи йўналишни ўзгартириди. У энг паствдаги булутларгача тушиб борди. Сайёрагача бир мил масофа қолганди. Бироқ хавф сигналидан дарак йўқ. Ўзларидан олдин жўнатилган йигирмата экспедициянинг қисмати нима бўлгани ҳам жумбоқлигиича қолмоқда эди.

Пид атом электр станцияси узра парвоз қилаётганида сайёра юзини ғира-ширалиқ қоплай бошлади. Атрофдаги бинолардан узоқроқ бўлишга интилган кема энди ўрмон узра парвоз қилишга ўтди. Чор-атрофда қоронғилик борган сари қуюқлашиб бормоқда. Мовий сайёранинг ягона Оий қалин булутлар пардаси ортига бекинди. Булутлардан бири тобора паствлаб, паствлаб... охири ерга кўнди.

– Тезда кемани тарқ этинг! – қичқириди Пид бошқарув пультидан ажралаётіб.

У энди югуриш учун эңг қулай бўлган шаклга ўтиб олиб, отилиб люқдан чиқди. Жер ва Ильглар ҳам унинг кетидан ошиқдилар. Кемадан эллик метрлар нарига югуриб боришгач, таққа тұхтаб, кута бошлашиб.

Кема ичидаги қайсицир занжирда қисқа туташув юз берди. Кема овозсиз бир титраб олди-да, уларнинг кўз ўнгида эрий бошлади. Пластмасса ҳавога сингиб, металл асослар буришиб, кичрая бошлади. Кўп ўтмай, кема бир уюм лаш-лушга айланди, бироқ жараён ҳали давом этмоқда эди. Йирик металл бўлаклари кичкина-ларига айланар, майдада синиқлар яна ва яна бўлинарди. Кеманинг ўз-ўзини йўқ қилишини кузатиб турган Пидни кутилмагандан чорасизлик ҳисси чулғаб олди. У Учувчиликтар табақасидан чиқкан эди. Унинг отаси, отасининг отаси, хуллас, ўша туманли даврлардан, Гломда илк самовий кемалар пайдо бўлган пайтлардан бошлаб барча ажоддлари Учувчилар бўлишган. Унинг бутун болалиги кемалар орасида ўтди, вояга етгач, ўзи ҳам Учувчига айланди. Айни дамда эса бегона оламда кемасидан ажралгач, чорасиз ва иложксиздек сезарди ўзини.

Бир неча дақиқадан сўнг кема қўнган жойда бир уюм чангнина қолди. Тунги эсган шамол эса бу чангни бутун ўрмонга сочиб, тарқатиб юборди.

Улар кутишарди. Бироқ ҳеч нима содир бўлмади. Шамол ғувиллар, дараҳтлар қисирларди. Олмахонлар инларида қасир-кусур қилишар, қушлар эса дараҳт шоҳларида ўтириб олиб, вақти-вақти билан қанотларини потирлатиб-потирлатиб қоқиб қўйишарди. Чўчқаёнғоқ қисқагина бўғиқ қарсилаган товуш чиқариб, ерга тушди. Шундай қилиб, Гломнинг йигирма биринчи экспедицияси Ерга омадли қўнганди.

Эрталабгача ҳеч бир ишни қилиб бўлмасди, шу боис Пид режа туга бошлади. Улар атом электр станциясининг жуда яқинига қўнишган. Шунчалик яқинки, бу ўзига хос жасурлик ҳам эди. Энди эса янаям яқинроқ боришлари керак. Улардан бири атом реактори биносигача етиб бориши ва Кўчиргични ишга тушириши лозим. Бу кийин. Аммо Пид бунга эришишига шубҳа қилмасди. Ахир топқирилқида Глом аҳолисининг олдига тушадигани йўқ.

«Топқирилкка жуда топқириларку-я, – аччиқ ўйга толди у, – аммо уларга радиоактив унсурлар даҳшатли тарзда етишмайди-да!» Бу мазкур экспедициянинг ўта муҳим ҳисобланишига сабаблардан яна бири. Гломликлар ўзларига буйсундирган сайёralарда радиоактив ёқилғи деярли қолмаган.

Янги тарих бошланишидаёқ қўшни оламларни ўзлашиб, яшашга яроқларига кўчиб ўтиш учун ўзининг барча радиоактив моддалар заҳирасини сарфлаб бўлган Гломга ҳамиша янги-янги оламлар зарур эди.

Яқинда разведка экспедицияларидан бири томонидан топилган бу сайёра ҳам гломликларга керак. У гломликларнинг барча талабларига жавоб берарди, аммо анча опис масофада жойлашиб. Ҳарбий-фазовий флотни жўнатишга эса ёқилғи етишмасди. Аммо гломликларнинг баҳтларига мақсадга етишишнинг бошқа, ундан-да кулайроқ йўли топилди.

Қачонлардир жуда қадимда Глом олимлари Кўчиргични яратишган. Бу ўша даврларда Айниятлар Техникасида чинакам ғалаба бўлганди. У маълум йўл билан ўзаро боғланган икки нуқта ўртасидаги массани лаҳзалар ичидаги бир нуқтадан иккинчисига кўчиради. Биттаси кўчмас ҳисобланиб, уни Гломдаги ягона атом

енергостанциясида жойлашиб. Иккинчи учини эса исталган ядрорий қувват манбаи ёнига жойлашибди, ҳаракатга келтириш керак бўларди. Ажратилган қувват икки нуқта орасида ҳаракатланиб, икки бор ўз шаклини ўзгартиради. Айниятлар Техникаси мўъжизаси туфайли гломликлар сайёрадан сайёрага сакрашлари, уларга қуондай ёпирилишлари мумкин эди.

Бу жуда содда усулда амалга ошириларди. Бироқ шунга қарамай, йигирмата экспедициядан бирортаси Ердаги нуқтага Кўчиргични ўрната олмаган. Уларга нима ҳалақит берганини эса ҳеч ким билмайди. Бу ҳақда сўзлаб бериши мумкин бўлган бирортаям кема аззоси Гломга қайтмаган.

Тонг пайтида экспедиция аъзолари маҳаллий ўт-уланлар тусига кириб олишиб, ўрмон оралаб кетиб боришиарди. Кўчиргичлар яқин ўртада ядрорий қувват борлигини сезгандек кучсиз титрай бошлади.

Уларнинг ёнидан миттигина тўртоёқли жонивор югуриб ўтиб кетди. Худди шу пайт Жерда ҳам тўрт оёқ пайдо бўлиб, ҳалиги жониворнинг кетидан қувлав қолди.

– Жер! Тезда ортингга қайт! – қичқириб юборди Пид эҳтиёткорликни унутиб.

Жер эса бу орада жониворга етиб олиб, ерга босди. У ўлжасини емоқчи эди, бироқ тишлиларни пайдо қилиш эсидан чиққанди. Бундан фойдаланган жонивор унинг чангалидан чиқди-да, ўрмонда кўздан йўқолди. Жер тишлиларни пайдо қилди ва сакраш учун мушакларини таранглаштира бошлади.

– Жер!

Индикатор истамай ўгирилди. Товуш чиқармасдан сакраб-сакраб Пиднинг олдига келди.

– Қорним очганди, – деди у.

– Йўқ, очмаганди, – деди қатъийлик билан Пид.

– Очганди, – тўнғиллади Жер хижолатдан ўнгайизлизаниб.

Пид Қўмондоннинг гапларини эслади. Жерда, сўзсиз, Овчи бўлишга нисбатан кучли мойиллик яширган. Унга кўз-кулоқ бўлиш керак.

– Бунга ўхшаш нарсалар бошқа тақрорланмасин, – деди Пид. – Унутма, Экзотик шаклларга киришга ҳали рухсат берилмаган. Ҳозирча ўзинг туғилган шакл билан қаноатланиб тур.

Жер бош ирғади ва яна ўрмондаги буталар билан уйғунлашиб кетди. Йўлни давом эттирилар.

Ўрмон четидан атом электр станцияси жуда яхши кўринарди. Пид бутага монанд никобланди, Жер эса эски ғўлага айланди. Ильг эса бироз ўйланиб тургач, ёш эман кўринишига кирди. Станция унча баланд бўлмаган металл тўсиқлар билан ўралган узун бинодан иборат экан. Тўсиқдаги дарвоза ёнида сокчилар туришарди.

«Биринчи галдаги вазифа, – ўйлади Пид, – йўлини топиб, дарвоздадан ўтиб оиш». У бунинг усууллари ва йўллари ҳақида ўйлай бошлади.

Разведка экспедицияларининг ҳисоботларидан олинган узук-юлук маълумотлар бўйича, баъзи муно-сабатлар борасида одамлар ирқи гломликларнига ўхшаб кетишини Пид биларди. Уларнинг ҳам худди гломликларнидек ўйлари, хонакилаштирилган жониворлари, маданияти бор. Механика борасида ерликлар ҳам худди гломликлар каби жуда моҳир.

Бироқ бу икки ирқ ўртасида ақл бовар қилмас фарқлар ҳам мавжуд. Одамларга худди тошлар ва дараҳтлар каби доимий, ўзгармас шакл берилган. Бу бир хиллик ўрнини тўлдириш учун уларнинг сайёраси турли-



туман насл, нав ва зотларга фавқулодда тўлиб-тошиб кетган. Ҳайвонот олами бор-йўғи саккизтагина шаклдан иборат Гломга сира ўхшамайди, албатта.

«Чақирилмаган меҳмонларни тутишда ерликларнинг малакаси анча ошгани ҳам аниқ», ўлади Пид. Афсуски, олдинги экспедицияларнинг муваффақиятсизликка учраши сабабини билмайди-да. Бу ишни анча осонлаштирган бўларди.

– Топдим, – деди Жер ғалати жонивор кўздан йўқолиши билан. – Мен Одамга айланаман-да, дарвозадан ичкарига, реактор биносига кириб, Кўчиргични ҳаракатга келтираман.

– Сен уларнинг тилида гаплашишни билмайсанку?! – эслатди Пид.

– Бирон оғиз ҳам гапириб ўтирумайман. Уларга ҳатто, эътибор ҳам қаратмайман. Мана бундай, – деди-да, Жер инсон қиёфасига кириб олди.

– Чакки эмас, – қувватлади Пид.

Жер бир неча марта Одам каби қадам ташлаб кўрди.

– Бироқ кўрқаманки, бундан бирон иш чиқмайди, – давом этди Пид.

– Ахир, бу мантиқаям мос келяпти-ку?! – эътиroz билдириди Жер.

– Биламан. Олдинги экспедициялар ҳам худди шу усулни кўллаб кўришган бўлишлари керак. Оқибатда уларнинг биронтасиям қайтмади.

Бу борада баҳс юритиш қийин эди. Жер яна тўнкага айланди.

– Унда нима қиламиз? – сўради у.

– Мен бир ўйлаб олай, – жавоб берди Пид.

Улар олдида икки оёкли эмас, балки тўрт оёқдаги жонивор ивирсиб юра бошлади. Пид уни дарров таниди. Ит – Одамнинг дўсти. Пид дикқат билан уни кузата бошлади.

Ит ер исказанча дарвоза томон юрди. Уни ҳеч ким тўхтатмадио Ит дарвозадан ўтиб, майсалар устига ётиб олди.

– Иҳм, – деди Пид.

Улар итдан кўзларини узмай кузатишарди. Одамлардан бири унинг ёнидан ўтаётуб, бошига тегиниб қўйди. Ит эса тилини чиқариб, оёқларини осмонга қилиб олди.

– Мен ҳам шундай қила оламан, – деди ҳаяжонланиб Жер. У Итнинг шаклига кириб бўлганди аллақачон.

– Йўқ, шошма, – деди Пид. – Куннинг қолган қисмини яхшилаб ўйлаб олишга сарфлаймиз. Ишимиз жуда муҳим, бунда кўр-кўрона иш тутиш ярамайди.

Жер хўмрайганча унга бўйсинди.

– Кетдик, қайтадиган вақт бўлди, – деди Пид.

Жер билан яна ўрмоннинг куюқ жойига қайтмоқчи бўлиб туришганида, кутилмаганда Пиднинг эсига Ильгутшиб қолди.

– Ильг! – секин чақирди у.

Ҳеч қандай жавоб бўлмади.

– Ильг!

– Нима? Ҳа, айтганча, – деди ёш эман ва бутага айланди. – Узр, бирон нима дедингизми?

– Биз қайтаяпмиз, – такорлади Пид. – Сен тасодифан Мутафаккирга ўшаб чукур мушоҳада қилмаётганимидинг?

– Йўғ-э, – ишонтирди Ильг. – Шунчаки, дам олаётгандим.

Пиднинг бу изоҳга рози бўлишдан ўзга чораси қолмади. Ташвишлари шусиз ҳам керагидан ортиқча.

Улар куннинг қолган қисмини ўрмоннинг зич ерида бу масалани муҳокама қилиб ўтказдилар. Афтидан, уларда иккита имконият бордай туюлди – Одам ёки Ит шаклига кириш. Бир жойда томир отиб ўсадиган дараҳнинг дарвоза томон ҳаракатланиб бориши сира-сира ўтиришмасди. Бунинг устига ҳеч ким шу тахлит сездирмасдан ўтиб кетолмайди.

Одам шаклида ўтишга уриниб кўриш ҳам жуда таваккал қилишдек гап эди. Хуллас, эрталаб Жернинг Ит шаклида бу ишни амалга оширишга уриниб кўришига келишиб олдилар.

– Энди ухлаб олинглар, – деди Пид.

Экипажнинг иккала аъзоси ҳам унга бўйсиниб, ўша лаҳзанинг ўзидаёқ шаклсиз кўринишга келиб, ялпайиб олишиб. Ҳаммаси оддийдек кўринарди гўё. Нега атом электр станцияси бунчалик ёмон кўриқланмоқда? Олдин кўлга олишган экспедициялардан Одамлар бирон нимани билиб олишлари керак эди-ку?! Наҳотки, улар умуман савол ҳам бериб ўтирумай, ўлдириб юбораве-ришган бўлишса?

Ўзга оламлик маҳлуқотнинг нима қилмоқчилигини олдиндан ҳеч қаҷон билиб бўлмайди.

Балки очиқ дарвозалар тузоқдир?

Пид ҳорғин ҳолда юмшаб, дўнгчали ерга кулайроқ жойлашиб олди. Бироқ шу заҳотиёқ ўзини тартибга келтирди.

Шаклсизлик ҳолатигача тушибди-я?!

«Кўлайликнинг бурчга ҳеч қанақа алоқадорлиги йўқ», дея ўзига эслатди ва дарров яна Учувчи шаклига кириб олди.

Бироқ Учувчи шакли намчил, нотекис тупроқда ухлаш учун мўлжалланмаганди. Пид тунни нотинч ўтказди.

Эрталаб Пид чарчаган ва кайфиятсиз ҳолда ўйонди. Жерни туртди.

– Ишга киришиш керак, – деди у.

Жер кувноқлик билан тик шаклга кириб олди.

– Ильг, сен ҳам ўйғон! – деди Пид атрофга аланг-лаб. – Ўйғон деяпман!

Жавоб бўлмади.

– Ильг! – чақирди у.

Яна жавоб йўқ.

– Уни топишга ёрдамлашиб юбор, – деди Пид Жерга. – У шу яқин атрофда бўлиши керак.

Икковлашиб ҳар бир бута, дараҳт ва тўнкаларни текшириб чиқишиди. Аммо уларнинг бирортаси Ильг эмасди.

Пид танасини совуқ кўркув эгаллаганини ҳис этди. Алоқачига нима бўлдийкин?

– Балки таваккал қилиб, дарвозадан ўтишга қарор қилгандир? – деди Жер.

Пид бу фаразни ўйлаб кўрди, аммо бундай бўлиши мумкин эмасди. Ильг ҳеч қаҷон ташаббус кўрсатмаган. Ҳамиша бирорларнинг буйруқларини бажариш билан қаноатланарди.

Уни кута бошладилар. Кун ярим бўлди ҳамки, ундан дарап йўқ.

– Бошқа кута олмаймиз, – эълон қилди Пид ва иккови ўрмон бўйлаб ҳаракатлана бошладилар. Пид кетаётуб, Ильгнинг ростдан ҳам дарвозадан таваккал қилиб ўтишга уриниб кўрганмикан, деган савол устида бош қотириб бораради. Бундай индамасларда кўпинча ақлага тўғри келмас жасорат яширинган бўлади.

Бироқ ҳеч нима Ильгнинг уриниши амалга ошганига шаъма қилмасди. Бундай вазиятда Алоқачи ҳалок

бўлган ёки Одамлар уни асир олишган, деб ўйлашга тўғри келарди.

Демак, энди Кўчиргични иккови ишга тушириши лозим.

Пид ҳалиям олдинги экспедицияларга нима бўлганини билмасди.

Ўрмон четида Жер Ит шаклига кирди. Пид уни синчиклаб текшириди.

– Думни сал калтароқ қил, – деди у.

Жер думини калталаштириди.

– Қулоқларни катталаштири.

Жер қулоқларини катталаштириди.

– Энди ўлчамларни бир-бирига тўғрила, – деди Пид ва нима ҳосил бўлганини яна бир бор текшириб кўрди. Жер ҳақиқатан ҳам, думи учидан то қоп-қора ҳўл тумшуғигача Ит шаклига кирганди. – Омадингни берсин!

– Миннатдорман, – деди ўрмондан эҳтиёткорлик билан чиқа бошлаган Жер.

Жер Итнинг қадам олишини ўхшатиб кета бошлади. Дарвоза олдида соқчи уни чақирди. Пиднинг дами ичига тушиб кетди. Жер Одамнинг чақиришига эътибор ҳам бермай, ёнидан ўтиб кетди. Одам Жер томон юра бошлаганди, у қочишга тушди.

Бу орада Пид иккита оёқни тайёрлаб турарди. Бу агар Жерни қўлга олишса, ёрдам беришга югуриш учун. Аммо соқчи яна дарвоза ёнига қайтди. Жер ҳам қочишдан тўхтади ва хотиржам асосий кириш эшиги томон кета бошлади.

Енгил нафас олган Пид ҳалиги икки оёқни йўқотди.

Бироқ асосий кириш эшиги ёпиқ эди! Пид Индикаторнинг уни очишига ҳаракт қилиб кўрмаслигига ишонарди. Ахир бу Итларга хос эмас.

Жернинг ёнига бошқа Ит югуриб келди-да, унга қараб қолди. Кейин яқин келиб Жерни ҳидлаб кўрди. Жер ҳам шундай йўл тутди.

Кейин иккала ит ҳам бино бурчаги томон юргургилаб кетишиди.

«Ақлли иш, – ўйлади Пид. – Орқа тарафда эшик бўлиши керак».

У ботаётган қуёшга тикилди. Кўчиргич ишлатилса, бу ерга Гломнинг улкан қўшини етиб келади. Одамлар нима бўлганини тушуниб етгунларича, уларнинг сони миллионга яқинлашиб қолади. Бу ҳали бошланиши.

Кун жуда секинлик билан поёнига етиб бормоқда. Аммо ҳеч нима содир бўлмади.

Пид бино гумбазидан кўзларини олмасди. У асабийлашарди. Негаки, агар Жер вазифани муваффақиятли амалга оширган бўлса, иш бунчалик чўзилиб кетмаслиги керак эди.

Пид ярим тунгача кутди. Одамлар бинога киришар ва ундан чиқишаарди. Дарвоза олдидаги итлар ҳура бошладилар. Аммо Жердан дарак йўқ.

Жер кўлга тушди, Ильг ғойиб бўлди, Пиднинг битта ўзи қолди.

У ҳалиям нима содир бўлганини билмасди.

Эрталабга яқин Пидни чорасизлик, иложкисизлик чулғаб олди. Гломнинг йигирма биринчи экспедицияси муваффақиятсизликка учраш арафасида турганини тушунди. Энди ҳаммаси битта унинг ўзига боғлиқ.

Сал қўпопроқ режа бўлсаем, Пид Одам шаклига кириб дарвозадан ўтишга қарор қилди. Бошқа йўли ҳам қолмаганди.

У ишчиларнинг дарвозадан тўп-тўп бўлиб кираётганини кўрди. Пид ўйларди: оломон билан аралашиб кетсинми ёки ҳаммаси тинчигандан сўнг ишга киришгани

дурустми. У тиқилинчдан фойдаланишга қарор қилди ва Одам шаклига кира бошлади.

Ўрмондан, у яширинган жой ёнидан Ит ўтиб кетаётганди.

– Салом, – деди Ит.

Бу Жер эди.

– Нима бўлди? – сўради енгил тортган Пид. – Нега бунча қолиб кетдинг? Кириш шунчалик қийинми?

– Билмадим, – деди Жер думини ликиллатиб, – бунга уриниб кўрганим йўқ.

Пид қотиб қолди.

– Мен ов қилдим, – мамнун тушунтириди Жер. – Биласизми, бу шакл Ов учун жуда қуай экан. Мен бошқа Ит билан бинонинг орқа тарафидаги эшигидан чиқиб кетдим.

– Бироқ экспедиция... бурч...

– Фикримдан қайтдим, – деди Жер. – Биласизми, Учувчи, мен ҳеч қаҷон Индикатор бўлишни истамаганман.

– Аммо сен Индикатор бўлиб түғилгансан!

– Бу тўғри, – деди Жер, – аммо бундан менга енгил бўлиб қолмайди. Мен ҳамиша Овчи бўлишни истаганман.

Пид ғазабдан титраб кетди.

– Мумкин эмас, – худди глом-болакайга тушунтираётгандек дона-дона қилиб гапирди, – Овчи шакли сен учун таъқиқланган.

– Бу ерда эмас, бу ерда таъқиқланмаган, – эътиroz билдириди Жер ҳамон думини ликиллатиб.

– Буни бошқа эшитишини истамайман, – ўшқирди Пид. – Электр станциясига бор-да, Кўчиргични ишга тушир. Мен эса сен айтган гапларнинг барини унутишга тайёрман.

– Бормайман, – деди Жер. – Бу ерда менга гломларнинг кераги йўқ. Улар ҳамма нарсани ҳалок қиладилар.

– У ҳақ, – деди бақувват эман.

– Ильг! – инграб юборди Пид. – Қаердасан?

Шоҳлар қимирлади.

– Шу ердаман, – деди Ильг. – Хаёл суряпман.

– Аммо сен... табақанг...

– Учувчи, – ғамгин оҳанга деди Жер. – Уйғонсангизчи! Гломда аксарият аҳоли баҳтсиз. Фақат удумларгина бизни аждодларимиз табақаларига мос шаклга киришга мажбур қиласди.

– Учувчи, – деди Ильг, – барча гломлар шаклсиз туғилади.

– Гломлар шаклсиз туғилганлари сабали ҳам Эркин Шаклга эга бўлишлари керак, – илиб кетди Жер.

– Тўппа-тўғри, – деди Ильг. – Аммо буни у тушуна олмайди. Энди эса маъзур тутасиз, камина чуқур мушоҳадага берилмоқчиман.

Эман жим бўлиб қолди.

Пид ғазабнок кулди.

– Одамлар сизни ўлдиришади, – деди у. – Худди бошқа экспедицияларни ҳалок қилишгандаридек.

– Гломлардан ҳеч ким ўлдирилмаган, – маълумот берди Жер. – Барча экспедициямиз шу ерда.

– Улар тирикми?

– Бўлмасам-чи. Одамлар ҳатто бизнинг мавжуудлигимизни билишмайди ҳам. Мен билан бирга ов қилган Ит ўн тўқизинчи экспедициядан экан. Учувчи, бу ерда биз юзатча бормиз ва бу ер бизга ёқиб қолди.

Пид бунинг барини ҳазм қилишга уринарди. Қуий табақаларга шаклга оид ўз-ўзини англаш етишмаслигиги ҳамиша биларди. Аммо бу... бунинг барি бемаъни-



лик, ахир. Мана, бу сайёранинг хавфилилиги сири нимада экан. Бу Эркинлик экан-да?!

— Учувчи, бизга қўшилинг, — таклиф қилди Жер. — Бу ер чинакам жаннатнинг ўзи. Биласизми, бу сайёрада ҳар хил нарсалар қанчалик кўп? Санаб адогига етолмайсиз. Бу ерда ҳаётнинг барча турига мос келадиган шакллар ҳам бор.

Пид бош чайқади. Унинг ҳаёт турига мос шакл йўқ. У — Учувчи.

Аммо Одамлар гломларнинг борлигини билиш майди ҳатто. Реакторга етиб бориш кулгили даражада осон.

— Ҳаммангиз билан Глом Олий Суди шуғулланади, — ўқирди у ва Итга айланди. — Менинг ўзим Кўчиргични ишга тушираман.

Пид бир муддат ўзини ўрганиб кўрди. Кейин Жерга бир қараб қўйди-да, диконлаганча дарвоза томон йўл олди.

Дарвоза олдида турганлар унга қараб ҳам қўймадилар. Пид бир Одамнинг ортидан асосий эшиқдан ичкарига кириб олди ва йўлак бўйлаб югуриб кетди. Танаси чўнтағидаги титрай бошлаган Кўчиргич Пидни редактор зали томон боришга ундағандек бўлди.

У ҳовлиққанича қандайдир зинадан кўтарилиб, бошка йўлак бўйлаб югуриб кетди. Бурилишдан қадам товушлари эшитилди. Унга сезгиси бино ичига итларнинг киришига йўл қўйилмаслигини билдириб турарди. Иложисизликдан яшириниш учун жой қидириб, атрофга аланглади. Бироқ йўлак силлиқ ва бўм-бўш эди. Фақат шифтда ёритгичлар осилиб турарди.

Пид бир сакраб, шифтга қапишиб олди ва ёритгич шаклига кирди. У Одамнинг нега унинг ёнмай турганига эътибор қаратмаслигига ишонарди.

Одамлар югуриб ўтиб кетишли.

Пид тағин Одам шаклига кириб, мақсад сари ошиқди.

Унга янада яқинроқ бориши керак эди.

Йўлақда яна бир Одам пайдо бўлди. У Пидга синчиклаб қараб турди-да, нимадир деб ғудранди. Кейин кутилмаганда кескин ортига бурилди-да, жуфтакни ростлади. Одамни нима бунча сергаклантирганига Пид тушунмади, албатта. Танасидаги Кўчиргич керакли ма-софага яқинлашиб қолинганини билдириб, сезиларли титрай бошлади.

Кутилмаганда Пиднинг миясида иккиланиш пайдо бўлди. Барча экспедиция аъзолари қочган! Ҳаммаси!

У югуришдан секинлашди.

Эркин Шакл... қандай ғалати тушунча. Вахимага солувчи тушунча.

«Бу, сўзсиз Шаклсизликнинг найранглари», деди ўзига-ўзи ва яна олдинга интилди.

Йўлак охири улкан ёпиқ эшикка бориб тақаларкан. Пид унга тикилиб қолди.

Йўлакнинг нариги бошида эса Одамларнинг ғовури, бақир-чақири эшитила бошлади.

Қаерда хатога йўл қўйди? Уни қандай сезиб қолиши? Узини бир қараб чиқди. Қўллари билан юзини сиплади. О, чехраси шаклини ўзгартиришини унугтан экан...

Жон ҳолатда эшикни тортди. Кейин чўнтағидан Кўчиргични чиқарди. Титраш етарлича эмасди. Уни ишлатиш учун реакторга янам яқинроқ бориш керак.

Пид эшикка разм солди. Унинг пастки қисми билан пол орасида тирқиши бор экан. Дарҳол шаклсиз ҳолга келиб эшик тагидан сизиб ўта бошлади. Кўчиргични ҳам бир амаллаб ўтказиб олди.

Ичкари тарафда эшикнинг илгаги бор экан. Пид уни илдириб, кетидан тираб қўйиш учун бирон нима қидириб, атрофга аланглади. Ҷофроққина хона. Бир томонда реакторга олиб борувчи залворли кўроғошин эшик, иккинчи томонда дераза бор. Бор-йўғи шу.

Пид Кўчиргичга қаради. Титраш етарлича. Ниҳоят, у мақсадига етишди. Бу ерда Кўчиргич реактордан кувват тортиб олиб бемалол ишлайди. Фақат уни ишга тушириш керак.

Бироқ нега уларнинг бари қоюққа айланышган? Пид иккиланаарди. Барча гломлар шаклсиз туғилади, бу ҳақиқат. То улғайгунча ва турли табақаларга тегишли аждодлари шакли берилмагунча гломларнинг болалари аморф ҳолатида бўлади. Бироқ Эркин Шакл...

Пид имкониятларини чамалаб кўраётганди. Ҳеч бир тўсиқсиз истаган шаклга кириши мумкин. Бу жаннатмонанд сайдерада у барча ниятлари ва орзусини амалга ошира олади. Кимга айлангиси келса — айланади, ниманинг шаклига киришни истаса — киради. Бу ерда ёлғиз ҳам қолиб кетмайди. Бу ерда бошқа гломлар ҳам Эркин Шаклдан лаззат олишмоқда.

Одамлар эшикни буза бошладилар. Пид ҳалиям танлай олмай иккиланаарди. Нима қилсин? Эркинлик...

Пид эркинлик ўзи учун эмаслигини алам билан ўйларди. Овчи ёки Мутафаккир бўлиш осон. У эса — Учувчи. Парвозлар — унинг ҳаёти, унинг шавқи. Парвоз билан бу ерда қандай шуғулдана олади?

Албатта, Одамларда ҳам кемалар бор. Одамга айланаб, бирорта кемани излаб кўриш мумкин...

Йўқ, ҳеч қаҷон. Дараҳт ёки Итга айланиш осонроқ. Ҳеч қаҷон ўзини Одамдек кўрсатмайди.

Гумбурлатиб уришлардан эшик зирилларди.

Пид Кўчиргични ишга тушириш олдидан сўнгги бор сайдерага назар солиш учун дераза олдига келди ва дезраздан ташқарига қаради-ю, хушдан кетиб йиқилишига бир баҳя қолди.

Бу ростдан ҳам ҳақиқатми? У Жернинг бу сайдерада истаган ниятни қондириш учун етарлича шакл, ҳаёт кўринишлари бор, дея тўлқинланиб гапирганида нимани назарда тутганини даставвал тушунмаган экан. Ҳатто унинг, Пиднинг ҳам орзусини амалга ошириш мумкин экан! Учувчилар табақасининг парвоз қилишга бўлган кучли истагини ҳам.

Пид ташқарига яна бир бор назар солди-да, Кўчиргични полга улоқтириди. Асбоб чил-чил синиб, ҳар ёққа тариқдек сочилиб кетди.

Эшик очилаётган пайтда эса у деразадан учеби чиқаётганди.

Одамлар дераза томон отилдилар. Дераза ортидан каттагина, оппоқ күш ҳавога кўтарилиди. У қанотларини сал беўхшовроқ қоқарди. Аммо қушнинг ҳаракатлари тобора аниқроқ бўла борди ва у узоқлашиб бораётган қушлар галасига етиб олишга ҳаракат қила бошлади.

**Рус тилидан Нурпўлат НУРҚУЛОВ
таржимаси**





Баҳром РЎЗИМУҲАММАД

ЖЕРДАҚЛИ БҮДИШ САОДАТИ

Ўзбек шеъриятининг замонавий дунёдаги олтин даври XX асрнинг 80-90 йилларига тўғри келади. Бу ўн йиллиқда эстетик заминимиз хаёл қилиб кўрганимиз – нотаниш ранглар эвазига бойигандан-бойиди. Жумладан, Шарқ мумтоз шеърияти анъаналари, XIX аср рус назм топилдиқлари, европача экспериментлар кетма-кетлиқда, узвийликда пайдо бўлиб, миллий адабиётимизда томир ёзи. Ана ўша жараёнда ҳаваскорлар шеърияти кўзга аниқ-тиник кўринимасди. Бугун аҳвол бир қадар ўзгарди. Шоир Усмон Азим таъкидлаганидек, бугун профессионал шеърият пасайиб, ҳаваскорлар шеърияти гуллаб-яшнамоқда. Эҳтимол бу танаффуслар оралиғидаги бўшлиқнинг ўз ҳолича тўла бошлишини белгилар? Инчунин, ўша тўқсонинчи йилларнинг суронли шеърияти инерцияси аҳён-аҳёнда ялт этиб кўриниб тургани ҳам бор гап.

Жорий йилда «Шарқ» нашириёт матбаа акциядорлик компанияси Сирохиддин Рауфнинг «Сиз менга кераксиз» номли салмоқли бир шеърий китобини босмадан чиқарди. Айтиш жоизки, бу китоб тасвир кўлами жиҳатидан биз ургулаётган давр манзараларини эсга туширади. Ҳақиқатан, Сирохиддин ўша давр тошларида қаламини обдон чархлаган: туркум шеърлари «XX аср ўзбек шеърияти антологияси»га киритилгани ҳам бежиз эмас. Аммо, у нуфузли антологиянинг бошқа муаллифларидан каммаҳсуллиги, камсукумлиги билан алоҳида ажралиб туради. Иккита тўплами чоп этилган экан – бу китобларини ўқиган эмасмиз. Бинобарин, уч минг нусхада ёруғлик юзини кўрган «Сиз менга кераксиз» тўплами назмнинг асл муҳлислари – шеърни соғиниб ўқиёдиган шинавандаларга зўр қизиқиш пайдо қилиши табиий ҳол.

Китоб анъанавий мавзуларда битилган иккита шеър билан ибтидо топган. Буларнинг бири – «Ватан», иккинчиси – «Шархисабз қўшиғи». Шеъриятимизда вазият тақозоси боис кўб ва хўб ишланган бу мавзуларда ҳам шоир бошқалар қўлламаган усувларга мурожаат этади:

Ўтмишининг турфаранг қабатларига
Ўйларим бош уриб, қакшайди ёдим:
Ер шарин мана шу сарҳадларига
Илк бор туғ қадаган қайси аждодим?

Шеър муаллифи ҳаммага таниш иборалар во-
ситасида Ватанни мадҳ этмасдан, шу муқаддас тушунчанинг мозийдаги илдизларига нигоҳ қаратади. Тарихий шахсларга таъриф бермасдан, уларни ҳа-
ракатда тасвирга кўчиради. Бу ҳусусият анчайин одатланиб қолганимиз – ватанпарварлик мавзуси уфқ-
ларини кенгайтиради:

Қонлар силқиб оқди, бағринг доғлади,
Мазлумлар оҳи-ю қилич жарангги.
Улуғ савашларга чорлаб боғлади,
Соҳибқирон Амир Темур ярангни.

Масаланинг яна бир муҳим жиҳати шундаки, му-
аллиф олдиндан тахмин қилиш мумкин бўлган осон
қофияларни қўлламайди. У ишлатган қофиялар ку-
тилмаганлик фазилати боис шеър сеҳрини, жозиба-
дорлигини оширади:

Жоҳиллар фош этди ўғу борингни –
Энг ёвуз ганимдир гоғиллик асти.
Тупрогингни топтаб, талаб зарингни
Бостириб келди-ку қизил алвасти.

«Асти»га «Алвасти»ни қофиялаш шеъриятимизда кузатилмаган. Муаллиф чайналган «Шўро» сўзи ўрнига «Қизил алвasti» образини танлабдики, бу танлов шеър залворини янада кучайтириди.

«Шархисабз қўшиғи»да асосан фикр салмоғига эмас, балки оҳангга дикқат-эътибор қаратилган. «Темур қурган Оқсаройсан, шаҳри Кеш, Гўзалликда тоқ саройсан, шаҳри Кеш» сингари оҳангги ёқимли мисралар шеърни шунчаки ўқилишига йўл қўймайди. Айнан шу мавзуда битилган «Кўк гумбаз» шеъри матндаги руҳ боис ўзгачалик касб этибди. Яъни шоир бу шеърни ўй шаклида қофозга муҳрлаган:

Шарафга гуеоҳсан, хўрликка гуеоҳ,
Барчасин ўйласам, шошади ақлим.
Мўминлар тилидан тушганда Оллоҳ,
Илк бор кўчиб тушган гиштларинг балким.

Астойдил ўқиган шеърхон бу битиклар обидага қараб туриб ёзилганини тез пайқайди. Ва ўша обиданинг безаклари борасида ҳам муайян тасаввурга эга бўлади. Охирги икки мисрада «тушмоқ» феъли икки хил маънода қўлланилган. Биринчиси – сўзни тилга олмаслик, унутиш. Иккинчиси эса обиданинг ўпирилиши: гиштнинг қулаши. Бу икки ҳолатни умумлаштиаркан, муаллиф эътиқоднинг сустлиги жа воҳирга тенг обидалар нурашига ҳам сабабчи бўлади, деган хулосага келади. Бинобарин, битта мавзуда учта шеър ранг ва руҳ айроочалиги туфайли мотивни тақрор этмайди. Айнан шу хусусият поэтик – тил янгилиги эски мавзуларни жонлантиради.

Сирожиддин Рауф – табиатан лирик шоир. Ишқ-муҳаббат, табиат мавзуларида қалам сураркан, ўзининг заҳирадаги маҳоратини кўрсатади. Очилади. Ватан мавзуидаги жиддийлик латиф, ўйноқи оҳанглар билан алмашнади. Зотан, унинг назмида мусиқа ва бўёқ бир маромда уйғунлашади. Худди ўша жиҳатлар боис баъзи битиклар устоз Рауф Парфи қаламини эслатади. Лекин бу орада тақлидни кўрмаймиз. Сирожиддин ўзини ўзи ва бошқа салафларини тақрорлаб қўйишдан чўчибми, шаклни тез ўзгариради. Балки, болаларбоп шеърлар битгани ҳам шу хусусият билан изоҳланар?

Бу авлод орасида поэтик тилни биллурдек силлиқ қилиб ишлайдиган шоирлар оз. Сирожиддин ҳар битта сўзнинг мусиқийлигидан ташқари шаклига ҳам эътибор қаратади. Айниқса, сонетларида:

Офтоб ғамзасида мужда кўринур –
Рўёни чилпарчин қилган ҳақиқат.
Сен – кўнглим кўшиқида кўхлик кўхинур,
Ўнгимми-тушимми, тарк этма фақат?

Муаллиф сонет матнидан келиб чиқадиган маънени саклаган ҳолда шакллар ўйинига тартиб берган. «Кўринур» – «Кўхинур» қофиясига эътибор қаратайлик. Учинчи мисрадаги «Сен»дан ташқари тўртта сўз «К» ҳарфи билан бошланади: «Фамза», «Чилпарчин», «Тарк» каби қаттиқ эшитиладиган сўзларнинг бир бурчагида юмшоқ эшитиладиган: «Ўнгимми-тушимми» жумласи турибди. Бундай шаклий ўйинларни шоир кўп битикларида муваффақиятли қўллайди. Чунончи, бу парча олинган сонетдаги: «Хаёлинг ҳабибим то тонгга довур», «Ундан юз ўғирмак хурофот, бидъат», «Ошиққа ҳамиша тахайюл раво», «Ишқиз умр ғариф, диллар бенаво», «Мудом ўйимдасан, илоҳий талъат?» мисралари якка ҳолда ҳам тушунарли ва

нафис. Бу янги изланишлар шоирда ифодани имкон қадар нозиклаштириш салоҳияти мавжудлигини тасдиқлайди. Бундай нозиклик ўкувчи идрокига хуш ёқади. Умуман, унинг ҳеч бир битикларида ғадир будурларни кўрмайсиз. Ўша нағисликни бир хилда тақрорламайди. Шу баробарида мотив хилма-хиллигига эришади ҳам:

Илдизман, шохлари гарчи ям-яшил,
Ўзи эса ҳануз сувга етмаган.
Мен ўша, алҳазар, парча кўрғошин,
Ўқ бўлиб кўкракка, шукр, ботмаган.

Ушбу тўртлик уч бўлақдан иборат «Кўнгил манзаралари» сарлавҳали шеърдан олинган. Шеърдаги кўнгил туйгулари очик ҳолатда ифодаланмаган. Рамз – тимсоллари воситасида умр ҳикмати талқин этилади. Шунингдек, образлари ҳам «ярқ» этиб кўзга ташланмайди: фира-ширалиқдаги манзаралар ненидир сўзлаётгандай туюлади. «Камалак нурлари инган шаршара, Чўққилардан учиб «бир гўзал синди», – деб ёзади шоир. «Оҳиста-оҳиста синади оғоч: Сим-сиёҳ тун ичра сингади унлар» деб ёзади. Бир кам дунё армони – кўнгилнинг бот-бот синиб туриши шу зайл кўркам бўёкларда, таскин берувчи оҳангларда ўз аксини топган. Пировардида, муаллиф умр ҳикматидан улкан маъно ахтармайди, шунчаки, курашлардан ҳайиқмаслигини ранг орқали хикоя қилиб ўтади:

О, яшил туйгулар, бор бўлинг ҳар дам,
Ал-омон, ал-омон, минг бор ал-омон!
Теғрамда ҳазонрез қаҳ-қаҳ урса ҳам,
Барибир мен тинсиз яшилланаман...

Шеърда фалсафа бўртиб кўринмайди, тасвирлар ўзаро туташиб, ўкувчи онгига неларнидир уқтиради. Бунақа усул Шарқда очик фалсафий фикр айтиш тури сифатида воқеликка кўчган тўртликларида ҳам учрайди:

Кўкламни ҳис этиб, майса ниш бўлди,
Ёз ўтди, куз ўтди, тагин қиши бўлди.
Ҳаётинг тонгига шомингни ўйла,
Дунёга келдингми, бўлар иш бўлди.

Дафъатан гап нима ҳақида бораётганлигини англай олмайсиз. Фикр этиб тушунасизки, инсон таваллуди – «бўлар ишнинг бўлиши». Яъни, таваллуд – банда ихтиёридан ташқаридаги амал. Шу боис турмуш ўйинларига у қадар эътибор қаратмаслик жоиз. Тонгда шомни ўйламоқ – ўткинчи умр ҳақида ўй сурмоқ. Яна бир сатрларида муаллиф ўша мулоҳазаларини давом эттиради: «Бу бедод фалакнинг иши кўп жумбоқ: Манзилим ноаён, отни қичарман».



Ҳаёт – абсурд, аммо, Оллоҳ бино этган гўзалликлардан шодланмоқ лозим, қабилидаги эски фалсафа кўп тўртликларда янгича шаклда ифода этилади. Умуман, шоирнинг фалсафага мойиллиги ҳар битта тўртлиқда намоён бўлиб турибди. Лекин, бизнингча, «Шуурдаги чақинлар» дея номланган кундалиқдаги қайдларга ўхшаш туркумни китобга киритиш шарт эмас эди. Туркумда: «Қанча кам ухласанг, шунча кўп яшайсан», «Қонунни дўст тутган ҳар инсон: Ҳаётда қоқилмас ҳеч қачон» сингари жўн сатрлар бошқа шеърларга хос сирлилкка кўланка ташлаётгандек бизнинг наздимизда. Аммо, китоб охиридан ўрин олган «Болажонлар саҳифаси» идрокка дам беради: шоир иқтидорининг бошқа қирраларини очади. Бу бўлим ўн уч шеърдан иборат ва ундаги шеърларни болалар ҳам, катталар ҳам завқланиб ўқишилари мумкин. Айниқса, «Фалати мусобақа», «Маймуннинг ҳикояси», «Тулкининг ҳикояси», «Ҳимоя», «Ялқов мушук» сингари шеърлар бетакрор усувлар кўлланилгани боис ўкувчини қизиқтиради.

Китобдаги энг чиройли шеърлардан бири – «Сиз менга кераксиз» шеъри. Бу шеър сарбаст вазнида битилган. Шакл ҳам бошқача: қисқа-қисқа мисралар ҳар бандда туташиб, яхлитлик касб этган:

Кимлигимни
ўзим биламан,
кўймади
Сизни-да яхшироқ билмоқ истаги
кўнглингизга юришлар қилдим.

Оҳистагина воқеликка кўчаётган нутқ каби янгарайдиган сатрларнинг ҳар бандда туташви, умуман, ҳар битта банднинг пировардида туташиб яхлитлик касб этиши шеърдаги эҳтиросли рухни янада кучайтиради. Бу шеърни ўқувчи чукур хис этсагина кўнгил мулкига айлантириши мумкин. Умуман олганда, «Сиз менга кераксиз» илк сатрининг китобга ном сифатида танланиши ҳам бежиз эмас. Шоир севиклисига, ўқувчиларига керакли бўлишни хоҳлайди. Ўзи эътибор қиласкан, бошқалардан-да эътибор кутади. Зотан, шоирнинг жамиятга кераксиз бўлиши – фожеа. Керакли бўлиш саодати эса унга рух бахш этади, қаламини ичдан нурлантириб туради.

Демак, қўлимида яхшигина китоб турибди. Кирилл ва лотин алифболарида босмадан чиқарилган. Қалин муқовалик. Аммо, китоб дизайнни ичкаридаги мазмунга у қадар мос эмас. Муқовадаги тасвир ниҳоятда анъанавий. Ўқувчи эътиборини тортмайди. Ҳарфлар ҳам шунга яраша. Муқова ортида муаллиф суврати. Қачонгача биз бу қадар сунъийликка амал қилиб яшаймиз? Европа нашриётларида босилган китобларга бир қур назар ташланг. Муқовадаги тасвирга, дизайннига, умуман, ҳар битта белгига инсоннинг ҳаваси келади. Албатта, юқоридаги камчиликлар муаллифга тегишли эмас. Аммо, унинг ҳам бу жараёнда қатнашишга ҳақи бор эди. Эндиги китобларини тайёрлашда Сирожиддин шу жиҳатларга ҳам эътибор қаратса мақсадга мувофиқ бўлур эди. Барibir, уни ажойиб бир китоб билан қутлаймиз.





Наргиза АБДУЛЛАЕВА

КИЧИК ҲИҚОЯЛАР



ЧҮҚҚИДАГИ НИГОХ

Сен ҳеч қишлоғимизга келғанмисан? Келмаган бўлсанг керак-а? Ана бизнинг қишлоқ – тоғлар, дарёлар билан ўралган, қутидек-кутидек уйлар билан тўлиб-тошган. Мен ҳозир қишлоқ теграсидаги энг баланд чўққида туриб, ҳамқишлоқларим ҳәтини кузатаяпман: авави соchlари узун, кўзлари қисиқ қиз – Чаманой, доимигидек аср маҳали ҳовлисини чиннидай қилиб супуришни бошлади. Бир сурув қўйларни хайдаб келаётган, соқоллари оппоқ озғин чол – унинг бобоси. Жуда инжик чол, ҳамма ундан ҳайқиб туради. Авави деворлари оқланган бино бизнинг мактаб, яқинда таъмирланди, ҳатто ҳали бўёқ ҳиди ҳам кетмаган. Мактаб ҳовлисини тўлдириб қийқириб юрган болалар – менинг дўстларим. Улар болаликнинг энг баҳтили палласида...

Пахса деворли уйлардан бири бизники. Ҳовлидаги чорпояда онам кўрпа қавиш билан овора. Ёнларида укам бешикда ётиби, дам-бадам тамшаниб қўяди. Шунда онам бешик тутқичидан аста тутадилар-да, “Аллаё, алла”, дейдилар. Гўдакнинг юзига боқиб, онамнинг кўзларида сўниб қолаёзган умид қайта жонланади. Лабларига табассум югурди.

Катта қора говмишни авайлаб согаётган, чехрасини олтмиш йиллик ҳаёт чизиклари қоплаган кампир – бувим. Уларнинг орқасида думини ликиллатганча Олапар турибди. уни қўшнимиз Соқи амаки берганлар. Ўшанда Олапар муштдайгина кучук эди...

Сувоқлари кўчган, эски намат тўшалган, кўрпашашлару хонтахта кўйилиб, янайам каталақдек бўлиб қолган хонада совуқчойни босиб-босиб ичаётган киши – дадам.

Уйимиздаги бундай рангсиз ҳаётнинг сабаби – менинг йўқлигим.

Ўшанда ёмғирли тун эди. Ҳар кунгидек отам маст ҳолда гандираклаб кириб келдилар. Доимигидек жанжал-тўполон бошланди: онам аёвсиз калтак остида, укам чириллаб йиглайди, бувижоним “ҳай-

ҳай”лайди... Мен эса бир четда биқиниб ўтирибман. Ўқиндим, бола қалбим ғам денгизига чўкиб кетди. Юрагимни алам ўртади: “Нега бизнинг оиласда шундай?”. Кейин кўримсиз, файзсиз ҳовлимиздан узоқлашдим. Чопдим, жон-жаҳдим билан югурдим. Тўхтасам гўё юрагим ёрилиб кетадигандек тинимсиз чопдим. Ва мана шу чўққига чиқдим. Ёмғир ҳамон қуяр, оёғимга ёпишган палаҳса-палаҳса лой мени куч билан пастга тортаётгандек эди. Зимистон қаърида олис-олислардаги яккам-дуккем чироқларнинг хира шуъласи кўзга ташланади, холос.

Аламданми, кўркувданми, ўкириб йигладим. Шаррос ёмғир овозимни босиб кетди. Юрагимни бўшатиб, ортга қайтмоқчи бўлиб қадам босгандим, оёғим тойиб жарликка қулладим. Бошим нимагадир қаттиқ урилди... Оғриқда алаҳсиб узоқ ётдим. Кейин бирдан оғриқ тўхтаб, енгил бўлиб қолдим, ҳатто учеб кетдим.

Ҳозир ҳаммаси яхши. Қишлоғимиз тинч, қалдирғочлар учеб юрибди. Онамнинг юзида табассум, отам ўнгланган. Мен эса... Мен эса ҳар куни қуёш чиқиб ботгунга қадар шу қоя лабида уларни кузатаман. Айтдим-ку, онам шод, бувим омон, отам инсофга келган... Фақат мен йўқман.

ЯШИЛ ШИППАК

Қизалоқ Янги йил тонгидаги Қорбобонинг келишига қаттиқ ишонарди. Қорбобо келишига умиди сўнганида эса у беш ёшда эди...

Янги йил кириб келишига саноқли кунлар қолди. Уй ям-яшил арча ва турли рангдаги зарлар билан безатилган. Ташқарида қор гупиллаб ёғар, тонг ёришиб кетганди.

– Қизим, турақол, – деди онаси қизининг хонасидағи деразанинг қалин пардаларни очаркан.

– Ойи, боғчага бормайман-ку, – кўзларини базёр очиб ғашлик қилди қизалоқ. Онаси қизининг феълини яхши билади: койимагунча ўрнидан турмайди. Лекин эрталабдан дили хира бўлишини истамади.



- Турмайсанми?! Билиб қўй, қорбобо уйқучи болаларга совға олиб келмайди.
 Қизчанинг кўзлари ярқ этиб очилди.
 – Вақтли уйғонсам келади-а?
 – Ҳа-да, сен ухлаб ётаверсанг, “Бе-е, бу қиз уйқучи, дангаса экан”, демайдими?

Қизалоқ кўрпасидан сирғалиб турди. Бу ёлғон Янги йил келгунча ҳар тонг, ҳар юмушда онасига қўл келди. Ва ниҳоят, Янги йил тонги ҳам отди. Бироқ онаси кечаги ўйин-кулгидан чарчаб, кеч ухлаган қизини уйғотмади.

Қизалоқ кун чошгоҳга яқинлашиб, ташқаридаги қор шитоблаган пайтда уйғонди. Уйғондию пушти гулли шиппагини илиб, онасининг ёнига чопди.

– Ойи, ойижон, Қорбобо келмадими?! – йиғла-моқдан бери бўлиб сўради у.

– Келди, ухлаб ётганингда хафа бўлиб кетиб қолди, – онаси пинагини бузмай жавоб берди.

– Нега уйғотмадингиз?! – қизалоқ энди йиғлай бошлади. Наҳот кетиб қолган бўлса! Ахир шунча кун умид билан кутганди-ку! Ҳатто ҳеч кимга билдирмай қорбобо учун расм чизганди... Унинг умидлари пучга чиқди, ишончи сўнди. Кўз ёши тиндию, аммо юрагида ўкинч қолди.

Келаси йили Янги йил тонгида ухлаб қолмади. Арча безатилган хонага кирди-да, беркиниб олиб Қорбобони кута бошлади. Ниҳоят “шитир-шитир” овоз эшишилди. Хонага яшил шиппакли Қорбобо кириб келди. Қизча унинг фақат оёқларини кўриб турарди холос. Яшил шиппакли “қорбобо” совғаларни қўйиб, чиқиб кетди. Қизалоқ негадир Қорбобони салобатли, қора этикли бўлади деб ўйларди. Бироқ...

Қизча совғани очиб кўрди, аммо бу ҳар кеча осмонга қараб тилаган нарса эмасди. Энг қизиги эртаси куни бўлди: қизалоқ худди ўша яшил шиппакни онасининг каравоти остида кўрди...



Жамила БОНУ

Ҳаёл дарёсида сузаман сокин

СОҒИНЧ

Қўлларим узатсам етмайди сенга,
 Кетиб бормоқдасан, қаён, қай томон?
 Мен эса пажмурда вақтнинг қўлида,
 Сенинг хаёлинг-ла яшайман ҳамон.

Наҳот энди бу кун барчаси унум,
 Соғинчдан ўртанар сенсиз бу қалбим.
 Соҳир кечаларда тушиларим аро,
 Испингни шивирлаб қўяр аллаким.

Майли, қайда бўлсанг ҳам мудом,
 Сен, тарк этмасин меҳру муҳаббат.
 Энди сендан, севгим, сўнгги иллинжим,
 Менинг ёнишларим унумта фақат.

ТУШ

Кўзларимни юмсам бўлар намоён,
 Кўзларимни очсам ҳаммаси рӯё.

*Ҳаёл дарёсида сузаман сокин,
 Сен билан ёнма-ён юргандек гўё.*

*Қани тугамаса бу ширин тушилар,
 Шамолларда етса сенга бу дилроз.
 Балки бу ширин туши ушалгай бир кун,
 Балки ҳаётимда бўларсан ҳамроз.*

ЮПАНЧ

*Қалбим истар бир юпанч,
 Мехр ва ширин қалом.
 Бироқ бу инжса туйғу,
 Менга етганда тамом.
 Бироқ менда умид бор,
 Мехр бор, муҳаббат бор.
 Шунинг учун умримда,
 Маъно бор, моҳият бор.*





Шоира ДОНИЁРОВА,
филология фанлари номзоди

ФИЛОСОФИЯ МАКИНАЛАР

Омон Мухтор романлари ўзининг янгича мазмун ва тасвири билан ажralиб турмоқда ва кейинги давр романчилигига турли баҳсларга сабаб бўлмоқда. Унинг "Минг бир қиёфа" романидаги тасвирланган воқеалар узоқ ўтмишдан тортиб то қиёмат қойим бўладиган давргача бўлган улкан давр ва жараённи ўз ичига қамраб олган бўлиб, у қаҳрамон тилидан ҳикоя қилинади. Мана шу ўтган, ҳозирги ва келаси замонларни ўз ичига олган жуда катта давр биргина инсон қисматида бир бутун ҳолда жамланган тарзда бадиий акс эттирилади ва бизнинг замондошимиз бўлган бу кишининг ғоят чигал тақдиридан нусха олинади.

Адибнинг «Минг бир қиёфа» асаридаги биринчи ҳикоя «Тутқун» деб номланган. Асар мазмуни сарлавҳадан ҳам маълум бўлганидек, қаҳрамоннинг тутқун бўлишини тасвирлаш билан бошланади. Бу ҳикояни ўқиш жараённада янги талқинни учратамиз. Унда инсонга таниш бўлмаган, оддий воқеадек бўлиб кўринувчи ҳолатлар талқини анчайин ишонарсиз ифодаланган. Асар қаҳрамони ярим тунда маст ҳолда нотаниш машинага ўтиради. Қараса, машина шофферсиз бошқариляпти. Бунинг устига машина номаълум томонга қараб кетаяпти. Қаҳрамон анчайин сархуш-бўлишига қарамасдан, шуларни билиб туриб онгли равишида мушоҳада ҳам қилиб боради. Лекин бўлаётган воқеаларга бефарқ қарайди. Нима бўлса бўлар, менга нима, қабилида иш тутиб, ҳатто ўз тақдирига ҳам беэътибор бўлади.

Хўш ўйлаб кўрайлик, шундай бўлиши мумкинми? Қаҳрамон, ёзувчи айтганидек, у даражада анди ҳам эмас, у таникли шоир, кейинги воқеалар давомида биз бунинг гувоҳи ҳам бўламиз.

Адид тасвирлаган қаҳрамон Абдулла Ҳаким таникли ижодкор, у бошка ҳеч нарса билан эмас, шу машинанинг шофферсиз бошқарилаётганилиги билан қизиқади. Ёзувчининг топиб айтган янги гапи ҳам ана шунда кўринади. Яъни, одамни ўғирлашнинг, яна ҳам аниқроғи одамнинг ўзлигидан олисларга олиб кетилишининг янги усули ҳақида сўз бораётганга ўхшайди. Бундай олиб қараганда, фан-техника ривожланган даврда ердан туриб ойдаги фазовий кемани бемалол бошқараётган инсон машинани ҳам шофферсиз бошқариши мумкин-ку! Қолаверса, бу келажакда амалга ошиши мумкин бўлган хаёлий тўқима ҳамdir.

Жамиятда ҳар хил мақсад ва маслак йўлида яшаётган турли тоифага мансуб кишилар борки, улар орасида

бойлик ва мартабага эга бўлиш учун, ўз истакларини амалга ошириш йўлида ҳеч нарсадан тап тортмайдиганлар ҳам учраб туради. Бундайлар ўз режаларини амалга оширишда инсон ҳаётига хавф солишдан ҳам қайтмайдилар. Бундай тўдаларнинг ашаддий душмани ҳақиқатпарвар ва ҳалол кишилардир.

Асарда тасвирланган қаримсиқ кўса, қош-киприги рангиз, сочи устарада қирилган кимса чўтири, ғилай киши образлари ҳаётда келажак учун яхши ном қолдирмай, қингир-қийшиқ ишлари билан кўпчиликнинг нафратига сабабчи бўлган тўдаларнинг тимсоли сифатида бадиий талқин қилинган. Уларга қарши курашувчиларнинг тимсолий қиёфаси эса Бурхон Шариф ва Абдулла Ҳаким образларида мужассамлаштирилган. Инсон дунёга бир марта келади, ана шу берилган имкониятдан ҳар ким ўзича фойдаланади. Дейлик, бирорлар ўзининг эзгу ишлари билан яхши ном қолдириб, инсон деган шарафли номга эга бўлса, баъзилар ёзувларни билан одамзотга иснод келтиришади. Асарда ана шу муаммога ҳам эътибор берилган. Хусусан, Абдулла Ҳаким ўзга бир шахсга қиёфадош, яъни ўхшаш бўлгани учун унинг ўрнига ваҳшийларча ўлдириб юборилади. Аслида эса унинг ҳеч қандай айби ҳам, заррача гуноҳи ҳам йўқ эди. У ўзининг ана шу қиска ҳаётى давомида бирор марта ҳам ёлғон гапирмаган, кишининг ҳақига кўз олайтиргмаган, хиёнат кўчасидан юрмаган, ўғирлик нималигини билмаган, бегона аёлларга ҳирс билан қарамаган покиза одам эди. Бундай олиб қараганда, мусича-ю беозор ва бегуноҳ шоир. Ёзувчи уни ҳар қандай иллатлардан холи қилиб тасвирлаган.

У бу дунёда якка-ю ёлғиз, уй-жойсиз, қорни тўйиб овқат емай, усти ҳам юпун ҳолда яшаган. Бунинг устига муҳаббат борасида ҳам омади чопган эмас. У бу ёруғ дунёда роҳатдан кўра азоб-уқубатни кўп кўрган.

Ёзувчи бу дунёда кўп тақрорланадиган жаннатий одамнинг қиёмат кунидаги азоб уқубатларини, аҳволини тасвирлайди. Бирорнинг, яъни Бурхон Шарифнинг номи билан ўлдирилган ва дағғи этилган Абдулла Ҳаким у дунёда ўзи учун жавоб беради. Яъни бу дунёдан бирор учун нариги дунёга рихлат қилган бўлса-да, у дунёда ўзи учун ҳисоб беради. Натижада дўзах азобини кўриб, оғир жазога мубтало этилади. Сўнгра жаннатга, яшил водийга утади.

Унинг гуноҳи бу дунёдалик вақтида ароқ ичганлиги ва муҳаббатда омади юришмаганлиги боис тушкун кай-

фиятда тирик мурдадек яшаганлиги, унга берилган имкониятлардан фойдаланмай дунё завқ ва шавқини унуганлиги, ўзига ва атрофидагиларга нисбатан бефарқ бўлганлиги, қалаверса ёлғиз ўзи умргузаронлик қилиб ёлғиз яшаб юрганлиги, ўзлигини англай олмаганлиги учун жазоланади.

Китобхонда ёзувчи бу билан нима демоқчи деган ҳакни савол туғилди. Бизнингча, адаб инсон Оллоҳга шукур қилиши ҳам билиши керак, демоқчи. Оллоҳ синовларига чидаш билан биргалиқда инсон ўтган вақти учун эмас, келгусида келадиган дақиқа ташвишида ҳам яшаши керак. Зеро умрнинг ҳар бир дақиқаси ғанимат, шу боис адаб асарида бу дунёнинг ўзи ғаниматлигини ўкувчига эслатиб қўйишни ўз олдига мақсад қилганга ўхшайди.

Ҳикояда тасвирланишича, сафардан қайтиб келган Бурхон Шариф Абдулла Ҳакимнинг қабрига ёдгорлик ўрнатади. Ўзи учун жон берган бу бегуноҳ кишининг руҳи олдида абадул-абад қарздор эканлигини ўйлаб, унинг номини абадийлаштириш чораларини излайди.

Асардаги иккинчи ҳикоя мана шу ниятнинг амалга ошмай қолганлигини тасвирловчи лавҳа билан бошланади. Ёзувчи бу ҳикоясига «Олисдаги одам» деб сарлавҳа кўйган. Лекин бу ҳикояда тасвирлганган воқеалар аввалги ҳикоядаги сюжет тизимининг бевосита давоми эмас, яъни ҳар икки ҳикоя воқеалари бир-бирини тўлдирмайди. Асарда бутунлай янги тасвир ҳукмронлик қиласди. Асарнинг ўқизиги ҳам бошқа йўналиш бўйлаб боради. Бунда Садиржон ва унинг севгилиси Гулхумор тақдири билан замон руҳининг муштарак бир уйғунлигининг бадиий ифодасини кўрамиз. Садиржон шифокор ва ошиқ. Асарнинг бошидан охиригача у шундайлигича қолади. Ўзи ва ўзгалар ҳаёти ҳамда қисмати учун ҳеч нарса қилмайди. Тасвирдаги воқеалар унинг хотираси орқали рӯёбга чиқади. Гулхумор эса шўро сиёсатининг иллатларини аёвсиз фош этувчи образ. У «Тарих маданият»деб номланган бир ташкилотда ишлайди. Шўролар ҳукумати сиёсати даврида миллый қадриятлар, урф-одатлар, миллый анъана ва маънавий бойликлар имкон даражасида йўқ қилинишига маҳкум этилган эди. Бунга асосан мачитлар, мадрасалар, авлиёлар қабри, зиёратгоҳ жойларнинг бузилиши, ота- боболаримиз сув ичган муқаддас чашмалару, зилол сувли кудуқларнинг йўқ қилиниши учун саводсиз ва манқурт кишилар қандай хизмат қилганлиги, қанчалик «жонбозлик» курсатганлиги Гулхумор образи орқали ёрқин бадиий бўёқларда тасвирланган. Гарчи бу мавзу янгилик бўлмаса-да, ёзувчи янги бадиий шакл ва янги поэтик талқинда бу мавзуни ўзига хос тарзда ёритадики, адаб маҳоратини намойиш этадиган ўринлар кўп учрайди. Асарда бугунги кунда жамиятдан узилиб қолган, узок; сархода жойлашган тўқиз қаватли мармар бино фаолиятини давом эттираётганлиги тасвирланган бўлса-да, ўша тўқиз қаватли бино ичдагилар ўзларини бамисоли жамиятнинг фидойилари қилиб кўрсатадилар. Аслида эса уларнинг замони аллақачонлар ўтиб кетганлигини адаб очиқ-ойдин кўрсатиб берган. Чунки бу бино шаҳардан бир кунда йўқ бўлиб қолган. Лекин шаҳар марказидаги шундай маҳобатли бир бинонинг бирданига йўқ бўлиб қолганлиги Садиржондан бошқага билингани йўқ. Чунки бу бинода фаолият кўрсатадётганларнинг бугунги жамият ҳаётида ўрни йўқ эди, Садиржоннинг изтироблари бу бино ва унда фаолият курсатадётган ташкилотнинг ғойиб булганлиги учун эмас, балки севгилиси Гулхумордан ажralиб қолганлиги учун юрагини кемираётган

айрилиқнинг исёни эди. Орадан анча вақт ўтгач, асарда тасвирланган воқеалар силсиласида яна Бурхон Шариф пайдо бўлади. Гулхуморнинг қўлига Абдулла Ҳакимнинг шеърлар дафтари тушиб қолган эди. Ана шу дафтарда ги шеърларни ёдлаб юрган Садиржонга Бурхон Шариф ёрдам қўлини чўзди. Натижада севгилисининг васлига етишдан умидини узаёзган Садиржон у билан дийдорлашади. Аммо Ватан, юрт, миллат, эътиқод, мухаббат ва садоқат каби инсоний туйғулардан тамомила мосуво бўлган бу қиз йигитнинг дарду аламлари ва изтиробларидан кўра ўзи учун муқаддас деб билгани – ўша тўқиз қаватли бинодаги тор муҳит қобигини ёриб чиколмайди. Ёзувчи мана шундай образни тасвирлаш орқали ўз миллати дардидан кўра ўз шахсий манфаатларини устун кўйган манқурт кимсаларни фош этиш билан бирга бугунги кун ўқувчисини ҳам маънавий комилликка ва огохликка чақиради.

Учинчи ҳикоя эса ўз навбатида Бурхон Шариф билан Садиржонларнинг Абдулла Ҳаким қисмати ва ижодини ёдга олишлари тасвири билан бошланади. У чинакам ижодкор, ҳақиқий истеъдод соҳиби эканлиги тан олинади. Энди Бурхон Шариф асардаги биринчи ҳикояда берган ваъдасининг устидан чиқиши учун фурсат кепганлигини китобхон сезади. Лекин асар охирида оғир бетоб бўлиб қолган Бурхон Шариф ўзининг айбларини бўйнига олади. Инсоннинг ҳамиша бир елкасида Раҳмон юрса, иккинчи кифтида Шайтон юради деб нақл қиладилар. Бурхон Шариф ҳам Худонинг бир бандаси, бошқа одамларга ўхшаб у ҳам хато қилиши, гуноҳ қилиши турган гап. Унинг қалби ҳам худбинликлардан холи эмас. Шу боис Абдулла Ҳакимнинг севгилиси билан бирга яшаган Бурхон Шариф мархумдан ўз хотинини қизғаниб, ўзи учун жонини ҳам аямаган кишининг қабри устидан берган вадасини бажармайди. Яъни номини абадийлаштиромайди. Натижада узоқ йиллар унтутиланган кишини ўз ўлимни олдидан эслаб, қилган ишларининг нотўрилигини ўйлаб, виждан азобларида қийналиб, ўз хатоларини гарчи кечроқ бўлсада, англаб етиб, ўзининг афсусланадётганлигини Садиржонга билдиради. Ана шу билан ўзини бир оз бўлса-да, виждан олдида поклаб ҳам олади.

Асарда келтирилган Абдулла Ҳаким дафтарида кўчирмадек киритилган Афанди латифалари, Насриддин Афанди ҳақидаги шеърлар, ривоятлар романга ёпишмаган. Китобхоннинг тишига тегиб, уни зерикиради. Қолаверса, Абдулла Ҳаким ҳаётда чиндан яшаб ўтган тарихий шахс ҳам эмас. Мабодо у тарихий шахс бўлганида ҳам ўзининг асарда тасвирланган бадиий образининг талқинига кўра ўкувчига эстетик таъсир кўрсатиши керак. Келтирилган Афанди латифалари ҳам халқ оғзаки ижодиётининг дурданалари сирасига киради. Адаб халқ орасида кенг тарқалган бундай латифаларни айнан олмасдан, балки тасвирланаётган воқеликни талқинини янада кенгайтириш ёки персонажлар образининг тўлақонли мазмун касб этишида ўрни билан истифода этганида яхши бўлар эди. Романнинг учинчи ҳикоят қисми анча сохта ва бўш чиқсанлигининг сабабларидан бири ҳам ана шунда деб ўлаймиз. Қолаверса, бундай тасвир услуги ҳамда халқ оғзаки ижодиётига бўлган бундай муносабат ёзувчини ўз бадиий ниятидан маълум маънода ҷалғитганга ўхшайди.

Омон Мухтор асарларидағи ўзига хос тасвирий, фалсафий янгиланишлар адабнинг ўзига хос бадиий услугубини ойдинлаштиради.



Абдулла АҲМАД

ИСТИНИ ҶОИКА КҮЙМОҚЧИ

Ҳажвия

Жонига тўзим берсин-ғей Овчибекнинг. Не бир азобларга дош бериб, бирорлар шивир-шивирига қулоқ тутади. Кимдир пана-пастқамда туриб, бошлиқни ёмонлайди. “Ўлгудай очофат, жамоадаги бор нарсани юлиб-юлқиб битирди. Яқин орада қийшайиб-қинграйиб турган идора чордевориниям ямлаб ютса ажаб эмас” дейди.

Биласиз, қоровулхона гапхонанинг уяси. Овчибек шунақа долзарб янгилик топдими, дарҳол ўша ерга чопади.

“Эшитдиларингми? – дейди кўзларини шокосадай катта очиб, – Фойиб Соипович бугун тунда идорадаги бор ашқол-дашқолни уйига ортиб кетибди. Энди хизмат машинасини ўзиники қилиш пайида эмиш!”

“Эвоҳ! – дейишади унинг сўзларини эшитганлар. – Фойиб Соипович қўй оғзидан чўп олмаган юввош, олдидан бир қоп тилла чиқсаям четлаб ўтади дейишарди-ку!” Сўнг бир-бирларига ажабланиб қараб қўйишиди: “Ё товба, одам оласи ичиди, деб бежиз айтилмаган-да. Биз лақмалар, бошлиғимиз сутдай оп-пок, художўй, ўта инсофли, кишининг ҳақидан ҳазар қилади, деб ўтирибмиз-а!”

Бу гаплар ҳам ортда қолди. Овчибек одати бўйича кузатишларни давом эттириди. Нима, одамларнинг пичир-пичирига уззукун қулоқ тутиш, куну тун жон ҳовучлаб яшаш, шўрликка зарил дейсизми? О, зарилда! Бу кимса гийбатиз яшолмаса не қилсин?! Ҳа-ҳа, бу ҳам бир қисмат, тузалмас касаллик. Ул кимса, дўстими, душманими, ҳаммасининг камоли-ю, заволини зимдан кузатмаса, кўзига уйқу келмайди.

Тунов кунги гап-гаштақда элга таниқли ва обрўли кимсалар Фойиб Соиповични бир мақташди, бир мақташди, бу мақтовларни эшитган Очилбек ҳайратдан бармоғини тишлади. “Товба, – деди ўз-ўзига. – Бечора Фойиб Соипович шундай улуғ, сахий, қўли тоза, эй борингки, сигирнинг сутини ичмайдиган – покиза одам эканлар-у, ановилар... ҳа ўшалар... у муҳтарам

зотнинг тупроғини тўзитиб юришибди-я, муттаҳам гийбатчилар!”

Овчибек уйига келса, уни хотини оғзи қулоғида қарши олди.

– Ҳой дадажониси, намунча кеч қолдингиз?

– Иш-да, хотин, иш...

– Ҳей, шу ишингиз ҳам бор бўлсин-ей.

Аёли ошхонадан бир чойнак чой кўтариб келдида, кўлига шапалоқдай таклиф қоғозини тутди.

– Бугун чарчаган бўлсангиз, эртага бир яираб дам оласиз, дадажониси. Таътилда бўлганингиз учун сизни атай уйимизга келиб айтиб кетишиди. Таклифномани кимсан Фойиб Соипович ўз кўллари билан ёзиптилар. Қоғозни олиб кепган кенжатойлари айтди.

– Эй менга қара, таклифномани ростданам кенжатойлари бериб кетдими?.. Ҳа-ҳа, сен ҳақсан! Таклифномада Фойиб Соиповичнинг ўз муборак дастхатлари. Ур-рей!..

– Бу ҳали ҳеч гап эмас, кенжалари ҳозирча ҳеч ким билмасин деб, бир хушхабар айтди.

– Ҳўш, нима хушхабар? Тезроқ айт!

– Гап бундай. Тўйни ўтказволиб, Фойиб Соипович вилоятга кетарканлар.

– Вилоятга, нима учун?

– Вой дадажониси-еъ, шуни ҳам сўрайсиз-а. Каттакон бошлиқ бўлиб-да!

– Яшавор, хотин! Мени беҳад хурсанд қилдинг. Айрим гапларни демаганда, у киши бизга яқин одам.

– Энди сиз ҳам вилоятга кетсангиз кераг-а?

– Шундай бўлса керак, о, маладес!

Овчибек хотини кўйган чойга ҳам қарамай, шошапиша кўчага отилди. У янгиликларни тезроқ “эгалари”га етказиши зарур. Одамлар Овчибек бошқаларга ўхшаб лаллайган, дунё бехабар эмаслигини, ҳар нарсадан воқифлигини кўриб қўйишишин. У даставал қоровулхонага югарди. Ундан ошхонага, гузарга, борингки, барча жойга хабар етказди. Таклифномадаги ёзув шахсан



Фойиб Соиповичнинг дастхат эканлигини қайта-қайта айтишдан чарчамади.

Эртасига тонг саҳардан тўй тарафдудига тушди: “Эҳ овсар, галварс!, – деди ўз-ўзига. – Пичир-пичирларга қўшилиб, шундок табаррук одам ҳақида ёлғонлар тўқибман-а! Хайрият, ўзи билмайди. Агар билса!... Энди шундай йўл тутайки, у кишининг энг яқин, энг... садоқатли одамлари бўлиб кўринай. Шунда сенинг ҳам ошиғинг олчи, Овчибек! Э, гардкам!”

Овчибек Фойиб Соиповичнинг тўйига нима тўёна қилсан экан деб роса бош қотирди: “Юз минг берсаммикин? Икки юз мингми? Эй-й-й, эрта-индин баҳт юлдузи порлаб, катта амал пиллапоясида турган зот учун буям камлик қиласди. Нима бўлса бўлди, кейин... мойлироқ жойга ўрнашса, ўн чандон чиқариб юборади”.

Шуларни хаёлдан кечирган Овчибек тўйига уч йилдан бери бокувда турган новвосини етаклаб борди. Тўй жуда ҳам дабдаба билан ўтди. Овчибек тиним билмай елиб-югурниб, борингки, туз totмай хизмат қиласди. Тинка-мадори қуриб чарчади. Лекин у жуда мамнун эди. Негаки, бошлиқнинг кўнглини олиб, қайта ишончини қозондим, деб ўйлаганди.

Эҳ, аттанг! Дунёнинг бортоғашлари Овчибекнинг бошига ағдарилгандай бўлди. Тўйнинг эртасигаёқ... Фойиб Соипович ишдан олинди.

Овчибек кўрпа-ёстиқ қилиб ётиб олди. Ахир шундай бўрдоқи новвос сабил кетади-ю, юрак хуружи тутмайдими? Бир ойдан сўнг ишга чиқди. Янги бошлиқ бўштобгина, камсукум киши экан. Қўл бериб кўришди, хайрлаша туриб: “Узр, ҳол сўрагали ўтолмадик. Неки ёрдам бўлса биздан. Файрат қилиб ишлайверинг”, деди.

Овчибек эски одатиша иш тутди. Атрофдаги гап-сўзларга қулоқ тутишни канда қилмади. Пичир-пичир гапларнинг бирини бекор деса, кўпини рост деб билди. Мукофот олган кунлари уч-тўрт улфат хилватда роса отамлашиди. Гап ниҳоят янги бошлиқ устида кетди.

– Эҳ, эшилдиларингми, – деди кўп йиллардан бери шу даргоҳда ишласа-да, нўноқлигидан мартабаси ошмаган шерикларидан бири, – тепада бошлиғимизнинг роса пўстагини қоқишибди. Ишни эплолмадинг, ўринни бўшат дейишибди.

– Бор-ей, топган гапингни қара-ю!
– Келганига энди бир йил бўлди-ку!

– Тепада бунга қарашмайди-да. Эпламадингми, тамом, олиб ташлашади.

Янги бошлиқ Овчибекнинг назарида уни хушламайдигандай кўринарди. Шунинг учун ичида суюниб, гапга қўшилди.

– Э, тезроқ кетса кетсин. Ҳамма ўзи ундан безиб кетди.

Шу суҳбатдан сўнг орадан бир ойлар чамаси ўтганди. Тушлиқда ҳамхоналар дардлашиб қолишиди.

– Хабарингиз борми, мулла Овчибек, – деди шерикларидан бири унга сирли жилмайиб: – Каттароқ тўёнани ҳозирлайверинг!

– Нима, қанақа тўй, қанақа тўёна?

– Бошлиғимиз Асрор Сардорович оталарининг саксон йиллигини нишонлар эканлар.

– Менга деса, – деди Овчибек аччиғининг зўридан овози бўғилиб, – оталари мингга кирмайдими, мен тўёна бермайман. Менинг берар тўёнам йўқ!

Ҳадемай тўй куни ҳам етиб келди. Жамоа ходимлари ўртада пул йиғиб совға олишиди. Бошлиққа яқинроқ кишилар алоҳида тўёна ҳам беришиди. Ёлғиз Овчибек уларнинг ҳеч бирига қўшилмади. “Кўр ҳассасини бир марта олдиради, – деган сўзлар ўтди унинг дил тубидан. – Иккинчи марта олдирсам, алдансан, унда... унда отимни бошқа қўяман!”

Алданмасликка аҳд қилган Овчибек тўйига ҳам бормади. Якшанба эмасми, “оқи”дан олиб, кун бўйи уйида ётди. Ўзича “боплаганим қандай!” деб керилиб ҳам кўйди.

Орадан бир ойча вақт ўтди. Эрталаб телефон жиринглади.

“Овчибек Соқибековиҷ, – деди қандайдир масрур ва ошиқона овозда котиба қиз. – Тез идорага келин!”

– Ҳа... ҳаҳ... нима гап, тинчликми?

– Ҳаммаси жойида. Асрор Самадович жамоа аъзолари билан хайрлашмоқчилар.

– Нега энди... Сабаб?

– Вазирликка ишга ўтибдилар, шунга.

– Нима дедингиз, вазирликка? А, вазирликка!!!

Шу сўзларни айтаркан, ҳолисизланиб деворга суюниб қолди.

